



ONALE

12

17

A


30

VITT. EMANUELE

Ex Bibliotheca
majori Coll. Rom.
Societ. Jesu

41 14-8. A. 16
48 48
d
22.





FRANCONIS BURGERSDICI
INSTITVTIONVM
 METAPHYSICARUM.

LIBRI DUO.

Bibl:

scr:

Opus Posthumum

Omni curâ ac diligentia ex ipsius Au-
 thoris manu-scripto collectum.

Coll: Rom: Soc Tiesu



LVGDVNI BATAVORVM,
 Apud HIERONYMUM de VOGEL.

c10-100 XL.



Typographus studiosis

S. P. D.

Afflictam Philosophiam funesta
morte solidissimi Philosophi D.
Franconis Burgersdicij p. m. ce-
leberrima Lugd. Academia, to-
tusque Philosophorum chorus meritò lu-
gent: ut tamen justissimo huic dolori sub-
veniretur, & damnum hoc aliquatenus re-
sarciretur, voluerunt Reverendi ac Doctis-
simi quidam Viri, ut hujus Philosophi o-
pera, huc usque cum multorum dispendio
in tenebris latitantia, lucem aspicerent;
quapropter me adhortarunt, ut præsertim
hanc Metaphysicam, quam ipse in Collegio
dictaverat, in lucem ederem: consulebant
quippe hoc pacto tum famæ & existima-
tioni ipsius Authoris, (multorum enim in
manibus versabantur multoties vitiosè de-
scripta exemplaria) tum publicæ utilitati.
Opus hoc Philosophiæ studiosis absolute
necessariū est, & quidquid contra garriant
bonarum artium contemptores, Theologis
non

non parum lucis hinc affuget, nam præter-
quā quod varios terminos, qui in Theologia
passim occurrunt accuratè explicet, etiam
quæ de Deo, Angelis, & Animâ ratio-
nali, naturali intellectus lumine concipi
possint, perspicuâ brevitate tradit,
unde non immerito Theologia naturalis
nuncupatur: ne vero in pervestigandis divi-
nis intellectus noster erret, Autor noster
ubique sollicitè admodum observavit, ut
philosophiæ veritas, veritati divinæ semper
respondeat, & illa huic ancilletur: itaque
in hoc opere nihil nisi fortasse ultima li-
ma desiderari potest. Vos igitur quibus
abundè satis solida D. Burgersdicij eru-
ditio innotescit, eo affectu eum in hoc di-
gnissimo ingenii sui fœtu reviviscentem
excipite, quo hunc docentem audivistis; &
qui semper cum applausu doctissima no-
stri Authoris, quæ publici juris sunt,
scripta exceperitis, operis hujus posthumi
etiam tutores estote.

INSTITUTIONUM METAPHYSICARUM

LIBRI I. CAP. I.

DE

NATVRA METAPHYSICÆ.

THESIS I.



THEORETICÆ Philosophiæ mensura est objectum *θεωρητὸν*, quo nomine intelligi debet id omne quod propter se cognoscitur, & non propter *ποίησιν* aliquam aut *πρᾶξιν* ex eo secururam, aut saltem non propter eam solam. Itaque cum non omnes etiam res, quarum notitia etiam citra *πρᾶξιν* aut *ποίησιν*, atque omnino extra usum vitæ expetitur, ad Physicam aut Mathematicam revocari queant, sequitur aliam scientiam esse concedendam, quæ inter partes Theoreticæ Philosophiæ suo quoque jure numeratur, quam Metaphysicam vocamus.

II. In hoc genere Primo ponendæ sunt immateriales & incorporeæ substantiæ, ut sunt Deus, intelligentiæ finitæ, sive Angeli ac Dæmones, item animæ humanæ, qua-

A

tenus

tenus absque corpore seorsim existunt. Secundo huc pertinet natura accidentis in genere, ejusque species, quæ nequeunt ad prædictas scientias revocari. Tertio denique huc referenda sunt omnia attributa
 1. quæ corporeis & incorporeis substantiis,
 2. quæ Deo & substantiis finitis, 3. quæ substantiis & accidentibus, 4. quæ omnibus omnino rebus communia sunt. Hæc enim cognosci queunt naturæ lumine absque divina revelatione, ac proinde hætenus ad Philosophiam pertinent: nec possunt ablegari ad Physicam, quæ corporum est solummodò, nec ad Mathematicam, quæ quantitatem non excedit. Restat ergo ut peculiaris sit scientia, quæ eorum notitiam profiteatur.

III. Qui substantiarum incorporearum contemplationem Theologiæ totum tribuunt, imperitè admodum de intellectus nostri habitibus atque natura judicare videntur. Nam habitus isti non tam objectis distinguuntur, quàm causâ sive ratione, quâ objectum cognoscunt, & conclusionibus de objecto formatis assentiuntur. Aliud enim est *πίστις* seu fides, aliud sensus, aliud scientia, etiamsi versentur circa idem objectum. Fides autoritate testimonii est subnixâ; scientia (ut de sensu nihil dicam) demonstratione gignitur. Itaque cum Theologia de Deo cæterisque substantiis incorporeis disserat ex verbo Dei, Philosophia
 ex na-

ex naturali lumine; sequitur diversas eas esse disciplinas, nec multo minus discriminis inter eas intercedere, quam inter fidem & sensum, aut inter scientiam & sensum.

IV. Crassius mihi errare videntur, qui illa, quæ thesi 2. dixi, ad Physicam aut Mathematicam referri non posse, ad Logicam referunt. Ubi in Logica Entis natura in genere, ejusque communissima attributa traduntur? Ubi agitur de iis, quæ omnibus substantiis sunt communia? Ubi accidentis natura & species ex professo & pro dignitate explicantur? nam in prædicamentis rerum ordines & classes recensentur potius quam tractantur: atque in iis non tam spectatur modus ὅτι εἶναι, ut fit in Metaphysica: sed modus tantum ὅτι κατηγορητικῶς, eaque fit, ut quæ reipsa diversa non sunt, sed tantum τῷ χημεῖν τῷ κατηγορητικῶς, ibi ut diversa genera proponantur.

V. Fateor quidem multa in Logicis tradi, quæ à Metaphysica sunt deprompta; ut causa, effectum, subjectum, adjunctum, & similes affectiones, quæ rerum diversarum χεῖρε explicant, sed nego Metaphysicam ideo esse rejiciendam. Quid? an Physica minus est scientia; quia magnam ejus partem Medicina sibi vendicavit? atqui eodem modo Logica se habet ad Metaphysicam, ut se Medicina ad Physicam. Ut ergo Physica probat, quæ Medicina sine probatione

sumit, & præsupponit quæ necessaria sunt ad regulas & leges medendi constituendas & probandas : ita quoque Logica, quæ mentis quasi nostræ Medicina est, multa sumit ex Metaphysica, & sine probatione præsupponit, quæ necessaria sunt ad regulas legesque Logicas constituendas, quibus artis illius usus & *πρόξις* continetur.

VI. Cum ergò constet esse Metaphysicam, ejus porro naturam investigemus, exorss ab objecto, quo constituto gemitum ejus genus quæremus, ex quibus definitio constituitur. In Objecto live Subiecto spectandum est ejus *Materiale & Formale*, siue id quod consideratur, & modus considerandi. *Materiale* est *Ens reale*; Entia enim rationis, privationes, & si quæ sint alia, (quæ, quamvis Entis realis ambitu non contineantur, non sunt tamen omnino nihil,) aut ad Metaphysicam non pertinent, aut saltem non ut objectum; sed hac de re cap. 2. in quo Entis realis ambitum circumscribemus.

VII. Versatur verò Metaphysica circa Ens tale, vel quæ *Ens*, vel quæ *Immaterialle*. Qui priorem sententiam amplectuntur, haud dubiè Aristotelem habent authorem: sed rationi hic plus concedendum videtur, ut & in tota Philosophia. Ratio pro secunda sententia militat haud dubiè: modus enim considerandi subiectum in omni scientia tam latè patere debet, ut omnes sub-
jecti

jecti partes directè possint ad eum revocari. Atqui multa sunt quæ eorum omnium confessione (qui quidem Metaphysicam penitus non rejiciunt) ad eam revocanda sunt; quæ tum ab iis præteriri debent, qui nihil aliud hic considerandum esse volunt, quàm Ens quàm Ens. Nam ad Metaphysicam revocari debet quicquid contemplationi objicitur, & neque ad Physicam neque ad Mathematicam pertinet. Atqui neutra de Deo differit, ut de subjecto suo, neutra de Angelis, neutra de substantiis aut accidente in genere. Hæc ergo Metaphysica expendere debet, ac proinde non modò versatur circa Ens ut Ens est: qui enim Deum considerat, qui Angelos, qui substantiam & accidens, non jam considerat Ens quàm Ens, sed quàm Ens est tale.

VIII. Versatur ergo Metaphysica circa *Ens reale, quatenus immateriale est*, id est, quatenus vel quousque sine materiâ consistit, aut saltem potest. Duobus enim modis dicitur Ens immateriale. 1. quod verè sine materia existit, ut, Deus & angeli, 2. quod quamvis non existat extra materiam, tale tamen est, ut esse immateriale non repugnet ejus essentiæ; ut, Ens, substantia, accidens in genere: etiamsi enim nulla corpora essent in rerum natura, non minus tamen verè de Ente, substantia & accidente in genere dici potest, quæ nunc iis à Metaphysica tribuuntur.

IX. Ex quo apparet quibus limitibus hæc disciplina à Physica & Mathematica distinguatur: Physica enim considerat ea, quæ cum materia complicata, eique involuta sunt: Mathematica versatur circa quantitatem, quæ & ipsa in materia est, extraque eam nec subsistit nec subsistere potest, licet eam in abstracto consideret, hoc est ita, ut materiam non spectet. At Metaphysica contemplatur ea, quæ extra materiam sunt, aut saltem absque illa consistere possunt; vel, ut significantius dicam, quæ materiam excludunt, aut saltem non includunt.

X. Hinc sequitur, Metaphysicam non modo partem esse Theoreticæ Philosophiæ, à cæteris diversam, sed etiam disciplinam à reliquis specie distinctam: & omnino hallucinatur Antonius Mirandulanus, cum docet, Unam tantummodo esse disciplinam, quæ differit de Ente, de speciebus Entis, & specierum speciebus. Fateor equidem, non modo Metaphysicam Ens in genere contemplari, sed ad species Entis progredi, & ad species etiam specierum, sed non ulterius, nec ad alias species quam quæ immateriales sunt.

XI. An Metaphysica sit una disciplina, cujus prima pars differat de Ente in genere, altera de Deo, tertia de Angelis, non secus ac Physica, quæ quamvis una sit scientia, agit tamen de corpore naturali in genere, de elementis,

lementis, de rebus mixtis; &c. An potius distinctæ sint disciplinæ vocandæ; ut Arithmetica, Geometria, aliæque Mathematicæ disciplinæ distinguuntur, in dubio positum est: & licet pro utraque parte rationes sint non contemnendæ, nos tamen eam partem sequimur, quæ partes quidem in Metaphysica admittit ut in Physica; scientiarum multitudinem non item. Scientiæ enim non sunt multiplicandæ secundum genera & species (aliâs namque Physica constaret tot scientiis quot partibus, alia esset scientia quæ de Corpore loqueretur, alia quæ de Cœlo, alia quæ de Elementis) sed secundum modum considerandi: atqui modus considerandi in Metaphysica unus & idem est, quicquid enim illa considerat, debet à materia sejunctum esse.

XII. Hactenus de Objecto. Genus Metaphysicæ est Scientia, idque stricta ratione, qua scientia ab arte & prudentiâ distinguitur. Ars enim non est, quia non est posita in ποιήσας, nec versatur περί γένεσιν καὶ τὸ τεχνάζειν, ἀλλὰ καὶ θεωρεῖν, ὅπως αὖ γίγνται τῶν ἐνδεχομένων, καὶ εἶναι, καὶ μὴ εἶναι. Non etiam Prudentia, quia non deliberat περί ἀγαθῶ καὶ κακῶ, nec docet quid eligendum vel fugiendum sit. Adhæc Metaphysica habet ea omnia, quæ scientia strictè dicta requirit: habet enim subiectum θεωρητικόν, habet affectiones proprias, habet principia tum complexa, tum incomplexa, quibus

bus affectiones istæ probantur subjecto inesse: ergo est scientia strictè dicta.

XIII. Ex iis quæ disputata sunt, talis potest formari Metaphysicæ dēfinitio. Metaphysica est *scientia Entis realis, quatenus immateriale est*, seu, quæ contemplatur Ens reale, quatenus & quousque absque materia consistere potest.

XIV. Metaphysica est scientia accuratissima & præstantissima. Præstantissima dicitur tum ratione objecti, tum ratione principiorum. Ratione Objecti ex una parte versatur circa communissimum, ex altera circa præstantissimum. Ratione principiorum, quia principia non accipit ab ulla alia scientia; versatur enim circa principia incomplexa, prorsus independentia, & complexa omnino ἀποδείκται. Accuratissima dicitur scientia; quia est certissima in se, & summâ necessitate suffulta; est enim rerum Metaphysicarū multo maior necessitas quàm Physicarū: & licet in rebus Mathematicis absoluta necessitas sit, cedit tamen Metaphysicæ necessitati in eo, quod materiam aliquam illæ præsupponant, res Metaphysicæ nullam.

XV. Hinc sequitur Metaphysicam veram esse sapientiam: Sapientia enim est, rerum præstantissimarum notitia, conjuncta cum intelligentia: intelligentia est, notitia principiorum. Ergo cum Metaphysica versetur circa Objectū communissimū simul & præstan-

& præstantissimū, habeatque principia quæ ex aliis non dependent, titulus Sapientiæ merito Metaphysicæ tribuendus est.

XVI. Sequitur etiam Metaphysicam omnibus scientiis præesse ac dominari, easque dirigere in contemplationem veritatis. Nam & objectum omnibus & principia tribuit: ubi enim Metaphysica desinit, aliæ scientiæ incipiunt. Itaque quæ à Metaphysico ultimo sunt demonstrata; ea cæteris scientiis principia sunt, & ab iis sine demonstratione præsupponuntur. Itaque licet unaquæque scientia perfecta sit in suo genere absque ope Metaphysicæ, multum tamen perfectionis accedit iis, cum Metaphysica cum iis sociatur.

XVII. Hinc porro sequitur, Metaphysicam ordine naturæ priorem esse cæteris disciplinis, cumque Metaphysica in Scholis postremo loco traditur, servari non ordinem naturæ, sed cognitionis nostræ.

XVIII. Ob hæc Metaphysicæ prærogativas, non debet existimari omnes alias scientias ei subalternari. Nam in scientiis subalternatis subiecta non sunt specie diversa: sed quod scientia superior considerat absolutè, id subalternata considerat vestitum accidente sensibili: deinde subalternata scientia utitur principiis quibus & superior utitur: at subiecta scientiarum aliarum diversa sunt à subiecto Metaphysicæ, & non utuntur iis principiis quibus utitur

to INSTITVT. METAPH.
tur Metaphysica, sed quæ sunt à Metaphy-
fica demonstrata, ea sine demonstratione
præsupponunt, & pro principiis habent, ut
ante dictum est.

C A P. II.

De communi Entis ratione.

T H E S I S I.

Cùm Entis immaterialis appellatione,
quod Metaphysicæ Objectum esse
diximus, non illæ modo Entis spe-
cies intelligantur quæ à materiæ contagio-
ne immunes sunt, sed & Ens in genere con-
sideratum, & ab omnibus speciebus suis
præcisum; non malè dividi potest Meta-
physica in partem Communem & Pro-
priam: ita ut Communis pars differat de
Ente in genere; Propria descendat ad eas
species, quæ prorsus sunt immateriales.

II. Cæterum cum omnis scientia Apò-
dictica, præter subjectum proprias affe-
ctiones habere debeat, & causas & princi-
pia, quibus affectiones subjecto convenire
demonstrantur, de singulis aliquid in hac
communi parte est dicendum, & quidem
prius de Subjecto. Superiore namque dis-
putatione nihil aliud est ostensum, quàm
Ens reale hujus disciplinæ esse objectum.
Nunc

Nunc porro videndum est, quid eâ voce intelligatur, (nam definitionem frustra quis expectet) quam latè pateat, quæ sit eorum omnium inter se convenientia, quænam realis Entis ambitu claudantur, & id genus alia.

III. Ens, ut à voce exordiar, primitus usurpatum est, invitâ latinitate, tanquam Participium ab esse deductum, ut ὄν ab εἶναι, nihilque aliud significat, quàm id quod existit; at postea, omisâ significatione Participii, usurpari cœpit pro Nomine, ad imitationem Græcorum, quibus τὸ ὄν absolute positum, nomen substantivum est. Hæ duæ Entis significationes multum differunt: cum enim sumuntur significatione Participii, ea tantum Entia dici queunt, quæ ipso actu sunt & reverà existunt, sive in se, sive in alio. At cum usurpantur ut Nomina, latius patent, atque iis etiam tribuuntur, quæ non actu aut in se, sed potestate, aut in causis suis existunt, quæque ita se habent ut rosa in tempore hyberno, imò etiam ut mundus nondum creatus: si enim ista non sint Entia, intelligi non possunt, ne quidem à Deo; ac proinde mundus à Deo cognitus non fuit, antequam effectus fuit: quod enim Ens non est, id non-Ens est; at non-Entia intelligi nequeunt.

IV. Deinde cum Ens sumitur ut Participium, pertinet ad quæstionem *ἆ ἐστὶν*: at cum sumitur ut Nomen, referendum ad

quæstionem ἢ τίς. Cum enim quippiam Ens esse dicitur, si Ens vim habeat Participii, nihil aliud dicitur quàm illud existere, quo solvitur quæstio *an sit*. Si verò vim habeat Nominis, id, quod quæritur, dicitur non esse nihil, aut non esse non-Ens, quod ad quæstionem *quid sit* referendum est. Quare cum definitio tribui etiam possit iis, quæ non sunt, id est quæ non existunt, sequitur τὸ ὄν & Ens, positum pro Nomine, latius patere, quàm cum sumitur pro Participio, quod significat id solum quod actu existit.

V. Præterea cum τὸ ὄν & Ens nomen sunt, interdum ita latè sumuntur, ut omnia, quæ non sunt omnino nihil, dicantur Entia, etiam privationes, denominationes, & id genus alia de quibus cap. sequenti. Atque hoc sensu Ens & aliquid, synonyma sunt, & Ens & nihil immediatè, & secundum contradictionem opponuntur, non secus ac Ens & non-Ens. Interdum hæ voces usurpantur strictius, pro eo quod non privatio, & nuda denominatio est, sed vera res, & vulgò dicitur Ens reale, quasi dicas tale Ens, quod non in mentis fictione situm est, sed in veritate rei consistit. Atque hoc significatu Ens non tam latè patet quàm aliquid, & τὸ Nihil non opponitur immediatè (multa enim esse postea probabimus, quæ non sunt omnino nihil, neque tamen sunt Entia realia) nec Ens & Nihil
libi

sibi directè contradicunt, sed alterum alterius contradictionem involvit obliquè: idque eo ferè modo quo opponuntur substantia aut quidvis aliud, & nihil: nihil enim & aliquid immediatè opponuntur. Hinc fit ut & Ens, quod aliquid est, opponatur $\pi\phi$ Nihil, sed non immediatè: ut enim substantia non est nihil, & tamen multa sunt, quæ neque nihil sunt, neque substantia; ita quoque licet Ens non sit nihil, quædam tamen dicuntur, quæ nec Ens sunt, nec omnino nihil, sed aliquid inter Ens & Nihil interjectum, ut accidentia inter substantiam & nihil sunt interjecta.

VI. His præmissis, observandum est, cum $\pi\phi$ $\delta\psi$ & Ens, Metaphysicæ subjectum esse dicitur, voces eas non Participii, sed Nominis significatione accipiendas esse: Magna enim pars attributorum, sive affectionum, quas Metaphysicus Enti convenire docet, etiam iis competunt, quæ aut actu ipso non existunt, aut ab actuali existentia abstrahuntur, ut Unum, Verum, Bonum &c. Nam hæ propositiones, Rosa est Ens, est unum quid, verum, bonum &c. non minus veræ sunt cum nulla rosa in rerum naturâ est, quàm tunc cum magna adest rosarum copia.

VII. Nec tamè ita latè significatio $\tau\epsilon\iota\sigma$ & Entis extendenda est, cum Metaphysicæ Entis ratione circumscribitur, ut id omne Ens dicatur, quod est aliquid & nō omnino nihil.

nihil. Hac enim sententiâ admissâ, nihil relictum est omnino, quod affectionum vicem gerat in hac scientia: nam quamvis non sit necesse affectiones reipsa distingui à suo subjecto: aliquid tamen debet vocabulis affectionum significari, quod subjecti nomine non significatur. Alias enim cum affectio de subjecto dicitur, erit prædicatio identica; tantundem enim erit, siue dicas, **Ens est Ens**, siue **Ens est Unum**, si **Unum** non significet aliquid quod **Ens** non significat. Atqui si omne id **Ens** est, quod non est nihil, quicquid unum significat præter **Ens**, id erit **Nihil**, atque ita **Ens & Nihil** erunt voces ejusdem prorsus significationis. **Ens** ergo, cum *Metaphysicæ* subjiçitur, strictius sumi debet pro eo, quod non modo in mentis fictione, sed in veritate, aliquo saltem modo consistat, quod ante diximus **Ens** reale dici.

VIII. **Ens** eo quo dictum est modo, non est unum quid, sed multa suo ambitu comprehendit; eaque diversissima; nec enim quicquam absurdius dici potest, quam omnia quæ sunt, non nisi unum quiddam esse, quod *Parmenidi & Melisso* Philosophus affingit: nam primo apparet quædam esse **Entia** finita, & ab aliis facta, & ea rursus ab aliis, eaque progressio nos ducit ad **Ens** infinitum, & à nullo factum. Præterea deprehendimus **Entia** quædam per se subsistere, alia non per se, sed in iis subsistere, quæ

quæ per se subsistunt; quorum illas *οὐσίαι* sive substantias vocamus, cætera *συμβεβη-
κότα*, id est, accidentia substantiarum, at-
que hæc quidem jam præsupponimus, quæ
suo loco demonstrabuntur.

IX. Omnia hæc, quantumcunque in-
ter se diversa sunt, uno aliquo conceptu &
notione comprehendi possunt, quæ non
repræsentet substantiam neque accidens,
nec Deum aut Creaturam in specie, sed ali-
quid in quo hæc omnia coincidunt. Atque
hæc ipsi in nobis experimur: quandoqui-
dem audita voce *ὄν* seu Entis, depre-
hendimus mentem nostram à multitudine
retrahi ad unitatem, formarique conce-
ptum aliquem communem in omnibus re-
bus, quo repræsentatur Ens, non ut tale
aut tale in specie, sed prout Ens est simpli-
citer. Hoc est quod vulgo dicitur, dari
unum conceptum formalem Entis, ut Ens
est.

X. Ex hac positione sequitur, omnia
Entia inter se aliquo modo convenire; uni
enim conceptui unum objectum respon-
dere debet: ergo, si detur unus omnium
Entium conceptus, ubique omnia Entia
inter se convenire, & in aliquâ communi
ratione uniri debent. Aut enim communis
illius omnium entium conceptus objectum
erit communio quædam omnium Entium,
aut aliquid ex propriis particularibus En-
tium rationibus collectum & aggregatum.

Hoc

IX. Ex quo apparet quibus limitibus hæc disciplina à Physica & Mathematica distinguatur: Physica enim considerat ea, quæ cum materia complicata, eique involuta sunt: Mathematica versatur circa quantitatem, quæ & ipsa in materia est, extraque eam nec subsistit nec subsistere potest, licet eam in abstracto consideret, hoc est ita, ut materiam non spectet. At Metaphysica contemplantur ea, quæ extra materiam sunt, aut saltem absque illa consistere possunt; vel, ut significantius dicam, quæ materiam excludunt, aut saltem non includunt.

X. Hinc sequitur, Metaphysicam non modo partem esse Theoreticæ Philosophiæ, à cæteris diversam, sed etiam disciplinam à reliquis specie distinctam: & omnino hallucinatur Antonius Mirandulanus, cum docet, Unam tantummodo esse disciplinam, quæ differat de Ente, de speciebus Entis, & specierum speciebus. Fateor equidem, non modo Metaphysicam Ens in genere contemplari, sed ad species Entis progredi, & ad species etiam specierum, sed non ulterius, nec ad alias species, quam quæ immateriales sunt.

XI. An Metaphysica sit una disciplina, cujus prima pars differat de Ente in genere, altera de Deo, tertia de Angelis, non secus ac Physica, quæ quamvis una sit scientia, agit tamen de corpore naturali in genere, de elementis,

lementis, de rebus mixtis; &c. An potius distinctæ sint disciplinæ vocandæ; ut Arithmetica, Geometria, aliæque Mathematicæ disciplinæ distinguuntur, in dubio positum est: & licet pro utraque parte rationes sint non contemnendæ, nos tamen eam partem sequimur, quæ partes quidem in Metaphysica admittit ut in Physica; scientiarum multitudinem non item. Scientiæ enim non sunt multiplicandæ secundum genera & species (aliàs namque Physica constaret tot scientiis quot partibus, alia esset scientia quæ de Corpore loqueretur, alia quæ de Cœlo, alia quæ de Elementis) sed secundum modum considerandi: atqui modus considerandi in Metaphysica unus & idem est, quicquid enim illa considerat, debet à materia sejunctum esse.

XII. Hactenus de Objecto. Genus Metaphysicæ est Scientia, idque stricta ratione, qua scientia ab arte & prudentiâ distinguitur. Ars enim non est, quia non est posita in ποιήσθαι, nec versatur περί γένεσιν καὶ τὸ τεχνάζειν, ἀλλὰ καὶ διαφέρειν, ὅπως αὖ γένηται τῶν ἐνδεχομένων, καὶ εἶναι, καὶ μὴ εἶναι. Non etiam Prudentia, quia non deliberat περί ἀγαθῶν καὶ κακῶν, nec docet quid eligendum vel fugiendum sit. Adhæc Metaphysica habet ea omnia, quæ scientia strictè dicta requirit: habet enim subjectum θεωρητικόν, habet affectiones proprias, habet principia tum complexa, tum incomplexa, quibus

bus affectiones istæ probantur subiecto inesse: ergo est scientia strictè dicta.

XIII. Ex iis quæ disputata sunt, talis potest formari Metaphysicæ dēfinitio. Metaphysica est *scientia Entis realis, quatenus immateriale est*, seu, quæ contemplatur Ens reale, quatenus & quousque absque materia consistere potest.

XIV. Metaphysica est scientia accuratissima & præstantissima. Præstantissima dicitur tum ratione objecti, tum ratione principiorum. Ratione Objecti ex una parte versatur circa communissimum, ex altera circa præstantissimum. Ratione principiorum, quia principia non accipit ab ulla alia scientia; versatur enim circa principia incomplexa, prorsus independentia, & complexa omnino ἀπὸδεiktai. Accuratissima dicitur scientia; quia est certissima in se, & summâ necessitate suffulta; est enim rerum Metaphysicarū multo maior necessitas quàm Physicarū: & licet in rebus Mathematicis absoluta necessitas sit, cedit tamen Metaphysicæ necessitati in eo, quod materiam aliquam illæ præsupponant, res Metaphysicæ nullam.

XV. Hinc sequitur Metaphysicam veram esse sapientiam: Sapientia enim est, rerum præstantissimarum notitia, conjuncta cum intelligentia: intelligentia est, notitia principiorum. Ergo cum Metaphysica versetur circa Objectū communissimū simul & præstan-

& præstantissimū, habeatque principia quæ ex aliis non dependent, titulus Sapientiæ merito Metaphysicæ tribuendus est.

XVI. Sequitur etiam Metaphysicam omnibus scientiis præesse ac dominari, easque dirigere in contemplationem veritatis. Nam & objectum omnibus & principia tribuit: ubi enim Metaphysica desinit, aliæ scientiæ incipiunt. Itaque quæ à Metaphysico ultimo sunt demonstrata; ea cæteris scientiis principia sunt, & ab iis sine demonstratione præsupponuntur. Itaque licet unaquæque scientia perfecta sit in suo genere absque ope Metaphysicæ, multum tamen perfectionis accedit iis, cum Metaphysica cum iis sociatur.

XVII. Hinc porro sequitur, Metaphysicam ordine naturæ priorem esse cæteris disciplinis, cumque Metaphysica in Scholis postremo loco traditur, servari non ordinem naturæ, sed cognitionis nostræ.

XVIII. Ob hæc Metaphysicæ prærogativas, non debet existimari omnes alias scientias ei subalternari. Nam in scientiis subalternatis subiecta non sunt specie diversa: sed quod scientia superior considerat absolutè, id subalternata considerat vestitum accidente sensibili: deinde subalternata scientia utitur principiis quibus & superior utitur: at subiecta scientiarum aliarum diversa sunt à subiecto Metaphysicæ, & non utuntur iis principiis quibus utitur

10 INSTITVT. METAPH.
tur Metaphysica, sed quæ sunt à Metaphy-
sica demonstrata, ea sine demonstratione
præsupponunt, & pro principiis habent, ut
ante dictum est.

C A P. II.

De communi Entis ratione.

T H E S I S I.

Cùm Entis immaterialis appellatione,
quod Metaphysicæ Objectum esse
diximus, non illæ modo Entis spe-
cies intelligantur quæ à materiæ contagio-
ne immunes sunt, sed & Ens in genere con-
sideratum, & ab omnibus speciebus suis
præcisum; non malè dividi potest Meta-
physica in partem Communem & Pro-
priam: ita ut Communis pars differat de
Ente in genere; Propria descendat ad eas
species, quæ prorsus sunt immateriales.

II. Cæterum cum omnis scientia Apò-
dictica, præter subjectum proprias affe-
ctiones habere debeat, & causas & princi-
pia, quibus affectiones subjecto convenire
demonstrantur, de singulis aliquid in hac
communi parte est dicendum, & quidem
prius de Subjecto. Superiore namque dis-
putatione nihil aliud est ostensum, quàm
Ens reale hujus disciplinæ esse objectum.

Nunc

Nunc porro videndum est, quid eâ voce intelligatur, (nam definitionem frustra quis expectet) quam latè pateat, quæ sit eorum omnium inter se convenientia, quænam realis Entis ambitu claudantur, & id genus alia.

III. Ens, ut à voce exordiar, primitus usurpatum est, invitâ latinitate, tanquam Participium ab esse deductum, ut *ὄν* ab *εἶναι*, nihilque aliud significat, quàm id quod existit; at postea, omisâ significatione Participii, usurpari cœpit pro Nomine, ad imitationem Græcorum, quibus τὸ ὄν absolute positum, nomen substantivum est. Hæ duæ Entis significationes multum differunt: cum enim sumuntur significatione Participii, ea tantum Entia dici queunt, quæ ipso actu sunt & reverà existunt, sive in se, sive in alio. At cum usurpantur ut Nomina, latius patent, atque iis etiam tribuuntur, quæ non actu aut in se, sed potestate, aut in causis suis existunt, quæque ita se habent ut rosa in tempore hyberno, imò etiam ut mundus nondum creatus: si enim ista non sint Entia, intelligi non possant, ne quidem à Deo; ac proinde mundus à Deo cognitus non fuit, antequam effectus fuit: quod enim Ens non est, id non-Ens est; at non-Entia intelligi nequeunt.

IV. Deinde cum Ens sumitur ut Participium, pertinet ad quæstionem *ἆν ἔστι*: at cum sumitur ut Nomen, referendum ad

quæstionem ἔστι τι . Cum enim quippiam Ens esse dicitur, si Ens vim habeat Participii, nihil aliud dicitur quàm illud existere, quo solvitur quæstio *an sit*. Si verò vim habeat Nominis, id, quod quæritur, dicitur non esse nihil, aut non esse non-Ens, quod ad quæstionem *quid sit* referendum est. Quare cum definitio tribui etiam possit iis, quæ non sunt, id est quæ non existunt, sequitur τὸ ὄν & Ens, positum pro Nomine, latius patere, quàm cum sumitur pro Participio, quod significat id solum quod actu existit.

V. Præterea cum τὸ ὄν & Ens nomen sunt, interdum ita latè sumuntur, ut omnia, quæ non sunt omnino nihil, dicantur Entia, etiam privationes, denominationes, & id genus alia de quibus cap. sequenti. Atque hoc sensu Ens & aliquid, synonyma sunt, & Ens & nihil immediatè, & secundum contradictionem opponuntur, non secus ac Ens & non-Ens. Interdum hæ voces usurpantur strictius, pro eo quod non privatio, & nuda denominatio est, sed vera res, & vulgò dicitur Ens reale, quasi dicas tale Ens, quod non in mentis fictione situm est, sed in veritate rei consistit. Atque hoc significatu Ens non tam latè patet quàm aliquid, & τὸ οὐκ ὄν Nihil non opponitur immediatè (multa enim esse postea probabimus, quæ non sunt omnino nihil, neque tamen sunt Entia realia) nec Ens & Nihil
libi

sibi directè contradicunt, sed alterum alterius contradictionem involvit obliquè: idque eo ferè modo quo opponuntur substantia aut quidvis aliud, & nihil: nihil enim & aliquid immediatè opponuntur. Hinc fit ut & Ens, quod aliquid est, opponatur $\pi\alpha$ Nihil, sed non immediatè: ut enim substantia non est nihil, & tamen multa sunt, quæ neque nihil sunt, neque substantia; ita quoque licet Ens non sit nihil, quædam tamen dicuntur, quæ nec Ens sunt, nec omnino nihil, sed aliquid inter Ens & Nihil interjectum, ut accidentia inter substantiam & nihil sunt interjecta.

VI. His præmissis, observandum est, cum $\pi\alpha$ $\delta\gamma$ & Ens, Metaphysicæ subjectum esse dicitur, voces eas non Participii, sed Nominis significatione accipiendas esse: Magna enim pars attributorum, sive affectionum, quas Metaphysicus Enti convenire docet, etiam iis competunt, quæ aut actu ipso non existunt, aut ab actuali existentia abstrahuntur, ut Unum, Verum, Bonum &c. Nam hæ propositiones, Rosa est Ens, est unum quid, verum, bonum &c. non minus veræ sunt cum nulla rosa in rerum naturâ est, quàm tunc cum magna adest rosarum copia.

VII. Nec tamè ita latè significatio $\tau\omicron\upsilon\tau\circ$ & Entis extendenda est, cum Metaphysica Entis ratione circumscribitur, ut id omne Ens dicatur, quod est aliquid & nō omnino nihil.

nihil. Hac enim sententiâ admissâ, nihil relictum est omnino, quod affectionum vicem gerat in hac scientia: nam quamvis non sit necesse affectiones reipsa distingui à suo subjecto: aliquid tamen debet vocabulis affectionum significari, quod subjecti nomine non significatur. Alias enim cum affectio de subjecto dicitur, erit prædicatio identica; tantundem enim erit, siue dicas, **Ens est Ens**, siue **Ens est Unum**, si **Unum** non significet aliquid quod **Ens** non significat. Atqui si omne id **Ens** est, quod non est nihil, quicquid unum significat præter **Ens**, id erit **Nihil**, atque ita **Ens & Nihil** erunt voces ejusdem prorsus significationis. **Ens** ergo, cum *Metaphysicæ* subjicitur, strictius sumi debet pro eo, quod non modo in mentis fictione, sed in veritate, aliquo saltem modo consistat, quod ante diximus **Ens** reale dici.

VIII. **Ens** eo quo dictum est modo, non est unum quid, sed multa suo ambitu comprehendit; eaque diversissima; nec enim quicquam absurdius dici potest, quam omnia quæ sunt, non nisi unum quiddam esse, quod *Parmenidi & Melisso* Philosophus affingit: nam primo apparet quædam esse **Entia** finita, & ab aliis facta, & ea rursus ab aliis, eaque progressio nos ducit ad **Ens** infinitum, & à nullo factum. Præterea deprehendimus **Entia** quædam per se subsistere, alia non per se, sed in iis subsistere, quæ

quæ per se subsistunt; quorum illas *εἰδίας* sive substantias vocamus, cætera *συμβεβη-
κότα*, id est, accidentia substantiarum, at-
que hæc quidem jam præsupponimus, quæ
suo loco demonstrabuntur.

IX. Omnia hæc, quantumcunque in-
ter se diversa sunt, uno aliquo conceptu &
notione comprehendi possunt, quæ non
repræsentet substantiam neque accidens,
nec Deum aut Creaturam in specie, sed ali-
quid in quo hæc omnia coincidunt. Atque
hæc ipsi in nobis experimur: quandoqui-
dem audita voce *ἔστι* seu Entis, depre-
hendimus mentem nostram à multitudine
retrahi ad unitatem, formarique conce-
ptum aliquem communem in omnibus re-
bus, quo repræsentatur Ens, non ut tale
aut tale in specie, sed prout Ens est simpli-
citer. Hoc est quod vulgo dicitur, dari
unum conceptum formalem Entis, ut Ens
est.

X. Ex hac positione sequitur, omnia
Entia inter se aliquo modo convenire; uni
enim conceptui unum objectum respon-
dere debet: ergo, si detur unus omnium
Entium conceptus, ubique omnia Entia
inter se convenire, & in aliquâ communi
ratione uniri debent. Aut enim communis
illius omnium entium conceptus objectum
erit communio quædam omnium Entium,
aut aliquid ex propriis particularibus En-
tium rationibus collectum & aggregatum.
Hoc

Hoc posterius manifestò falsum. est : nam cum objectum ex multis particularibus objectis aggregatum est, conceptus quoque mentis aggregatus esse debet ex multis conceptibus, quorum singuli singulis objectis respondent. Ergo concedenda est quædam omnium Entium communio & convenientia, secundum quam uno aliquo conceptu promiscuè possunt ab intellectu apprehendi. hæc convenientia vulgo vocatur conceptus objectivus.

XI. Porro hæc communio aut convenientia non est sita in sola communione ἡ οὐσία seu Entis, nec in quoquam alio, quod extra rationem Entis est, sed in proprio Entis actu, per quem reverà est Ens, & distinguitur non solum ab eo quod est nihil, sed etiam ab omni eo, quod est non-Ens. Proprius Entis actus est *esse* : nam omne Ens est, & quicquid est, Ens est; sicuti & quicquid non est, non est Ens. Intelligitur autem esse secundi adjuncti, quod est esse simpliciter, non esse tertii adjuncti, quod est esse *κατὰ τὴν* : competit enim id & non Enti, & *κατὰ* nihil; veluti cum dicitur, nihil est non Ens, cæcitas est privatio. Communio igitur Entium, quæ objectum est communis illius conceptus, est causa unitatis in illo conceptu, & sita est in communi ratione ἡ οὐσία : Non enim fingi possunt duo Entia adeo diversa, inter quæ non sit major convenientia, quàm inter Ens & nihil, siue in-

ter Ens & non-Ens: nimirum quia omnibus entibus convenit τὸ εἶναι simpliciter, quod τὸ οὐκ εἶναι Nihil & non-Enti non convenit.

XII. Hinc sequitur, nomen Entis prout explicatum est, si ad substantiam, aut accidens, aut Deum & creaturas referatur, non esse prorsus æquivocum: Nam Æquivoca dicuntur, quibus solum nomen commune est, & ὁ λόγος τῆς οὐσίας, hoc est, ratio τῆς εἶναι, quæ quidem communi illi nomini respondet, omnino diversa. Si enim sit aliqua convenientia plurium εἰς τὸν λόγον τῆς οὐσίας, licet illa plura non sint penitus Univoca, non erunt tamen penitus Æquivoca: imò tantò longius absunt à perfectâ Æquivocatione, quanto major est communio & convenientia τῆς εἶναι. Itaque cum aliqua sit Substantiæ & Accidentis, Dei & Creaturæ convenientia in ratione τῆς εἶναι, non est Entis vox iis accensenda, quæ omnino sunt æquivoca.

XIII. Sed neque referenda est ad ea, quæ in solidum sunt Univoca: perfectè enim Univoca dicuntur quibus λόγος τῆς οὐσίας, communi nomini respondet, ita, ut nomen ipsum ex æquo commune sit. Atqui λόγος τῆς εἶναι, qui respondet communi nomini Entis, non convenit ex æquo substantiæ & accidenti, Deo & creaturis, sed substantiis & Deo primario & potiori jure, quàm accidentibus & creaturis. Causa hujus inæqualitatis est, quod acci-

accidentia à substantiis & creaturæ à Deo dependeant, idque non solum in quantum sunt accidentia & creaturæ, sed etiam in quantum sunt Entia. Quod enim accidentia & creaturæ sint, hoc debent illa substantiæ, hæc Deo acceptum; & Deo quidem, non solum ob id quod semel sunt ab illo effectæ, sed multò maximè, quod etiamnum à Deo conseruentur & sustententur, quod nunc præsupponimus.

XIV. Communis illa natura & ratio Entis in quâ omnia Entia convenire diximus, non determinatur aut contrahitur ad inferiora per differentias, quæ & ipsa vera sunt Entia, sed per modos *ἑσῆς* aut aliquid ejusmodi, quod quamvis Nihil non sit, Ens tamen reale dici non potest. Genus enim non affirmatur de suis differentiis. Ergo differentiæ quibus Ens contrahitur, non possunt esse Entia, ac proinde non possunt esse omnino nihil; quare debent esse modi Entium, aut aliquid tale.

XV. Hinc sequitur, communem Entis conceptum, à conceptu substantiæ & accidentis multum discrepare; discrimenque illud non in eo esse positum, quod conceptus Substantiæ & Accidentis expressius repræsentet naturam Entis (ut Suarez existimat) quàm conceptus ille communis: si enim conceptus substantiæ nihil apprehendat aut repræsentet, præter id quod conceptus Entis repræsentat, conceptus

ceptus substantiæ idem erit conceptui Entis, ac proinde & conceptus accidentis, ex quo sequitur conceptum Substantiæ eundem esse conceptui Accidentis: quæ enim eidem tertio eadem sunt, inter se quoque eadem sunt. Quid? quod substantiæ conceptus expressius repræsentare non potest rationem Entis, quam ipse conceptus Entis, si in illo nihil omnino sit, quod etiam in hoc non sit. Ut ergo substantia includit communem rationem Entis, & proprium modum ἡ ἑαυτῆς, quem vocamus per se subsistere, & accidens ad communem rationem Entis adjicit modum ἡ ἑαυτῆς, quem vocamus esse in subjecto: ita quoque conceptus substantiæ & accidentis repræsentat communem rationem Entis, quæ & communi Entis conceptu repræsentatur, atque insuper includunt modum aliquem, quo communis ratio Entis determinatur & contrahitur, ut diximus.

CAP. III.

*De eo quod est medium inter Ens
& Nihil, in genere.*

T H E S I S I.

EXplicato ambitu & ratione Entis in genere, cujus contemplationem ad
Com-

communem partem Metaphysicæ pertinere diximus; super est, ut quædam etiam dicamus de affectionibus, quæ Enti per se & generatim insunt, & cum illo reciprocantur, de quæ principiiis, quibus Metaphysicus affectiones illas Enti convenire demonstrat, quo planior nobis via sit ad singularem affectionum Theoriam, in qua Metaphysica scientia tota propemodum consistit.

II. Ante omnia autem statuendum est, in omni scientia, subjectum, principia & affectiones aliquo modo debere inter se discrepare: ita ut cum vel affectiones, vel principia de subjecto, vel affectiones de principiiis prædicantur, ea prædicatio non sit prorsus identica & nugatoria. Argumentatio enim ejusmodi, in quâ aliqua ex propositionibus identica est, tantum abest ut demonstratio sit, & scientiâ gignere queat, ut sophisma sit *ὡς γὰρ τὸ ἐν ἀρχῇ λαμβάνειν*, seu petitio ejus quod in principio positum fuit.


III. Ut ergo Metaphysicæ probationes vim habeant efficiendi scientiâ, illa tria, quæ dixi, subjectum scilicet, principia & affectiones, vel reipsâ differre debent, vel modo, vel ratione (ut loquuntur) ratiocinata: hæc enim distinctio cum inter subjectum & prædicatum intercedit, sufficit ad id, ut enunciatio non sit identica; at distinctio rationis ratiocinantis identitatē enunciationis

ciationis non tollit, quia nullum in re ob-
jecta discrimen præsupponit, quod distin-
ctionis fundamentum, aut saltem occasio
esse possit, sed tota dependet ab intellectu.
In hoc genere sunt polyonyma, ut ensis &
gladius, quorum alterum cum de altero
affirmatur, enunciatio est identica; hæc
ergo distinctio cum sola inter tres syllogis-
mi terminos intercedit, non sufficit ad sci-
entiæ generationem.

IV. Itaque cum subjectum Metaphysicæ
Communis sit Ens in genere, affectiones &
principia, juxta notionem illam, qua affe-
ctiones & principia sunt, non possunt esse
entia: si enim Entia sint, & nihil aliud quàm
Entia, cum de Ente prædicantur, vel etiam
cum affectiones de principiis prædicantur,
prædicatio erit omnino identica: Ens enim
ab Ente non potest ullo modo esse diver-
sum, eo ipso quod Ens est.

V. Non negaverim Ens, suarum affectio-
num notionibus includi: (qui enim dicit,
Unum, Bonum, &c. etiam Ens dicit haud
dubiè; alioquin enim nec Unum Ens, nec
Ens Unum dici posset.) Sed hoc addo, ali-
quid insuper in affectionibus & principiis
includi, quod Ens non est, quo ab Ente &
inter se tantillo discrimine distinguuntur,
quantum satis est, ut, cum alterutrum de
Ente, vel alterum de altero prædicatur, ea
prædicatio non sit identica.

VI. Porro illud quo affectiones & princi-
pia



pia vel ab Ente vel à se invicem distinguuntur, non potest esse purum Nihil; Ens enim ab Ente non potest distingui per illud, quod omnino nihil est: quare cum affectiones & principia sint Entia, & ab Ente aliquo modo distincta, non tamen per id quod Entia sint, sequitur medium aliquod esse concedendum, inter Ens & purum putum Nihil, quod communi Entis rationi additum, communes Entis affectiones & principia constituit. Quod etiam sic concludi potest: Nihil non differt à nihilo; at affectio Entis differt ab affectione: nam licet Unum etiam Verum & bonum sit: Unitas tamen Veritas non est aut Bonitas: Ergo cum hoc discrimen non sit ab Entitate quæ in omnibus affectionibus eodem modo continetur, aliquid concedendum est, quod sub Ente non continetur, quatenus Ens Metaphysicæ sit subiectum, & tamen non sit Nihil.

VII. Medium illud quod inter Ens & Nihil interjectum esse dicimus, non est medium per participationem extremorum, quomodo tepor medium est inter calorem & frigus; sed medium per negationem utriusque extremi, quomodo lapis medium est inter illud quod videt, & quod cæcum est; idque non est unius generis, sed multiplici varietate diversum, adeo ut multò difficilius sit, hanc non-Entium diversitatem, quàm vera Entia ad certas classes & genera revocare:

care; & quamvis hic non audeam spondere aliquam ἀκρίβειαν, glaciem tamen frango eâ spe, ut alii hæc accuratius postea tradant.

VIII. Non-Ens ergo illud, quod non est Nihil, vel privatio videtur esse, vel denominatio externa, vel Ens rationis, vel relatio, vel modus Entis: atque hæc inter se ita diversa sunt, ut nihil fingi possit, quo inter se convenient, & ab Ente discrepent; ideoque si commune nomen datum esset iis omnibus, illud esset prorsus æquivocum; quæ causa est, ut nihil de iis in genere dicamus, præter hoc solum, quod sint quædam inter Ens & Nihil interjecta. Sed statim ordiamur ab enumeratione, in qua eum servabimus ordinem, ut, quo unumquodque Enti dissimilius est, eò priori loco præponatur.

IX. Ante omnia tenendum est, nullum eorum, quæ commemoravi, Nihil esse omnino: quod enim non sint res aliqua, aut Ens reale, ex singulorum explicatione patebit. Nihil enim, ut ante diximus, à nihilo non differt; at ista, quæ recensui, multifariam differunt: tum alia ab aliis; ut relatio à privatione, modus Entis ab Ente rationis, & ut verbo dicam, quidlibet à quolibet: tum ipsa inter se, ut paternitas à dominio, cæcitas à surditate, & sic de cæteris omnibus, quæ spectant ad eandem classem.

X. Ob-

X. Objiciat aliquis discrimen hoc ab Ente aliquo proficisci, quod privatio, relatio, denominatio externa, cæteraque illa connotant; ac proinde ex eo non posse concludi, non esse Nihil: quod enim cæcitas & surditas inter se distinguantur, id totum habitibus oppositis videtur imputandum, aut subjectis. Si enim spectentur privationes prout sunt privationes, atque extra Entis ambitum constitutæ, nihil videntur discriminis habere; sic neque Relationes videntur inter se differre per hoc, quod sint non-Entia, sed per aliquod Ens, puta per fundamentum, aut terminum, quæ Relationis vox includit, vel connotat. Idem de cæteris non Entibus dici posse videtur.

XI. Molestum hoc esse argumentum fateor, sed non desperatum; potest enim concedi, diversitatem inter privationes proficisci à subjectis & oppositis habitibus, & discrimen relationum à fundamentis & terminis. Hinc enim concludo ob diversitatem subjectorum & habituum, ipsas quoque privationes, & ob discrimen fundamentorum ac terminorum ipsas etiam relationes diversas esse. Si enim privationum diversitas sit ab oppositis habitibus aut à subjectis; & distinctio relationum à fundamento & termino, negari non potest inter ipsas privationes, aut inter relationes esse diversitatem; atque in eo quoque differunt à nihilo; siquidem nihil à nihilo non differt,
neque

neque per se, neque per aliud: imò ubi nihil à nihilo differre incipit per connotationem Entis, tunc Nihil definit esse nihil, & fit aliquid. Atque hæc quidem de eo quod medium est inter ens & nihil in genere.

CAP. IV.

*De Privatione, & Denominatione
externâ.*

T H E S I S I.

VIdeamus singula, atque ut servemus eum ordinem, quem thesi 8. præced. cap. proposuimus à Privatione ordiemur. Privatio est absentia habitus, in ejusmodi-subjecto in quo & quando inesse potest. In eoque differt à purâ simplicique negatione, quæ neque subjectum definitum postulat, neq; aptitudinem in illo subjecto, ad rem negatam recipiendam, quorum utrumque Privatio connotat. Est quidem omnis privatio negatio quædam oppositi habitus, quod *absentia* voce designavimus; at non omnis negatio privatio est: sed illa solum, quâ removetur quippiam ab idoneo subjecto. Idoneum subjectum dicitur, quod aut natura, aut arte, aut consilio, aut alio modo aptatum est, ad recipiendum habitum, idque eo solum tempore, quo

re, quo habitum recipere potest. ex. gr. absentia visus non est privatio in planta, nec planta cæca dici potest, quia videndi potestas plantis inesse non debet, nec potest: At in homine aliisque perfectis animantibus privatio est, quibus Natura indulgit videndi potestatem: similiter, edentulum esse, non est privatio in infante, sed negatio mera; at in vetula (quam Martial. notat l. i. epigr. 20.) est privatio.

II. Per habitum laxo admodum significato intelligimus hoc loco omne attributum affirmatum sive positivum, subiectum quoquo modo perficiens, quod abesse potest a subiecto citra ipsius corruptionem. Dixi *attributum positivum*; quia privatio privationis non datur: in quo tamen voces spectandæ non sunt, sed res ipsæ; nam sæpe voces privativæ significant positivum quippiam, sæpe contra. ex. gr. ἀχολία privatio videri posset vocabuli formationem spectanti: sed habitus potius est, cujus privatio est χολή, id est, otium, atque ira de cæteris.

III. Omnis habitus perfectio quædam est, at privatio quædam imperfectio: ideo res melius se habent cum sunt habitu præditæ, quam cum illo sunt privatæ. Hinc sequitur, Deo nullas privationes convenire: Nulla enim ei perfectio deest, & nulla imperfectio adest. Ideoque privativæ voces, ut infinitudo, immensitas &c. non significant

cant in Deo privationem , sed aut puras negationes, aut proprietatem aliquam attributumve positivum , quod nos , quia negativè concipimus , privativis vocibus efferimus.

IV. *Habitus & Privatio* per omnes vagantur categorias excepta quantitate & situ: est enim privatio quædam *τὸ ἔσθαι* sive substantiæ , quæ inter principia generationis ab Aristotele recensetur Lib 1. *Phys.* Sic mors sive mortuum esse , est vitæ quædam privatio. Qualitas secundum omnes suas species privationes admittit; sic in potentia naturali sunt visus & cœcitas ; in habitu, scientia & ignorantia; in patibili qualitate , lux & tenebræ; in quarta specie, formatum & informe esse. Sic in relatione, habere parentes & orbem esse: in actione, operari & cessare: in passione , moveri & quiescere: in Ubi, in patria versari & exulare: in Quando, tempestivum & intempestivum: in habitu , vestitum & nudum esse, &c.

V. In hac habituum multiplici varietate observandum est, quosdam ad subjecti substantiam pertinere, ut forma, vel inde immediate emanare, ut potentiæ naturales: alios in subjecto suboriri ab ejusmodi causa, quæ à natura subjecti diversa est , & prioribus adjungi. Inter hos hoc discrimen observandum est, ut alia omittam , quod illi, cum sunt amissi , recuperari nequeant naturæ viribus, sed tantummodo miracu-

Iosè; hi recuperari queant. Itaque quod Aristoteles dicit ἀπὸ τῆς στερήσεως ἐπὶ τὴν ἕξιν μὴ γενέσθαι μεταβολήν cap. 10. de categor. de priori genere habituum & privationum accipiendum est.

VI. Ex dictis apparet, privationem non esse Ens; absentia enim rei non est ipsa res: & quamvis privatio connotet aptitudinem in subiecto, quo nomine non est pura negatio aut merum nihil, ea tamen aptitudo non privatio nec pars est privationis. Connotatio autem ista Ens aut res dici non potest eo sensu, quo nunc de Ente loquimur.

VII. Denominatio externa, est attributum, denotans id quod in subiecto non est ad illud ordinatum esse. Eaque petitur vel ab objecto, veluti cum Politia dicitur civilis vel ecclesiastica; vel à subiecto, veluti cum bonum dicitur appetibile, color visibilis; & vel ab actione, veluti cum ignis, dicitur urere; vel à relationis termino, veluti cum quis dicitur uxoratus; vel à loco sive Ubi, veluti cum animalia dicuntur terrestria vel aquatilia, aut homines Europæi vel Afri &c. vel à tempore sive Quando, veluti cum flores dicuntur verni vel æstivi; vel ab habitu, veluti cum miles dicitur armatus &c. Denominatio externa non est nuda vox, sed aliquid quod per vocem significatur. Quod verò per vocē illam significatur, non est res ipsa, quæ ad subiectum refer-

refertur, sed ordo potius, aut quicquid illud sit, quod inter rem illam & subjectum intercedit. Sic dicit Arist. τὸ ἔχον, quod ad decimam Categ. pertinet, quod haud dubiè denominatio externa est, non esse eum qui vestem habet, nec vestem ipsam, sed τὸ μετὰ τὴν ἐσθῆτα, καὶ τῷ ἔχοντι τὴν ἐσθῆτα. Illud verò quemadmodum non est omnino nihil, ita quoque non est vera res aut Ens reale, sed medium quippiam inter Ens & nihil. Si enim externa denominatio rem aliquam per se denotaret, sequeretur mutari rem omnem & componi, cum ei externa denominatio de novo tribueretur; quod falsum est haud dubiè: nam cum Deus Creator, Conservator, & id genus alia dicitur, denominatio externa est, nec tamen in Deo compositio ex diversis rebus, aut mutatio concedenda est.

VIII. Ex prædictis porro videre est, quomodo externæ denominationes distinguantur à privationibus. Privationes enim remotione habitus connotant aptitudinem in subjecto: at denominationes externæ connotant ordinem, quo res externa, unde denominatio sumpta est, ad subjectum ordinata est.

CAP. V.

De Ente Rationis.

THESIS I.

Entia Rationis dicuntur generatim, quæcunque ad mentem sive rationem aliquo modo spectant, ab eâque dependent. Eaque in tres classes vulgò dispescuntur, pro triplici modo dependentiæ. Quædam enim dicuntur à mente dependere effectivè; ut, quæcunque ab arte aliisque mentis habitibus aut actionibus proficiuntur: aliæ subjectivè; ut disciplinæ, alique similes habitus, aut qualitates, quæ menti ut proprio subjecto inhærent: aliæ objectivè; ut, quæ rebus conveniunt, prout menti obijciuntur.

II. Entia rationis primo & secundo modo dicta, veram habent essentiam, & capacia sunt veræ realisque existentia; ac proinde vera sunt & realia Entia: at quæ tertio modo Entia rationis sunt, veram essentiam non habent, nedum ut realis existentia capacia sint: eorum enim esse nihil aliud est, quàm intellectui obijci.

III. Quod autem ejusmodi quædam Entia rationis dentur, non est demonstratu difficile; quæ enim rebus tribuuntur, duorum sunt generum: Quædam iis tribuuntur prout ipsa sunt in se, veluti cum dicimus

cimus hominem esse animal, risibilem, bipedem, philosophum, &c. atque hæc omnia realia sunt, aut saltem non sunt Entia rationis: Alia quædam rebus conveniunt prout à nobis apprehenduntur, atque inter se ab intellectu comparantur, velut cum dicimus hominem esse speciem, subjectum &c. hæc sunt Entia rationis; non enim homini conveniunt ob id, quod homo est, sed ob id quod tali modo concipitur.

IV. Causa efficiens Entium rationis est intellectus. Efficit autem intellectus Entia rationis intelligendo, hoc est formando conceptus sive notiones de rebus objectis; notiones aliæ sunt primæ, aliæ secundæ. Efficit autem intellectus Entia rationis primis notionibus; eaque rursus secundis notionibus intelligit. Entia ergo rationis effecta intellectus sunt, quoad notiones primas; & objecta quoad secundas.

V. Intellectus format Entia rationis, cum res objectas ita intuetur, ut eas inter se comparet: hujus tamen comparatæ intellectiōis terminus internus non est Ens rationis (hoc enim si ita esset, Entia rationis essent entia realia) sed conceptus aliquis sive notio prima Entis realis, quod obijcitur, ex qua Ens rationis in objecto resultat. ex. gr. cum intellectus deprehendens Petrum vel Paulum convenire in humanâ natura, suam naturam intelligit abstra-

Etiam à differentiis individualibus, dicitur formare illud Ens rationis, quod speciem vocamus; species enim per se non est in natura humana, sed eam sequitur, cum mens eam à Petro & Paulo aliisque individuis abstrahit, atque ita abstractam in communi concipit.

VI. Cum jam mens in seipsam reflexa intelligit se intelligere humanitatem, & modum quoque comprehendit, quo humanitatem intellexit, dicitur formare notiones secundas: quibus jam non humanitatem intelligit, sed modum, quo humanitas promiscuè se habet ad Petrum & Paulum, & quælibet natura communis ad subiecta sibi individua.

VII. Uni rei multa tributuntur Entia rationis, quia scilicet una eademque res pluribus modis intelligi & cum aliis rebus comparari potest. Quemadmodum vicissim unum Ens rationis diversissimis rebus ac penè omnibus affingi potest: quia nimirum uno eodemque modo pleræque res cum aliis comparari possunt.

VIII. Intellectus format ac fingit, Entia rationis, non pro arbitrio suo temerè, sed certo modo & lege; sequitur enim in ipsa fictione *ἡσιν*, quam habent res objectæ cum aliis. Cum ergò intellectus res objectas apprehendit, quæ *ἡσιν* illam habent, format Entia rationis secundum modum illius *ἡσιν*. Ens ergo rationis non est intellectio

tellectio aut conceptus mentis, non res concepta, non *χέσις* illius rei cum aliis; sed aliquid aliud, quod resultat ex intellectus actione rem objectam cum alia re comparantis, & secundum certam *χέσις* & comparisonem intelligentis: eoque fit, ut cessante intellectu Entia quoque rationis intercidant, adeò ut non sint, nisi cum res intelliguntur, quibus dicuntur convenire.

IX. Fundamentum ergo Entium rationis est *χέσις* sive relatio quædam rerum inter se: nam quod quidam negationes, privationes & Entia ficta, qualia sunt Chimæra & id genus alia, numerent inter Entia rationis, non est rationi satis consentaneum. Nam negationes omnino nihil sunt, & privationes, etsi non sint nihil, sunt tamen omnino non-Entia: At Entia rationis, quamvis non sint Entia realia, sunt tamen suo modo Entia: de rebus enim affirmativè dicuntur; & in quantum suo quodam modo sunt, in tantum quoddam quasi esse positivum habent. Entia ficta, si considerentur ex hypothesis esse hoc quod finguntur esse, vera ac realia Entia sunt; at extra hypothesis illam sunt omnino nihil; nam id quod per fictionem repræsentatur, omnino nihil est: imo verò, si non sit nihil, fictio non erit fictio.

X. Ex dictis apparet Entia rationis nec esse nihil omnino, nec Entia realia. Non Nihil, quia inter se discrepant (aliud enim

est genus, aliud species &c.) atque insuper à nobis intelliguntur; at Nihil à nihilo non differt, neque intelligi potest. Non sunt etiam Entia vera ac realia, quia non sunt nisi mentis beneficio, resultantque ex mentis intellectu: adeo ut esse eorum nihil aliud sit, quàm menti objici.

CAP. VI.

De Relatione.

T H E S I S I.

Relatio est *relatōis* sive habitudo unius ad aliud. In omni ergo relatione duo requiruntur: quorum alterum, quod refertur ad aliud, subiectum relationis vel Relatum dicitur; alterum ad quod subiectum refertur, terminus sive Correlatum dicitur. Præter ista duo in quibusdam etiam fundamentum requiritur, sed non in omnibus, ut postea patebit.

II. Et si autem subiectum & relatum, quemadmodum etiam terminus & correlatum, reipsâ idem sunt, distinguuntur tamen ratione; Subiectum enim appellatur, quod ad aliud refertur, quando illud absolute, in se, & sine relatione spectatur: Relatum verò dicitur, quando ad aliud, & quatenus ad aliud refertur, & spectatur, ut im-

butum

butum atque affectum relatione. Itaque Relata rectè definiuntur ab Aristotele, quæ hoc quod sunt, aliorum esse dicuntur, vel alio aliquo modo ad aliud referuntur: de qua definitione vide Logicos. Simili modo Terminus vocatur, ad quod subiectum siue Relatum refertur, quando illud absolute & in se consideratur: Correlatum, cum consideratur affectum altera relatione, quâ vicissim refertur ad relatum. ex. gr. paternitatis subiectum est homo quispiam, puta Philippus; relatum pater, hoc est, homo quispiam affectus paternitate: Terminus paternitatis, est alius homo, puta Alexander: Correlatum filius, hoc est, homo quispiam affectus filiatione, & cum filiatione spectatus.

III. Ut autem in omni Relatione duo necessariò requiruntur; ita quoque omnis Relatio gemina est. ex. gr. inter patrem & filium intercedunt relationes duæ, paternitas & filiatio; inter dominum & servum, dominium & servitus. Sæpè tamen ob vocabulorum penuriam hæc geminatio non apparet, neque in relatis, neque in relationibus; Interdum enim relationes sunt uninomines inter relata nominibus distincta: veluti cum relationes inter maritum & uxorem, conjugium & matrimonium dicuntur: Interdum Relata æquè ac relationes uninomina sunt, ut in amicitia; utrumque enim relatum amicus dicitur, & utra-

que relatio amicitiae vocatur; licet enim una sit amicitia, relationes haud dubie geminae sunt. Interdum relationibus nullum nomen est positum; nullum enim nomen habent Relationes illae quae intercedunt inter Magistratum & subditos, aut inter rivales, aut inter subjectum & adjunctum, aut inter causam & causatum (nam causalitas fundamentum est istius relationis) aut inter emptorem & venditorem, & infinita alia. Saepè etiam fit, ut alterum Relatorum non habeat conveniens nomen: sic caput, ala, clayus sunt voces relativae, quibus tamen idoneae voces non respondent in correlatis; & tunc, inquit Aristoteles, oportet *ὀνομαστικοποιεῖν*, & dicere caput est non animalis, sed capitati caput &c. Ex dictis sequitur, omnia relata esse mutua, nec dari relata non mutua nisi ob defectum vocabulorum.

IV. Porro quod est in una relatione subjectum, id in altera terminus est; & quod est in una relatum, in altera est correlatum, & vicissim. ex.gr. Paternitatis subjectum est homo aliquis, puta Philippus, idem est filiationis terminus, & in paternitate Pater relatum est, in filiatione correlatum: Contrà filiationis subjectum est aliquis homo puta Alexander; idem est terminus paternitatis; & in filiatione relatum est filius, in paternitate correlatum.

V. Distinguunt vulgò subjectum relationum

tionum in subjectum inhæſionis, & ſubjectum denominationis: ajuntque interdum ea quidem eſſe eadem, ſed ſæpius diverſa: & cum diverſa ſunt, dicunt ſubjectum inhæſionis ſemper eſſe ſubſtantiam; ſubjectum denominationis, accidens aliquod, quod ad aliud refertur. ex. gr. cum homo quifpiam Pater dicitur aut Dominus, idem homo ſubjectum eſt, in quo illa relatio ineſt, & de quo dicitur: at cum jugerum dicitur æquale jugero, aut albor ſimilis albori, ſubjectum de quo dicitur relatio æqualitatis, eſt quantitas, & de quo dicitur ſimilitudo, eſt qualitas; at ſubjectum inhæſionis utriuſque relationis eſt ſubſtantia, in qua vel quantitas illa, vel hæc qualitas inhæret.

VI. Hæc non tam verè quàm ſpecioſè dicuntur; Relationes enim non ſunt veræ res, ſeu accidentia realia, atque ob eam cauſam per ſe, & ex propriæ naturæ conditione, non indigent ſubſtantiâ tanquam ſubjecto; nam vel in accidentibus, vel in modis entium, aut in Entibus rationis ſubſiſtere poſſunt. Interim ſubſtantia neceſſaria eſt ad illarum ſubſiſtentiam, quia quicquid relationem admittit, vel ſubſtantia eſt, vel in ſubſtantia eſt ut in ſubjecto, aut alio aliquo modo in ea ſubſiſtit. Non eſt igitur de ratione relationis, vel ſubſtantię vel accidenti inhærere, ſed alicui ſolummodò adhærere, quicquid tandem il-
lud.

lud sit. Ac proinde subiectum relationum non est subiectum inhæſionis, niſi improprie loqui velis, ſed denominationis ſolummodo.

VII. Hæc hallucinatio ex alio errore profecta videtur: Putant enim illi, contra quos jam diſputamus, omnes relationes habere fundamentum aliquod, quo interueniente in ſubjecto ſunt. Hoc fundamentum ajunt eſſe accidens aliquod, idque volunt in propria ac formali ratione relationis includi: Relationeſque illius merito eſſe vera accidentia, & more accidentium, ſubſtantię cuiſpiam, ut ſubjecto inhærere: ſecorſim autem ab illo fundamento conſideratas, nihil eſſe aliud, quam externas denominationes, denotantes termini & ſubjecti coëxiſtentiam. ex. gr. Relatio paternitatis, inquiunt, includit potentiam generandi in patre, aut ipſam actionem generandi, & denominationem inſuper externam denotans exiſtentiam, aut coëxiſtentiam filii. Sed hæc falſa ſunt, ut ex ſequentibus apparebit.

VIII. Nam primo facile oſtendi poſteſt, in omni relatione præter ſubjectum & terminum, ſive relatum & correlatum, non requiri fundamentum à ſubjecto diuerſum. Nam quodnam eſt illius relationis fundamentum; quæ duæ horæ, aut duæ lineæ dicuntur æquales, aut duo colores, aut figuræ ſimiles? dicent fortæſſe quantitatem

tatem esse æqualitatis, & qualitatem esse similitudinis fundamentum. At, inquam ego, quantitas est subjectum æqualitatis, & qualitas subjectum similitudinis, non fundamentum; nam fundamentum diversum esse debet ab eo in quo est relatio, hoc est, à subjecto; at æqualitas est in quantitate, & similitudo in qualitate: hora enim & linea sunt quantitates; color & figura, qualitates; ac proinde non sunt fundamentum. Sed ut omnis dubitatio tollatur, quodnam est fundamentum earum relationum, quæ Deo tribuuntur, aut etiam earum, quæ immediatè tribuuntur substantiis? nam cum duæ substantiæ dicuntur ejusdem esse speciei illa identitas haud dubiè relatio est, & tamen non habet fundamentum à subjecto & termino, hoc est à substantiis, diversum.

IX. Sunt quidem multæ Relationes, fa-
teor, quæ fundamentum habent à sub-
jecto diversum; sed illæ tamen ipsæ relatio-
nes fundamentum non videntur includere
in quantum relationes sunt, sed in quan-
tum sunt relationes tales aut tales, puta pa-
ternitas, filiatio, dominium, servitus, aut
conjugium. Fundamentum enim ita se ha-
bet ad illas relationes, ut rationale se ha-
bet ad animal: ut enim homo per π ratio-
nale non est animal (animal enim rationa-
litate prius est) sed tale animal, puta homo:
ita paternitas per fundamentum suum non
est

est relatio, sed talis solummodò relatio. Una enim est conditio relationis in omnibus relationibus, siue fundamentum habeant, siue non; sicut una est natura & conditio animalitatis in omnibus speciebus licet communis illa natura, & conditio relationis & animalitatis per differentias adjectas & communi naturâ posteriores, in speciebus determinetur.

X. Præterea falsum est, quicquid præter fundamentum in relationibus includitur, id esse denominationem externam. Fateor equidem denominationes externas ex relationibus formati posse, si voces suppetant (veluti cum dicitur aliquem esse uxorum) sed multum tamen à relationibus differunt: nam denominationes externæ in vocabulis consistunt, relationes positæ sunt in rebus, & priores sunt vocabulis. Deinde denominationes externæ denotant, quomodo id, quod extra subiectum est, se habeat ad subiectum; voces relativæ ostendunt, quo modo subiectum se habeat ad illud, quod extra subiectum est, nempe ad terminum.

XI. Ex dictis sequitur, Relationes non esse omnino nihil, ne quidem si considerentur, ut sunt à subiecto & fundamento distinctæ: Si enim nihil sint, non poterit quispiam aliter se habere ad filium atque ad servum, siquidem in nihilo nullū discrimen est: at qui pater est & dominus, per relationem,

lationem paternitatis aliter se habet ad filium, quam ad servum; & per relationem domini, aliter ad servum, quàm ad filium. Ergo paternitas & filiatio extra notionem fundamenti, non sunt nihil. Nec est quod diversitatem illam fundamento imputes: nam præterquam, quod antea ostendi, non omnes relationes fundamentum habere, dici potest insuper, licet relationes à fundamento quasi proveniant, non tamen relatum hoc aut illo modo se habere ad correlatum per fundamentum, sed per relationem ipsam: ac proinde non potest esse nihil.

XII. Non sunt etiam relationes in proprio suo conceptu, quatenus à fundamento & subjecto distinguuntur, veræ res, aut Entia realia. Atque hoc inde patet, quod additæ subjecto non faciant compositionem, nec ortu suo, aut ablatione efficiunt in subjecto mutationem. Quæ enim est compositio in horâ aut in lineâ, cum alteri horæ aut lineæ dicitur æqualis? quæ mutatio in ovo, cum alteri ovo apud Antipodas genito incipit esse simile? Fateor equidem plerasque relationes aliqua mutatione suboriri; sed ea mutatio vel est in termino, ut cum similitudo oritur in una re, cum ei altera assimilatur, aut cum Deus cœpit Creator esse per creationem, quæ non in Deo, sed in creaturâ est: vel si ea mutatio sit in subjecto, veluti cum quis pater sit per genera-

generationem, dominus peremptionem; &c. relatio ista mutatione posterior est. Hinc concludimus, omnibus omnino rebus, etiam Deo, relationes tutò tribui posse. Nec propterea dicendum est, relationes Dei prorsus diversas esse à nostris relationibus; etsi ex alio fundamento oriantur.

XIII. Relationes vulgò dividuntur triariam: ac primò in relationes reales & rationis. Relationes reales dicuntur, non quæ res sunt aut Entia realia (nullæ enim relationes veræ sunt res) sed quæ rebus conveniunt absque mentis ope. Quæ verò rebus competunt per mentis operationem, relationes rationis vocantur: atque istæ videntur rursus esse triplices. Primo enim dicuntur relationes rationis, quæ sunt in Ente rationis, qualis est relatio inter genus & speciem. Secundo quæ sunt inter duo, quæ sola ratione distinguuntur; veluti cum quippiam dicitur esse idem ipsum sibi ipsi. Tertio quæ ab intellectu ipsæ finguntur; veluti cum in cœlo aut in aliis rebus dextrum & sinistrum absque ulla causa fingitur.

XIV. Dividuntur etiam Relationes vel potius relata, in relata secundum dici & relata secundum esse: Nam discrimen hoc non est situm in relationibus, sed in vocabulis, quibus relata nuncupantur. Quod ut intelligatur, repetendum est quod supra dixi, relatum omne conflatum esse ex sub-
jecto,

jecto, quod est res absoluta, & relatione; sic pater denotat hominem quempiam cum paternitate. Illæ igitur voces, quæ ex prima sua institutione significant relationem, ac rem absolutam, quæ subiectum est, per consequentiam, dicuntur relata secundum esse, quasi dicas, quæ reverâ relata sunt, sive οἷς τὸ εἶναι αὐτὸν ἐστὶ τὰς ἀπὸς πρὸς ἑχθρ. At quæ primo significant rem absolutam & relationem per consequentiam, vocantur relata secundum dici, id est, quæ, prout ista voce nominantur, non sunt relata, sed dicuntur tantum; ut scientia & scibile, caput & capitatum &c. nam scientia vox qualitatis est ejusmodi, quæ relationem connotat.

XV. Tandem dividuntur relationes & relata, in prædicamentalia & transcendentalia. Prædicamentalia dicuntur, quæ ad illud referuntur quod habet rationem termini solummodò: Transcendentalia. quæ referuntur ad illud, quod non solum habet rationem termini, sed & causæ aut effecti. Prioris exempla sunt, pater & filius, dominus & servus; exempla posterioris, causa & causatum, habitus & objectum, &c.

CAP. VII.

De modis Entium.

T H E S I S I.

Superest ut agamus de modis Entium: qui quamvis aliquanto propius accedant ad Entium naturam, quàm ea, de quibus ante dictum est, per se tamen ac seorsim à rebus modificatis, vera Entia non sunt. Horum natura ita abstrusa est, ut difficile sit, eam iusta convenientiæ definitione explicare, faciliusque sit, docere quid modus non sit, quam quid sit. Ne tamen nihil dicamus, videtur Modus esse positiva quædam, interna, & absoluta appendicula, qua res modificata vel quoad esse, vel quoad fieri, ut ita dicam, limitatur.

II. Ut hanc descriptionem intelligas, nota primùm, cum modum dicimus Entis *appendiculam*, cum ab Entis ambitu secludimus: nam cum modus debeat à modificato discrepare (impossibile enim est, inquit Aristoteles, scientiam simul & modum scientiæ quærere) cum Ens sit, quod modificetur, modus Ens esse non potest. Nec sufficit si respondeas, modum esse Ens, & tamen discrepare ab eo Ente, quod modificatur: quia dantur modi quidam, qui aut omni Enti conveniunt, aut maximæ saltem parti: quos frustra tentes ad ullum genus

nus Entium revocare. ex. gr. quia *per se subsistere* est modus constituens substantiam, eamque distinguens ab accidentibus, non potest esse substantia, si modus debeat distinguì à re modificata: nec potest esse accidens; quia accidens non potest substantiam distinguere ab accidente. Cum ergo non detur verum Ens, quod inter substantiam & accidens medium sit, sequitur *per se subsistere* non esse verum Ens. Simili modo judicari potest de inhærentiâ accidentis in substantia, de duratione, de necessitate & contingentia, & similibus differentiis, quæ Entis ambitum immediatè dividunt. Non negaverim quædam esse vera Entia, quæ aliorum Entium modi dicuntur aliquândo (omnia enim accidentia quodammodo sunt modi substantiarum) sed nos tam latè Modi significationem non sumimus.

III. Additur in definitione, modum esse appendiculam *positivam*, ut à privatione distingueretur, & *internam*, ut separaretur à denominatione externa; quæ, quamvis modum sæpè connotet, Modus tamen ipse non est Relatio; licet modus quidam esse videatur, quo res ad aliam refertur, non est tamen modus *ἑνῶς*: ideoque additur, modum esse appendiculam *absolutam* & rei modificatæ absolutè convenientem.

IV. Effectum modorum est, res modificatas limitare, seu determinare ac circumscribere;

scribere; in quo fungitur quodammodo munere formæ sive differentiæ: res enim modificanda est instar materiæ sive generis; & res modificata, instar speciei ex materia & forma, sive genere & differentia compositæ. ex. gr. Substantia, quasi species quædam componitur ex Ente, quod est loco generis, & modo *τὸ εἶναι* quo dicitur *per se subsistere*, qui est instar differentiæ, substantiam constituens, & ab accidente distinguens. Hinc apparet, Entia rationis non posse modos Entium appellari: siquidem non habent vim Entia limitandi & distinguendi.

V. Cæterum modi non tantum distinguunt rem ab aliâ quapiam re, sed etiam à seipsa: sic sedens differt à seipso stante; cum tamen sedere, stare atque adeo omnis situs, modus tantum esse videatur.

VI. Porro modus omnis *rem* modificat: idque vel immediate, veluti cum *per se subsistere* dicitur modus substantiæ, aut cum actio vel motus dicitur modus, quo res fit: vel mediante altero quopiam modo prior, velut cum actionibus tribuuntur alii modi, puta celeritas aut tarditas: aut nimium, parum & mediocritas, ut in Ethicis. Interdum etiam multi modi subordinantur ut postea patebit.

VII. Modi vel *αὐτὸς τὸ εἶναι* referuntur, sive ad essentiam vel existentiam, vel *αὐτὸς τὸ γίνεσθαι*, id est, ad fieri vel ortum rerum.

Modi

Modi prioris generis admodum latè patent, ita ut etiam in Deo reperiantur; siquidem in unica Dei essentia tres sunt diversi *τρόποι υπάρξεως* sive modi subsistendi. Ad alterum genus refertur actio, passio, motus (hæc enim reipsa non differunt) quatenus spectant ad id, quod fit. Nam si actio aut motus referatur ad agens, denominatio externa est: si passio aut motus referatur ad subjectum sive patiens, sæpè verum Ens est, non quidem vi suâ, sed vi ejus quod oritur. ex. gr. Calefactio est modus caloris qui oritur, quo distinguitur à calore jam genito; est externa denominatio calefacientis, & verum accidens, nempe qualitas ejus quod calefit. Si terminus actionis non sit substantia aut accidens reale, actio non quâ actio, sed quâ passio est, dicetur quoque modus, & non accidens reale respectu patientis. ex. gr. quia ubi sive potius præsentia localis, modus est locatæ rei, motus localis, quo ubi mutatur, & nova præsentia acquiritur, non erit accidens rei locatæ, sed tantùm modus: Nam quod rei cuiuspiam tribuitur mediante modo, non potest vera esse res, sed necessario debet esse modus, aut etiam aliquid minus.

VIII. Mutatio rerum secundum modos, sive ea sit ortus novi alicujus modi, sive abolitio, si permutatio ac transitus ab uno in alium, vera est ac realis mutatio, idcoque aliquam imperfectionem aut includit

dit aut præsupponit. In eoque modus differt à denominatione externa, & à relatione, quæ accessu suo aut abcessu veram ac realem mutationem non inferunt, neque imperfectionem includunt aut præsupponunt. Ideoque novi modi Deo tribui non debent: ut novæ relationes, aut denominationes ei tribuantur, nihil omnino verat.

IX. Modi additi rebus modificatis efficiunt aliqualem haud dubiè compositionem: nam ubi aliqua distinctio intercedit, ibi quædam debet esse compositio, cum ex iis, quæ distincta sunt, unum fit. Atqui ex re modificatâ, & modo fit unum; ergo modus efficit aliquam compositionem, cum rei modificatæ adjungitur. Hæc tamen compositio non arguit imperfectionem ex seipsâ, sed ex accidenti tantummodò, quando scilicet contingit aut modum additum esse mutabilem, vel quando oritur ex modificatæ rei similitudine: quæ duo, mutabilitas scilicet & finitudo, aliquam absque dubio includunt imperfectionem. Non pugnat ergo, cum summa Dei perfectione si in divinis personis admittatûr aliqua compositio ex essentia divina, quæ tribus personis communis est; & ex incommunicabili hypostasi, sive personalitate, quæ unicuique personæ propria est; hæc enim hypostasis sive personalitas modus quidam subsistendi est, verum immutabilis, atque

atque infinitus, & infinitæ Dei essentiaæ
competens.

CAP. VIII.

*De principiis incomplexis sive de
Essentia & Existentia.*

THESIS I.

HIs sic explicatis, via strata est ad Principia & affectiones Metaphysicas. Principia, ut inde ordiar, quibus utitur Metaphysica, vel incomplexa sunt vel complexa. Principia incomplexa sunt Essentia & Existentia: atque hæc quidem duo duplici nomine principia sunt, subjecti videlicet, sive Entis, & affectionum. Entis principia sunt quia, per essentiam. Ens est id quod est, & per existentiam actu est, quicquid actu atque extra suas causas est. Sunt etiam hæc duo principia affectionum, quia omnis affectio ab illis fluit vel proximè vel remotè, ut postea apparebit. Cum autem mens nostra Essentiam Existentiame, vel cum Ente copulat, vel cum aliqua affectione quæ ab iis immediatè fluit, ex illa copulatione oriuntur principia complexa, de quibus cap. sequente agemus. Cum enim dicimus; Ens habet essentiam, est definitio quædam Entis: cum dicimus,

C

Ens

Ens habet existentiam, est hypothesis, quia statuitur esse Ens. Cum verò dicimus, quod essentiam habet est unum, verum, bonum &c. sunt axiomata, quæ aliquam etiam declarationem continent Unitatis, Bonitatis & Veritatis, &c.

II. Ut Essentiæ Existentiæque vim intelligamus, observandum est, quod antè dixi, **Ens** vel ut nomen sumi, vel ut participium. **Ens** acceptum significatione nominis, solâ Essentiâ constituitur: at significatione participij Existentiam simul & Essentiam requirit. Ex quo sequitur, Essentiam pertinere ad quæstionem, quid sit, quemadmodum & **Ens**, cum pro nomine sumitur; Existentiam, ad quæstionem, an sit, sicuti **Ens** notione participij sumptum.

III. Essentia ergo nihil aliud est, quam id quod definitione exprimitur, vel quo res & est, & est id quod est. In quo differt à Forma, qua quidem dicitur res esse id quod est, sed non dicitur esse Ens, aut esse simpliciter. Forma enim sola non dat esse simpliciter, sed tale esse, sive esse certæ speciei: esse verò simpliciter dat sociata materiæ, & una cum materia. At Essentia dat unicuique rei, ut sit Ens simpliciter, & ut sit tale Ens in specie. Itaque Essentia non ita se habet ad Ens, ut Forma ad materiam, sed ut natura abstracta ad concretum, puta humanitas ad hominem, aut vita ad vivens.

IV. Ex

IV. Ex quo intelligitur, cum Essentia dicitur principium Entis, vim principii non convenire Essentiæ per se, sed tantum per operationes nostræ mentis, Ens per modum subjecti, & Essentiam per modum actus sive Formæ, qua Ens constituitur, apprehendentis: neque enim reale discrimen intercedit inter Ens & Essentiam, sed discrimen rationis solummodo, cum aliquo rationis fundamento. Si enim reale discrimen intercederet, Essentia foret Ens ab Ente diversum, rursusque suam haberet Essentiam, atque ita in infinitum.

V. Fundamentum quo distinctio rationis subnixæ est, quam diximus inter Ens & Essentiam intercedere, situm est in eo, quod Essentia Entis rationem denotare videtur, ab inferioribus abstractam: at Ens denotat Essentiam cum respectu ad inferiora, sed indefinitè tamen. Ex quo fit, ut non inepte dicatur, Ens habere Essentiam: si enim nulla distinctio intercederet inter Ens & Essentiam, ea locutio inepta foret; nihil enim seipsum habere dicitur.

VI. Cum Essentia sit ratio Entis, atque adeo ipsum Ens in abstracto, sequitur Essentiam & Ens inter se reciprocari, sicut vita & vivens: ita quidem, ut omne Ens habeat Essentiam, & quicquid Essentiam habet Ens sit; & vice versa, quod non habet Essentiam, non sit Ens, & quod non est Ens, non habeat Essentiam. Ac proinde

neque privationibus, neque denominationibus externis, neque entibus rationis, neque relationibus, neque modis etiam Entium per se Essentiam convenire: hæc enim omnia ex Entium censu antea eiecimus.

VII. Existencia, est id quo res actu atque extra suas causas est; quæcunque enim existere possunt, hoc est, quæcunque non involvunt contradictionem, antequam existunt, dicuntur in causis suis esse. Ubi autem existere incipiunt, è causis suis quasi emergunt: hæc tamen emissio non tollit rei existentis conservationem: siquidem non aliæ causæ intelliguntur, cum res existens extra suas causas esse dicitur, quàm quæ concurrunt ad procreationem, & quatenus ad eam concurrunt, non quatenus concurrunt ad conservationem. Ex quo intelligitur res successivas, & quæcunque perpetuò fiunt, improprie admodum atque imperfecto modo existere; non enim extra suas causas sunt.

VIII. Vulgò distinguitur Essentia in Actualem & Potentialem. Sed non est abundandum ista distinctione: Essentia enim potentialis non est Essentia diversa ab essentia actuali, quod quidam perperam existimant: sed una eademque essentia actualis & potentialis dicitur: imo omnis essentia revera actualis est; quæ tamen tunc potentialis dicitur, quando tribuitur iis, quæ non actu, sed potentia sunt: veluti cum
rosis.

rosis tribuitur *Essentia*, cum nullæ rosæ sunt; aut mundo, cum nondum conditus est; neque enim alia *essentia* est, quæ rosis tribuitur cum non existunt, aut mundo nondum condito, ab ea, quæ tribuitur iis, cum jam ad *Existentiam* provocata sunt.

IX. Nec verum est quod docent quidam, *Essentiam* actualem & potentialem opponi ut *Ens* & non *Ens*: licet enim opponantur esse actu & esse potentiâ; attamen inter *essentiam*, quæ actu est, & inter eam quæ tantum est potentia, quatenus sunt *Essentiæ*, nulla versatur ejusmodi oppositio. Si dicas *Ens* actu & *Ens* potentiâ sic opponi, ergo & *Essentiam* actualem & potentialem opponi ut *Ens* & non-*Ens*; nec consequentia concedenda videtur, nec antecedens. Non Consequentia; quia eadem *Essentia*, quæ iis absolute tribuitur, quæ actu sunt, tribuitur etiam iis, quæ potentia sunt; sed sub hac conditione, si sint & quando erunt, quod semper subintelligitur. Dicitur ergo *Essentia* potentialis, ut ante dixi, non quia ipsa potentia est, sed quia iis ex hypothese tribuitur, quæ potentia dicuntur esse. Antecedens etiam negari potest: nam mundus ante creationem, & quicquid potentia esse dicitur, non alio sensu aut significatione dicitur *Ens*, quam mundus conditus, & quicquid jam actu existit; nam quod de *Essentia* diximus, idem debet intelligi de *Ente* nominis signifi-

nificatione accepto: Ergo ut Essentia, ita quoque Ens, quatenus cum Essentia recurrit, de eo quod actu est absolutè dicitur; de eo quod est potentia, ex hypothesi solum: de utroque tamen eadem significatione, quod fieri non posset, si Ens potentiale Enti actuali opponeretur, ut non-Ens opponitur Enti: non potest enim non-Ens dici de eo, de quo dicitur Ens.

X. Existencia non est res, aut modus, ab Essentia distinctus, eique adiectus, sed ipsa Essentia extra causas suas cōstituta: Si enim res esset, haberet Essentiam & Existentiam, ac illa rursus suam, atque ita in infinitum: Si modus esset Essentiæ adiectus, posset Essentia concipi sine Existentia; atque hoc fieri non potest: nam si intelligas Essentiam actualem, sive eam quam tribuimus istis rebus, quæ actu sunt, ea intelligi non poterit non intellecta existencia, nedum ut intelligi queat ea neglecta; & quia Essentia potentialis non est alia ab actuali, sequitur non alio discrimine ab ea distinguendam esse Existentiam, quàm quo distinguitur ab actuali: Nam quamvis Essentia potentialis rebus tribuitur, quæ non existunt, non tamen iis tribuitur sine respectu ad Existentiam. Ut enim quæstio quid sit, præsupponit quæstionem an sit, ita omnis Essentia, quæ spectat ad quæstionem, quid sit, præsupponit Existentiam, ita ut nihil omnino dici queat vel Ens esse, vel essentiam

tiam habere, nisi quatenus Existentiam habet, vel habere præsupponitur.

XI. *Distinctio inter Essentiam & Existentiam est distinctio rationis ratiocinata: cujus fundamentum & occasio est, quod Essentia pertineat ad quæstionem, quid sit; Existentia, ad quæstionem, an sit, ut ante diximus: quodque Essentia conveniat pariter iis quæ actu & quæ potentia sunt; Existentia tantum iis quæ actu sunt, & non etiam quæ potentia. Hæc tamen causa distinctionis, non habet locum in Deo, sed tantum in creaturis; nam creaturæ ita actu sunt, ut aliquando non fuerint, atque etiamnum possint non esse: at Deus nunquam non fuit, neque potest non esse, imo quod potest non esse, non potest esse Deus. Hinc sequitur, ut cum mens Essentiam concipit & Existentiam in Creaturis, admodum dissimiles formet conceptus. Nam Essentiæ conceptus talis est, ut iis etiam tribui possit, quæ non sunt, saltem ex hypothesis. At cum in Deo Essentiam & Existentiam concipit distinctis conceptibus, conceptus illi non ob aliam causam dissimiles sunt, quàm quod aliter respondeant quæstioni, an sit; aliter quæstioni, quid sit: Nam conceptus Essentiæ divinæ formantur ita, ut tò esse actu includant, nec tribui possint iis, quæ possunt non esse, multò minus iis, quæ non sunt actu, sed tantum potentia: Nam sicuti Deus esse*

nequit quod potest non esse; ita Deum non concipit aut Dei essentiam, qui tale quippiam concipit quod potest non esse. Sunt tamen etiam in Deo dissimiles essentiae & existentiae conceptus, sed ob id solum quod essentia pertineat ad quaestionem quid sit, existentia ad quaestionem, an sit; quæ ratio, ut est generalis, ita sufficit ad distinctionem rationis ratiocinatæ.

C.A.P. IX.

De principiis Metaphysicæ complexis.

T H E S I S I.

P Rincipia Complexa, vel sunt Hypotheses, vel Definitiones, vel Axiomata. Hypothesis Metaphysica est, quæ præsupponit dari Ens quoddam. Ut cæteræ scientiæ, ita quoque Metaphysica præsupponit suum subjectum esse: atque ita quidem, ut id nulli scientiæ debeat acceptum; nam præterquam, quod ipsa sit prima omnium scientiarum, ita notum est, dari Entia, ut id probari neque debeat neque possit.

II. Secundo loco sumit Metaphysica nominalem definitionem Entis; atque omnium adeo terminorum, quibus utitur:

Atque

Atque hoc etiam commune est Metaphysicæ cum omnibus aliis scientiis. Nominales enim definitiones peti debent ex Grammatica; quæ prima est omnium disciplinarum.

III. Tertio loco sunt Axiomata, hoc est, propositiones, ἀναπόδεικται, atque indubitatae veritatis: exque ita generales, ut omnibus Entibus accommodari queant. Harum omnium fons est hoc axioma. Idem non potest esse & non esse; sive, quod eodem redit, De qualibet re altera contradictionis pars vera est, altera falsa: ita ut si affirmatio vera sit, negationem necesse sit esse falsam; aut negationem veram, si affirmatio sit falsa, & sic vice versa.

IV. Ex hoc fonte alia multa Axiomata scaturiunt; ut, Nihil potest à seipso fieri: Non datur progressus in infinitum: Causæ efficientes non admittunt circularem à se invicem dependentiam, & id genus alia. Quæ tamen vim probandi habent ab illo primo axioma. ex. gr. Si quis quærat cur nihil possit à seipso fieri? (etsi nemo, nisi pertinax, hoc & similia quæsiturus sit) responderi tamen poterit, quia sequeretur idem simul esse & non esse: Nam quod facit quippiam, jam actu est; quod sit, non est actu: Ergo si quid fieret à seipso, idemque semetipsum faceret, quatenus fieret à seipso, non esset actu, idemque esset actu quatenus faceret seipsum. Idem est & judi-

cium de cæteris axiomatibus. At si quis quærat, cur idem nequeat esse simul & non esse, non pertinaciæ erit indicium ista quæstio, sed insanix; cui non melius, quàm tacendo respondeas.

V. Ex hisce principiis ratiocinatur Metaphysicus non ostensivè, sed deductione ad impossibile, ostendens, aut nullum fore Ens, quod est contra hypothesin; aut non fore quippiam id, quod per definitionem aut essentialem aut nominalem esse dicitur, aut idem esse simul & non esse, quod est contra primum veritatis *καθήκειον*, si non sua sententia, sed id quod suæ sententiæ contradicit, statuatur esse verum.

CAP. X.

De Entis Affectionibus in genere.

T H E S I S I.

HÆc de Principiis, sequuntur nunc Affectiones, quæ præcipuè in hac & in aliis omnibus scientiis considerandæ sunt: neque verò jam dubitandum est, an dentur affectiones; quandoquidem ostensum est, multa reperiri in Ente, quæ Entia non sunt, nec tamen nihil omnino. Sunt ergo affectiones in eorum numero, quas mediæ conditionis esse diximus inter
Ens

Ens & Nihil. Affectiones Entis in genere sunt duum generum: Quædam singulæ cum Entereciprocantur; veluti cum dicimus, omne Ens esse Unum, Verum &c. Aliæ non nisi combinatæ; ut, omne Ens est necessarium aut contingens, actu vel potestate, &c. Quarum illas Simples docendi causæ nuncupabimus; has Coniunctas aut combinatas.

I I. Affectiones simplices vel essentiam sequuntur vel existentiam. Essentiam sequuntur unitas, veritas, bonitas, harumque species, & quæ iis accedunt: Existentiam comitantur duratio, locus, tempus, aut esse in loco, & in tempore. Nam licet essentia & existentia sola ratione differant, non tamen eo minus esse possunt principia distinctarum affectionum: præsertim tum affectiones ipsæ inter se, non reipsa, sed sola ratione discrepent.

II I. Cæterum Unitas, Veritas, Bonitas dicuntur Essentiam comitari, quia tribuuntur iis etiam, quæ actu non sunt, sicuti Essentia. Nam mundus condendus unus erat mundus, & verus, & bonus æquè ac mundus conditus: imo mundus condendus idem erat mundus qui nunc est conditus, eademque illius essentia. Cætera dicuntur Existentiam sequi, utpote quæ aut tempus & locum, aut saltem ubi & quando inferit; etsi tempus, etiam durationem: Essentia nihil horum, qua Essentia.

IV. Ens cum hisce suis Affectionibus vulgo vocantur Transcendentalia : quia scilicet omnes Categoriarum gradus transcendunt, non Universalitate (nihil enim est universalius summis generibus) sed communitate significandi. Hinc fit, ut, cum substantia, accidens, aut quantitas Ens Unum, Verum, aut Bonum esse dicitur, enunciationes istæ non magis immediatæ sint, quàm, cum Aristoteles, vel aliud individuum, Ens esse dicitur, aut Unum, aut aliquid tale.

V. Hisce quatuor transcendentibus sunt qui *Rem* etiam & *Aliquid* annumerant, sed perperam. Nam Res est idem prorsus quod Ens in hac disciplina. Ideoque cum Ens Res esse dicitur, aut contra, prædicatio est prorsus identica. Aliquid dicitur secundum quosdam, quasi aliquam quidditatem habens, ac sic Enti quoque æquipollet: nisi malimus *Aliquid* aliquanto communius esse, quàm Ens, ita ut etiam affectiones Entis comprehendat; nam prout sunt, ab Ente distinctæ, sunt sanè aliquid, non tamen Entia, ut antè dictum est. Alii volunt Aliquid dici, quasi aliud quid: & sic unitatem sequitur, ut statim dicemus.

VI. Ex tribus illis affectionibus Unitas primum locum obtinet, Veritas secundum, Bonitas tertium; non quod Veritas per Unitatem, & Bonitas per Veritatem de Ente demonstrantur, sicut Unitas demonstra-
tur

tur per Essentiam (nam omnes hæ affectiones immediatè sequuntur Essentiam) sed quod Unitas simplicior sit, minusque tribuat Enti, quàm duæ reliquæ, & Veritas minus, quàm Bonitas, ut ex singularum explicatione patebit.

CAP. XI.

De Vnitate & Multitudine, in genere.

THESIS I.

VNum est, quod est indivisum in se: addunt quidam, & divisum à quolibet alio; sed malè: nam necesse est omne Ens actu Unum esse; at necesse non est, omne Ens actu divisum esse ab alio: nam ante mundum conditum Deus erat Unus, nec à quopiam erat actu divisus: quia nihil erat præter Deum. Igitur divisum esse non pertinet ad Unitatis definitionem, sed est proprietas, quæ posita rerum multitudine, Unitatem sequitur.

II. Unitati opponitur Multitudo, quatenus Multitudo est, non quatenus rationem unius induit aliquo modo. Quod ut intelligas, notandum est Multa bifariam cum Uno comparari posse, nempe vel quatenus multa sunt, hoc est, quatenus a se invicem

invicem diuisa ac distincta sunt, quæ multitudinem constituunt; vel quatenus certum constituunt numerum, qui unitatis rationem eatenus induit, quatenus in plures ejusmodi numeros dividi non potest: sic numerus denarius, quamvis multitudo quædam sit, si singulas unitates spectes; tamen, si consideres rationem decadis, unus numerus dici potest: Ita enim in se indivisus est, ut dividi nequeat in alias decades. Atque hoc sanè sensu multitudo non opponitur unitati, sed modus quidam unitatis est, licet imperfectus, ut postea patebit: multitudo igitur unitati opponitur, quatenus constat divisione quadam Entium, ac distinctione eorum à se invicem; oppositioque est in indivisione, quæ est ratio unitatis, & in divisione sive distinctione, quæ est ratio multitudinis.

III. Quid indivisio adjiciat Enti, quod Unum dicitur, & quid distinctio tribuat iis Entibus, quæ dicuntur Multa, non satis patet. Hoc constat, Unitatem, quatenus Enti additur, non esse Ens: si enim Unum quàm Unum, sive Unitas ipsa prout est ab Entitate distincta, esset Ens, Unum esset, & sic porro in infinitum: non est etiam Denominatio externa; quia, quicquid Unum dicitur, in se Unum est, sine ulla externæ rei connotatione: Non Ens rationis; quia Ens Unum dicitur, Unitate transcendentali, absque ulla operatione intellectus: Non
est

est etiam Relatio; quia Relatum correlati sui relatum est; at Unum non refertur ad correlatum, quia Unum est: Non videtur etiam privatio; quia privatio habitus oppositi privatio est: Unitati autem opponitur multitudo, quæ, ut diximus, consistit in divisione, sicut Unitas in indivisione. Quare, si unitas & indivisio privatio foret, divisionis esset privatio, at divisio ipsa privatio quædam aut certè negatio quædam est: ergo Unitas non est privatio; quia privatio non est privationis aut negationis privatio, sed habitus, id est, attributi positivi. Præterea privatio connotat aptitudinem in subiecto ad habitum oppositum recipiendum: at non omne Ens aptitudinem habet, aut potentiam ad divisionem sive multitudinem; Deus enim (neque necesse est plura commemorare) ita Unus est, ut repugnet ejus naturæ plures esse Deos.

IV. Qui Unitatem dicunt esse positam in nuda negatione, propius ad veritatem accedere videntur, sed non tamen accedunt; nam pura negatio non potest esse vera Entis affectio, cum nihil omnino sit: deinde licet vox ipsa indivisionis negativa sit (significat enim negationem divisionis) quod tamen per ipsam vocem significatur, positivum quiddam esse debet: nam divisio distinctioque negatio quædam est: ergo indivisio est affirmatum ac positivum quippiam;

piam; negatio enim negationis est affirmatio.

V. Superest ergo, ut dicamus per indisionem designari modum positivum, quo Ens dicitur indivisum; sed quem per negationem explicamus, quâ, quod Unum est, negamus esse divisum in seipso. In quo Unum distinguitur ab Unico, quod etiam negationem denotat, sed non negationem divisionis in seipso, sed negationem ejusmodi Entitatis, quâ ipsum est id quod est. Itaque cum dicimus, Deum esse Unum, dicimus in Deo non esse divisionem aut distinctionem plurium Entium inter se; at cum Unicum dicimus, significamus non esse plures Deos: hæc duo adeo diversa sunt, ut multa reperiantur, quæ Una sunt, sed non Unica, & multa Unica, quæ non sunt Una. ex gr. homo quilibet Unus est, sed non est Unicus: contra numerus aliquis, puta Decas, tesseras, potest esse Unicus, sed non est Unus, nisi admodum improprie. Quamvis autem unum sæpius sumatur pro unico, hoc tamen loco, ubi de Entis affectionibus sermo est, ab unico distingui debet.

VI. Ex dictis apparet, *Unicum* non esse affectionem Entis; siquidem non omni Enti competit, atque insuper in sola negatione consistit, quam diximus non sufficere ad Entis affectionem constituendam. At *Vnitas* omni Enti competit, & insuper
non

non nudam negationem Enti adjicit, sed modum, qui per negationem explicatur: Est autem unitas ex illo modorum numero, qui sunt instar proprietatum, non instar differentiarum; ideoq; ens non determinat ac restringit ad speciem, aut quasi speciem, sed cum illo reciprocatur: interim ens sic afficit ac modificat, ut illius beneficio differat ab iis quæ in se divisa sunt, & aliqua multitudine constant.

VII. Vnitas opponitur multitudini, ut habitus privationi: nam ut Vnitas est modus Entis, ita multitudo est quædam quasi privatio illius modi: Discrepat tamen ob transcendentalem naturam ab oppositione privativâ, quod nec ab omni Ente Vnitas separari possit, nec omnis multitudo includat potentiam ad unitatem. At omnis habitus per privationem tolli potest, & omnis privatio connotat habitudinem in subjecto ad habitum oppositum.

CAP. XII.

De Vnitate Numerica & Formali, deque principio individuationis.

T H E S I S I.

V Nitas alia singularis est, alia universalis. Vnitas singularis dicitur, quæ singularibus atque individuis convenit:
Uni-

Universalis, quæ convenit rebus universalibus. Præsupponimus enim nunc divisionē Entis in universale & singulare: quæ tamen, quomodo intelligi debeat, postea dicitur.

II. Unitas singularis vel est materialis sive numerica, vel formalis. Quæ divisio ut intelligatur, observandum est, individuum omne constare ex natura quadam, in qua omnia individua ejusdem speciei conveniunt, & ex propria quadam differentia, qua unumquodque individuum ab aliis individuis suæ speciei distinguitur; quæque ob eam causam differentia individualis seu individuans vocatur: Cum enim mens duo individua ejusdem speciei, puta Petrum & Paulum inter se comparat, apprehendit in illa comparatione aliquid esse in Petro, quod etiam est in Paulo, videlicet humanitatem; & aliud, quod in Paulo non est, nec in quopiam alio homine, quod docendi causa Petreitatem appellabimus.

III. His præmissis dico, Unitatem numericam sive materiale[m] esse eam, quæ convenit singularibus, prout considerantur una cum differentiis individuantibus: Formalem, quæ rebus item singularibus convenit, sed quatenus abstractæ sunt à differentiis individuantibus: Cum enim humanitatem Petri, abstractam tamen & præcisam à Petreitate, unam esse humanitatem

tem dicimus, ea Unitas formalis est : at cum Petrum ipsum, hoc est, humanitatem Petri unà cum Petreitate consideratam, Unam vocamus, illa est Unitas numerica.

IV. Ex his utcunque manifestum est, quid inter Unitatem formalem, & materialem sive numericam intersit. Ut autem porro cognoscamus, quomodo hæc ad illam sese habeat, aliquanto accuratius agendum est de differentia individuante, quæ addita Unitati formali, sive naturæ, quæ formaliter est Una, conficit unitatem numericam. Explicandum autem est primo, quid sit ista differentia, quam efficiat compositionem, quæque sint illius effecta: deinde unde ista differentia sumatur.

V. Ac primo statuendum est contra Nominales, Differentiam individuantem aliquo saltem modo distingui à natura individuanda, nec esse unamquamque rem per se primò atque immediate individuum. Natura enim individuanda ex se indifferens est ad omnia individua ejusdem speciei; at natura individuata non est amplius indifferens. Ergo differentia individuans aliquo saltem modo differt à natura individuanda efficitque aliquam compositionem, cum illi additur: atque hoc verum est in Creaturis solummodò: Deus autem, ejusque Essentia ipsa per se primò atque immediate individua est, absque ulla compositione

positione ex natura individuanda, & differentia individuante: quia Singularitas est de illius Essentia.

VI. Differentia individuans non est accidens quodpiam, aut proprietas, essentiae Entis individuandi superaddita, nec *ἄλλοις-μεν ἰδιότητων ὅ ἐκ αὐτῆς ἄλλῃ τινός ποτε τὸ αὐτὸ γένοιτο*, id est, collectio proprietatum, quæ nunquam in alio eadem esse possit. Nam accidens aut collectio accidentium non efficit, ut individuum ab individuo diversum sit, sed hanc diversitatem indicat ac demonstrat; accidentia enim individua, individuum subiectum inveniunt atque præsupponunt.

VII. Non est etiam differentia individualis; modus aut positivum quidpiam, quod suâ naturâ, sive ex naturâ rei ac citra mentis operationem differt à natura individuanda: nihil enim est positivi in humanitate Petri, quod non est in humanitate considerata præcisè atque abstracta à Petro, & quolibet alio individuo homine: quicquid enim existit ex seipso, singulare est atque individuum. Atqui natura individuanda, concepta sine omni alia re aut modo positivo existit: Ergo absq; omni alia re & modo positivo est singularis. Ac proinde differentia, quæ naturam illam singularem efficit, non est res aut modus positivus ab illa distinctus.

VIII. Restat ergò ut differentia individuans sit quædam res positiva, sed quæ sola ratione discrepet à naturâ individuanda, quæque per negationem concipitur atque explicatur. Illa enim ipsa natura, quæ, quatenus consideratur, ut communis multis individuis, dicitur individuanda; absque ulla Entitatis aut modi positivi accessione, dicitur individuata, quatenus in hoc vel illo individuo existit, & non in alio; humanitas enim non aliter individuatur aut contrahitur, quàm quia & quatenus in Petro aut in Paulo sic existit, ut non existat in alio.

IX. Ex quo sequitur compositionem ex natura individuanda & differentia individuante, esse compositionem rationis. In quo quidem convenit cum compositione naturæ specialis ex genere & differentia specifica, quæ & ipsa rationis & non realis compositio est: attamen ab ea in aliis multis discrepat. Nam differentia specifica ponit aliquid in una specie, cujus contrarium est in altera: sic hominis differentia est τὸ λογικόν, bestię differentia τὸ ἄλογον, quæ duo sanè contraria sunt: at differentia individuans nil ponit in uno individuo, quod quidem ad essentiam spectat, quod non item ponit in alio, præter hoc solum, quod Essentia aut natura hujus, non sit Essentia aut natura alterius: nihil enim aliud includitur in

conceptu essentiali Petri, quàm humanitas, quæ non sit alterius humanitas, quàm Petri: ita ut dici possit, inter duas species ejusdem generis intercedere discrimen essentialiale: inter duo verò individua ejusdem speciei discrimen essentialium, non essentialiale. Hinc fit, ut speciei Essentia resolvi possit in dissimiles conceptus: individui Essentia non item. Atque hæc est causa quod individua species non sunt, ut voluit Ramus; quodque species possit conservari in uno individuo, cum genus non possit conservari in una specie.

X. Effectum differentię individuantis est incommunicabilitas: rem enim singularem reddit incommunicabilem pluribus inferioribus. Si enim res spectetur in Unitate formali, hoc est, præcisa à differentia individuantem, non est quidem necesse ut actu sit communis pluribus inferioribus; nil tamē impedit, quominus pluribus communicari possit; vel etiam actu communetur. ex. gr. cum Deus Adamum condiderat, humana natura præcisa ab Adameitate & considerata in Unitate formali, in illo solo consistebat, sed ita ut cum pluribus communicari potuerit, & reverà fuerit communicata: at considerata cum Adameitate, quæ Adamus unus erat Unitate numerica non magis communicari potuit pluribus, quàm ut consideretur alter Adamus & idem. Dixi disertè naturam individuantem

tem non posse communicari pluribus inferioribus : nam ut pluribus suppositis communicetur, non est impossibile. Divina enim Essentia, etsi per se primò sit singularis, communis tamen est tribus suppositis sive personis, ut ex Theologia planum est.

XI. Id unde individualis differentia sumitur, quod explicandum superest, vocatur Principium individuationis, de quo multa admodum intricatè disputata sunt à Physicis. Scotus principium individuationis dixit esse *hæceitatem* vel *ecceitatem*, id est, id quo unumquodque dicitur hoc aut hæc res; vel quo fit, ut dici queat, ecce ista res. Sed meâ opinione fallitur : nam hæceitas ista vel est ipsa individui singularitas, vel differentia individualis, cujus hic fundamentum quæritur & principium internum.

XII. Thomas statuit principium individuationis esse materiam signatam, sed nihilo melius: Materia enim signata principium individuationis non est, neque quâ materia est, neque quâ signata est. Non quâ materia est; quia una eademque materia potest esse duorum individuorum : non etiam quatenus est signata; nam materia signata dicitur; vel quæ quantitate, vel quæ aliis accidentibus est affecta. Materia quantita non est principium individuationis: quia si statuis, quantitatem non differre re ipsa à substantia materiæ, aut eam esse materiæ
coævam,

coævam, quantitas nihilo plus adferre poterit ad individuationem, quam ipsa materia; ut enim eadem materia, ita quoque eadem quantitas esse poterit in diversis individuis. Nee est, quod dicas *Quantitatem* interminatam eandem esse posse in diversis individuis, terminatam non item; nam homo & cadaver hominis sunt diversa individua, & tamen habent eandem quantitatem, & eodem modo terminatam: Si contendas quantitatē non esse materiae coævam, sequetur inde, eam posteriorem esse individui generatione, & ex formæ cum materia conjunctione resultare, ac proinde non poterit esse principium individuationis. Materia affecta aliis accidentibus, etiam non est principium individuationis: quia accidentia vel antecedunt individui generationem, vel sequuntur: quorū illa, quia communia sūt pluribus individuis, individua non queunt à se invicem discriminare; hæc non possunt esse principia individuationis, quia posteriora sunt individuo. Præterea materia signata tantum in substantiis corporeis locum habet, non in omnibus rebus. Quæ tamen ipsæ tantum abest ut per accidentia sint individua, ut accidentia potius individua sint, quia sunt in individua substantia.

XIII. Nos verò, ut alios errores non refellamus, arbitramur, non esse laborandum de principio ac fundamento individuationis,

duationis, sed potius de principio universalitatis. Omnis enim res quatenus est, eatenus singularis est; ac proinde principium individuationis nihil est aliud, quam cuiusque rei singularis essentia, sive ea sit simplex sive composita. Ac Deus quidem individuum est per simplicem substantiam, quemadmodum & intelligentiæ. Intercedit tamen discrimen; quia esse singulare est de essentia Dei; at hoc non est de essentia intelligentiarum, aut ullius creaturæ.

XIV. Substantiæ compositæ, ut corpora, individuantur per materiam & formā; ideoque corpora tamdiu sunt eadem individua, quamdiu eandem habent materiam & formam: at alterâ duarum mutata, continuo fiunt aliud individuum. Materia per seipsam individua est: Forma materialis per seipsam etiam individuat, sed dependenter a materia. Hinc fit, ut una materia possit diversas formas recipere successivè; & formæ materiales diversis materiis inesse nequeant, neque simul neque successivè: imò plures formæ ejusdem ordinis simul esse non possint in eadem materia. Anima rationalis, quæ hominis forma est, cum immaterialis forma sit, per seipsam solam est individua absque ulla dependentia à materiâ, in eoque sequitur conditionem intelligentiarum. Accidentia per subjectum individuantur, ut formæ ma-

D

teriales:

teriales: & ob eam causam idem numero accidens non potest migrare de subiecto in subiectum; nec duo accidentia ejusdem speciei numero possunt differre in eodem subiecto.

XV. Quod annihilatur, non potest idem numero produci de novo; ideoque si intelligentia, aut materia, aut anima rationalis interiret, non possent eadem numero resuscitari: quoniam non aliter interire possent, quam per annihilationem. Et licet formæ materiales & accidentia, propriè non annihilentur, sed relabantur in potestatem materiæ, ex qua erant eductæ, quod est annihilationi proximum; non possunt tamen eadem numero produci cum semel abolentur. Sed nec corporeæ substantiæ reproduci possunt, quæ constant materia & materiali forma: at homo qui constat ex corpore tanquàm ex materia, & ex anima immateriali tanquàm ex forma, idem numero qui interit, in vitam resuscitari potest. Quia enim neque materia in nihil abit, neque forma relabitur in potestatem materiæ, nihil causæ est, cur non possit idem numero reparari. Nec obstat, quod anima vegetativa & sensitiva, & forma corporeitatis aboleatur: hæc enim, cum sint dispositiones materiæ solummodò, non faciunt ad unitatem numericam.

CAP. XIII.

De Unitate Universalis.

T H E S I S I.

VNitas Universalis est, quæ convenit rebus, quatenus indivisæ sunt in plures res ejusdem nominis & essentiæ, & aptæ ut in eas dividantur: Unitas enim hæc duo postulat, Unitatem sive indivisionem, & Communitatem sive aptitudinem ad divisionem & multitudinem. Sic animal, ut est Universale, in se unum est (unâ enim definitione potest explicari) & aptum est dividi in hominem & bestiam.

II. Unitas illa atque indivisio debet esse posita in actu ipso; Communicabilitas etsi sæpè sit in actu sita, satis tamen est si sit in potentia. Sic Sol universale quoddam est, & tamen ejus natura non communicatur actu pluribus, sed aptitudinem solum habet aut non repugnantiam, ut pluribus actu communicetur. Illa non-repugnantia sita est in eo, quia non implicat contradictionem, plures dari Soles. dicitur igitur Solis natura universalis, quia & huic vero Soli, & aliis quos fieri non repugnat, communis est.

III. Hinc apparet, quomodo Unitas hæc differat ab Unitate numericâ & formali:

Unitas enim numerica, includit repugnantiam ad multiplicationem sui & divisionem in plura ejusdem nominis & rationis: Unitas formalis neque repugnantiam includit neque non-repugnantiam: sed indifferenti modo se habet ad utramque, neutram includit, & neutram excludit: At Unitas universalis includit non-repugnantiam, ad multitudinem, in eaque consistit. Hoc discrimen profecto est subtile, ideoque in eo explicando cautè loquendum est. Ex gr. rectè dicitur Unitas formalis non habet repugnantiam ad multitudinem & divisionem in plura ejusdem naturæ: at non rectè dicitur aut verè, Unitas formalis habet non repugnantiam: hoc enim Unitatis universalis est.

IV. Unitas universalis non est in ideis, siue in rebus separatis ac sejunctis à singularibus, ut Platonem docuisse passim testatur Aristoteles: nam si darentur ejusmodi ideæ, quæ per se ac seorsim à singularibus existerent, essent sanè singulares; quicquid enim per se existit, singulare est: atqui Unitas universalis non potest esse in rebus singularibus, ut singulares sunt: hætenus enim Vnæ sunt unitate numerica, quæ ab Unitate universali differt, ut ex præcedentibus liquet.

V. Unitas universalis non est in rebus ante mentis operationem, sed per mentis operationem fit, rebusque tribuitur per denominationem.

nominationem externam, quæ sumpta est ab unitate conceptûs, plura individua ejusdem speciei in unitate formali, id est, abstracta à differentia individuali, repræsentantis.

VI. Quod ut intelligatur, observandum est individua ejusdem speciei sibi admodum esse similia quo ad naturam, si illa consideretur abstracta à differentiis individuantibus. Sic duo homines, puta Petrus & Paulus, sibi invicem ad amissim similes sunt, quo ad humanitatem: Si autem sint dissimiles, illa duorum hominum humanitas non est una, sed gemina humanitas; Unitas enim formalis à numerica solâ ratione distinguitur; ac proinde multiplicatur secundum numerum individuorum æquè ac Unitas numerica. Cum ergò humanitas, quæ est in Petro absque intuitu Petreitatis sit una humanitas formaliter, & humanitas Pauli item sit una, sequitur duas esse humanitates reipsâ, & non unam. Quia tamen humanitas Petri & humanitas Pauli absque intuitu differentiarum individuantium, inter se ita similes sunt, ut nihil una includat, quod non includat altera; mens apprehendit utramque, imò omnium hominum humanitates unico conceptu: ut enim pictura ovi unius repræsentat simul omnia ova ejusdem speciei propter exactam eorum similitudinem: ita quoque fit, ut conceptus, qui est pictura rei in mente,

repræsentans naturam unius individui absque differentiis individuantes, simul repræsentet naturas omnium individuorum ejusdem speciei ob convenientiam, & similitudinem earum in unitate formali. Illæ ergo multæ individuorum naturæ dicuntur una natura, non quia per se sint unum quid, sed quia sunt objectum unius conceptus.

VII. Hæc sententia sic probari potest: Si quæ res per se & absque operatione intellectus essent universales & unæ, vel essent æternæ, vel factæ: Æternas illas affirmare nimis est absurdum, cum id soli Deo competat. Si factæ sunt, singulares sunt: quia quicquid per actionem esse incipit, singulare est, cum omnis actio sit singulare. Si dicas universalis non fieri per se, sed in & per singularia, ut accidentia fieri dicuntur, cum subjectum sit; non tollis difficultatem: nam quicquid fit in & per singularia, id ipsum debet esse singulare.

VIII. Interim non assentimur Nominalibus, qui putant universalis esse pura nomina; nam non solum fatemur, res esse ante mentis operationem quæ dicuntur Vniversales, quod illi quoque fatentur; Sed etiam fatemur, esse in rebus citra mentis operationem Vniversalitatis fundamentum, nempe exactam similitudinem illam plurium individuorum ejusdem speciei

ciei in unitate formali, quod illi non concedunt. In quo & dissidemus à Scoto, qui similitudinem illam plurium individuorum in Vnitate formali vult esse veram Vnitatem, atque ipsam adeò Vniversalitatem. Nos verò ut singula individua per se una esse profiteamur, idque non solum Vnitate numerica, sed & formali: ita plures Individuorum naturas, unam esse naturam absque mentis operatione, sanè negamus. Similitudinem aliquam & convenientiam agnoscimus; Vnitatem non item.

IX. Objicere quis posset, definitiones, demonstrationes & scientias esse Vniversalium; easdemque esse de rebus, & non de mentis nostræ conceptibus: ac proinde Vniversalia esse veras res, & non fieri per operationem intellectus. Sed non est difficile hoc argumentum solvere. Definitiones enim, demonstrationes & scientiæ versantur sanè circa res, & circa Vniversalia: sed non quatenus actu sunt Vniversalia, sed quatenus similitudinem habent inter se in Vnitate formali, quam diximus esse Unitatis fundamentum. Neque verò necesse est ad unitatem Conceptus (quod tamen qui secus sentiunt vehementer urgent) ut objectum habeat veram ac propriè dictam Unitatem, sed sufficit, ut plura inter se similitudine quâdam convenient: ita ut Conceptus unum ex multis apprehendens, cætera omnia simul repræsentet.

X. Porro ex Monlorio sic disputat Kerkermannus; ad Universalitatem duo tantum necessaria sunt, Unitas & Communitas: at utraque reperitur in rebus ante & citra mentis operationem; nam Vniversales unæ sunt, quia unâ definitione explicantur: Communes, quia multiplicantur in individuis. Respondeo primo non esse Vnitatem aliquam in rebus, puta in humanâ naturâ, præter Vnitatem formalem, quam diximus cum individuis multiplicari. Nec ea necessaria est ad Vnitatem definitionum; sufficit enim illa sæpè repetita individuorum convenientia in Vnitate formali. Secundo nego res, quæ Vniversales dicuntur, propriè communicari, sed tantum multiplicari. Communicari enim dicitur res, quæ absque divisione sui, aut multitudine pluribus communis sit: sic communicatur Essentia Divina tribus personis.

XI. Objici etiam solet, Naturas rerum per Differentiam individuantem contrahi ac reddi singulares: ac proinde per se communicabiles esse atque Vniversales citra mentis operationem. Non enim satis intelligi aut explicari potest, quomodo humana natura dicatur contrahi ac terminari ad Petrum per Petreitatem, si non sit omnibus hominibus communis. Respondeo per differentiam individuantem non contrahi naturam aliquam, quæ revera multis erat

erat communis, sed hoc tantum effici, ut naturæ, cui per se non repugnabat esse in pluribus per multiplicationem individuorum, jam repugnet ista multiplicatio.

XII. Vnitas universalis fit per actionem intellectus absolutam, quæ naturas rerum abstrahit à differentiis individuantes: sed non absque prævia comparatione: non potest enim fieri, ut mens nostra concipiat id, in quo individua conveniunt, relictis propriis eorum differentiis, nisi prius ea inter sese compareret; nam absque comparatione non apparet, in quo conveniant, & in quo differant.

XIII. Ad Unitatem universalem revocari potest unitas eorum, quæ dicuntur *τὰ αὐτὰ ἐνός*, vulgò, sed perperam, Analoga attributionis; nec tamen omnia, sed ea solum, quæ pluribus attribuuntur denominatione internâ, veluti cum Ens dicitur de substantia & accidente: Analoga proportionis, veluti cum radix in plantis, & id, quo animalia cibum admittunt, communi vocabulo os dicitur: aut Analoga attributionis: externæ, veluti cum animal dicitur sanum denominatione internâ; urina, cibus, exercitium, &c. denominatione externâ, potius homonyma vocabula sunt, quàm Universalia, ideoque Unitatem universalem non habent.

CAP. XIV.

De speciebus & gradibus Unitatis.

T H E S I S I.

Dividi etiam potest Unitas in Unitatem simplicitatis, & compositionis, quarum illa rebus simplicibus; hæc compositis competit.

I I. Simplicitas est Unitas carens omni multitudine: Compositio est unio plurium inter se. Quemadmodum autem omnem Unitatem modum Entis esse diximus; ita impræsentiarum statuendum est, simplicitatem & compositionem esse differentias & modos Unitatis, sed modos inseparabiles. Et licet simplicitatem concipiamus & explicemus per negationem compositionis, utraque tamen revera est positivum quiddam, quo res & Una est & tali modo Una.

I I I. Simplicitas unius modi est: at Compositio variè variatur; dividi enim potest in Realem, Rationalem, & Modalem. Compositio realis est, cum Entia distincta reipsa uniuntur. Hæc iterum duplex est: vel enim fit ex iis quæ actu sunt, vel ex potestate & actu, quarum illam docendi causa, actualem, hanc potentialem nuncupabimus. Compositio actualis vel fit per continua-

tinuationem vel per aggregationem : Per continuationem, cum plura confusis extremitatibus sic coalescunt, ut ex iis fiat unum continuum : veluti cum aqua aquæ, aut aër aëri adjungitur, habetque locum tam in heterogeneis, quàm in homogeneis. Compositio per aggregationē fit, cum plura servatis suis superficiebus contigua sunt, ut fit in acervo lapidum, aut cum plura ordinem habent aliquem inter se; idque vel à natura, ut in mundo; vel ab institutione, ut in exercitu, Ecclesia, Republica, &c.

IV. Compositio potentialis dicitur, cum duo ita uniuntur, ut alterum sit in potentia ad alterum, alterumque sit actus & forma alterius. Quod in potentia est ad aliud, semper est substantia quædam; eaque actuat vel per informationem, vel per inhærentiam. Per informationem, cum potentia in suo genere imperfecta, actum sui generis, id est, actum substantialem adsciscit, & cum eo constituit corpus, seu corpoream substantiam, ita ut potentia materiæ, actus formæ vicem gerat. Per inhærentiam, cum potentia in suo genere perfecta adsciscit actum alterius generis sive accidentalem, & cum eo constituit Ens concretum : ut album, nigrum, &c. huc refer res arte factas, meteora, & id genus alia.

V. Cum autem in omni compositione sit Unio quædam plurium, sequitur compositionem duobus modis dici rationalem;

Primo, cum multitudo; Secundo, cum unio pendet à ratione. Compositio rationis est eorum, quæ sola ratione differunt, veluti cum unam eandemque rem dissimilibus conceptibus apprehendimus. Talis compositio est ex genere & differentia, ex essentia & existentia, ex Ente & relatione, privatione aut denominatione externa, & si quæ sint aliæ. Hæc compositio non pugnat cum simplicitate: nihil enim ita simplex est, quod mens non queat apprehendere dissimilibus conceptibus; ideoque non est vera compositio.

VI. Compositio rationalis secundi generis, est, cum quæ multa sunt, intelligi possunt uno eodemque conceptu. Huc pertinet primo, omne Universale, siue genus sit siue species, quatenus ex inferioribus coalescit: Secundo æqualitas & similitudo, tum simplex, tum analogica: Tertio convenientia rerum in causis externis, in effectis, subjectis, & adjunctis externis.

VII. Compositio modalis est, cum quid componitur ex Ente & ex modo, qui natura sua ab Ente distinguitur. Quod ut intelligatur, observandum est, modos quosdam distingui sola ratione à re modificata; veluti cum *per se subsistere* & *esse in subjecto* dicuntur modi, qui Enti additi substantiam & accidens constituunt; aut cum Unitas dicitur modus quo Ens indivisum est: alios non sola ratione, sed sua natura distingui à re mo-

re modificata; & hœc rursus vel separabiles esse à re modificata, vel inseparabiles: Ex. gr. contractio est modus manûs; & figura est modus ceræ aut æris, sed uterque separabilis; at hypostasis sive substantia est modus divinæ essentiæ constituens Personam, ab eaque prorsus inseparabilis est. Quod ad modos primi generis attinet, non efficiunt illi veram compositionem: sed tantum compositionem rationis: at modi secundi generis sive separabiles sint, sive inseparabiles, compositionem efficiunt diversam à compositione rationis.

VIII. Cæterum in hisce modis Unitatis, reperitur magis & minus: ut non tam species sint, quàm gradus: nam sicuti habitus plerique ac proinde privationes intenduntur & remittuntur; ita quoque unitas & multitudo, quas diximus ita ferè opponi, ut habitum & privationem, suis gradibus variantur, saltem in diversis subjectis. Ac primum quidem locum occupat simplicitas; nihil enim magis est Unum, quàm quod simplex est: simplicitatem enim non minuit ea compositio, quæ fit ex iis quæ sola ratione distinguuntur. In compositis præcipuum locum tenent quæ constant modo & re modificata: secundum, quæ conflata sunt ex materia & forma, ut corpora: tertium locum tenent, quæ componuntur ex partibus continuis: ita tamen, ut homogenea sint magis una quàm heterogenea: quarto

quarto loco sunt concreta ex subiecto & accidente: quinto aggregata, in quibus etiam aliqualis differentia est: magis enim sunt Una quæ ordinem habent, quam quæ sine ordine compinguntur. his sexto loco succedunt, quæ ratio componit, hæc enim reverà nullam habent unitatem.

IX. Ex iis quæ reapse Una sunt & non per operationem intellectus, quædam dicuntur Una per se, quædam per accidens. Una per se dicuntur: primo, quæ simplicia sunt, ut Deus, Angeli: deinde quæ ex diversis rebus composita, vel per informationem uniuntur, ut substantiæ corporeæ, vel per continuationem. Vnum per accidens dicitur, cum ei quod per se Vnum atque in suo genere perfectum est, aliud quid adjungitur. Quod fit duobus modis: primo cum accidens adjungitur substantiæ, ut fit in iis, quæ dicuntur concreta; licet enim accidens substantiæ uniatur, idè tamen non efficit Vnum per se, sed per accidens, quia unitur per inhærentiam, quæ est informatione posterior: secundo, cum adiunguntur plura ejusdem generis, puta vel substantiæ cum substantiis, vel accidentia cum accidentibus, quæ tamen discreta manent, ac divisa à se invicem, ut in aggregatis; nec refert, an ordine fiant ut in exercitu, an sine ordine colligantur, ut in acervo.

X. Discrimen inter Vnum per se & Vnum per

per

per accidens optimè explicatur hoc axioma: *Ens additum ei, quod omnem perfectionem suo generi debitam actu obtinet, efficit Vnum per accidens.* Itaque accidens additum substantiæ, efficit Vnum per accidens, quia non est perfectio debita substantiæ, ut est substantia: at Forma addita materiæ efficit Vnum per se, quia Forma materiæ debetur ad constituendam substantiam. Similiter acervus lapidum est Vnum per aggregationem, sive per accidens, quia lapis unus non pertinet ad perfectionem alterius; At homo licet ex diversis partibus constet, per se tamen Vnum est, quia pars unaquæque in suo genere destinata est ad perfectionem majorem, sive ad constitutionem Totius, atque insuper cæteris partibus sic adjungitur, ut ex omnibus constituatur continuum quidpiam.

CAP. XV.

De Diversitate sive Distinctione & Convenientia:

THESIS I.

AD Vnitatem pertinet Convenientia; ad multitudinem Diversitas & Distinctio: nam in omni Convenientia quædam est Vnitas, & in omni distinctione quædam multitudo: hæc tamen non
con-

convertuntur simili modo; nam in omni quidem multitudine reperitur aliqua distinctio; at Convenientia non reperitur in omni Unitate, sed in ea solum quæ compositione constat, & in hac ipsa unitate, non qua unitas, sed qua ex multis constat, convenientia reperitur: siquidem, quicquid convenit, alicui convenire necesse est, ut aliqua multitudo distinctioque intervenire debeat inter illud quod convenire dicitur, & aliud cui dicitur convenire.

II. Cum autem omnis Convenientia distinctionem aliquam videatur præsupponere, prius de Distinctione agemus, deinde de Convenientia. Distinctio sive Diversitas dividitur primo, in distinctionem rationis, & in eam, quam vulgò vocant distinctionem ex natura rei. Distinctio rationis est, quæ ab intellectu proficiscitur, unam eandemque rem pluribus conceptibus apprehendente.

III. Distinctio rationis vel est distinctio rationis ratiocinantis, vel rationis ratiocinatæ. Ratio enim & λόγος vel mentē significat vel quidditatem, quæ est λόγος τῆς πρὸς αὐτὴν εἰσῆς. Mens dicitur ratio ratiocinans, quidditas ratio ratiocinata. Ergo distinctio rationis ratiocinantis dicitur, quæ sumitur à mente solâ, hoc est, à pluribus conceptibus, quorum singuli uni eademque rei adæquantur, ideoque omnes inter se similes sunt. Tali modo distinguuntur Polyonyma vulgò Syn-

gò Synonyma : ut ensis & gladius , mulier & foemina. Hæc distinctio tam exilis est, ut nō impediatur quominus propositio sit identica, quæ constat subjecto & prædicato ejusmodi quæ non aliter quàm hac distinctione differunt : quippe tota pender ab operatione mensis , absque ulla diversitate aut causa diversitatis in rebus.

I V. Distinctio rationis ratiocinatae est, quæ quidem proficiscitur à mente, hoc est, à pluribus conceptibus , sed quorum singuli uni alicui eidemque rei inæquales ideoque inter se dissimiles sunt. Causa hujus inæqualitatis & dissimilitudinis in pluribus conceptibus de eodem Ente formalis est in ipso Ente : nempe diversitas in quidditate, sive in ratione $\tau\acute{\epsilon}\tau\eta\ \eta\upsilon\ \epsilon\iota\varsigma\alpha\gamma$; hinc enim fit, ut una res inæqualibus & dissimilibus conceptibus apprehendatur. Neque verò mirum videri debet, uni Enti diversas quidditates & definitiones attribui posse; Quidditas enim & definitio non semper rebus attribuuntur secundum nudam Entitatem, sed sæpissimè secundum diversos Entitatis suæ respectus, aut aliquid eorum, quæ supra diximus esse media inter Ens & Nihil, excipio solummodò modos quosdam, qui distinctionem faciunt ex natura rei, ut postea patebit. Sic acclive & declive quidditate differunt, cum tamen unum intervallum sit, quod pro diverso respectu dicitur acclive & declive. Scotus, confide-
rans

rans quidditatem in rebus esse absque mentis operatione, negavit hanc distinctionem esse distinctionem rationis, eamque vocavit distinctionem ex naturâ rei: sed non videtur satis intellexisse vim horum vocabulorum. Concedimus sanè Scoto, causam primam & fundamentum hujus distinctionis à rebus esse: sed negamus tamen ob id esse distinctionem ex naturâ rei, quia nullam multitudinem rerum à se invicem distinctarum, præsupponit (competit enim Deo quoque in quo summa est simplicitas) quod tamen in distinctione ex naturâ rei videtur necessarium. Ex quibus omnibus apparet, quam perperam judicent, qui omnem distinctionem realem esse volunt, quæ illis rebus tribuitur, quæ definitione differunt.

V. Distinctio hæc vel inter subordinata reperitur, puta inter genus & speciem, aut differentiam specificam, vel inter coordinata, aut saltem inter ea, quæ ut coordinata concipiuntur: ut inter definitionem & definitum, inter speciem & differentiam specificam, inter rem & essentiam rei, ut inter carnem & essentiâ carnis, quam vocat Aristoteles τὸ εἶναι σαρκὸς, & id genus alia infinita; in quibus omnibus hoc spectatur, ut eadem Entitas dissimili modo concipiatur.

VI. Distinctio ex natura rei rebus per se competit absque ope & respectu ad intellectum. Hæc distinctio ex separatione cognoscitur;

gnoscitur ; nam quæcunque separari possunt , distinguuntur ex natura rei. Separari dicuntur , quæ diversis locis aut temporibus existunt ; aut quæ sunt in subjectis reipsa diversis : non etiam ea , quorum unum existit sine altero ; hoc enim in ijs etiam reperitur , quæ ratione differunt. Alexander enim & Philippi filius , verbi gr. non differunt ex natura rei : attamen Alexander desiit esse Philippi filius , ut tamen non desineret esse Alexander. Non putem autem , notam hanc distinctionis ex natura rei cum eâ converti posse , etsi illud à multis temerè sit assertum ; non enim ea omnia , quæ distinguuntur ex natura rei , separari possunt ; nec , semper quæ separari nequeunt , ea omnia distinguuntur ex naturâ rei.

VII. Distinctio ex natura rei ; vel realis est , vel modalis. Distinctio realis est , vel positiva vel negativa. Positiva dicitur , quâ distinguitur unum Ens ab alio Ente , ut Petrus à Paulo : Negativa , qua distinguitur Ens à sui privatione , ut visus à cæcitate ; vel à sui negatione , ut Ens à non Ente ; vel etiâ privationes habituum realiter à se invicem distinctorum ; ut cæcitas à surditate. Quamquam hæc distinctio improprie satis realis dicatur. Distinctio positiva vel est mutua , vel non mutua : mutuam voco cum utrumque ab altero distinguitur realiter & positive : veluti , cum distinguitur totum à toto , aut pars à parte ; totum autem integrale intelligo

intelligo & illius partes. Distinctio non mutua vocatur, qua duorum alterum ab altero distinguitur realiter & positivè, sed non vicissim; sic totum distinguitur re ipsa & positivè à qualibet sui parte, sed pars non videtur realiter distingui ab eo toto, cui inest, aut saltem non distingui positivè.

VIII. Diversitas & distinctio realis positiva vel essentialis est, vel accidentalis: quarū illa ab Essentia petitur, hæc ab accidentibus, vel ab eo, quod extra essentiam est. Diversitas essentialis vel est generica, vel specifica, vel numerica. Diversitas generica est, qua summa genera τῶν ὄντων, & quæ sub ijs continentur, differunt à se invicem: ut substantia & qualitas. Dixi *summa* genera: quia species & genera subalterna differunt specificè solummodo: dixi genera τῶν ὄντων, ne quis huc referat decem summa genera τῶν κατηγορημάτων, quæ omnia profecto non differunt realiter. Diversitas specifica est, qua inter se differunt species ejusdem generis, & quæ sub ijs continentur. Numerica, qua differunt ejusdem speciei individua à se invicem.

IX. Porro summa genera ita differunt, ut nihil habeant in quo convenient, ideoque dicuntur *primo diversa*, & *tota essentia differre*. Individua ejusdem speciei dicuntur tota essentia convenire; nihil enim habent diversitatis, si secundum essentiam specten-

ſpectentur, præterquam quod unum non ſit alterum. At ſpecies parte aliqua eſſentiæ conveniunt, nempe communi genere, & parte altera ſunt diverſæ, nempe quoad differentias contrarias. Itaque diverſitas generica eſt maxima, numerica minima, ſpecifica media: in primâ enim nulla eſt convenientia aut unio; in ſecunda & tertia eſt aliqua convenientia, & unio quædam, ſed quæ à ratione eſt.

X. Diverſitas accidentalis longè lateque patet. huc pertinet Imparitas & Diſſimilitudo: item diverſitas in in cauſis, effectis, ſubjectis, adjunctis, & ſi quid præterea nominari poteſt, quod non pertinet ad rerum eſſentiam. Ubi tamen nota, in omni diſtinctione ac diverſitate accidentali, ſi realis ſit, aliquam eſſentialem diſtinctionem includi, ſive genericam, ſive ſpecificam, ſive numericam.

XI. Diſtinctio modalis eſt, qua res una eademque diſtinguitur à ſeipſa per diverſos modos. Nec refert ſive diverſi illi modi involvant repugnantiam, ita ut ſimul eidem rei in eſſe nequeant; veluti cum ſedens dicitur diſferre à ſeipſo ſtante: ſive ſine repugnantia in eadem re ſimul inveniantur; veluti, ſi quis in cera mollitiem diſtinguat à figura, aut ceram, quæ mollis eſt, à ſeipſa figurata. Huc pertinet diſtinctio perſonarum in una ſimplicique eſſentia. Cum res diverſæ modis diſtinguantur, ut Socrates

crates stans à Platone sedente, ea realis est distinctio.

XII. Convenientia, ut de ea etiam pauca dicam, est plurium aut quasi plurium Unio. Estque vel realis vel rationis. In convenientia rationis uniuntur plura; in reali, quasi plura: nam quæ multa non sunt, iis mens utitur tanquam multis, interposita scilicet distinctione rationis. Quod ut intelligatur, observandum est, Convenientiam & Distinctionem contrario se habere modo quoad hasce duas: nam quæ reipsa distinguuntur, ita conveniunt, ut non re, sed ratione fiant Unum; & quæ distinguuntur ratione, reipsa unum sunt; atque ita vice versa.

XIII. Præter hasce species non datur Convenientia modalis; diversæ enim res eundem numero modum habere nequeunt; & si quæ modos habeant ejusdem speciei, sed numero diversos, Rationis illa convenientia est: veluti cum ovum ovo convenit ob figuram: sola enim ratione duo ova uniuntur, cum sint reipsa diversa.

XIV. Convenientia, etiam ut Distinctio, dividitur in essentialem & accidentalem. Essentialis est vel subordinatorum, vel coordinatorum: & hæc rursus vel generica, vel specifica, vel numerica. Quarum convenientia subordinata & numerica, realis convenientia est; generica & specifica, rationis. Quæ genere conveniunt,
parte

parte solum essentiæ convenire concipiuntur : quæ specie, tota essentia. Convenientia accidentalis vel est paritas , vel æqualitas, vel similitudo, vel convenientia in causis , effectis, subjectis adjunctis, & id genus aliis, quæ extra rei essentiam sunt. Totum genus convenientiæ accidentalis , ad convenientiam Rationis pertinet : nam ut species diversæ unius generis , aut individua ejusdem speciei ; ita quoque, quæ eandem habent quantitatem, aut qualitatem aut quæ habent easdem causas, effecta, subjecta, aut adjuncta, non révera , sed ratione tantum unum sunt.

CAP. XVI.

De Oppositione.

T H E S I S I.

Realis diversitas Oppositionem includit, & ordinem, de quibus agendum est obiter. Opposita dicuntur, quæ neque de se invicem, neque de eodem tertio, secundum idem, ad idem, eodem modo atque tempore verè affirmari possunt.

II. Oppositorum quinque sunt species: contradicentia, privativè opposita, contraria, relativè opposita, & disparata.

III. Con-

III. Contradicientia sunt Ens & illius negatio : idque vel in terminis transcendentibus, ut Ens & non-Ens ; vel in certo rerum genere ; ut substantia & non-substantia, homo & non homo, &c. Contradicientia immediatè dividunt totam Entis latitudinem, ideoque nullum habent medium, de quo ambo simul negari possint : nihil enim nominari aut cogitari potest, quod non sit Ens aut non Ens, aut homo aut non homo, &c.

IV. Contradictio ergo est Oppositio-
num maxima ; idque non ob maximam extremorum dissimilitudinem & discrepantiam, sed ob irreconciliabilem pugnam ; si enim extremorum discrepantia spectetur, ea major est in Contrariis & in cæteris oppositionum generibus : nam album & nigrum sunt contraria ; album & non album contradicientia : sed album nigro dissimilius est, quam non albo : siquidem flavum, &c. non album est. At si spectetur pugna, ea major est inter album & non album, quia nihil inter ea medium est.

V. Hinc sequitur, Contradictionem esse mensuram omnium oppositionum ; ac proinde cætera quæ commemoravimus, ideò sunt opposita, quia contradictionem includunt : album enim & nigrum idcirco sunt opposita, quia album est non nigrum, & sic de cæteris.

VI. Neque verò solum in Oppositionum
gene-

generibus contradictio involvitur, sed & in aliis terminis quæ nullam aliam oppositionem per se induunt, quam contradictionem; veluti cum genus aut differentia, aut definitio, aut etiam proprietas, aut aliud quippiam negatur de re, ex quo sequitur etiam negatio ipsius rei: ut si quis diceret, homo non rationalis, ignis non calidus, sacrificium incruentum, aut aliquid tale; hæc enim omnia idem sunt ac homo non homo, ignis non ignis, sacrificium non sacrificium.

VII. Contradictionem proxime sequitur oppositio privativa, quæ est inter privationem & habitum, ideoque requirunt idem subjectum: non quod subjectum esse possit simul habitu præditum, & eodem privatum, sed quia non in alio subjecto unquam reperitur privatio, quam in quo reperitur habitus; nec habitus, nisi in quo reperiri solet privatio, in eoque distinguitur à contradictione, cujus extrema non habent idem commune subjectum. Ob eam causam privatio & habitus habent medium, de quo simul negari possunt, quod in contradictione non contingit: multa enim sunt quæ neque vident, neque tamen cæca sunt; at nihil est neque cogitari potest, quod neque videt, neque non videt.

VIII. Contraria sunt duo absoluta, quæ sub eodem genere plurimum distant.

E

Cum

Cum contraria dicuntur esse *duo*, distinguuntur à disparatis: cum dicuntur *absoluta* distinguuntur ab iis quæ relativè opponuntur. Nec obstat, quod vitium & virtuti contrarium sit & vitio, non enim est unica illa, sed duplex contrarietas: nam alia est contrarietas, qua avaritia liberalitati, alia est qua prodigalitati opponitur. Dicuntur contraria *plurimum distare* vel *ἄρ' εἰδ* vel *ἄρ' τὸ πᾶν*, id est, vel ratione formæ, ac naturæ, vel ratione loci seu intervalli: unde duplex etiam contrarietas oritur, altera quoad formam; ut inter calidum & frigidum, par & impar, rationale & irrationale: altera quo ad intervallum; ut superum & inferum, ante & post, &c. Contrarietas *ἄρ' εἰδ* non solum in qualitate est, ut Aristoteles sancire videtur in libro de Categor: sed etiam in substantiis aut saltem in differentiis substantiarum, atque adeò in omnibus categoriis, præterquam in quantitate, etsi omni contrarietati non sint posita convenientia vocabula.

IX. Contrariorum distantia nō est maxima simpliciter, sed sub eodem genere; vel proximo vel remoto. Si contraria non habeant idem genus proximum, sed diversa, ipsa quoque genera debent inter se esse contraria. Quod adeò verum est, ut etiam bonum & malum sub eodem genere sint, quatenus contraria sunt: quatenus autē transcenduntia sunt, non contraria sunt, sed privativè

vativè opponuntur. Hac parte distinguuntur contraria à privantibus & contradicentibus. Hæc enim sub eodem genere non continentur, quia alterum est alterius negatio.

X. Contraria dividuntur in mediata & immediata. Mediata dicuntur, quæ medium habent, quod ex utriusque extremi commistione, aut confusione componitur: vulgò dicitur medium Participationis; nam medium negationis est in omnibus contrariis, imò in omni oppositione, præterquam in contradictione. Contraria mediata sunt calor & frigus, albor & nigror, &c. Immediata dicuntur, quæ ejusmodi medium non habent, ut par & impar, liber & servus, rationale & irrationale, &c.

XI. Contraria se mutuo destruunt: idque ἀπὸς, hoc est, simul & semel, ut immediata; vel sensim & per partes, ut mediata. Horum alterum alterius contagione remittitur, atque iterum intenditur, cum à suo contrario liberatur: ideoque contraria non possunt esse in eodem subjecto, quod in immediatis caret dubio: nec aliter de mediatis sentiendum est; nam cum extrema commiscantur, desinunt esse contraria, & fiunt Unum quippiam; Sic tepor non est calor & frigus, sed una qualitas ex calore & frigore genita.

XII. Relativè opposita sunt, quæ id ipsum

sum quod sunt, oppositorum esse dicuntur, vel alio aliquo modo ad illa referuntur. Nihil autem sunt aliud, quàm relatum & correlatum, quæ manifestam habent oppositionem, si eidem tribuantur eodem respectu. Videntur autem excipi relata synonyma, ut simile & simile, sed in illis haud minor est oppositio quàm in cæteris.

XIII. Disparata sunt, quorum unum pluribus opponitur eodem oppositionis genere. Sic opponuntur diversa genera & quæcunque, sub diversis generibus continentur; ut substantia & qualitas, sonus & caro: item multæ species ejusdem generis; ut equus, asinus, bos &c. Sic etiam extrema opponuntur mediis, & media sibi invicem; ut album flavum, rubrum & cæteri colores.

CAP. XVII.

De Ordine.

THESIS I.

IN Ordine spectatur prius & posterius, sicuti & simul. Hæc dicuntur quinque modis, tempore, natura, dispositione, dignitate, & cognitione. Quid sit prius & posterius, & simul tempore, per se satis notum est: tantum nota, simul tempore dici quæ

quæ simul incipiunt & simul desinunt, & quorum alterum incipit, antequam alterum desijt.

I I. Prius natura dicitur duobus modis, existendi consecutione, & causalitate. Prius quoad existendi consecutionem dicitur, à quo non recipiatur existendi consecutio: sic animal prius est homine, quia si sit homo, sequitur esse animal: at si sit animal, non sequitur esse hominem; itaque existendi consecutio non recipiatur in animali, sed in illo deficit.

I I I. Prius causalitate dicitur, quod recipiatur quidem secundum existendi consecutionem, sed ita ut alterum quomodo-cunque causa sit, cur alterum existat. Sic Sol est prior sua luce; & Essentia subiecti prior proprietate, si proprietas sit res à subiecto distincta: Causalitas hic latè usurpatur, ita ut comprehendat quamlibet dependentiam. Huc ergò pertinet prioritas, quâ in divina Essentia Pater dicitur prior Filio, & uterque Spiritu Sancto; non quidem quoad Essentiam communem, sed quoad modum subsistendi. Ex quatuor causis, Materia, Forma, & Efficiens dicuntur priores quoad ordinem naturæ generantis; Finis quoad ordinem naturæ intendentis: Finis enim causa non est nisi in intentione, in executione est effectum.

I V. Simul natura dicuntur, quæ recipiuntur secundum existendi consecutionem,

& neutrum est causa, cur alterum existat. Huc pertinet primo relata, quæ relata sunt, & duo effecta ab eadem causa immediate promanantia; ut pater & filius, τὸ μελαπικρὸν, καὶ θυμωδισκὸν in homine: atque hæc dicuntur absolutè & simpliciter simul. Huc secundo loco referuntur, quæcunque in ejusdem generis divisione sibi opponuntur; ut homo & bestia. Hæc non sunt absolutè simul, sed tantum respectu communis generis genus debet esse synonymum: species enim generis homonymi non possunt dici simul, ne quidem quoad communionem generis.

V. Prius, posterius & simul dispositione non indiget longa explicatione: hoc tantum nota, quæ priora, posteriora, aut simul dispositione dicuntur, ea sic dici in ordine ad aliquod tertium: quod veluti mensura est & index illius prioritatis, quæ in dispositione est. Est enim in omni dispositione primum quippiam, cujus respectu cætera dicuntur priora, posteriora, aut simul, prout ab illo propius aut longius absunt. Ipsum verò primum dicitur prius cæteris, non quia minus abest ab initio, sed quia ab illo non abest, sed ipsum est initium.

VI. Non est etiam ignotum, quid sit prius, posterius, & simul dignitate: tantum observari velim, appellationem dignitatis non solum ad gloriam & honorem pertinere, sed ad quamcunque perfectionem
aut

aut aptitudinem ad finem.

VII. Prius cognitione autem dicitur, quod facilius cognoscitur, Græcis *πρῶτον*, id est, quod notius aut potius noscibilis est. Duobus autem modis aliquid altero notius esse dicitur, nempe vel κατὰ φύσιν, vel κατὰ ἡμῶς. κατὰ φύσιν notius esse dicitur quod notius est ijs, qui, relicto sensuum indicio & iudicio, res omnes, earumque seriem & nexum ita intuentur, uti sunt in se, quod Aristoteles dicit, *ἐν διακειμένης τῇ ἀλγύνοισιν*, id est, mentem benè dispositam habere. Nobis notius esse dicitur, quod prius faciliusque cognoscitur ab ijs, qui sequuntur indicium & iudicium sensuum.

VIII. Itaque naturâ notiora sunt, quæ à sensibus sunt remotiora : contrâ, notiora nobis, quæ sensibus nostris viciniora sunt, & omnium notissima, quæ in sensus nostros incurrunt. Sunt ergo singularia nobis notiora universalibus, & species generibus, effecta causis, composita simplicibus, totum partibus, materialia immaterialibus : quoad naturam contrâ.

IX. Cæterum nobis ea notiora dicuntur, quæ sensibus propiora sunt, quia omnem cognitionem nostram trahentes à sensibus, necesse est in acquirenda rerum cognitione sequi eum ordinem, quo res sensibus propiores sunt, vel ab ijs remotiores : Reliqua dicuntur notiora quoad naturam, quia

naturâ suâ talia sunt, ut, si per mentis nostræ imbecillitatem atque imperfectionem non staret, prius etiam intelligerentur: & revera etiam prius intelliguntur ab ijs, qui ab hac imperfectione liberati, per usum contemplationum, sensuum adminiculo relicto, res intelligunt eo ordine, quo inter se connexæ sunt:

CAP. XVIII.

De Veritate & Falsitate.

THESIS I.

Veritas alia simplex est, alia composita: quarum illa Entis affectio est ideoque Transcendentalis dicitur; hæc verò est affectio propositionis vel in mente, vel in verbis. Licet autem sola veritas simplex hujus loci esse videatur, tamen quia vocabulum hoc primo tributum est veritati complexæ, indeque tractum ad significandum veritatem simplicem, non abs re fuerit, quædam præmittere de complexa veritate, ut tantò facilius assequamur, quæ de simplici veritate dicemus.

II. Veritas complexa vel est in intellectu, vel in verbis sive enunciatione. Veritas in mente, est convenientia mentis cum rebus.

Dicitur

Dicitur autem mens cum rebus convenire, quando judicat conjuncta esse, quæ reverà sunt conjuncta; vel divisa, quæ reverà divisa sunt. Veritas in verbis duplex est, Ethica & Logica. Veritas Ethica est convenientia enunciationis cum intellectus judicio: convenit autem enuntiatio cum mentis judicio, cum ea pronunciat esse conjuncta aut divisa, quæ intellectus judicat esse conjuncta aut divisa. Veritas Logica est convenientia enunciationis cum rebus: convenit autem enuntiatio cum rebus quando pronunciat conjuncta vel divisa, non quæ mens conjuncta vel divisa judicat, sed quæ reverà conjuncta, aut divisa sunt.

III. Complexæ veritati opponitur complexa falsitas, eaque oppositio contraria est. Contrariatur autem complexa falsitas veritati secundum omnes species sive modos. Vero mentis judicio opponitur error, seu ignorantia καὶ ἀγνοῖν, aut prævæ dispositionis: Enunciationi Ethicè veræ opponitur mendacium: quæ enunciationi Logicè veræ opponitur, proprium nomen non habet, sed generali nomine enuntiatio falsa dicitur.

IV. Quemadmodum veritas & falsitas contraria sunt, ita quoque oriuntur ex contrarijs causis. Veritas judicij oritur vel ex recta apprehensione terminorum, vel ex rectâ sensatione, vel ex ratione bene cō-

cludente, vel ex enunciatione Logicè vera, ab altero prolata. Ex ijs causis contrario modo se habentibus oritur falsitas iudicij, puta ex mala terminorum apprehensione, ex hallucinatione sensus, ex ratione malè concludentè, aut ex falsa enunciatione. Veritas Ethica, & illi contraria falsitas, oritur ex sola voluntate proferentis enunciationem: Veritas & falsitas Logica oritur vel ex scientiâ & ignorantia dicentis, vel ex ejus voluntate.

V. Veritas simplex, ut ad illam jam accedam, duobus modis considerari potest, nempe, vel materialiter vel formaliter. Materialiter considerari dicitur, cum res ipsa consideratur ac cognoscitur, quæ vera denominatur. Hoc sensu dicitur tota Philosophia occupata in Veritatis investigatione. Formaliter considerari dicitur, cum consideratur illa ipsa ratio, in qua veritas cujusque rei consistit: atque hoc modo spectat veritas ad Metaphysicam, estque Transcendentalis affectio Entis æquè ac Unitas. De hac veritate dixit Arist. *ἐκαστὸν ὡς ἔχον τὴν εἶναι, ὅτι καὶ τὴν ἀληθείαν*, id est, ut unumquodque se habet ad esse, ita se habet quoad veritatem, lib. 2. Metaph. c. 1.

VI. Veritas simplex vulgò putatur esse convenientia Entis cum intellectu. Si opponas illi sententiæ, Ens verum dici absque ullo respectu ad intellectum; Respondent, non posse quippiam ita concipi, ut
non

non habeat respectum ad intellectum vel humanum vel divinum. Si urgeas; id omne quod absolutum est considerari posse absque respectu ad aliud, ac proinde Ens considerari posse absque Veritate, si Veritas ponatur esse posita in conformitate cum intellectu, idque haud dubiè absurdum esse; Respondent porro, Veritatem non esse sitam in eo, ut Ens actu sit intellectui conforme, sed in eo ut intellectui possit conformari. Si quæras porro, quid hæc conformitas adjiciat ad rationem eam, per quam Ens est Ens; respondent, denominationem externam, petitam à conceptu mentis vel humanæ vel divinæ, cui Ens conformetur, vel verè conformari possit.

VII. Hæc speciosa sunt, &, si vera non sunt, sunt vero proxima. Ne tamen ijs assentiar qui sic philosophantur, hæc ratio facit: quod, quando rem aliquam veram denominamus, non respiciamus ullo modo intellectum, aut conceptum intellectus. Cum enim verum aurum dicimus, quis putet aurum intelligi prout est intellectui conforme, aut conformabile? hic non ad vulgus solum, sed & ad sapientes provo co, qui omnes verum aurum vocant, quod ab eo distinguitur, quod aurum non est, sed tamen esse videtur: Atqui verum aurum non distinguitur ab eo, quod non est aurum, sed tantum videtur esse, quia intelle-

ſui conforme eſt aut conformabile ; ſed
 contra, quia reverà aurum eſt , ideo eſt in-
 tellectui conformabile. Quemadmodum
 enim ὁ ἀληθὴς λόγος (verba ſunt Ariſtot. cap.
 12. de categ.) ὑδαμῶς αἰπὸς ἐστὶ τῷ εἶναι τὸ
 πρᾶγμα , τὸ μὴ τοιγὰ πρᾶγμα φαίνεται πως
 αἰπὸν τῷ ἀληθῇ τῷ λόγῳ εἶναι : Ita etiam Ve-
 ritas in rebus, ſive vera rerum eſſentia , po-
 tius eſt cauſa conceptuum , aut vero quod
 res concipi poſſit , quam contra : Pat enim
 utrobique eſt ratio. Nam ut res eſt obje-
 ctum τοῦ λόγου ſive rationis , ideoque &
 cauſa Veritatis quæ eſt in ratione : Ita quo-
 que res ſimplices ſunt objecta ſimplicium
 conceptuum , & per conſequens cauſæ
 veritatis , quæ eſt in ſimplicibus conce-
 ptibus. Non igitur conceptus cauſa eſt
 aut meſura veritatis , quæ rebus com-
 petit.

VIII. Alij Veritatem volunt eſſe con-
 conformitatem cum ideâ ſua. Sed quid in-
 telligunt per ideâs ? an ſeparatas à rebus
 ſingularibus ὑπάρξεις ac naturas ? at nihil
 abſurdius eſt quam tales naturas ſive ideâs
 imaginari. Demus tamen ipſas eſſe ; cum
 ipſi idearum authores fateantur ipſas ideâs
 maximè veras eſſe, ὄντως ὄντα , cum reli-
 qua vix velint fateri eſſe vera Entia, ſequi-
 tur non omnem Veritatem conformita-
 tem eſſe cum ideis. Ut nihil dicam ideâs
 illis rebus non fuiſſe attributas, in quibus
 prius eſſet aut poſterius. An ideâs dicent
 eſſe

esse simulachra & conceptus quarumcunque rerum in suis causis? Artificialium in artifice, & cæterarum in causa prima nempe Deo? & res esse veras quia hisce simulachris sunt conformes? Sed nec hoc rationi consentaneum est: nam licet ideæ causæ sint accidentium ac circumstantiarum, quæ sunt in rebus, non sunt tamen causæ essentia aut veritatis quæ est in essentia rerum. Nam cum Architectus ideam animo format futuri ædificij, ædificium est objectum & mensura illius ideæ, ac proinde non habet veritatem ab illa idea, sed idea habet veritatem ab ædificio; nec causa est ædificij, nisi quoad certum structuræ modum, quem Architectus animo proposuit. Si ergo quæram, cur ædificium sit certum ædificium? an respondebis, quia est conforme ideæ architecti? Quid si architectus in struendi modo ab idea sua aberrasset, an eo minus fuisset verum ædificium? nullo modo. Jam si unaquæque res ita se habeat in Veritate, ut se habet *ὡς τὸ εἶναι*, ut 2. Metaph. cap. 1. certè Deus erit maximè verus: At cui ideæ ille conformis est, qui nullam habet sui causam?

IX. Et si autem facilius sit aliorum sententias convellere, quam eam ponere quæ convelli nequeat, conabor tamen, aliorum opinionibus rejectis, meam stabilire. Mea ergo est opinio, Veritatem nihil esse aliud quam convenientiam rerum cum sua definitione

nitione, aut principijs essentialibus: Nam cum verum hominem dicimus, quid aliud dicimus, quàm hominem reverà habere Essentiam humanam, aut constare ex principijs humanitatis? Hæc convenientia nihil addit Enti, quam modum positivum sola ratione ab Ente distinctum; quem tamen explicamus per negationem Esse ficti aut apparentis: Nam cum verum aurum dicimus, nihil aliud dicimus, quam id, quod aurum vocamus, tali modo se habere, ut congruat cum verà definitione auri; quod nihil aliud est, quam non esse tale quippiam, quod videtur aurum esse tantum, sed reverà non est.

X. Veritas simplex non solum reperitur in rebus, sed etiam in conceptibus & vocibus. Conceptus & voces duplici modo dicuntur veræ, res tantum uno. Nam conceptus, vel ut qualitates mentis considerari possunt, vel ut *ὑποτάγματα* sive simulachra rerum: Priori modo dicuntur conceptus veri, quia illis reverà competit definitio qualitatis: Secundo modo dicuntur veri, quia revera repræsentant id cujus conceptus dicuntur esse. Simili modo voces sive vocabula vera sunt, & quatenus sunt res, & quatenus referuntur ad ea, ad quæ significanda sunt institutæ. Hic duplex Veritatis modus reperitur in omni signo: In omni enim signo, atque imagine est quasi duplex esse, esse reale & intentionale quod vocant,

vocant, sive esse repræsentativum, aut significativum.

XI. Veritas, quæ conceptibus, vocibus, atque adeò omnibus signis competit secundum esse reale, est Veritas transcendentalis, ideoque eodem modo est explicanda, atque à nobis est explicata Thesi 9. At quæ ijs competit secundum esse intentionale, alio se habet modo haud dubiè: hæc enim non est convenientia cum definitione sua, aut principijs essentialibus, sed cum objectis aut rebus significatis. Hinc fit, ut veritas hæc aboleri possit, salvo tamen conceptu, voce, aut signo, aut quicquid sit, quod ab ea verum denominatur: In eoq; convenit cum veritate complexa, quæ & ipsa aboleri potest salva propositione (sive ea in mente sit sive in verbis) quæ ab illa vera denominatur. At Veritas transcendens non potest aboleri absque mutatione illius quod verum dicitur. An ergo nullum discrimen est inter veritatem conceptuum simplicium & vocum, & inter veritatem complexam? imo sanè: Veritas enim complexa absque ulla mutatione subjecti sui non solum aboletur, sed etiam in falsitatem transit: ὁ γὰρ λόγος ἐν ἡ δόξα, inquit Aristot. cap. 5. categ. αὐτὰ μὲν ἀκίνητα πάντα ἀφαιρῶνται τῷ ᾧ πρᾶγμα μὲν κινεῖται τὸ ἐνάντιον πρὸς αὐτὰ γίνεται. id est, Oratio & opinio (quæ scil. subjectum sunt veritatis complexæ) omnino immota permanent, sed remota contrarium in illis fit

fit, id est, ex vera fit falsa, & contra. At conceptus, voces, & id genus alia, etsi absque mutatione sui queant amittere veritatem, attamen ut falsa fiant, nullo modo fieri potest, cujus causa jam dicetur.

XII. Veritati transcendentali nulla Falsitas opponitur, omnis enim res vera est, & eatenus vera, quatenus est hoc quod per definitionem explicatur. Nulla ergo res falsa est, quicquid enim est, suæ definitioni congruit. Sed licet res vera sit, dicat aliquis quatenus suæ definitioni convenit, poterit dici falsa, quatenus cum alterius rei definitione videtur congruere, sed reverâ tamen non congruit: sic aurichalcum videri possit falsum aurum, quia videtur congruere definitioni auri, sed revera nō congruit. Resp. aurichalcum non esse falsum aurum, sed verum aurichalcum; convenit enim cū aurichalci definitione. Non potest autem dici falsum aurum, nec quia cum auri definitione non congruit (si enim idē falsum aurū esset, omnia falsum aurum dici possent, etiam lignū, aqua &c.) nec etiam, quia nobis falsō congruere videtur, quia aurifabro non videtur congruere: ac proinde illi non erit falsum aurum. Nec potest fieri, ut idem uni falsum sit, & alteri non sit falsum. Cur ergo falsum aurum dicitur? quia mentis nostræ judicium falsum est, statuentis aurichalcum esse aurum: Hæc adeo vera sunt, ut ne quidem res artificiosæ possent dici falsæ,

ſæ, licet ab idea artificis deſlectant. Nam præterquam quod veritas non ſit ſita in convenientia cum idea ſua, poteſt etiam dici, res artificioſas non eſſe ab arte, quatenus ab idea artificis deſlectunt, ſed à caſu. Eo ſit, ut, ſicuti idea non eſt falſa, etſi cum iſto opere non convenit (non enim illud habebat pro objecto & fine) ita ipſum opus non poteſt falſum denominari, quatenus ab idea recedit: hætenus enim neque illius ideæ objectum eſt, neque effectum.

XIII. Hinc porro concludi poteſt, nullam Falſitatem opponi Veritati, quæ conceptibus ſimplicibus, vocibus aliſque ſignis aut imaginibus competit. Nam ſi conſiderentur ſecundum eſſe Reale, eodem modo ſe habent quoad Veritatem & Falſitatem atque alia Entia, & quanquam veritas, quæ iis competit ſecundum eſſe intentionale, diſcrepet aliquantulum à veritate Transcendentali, non tamen habet ſibi oppoſitam Falſitatem. Etenim ſimplex conceptus ab objecto diſcrepare nequit. Conceptus enim ſimplex aut repræſentat illud ipſum cujus conceptus eſſe dicitur, vel aliud quippiam. Si repræſentet illud ipſum, verus eſt illius rei conceptus; ſi aliud, jam hujus quoque rei verus erit conceptus: illius vero conceptus non eſt ullo modo neque verus neque falſus; ſed conceptus illius dicitur falſo. Ex.gr. ſi conceptum formes, qui hominem repræſen-

ret,

ret, verus est hominis conceptus : si repræsentet canem , non est jam falsus conceptus hominis, imò nullo modo conceptus hominis est , sed verus conceptus canis : si quis tamen hunc conceptum putet aut dicat esse conceptum hominis, falsitas erit in opinione aut oratione dicentis , non in conceptu. Eodem modo judicandum est de vocibus , atque alijs cujuscunque generis, signis, atque imaginibus.

C A P. XIX.

De Adjunctis Veritatis.

T H E S I S I.

Veritati accidit primo Evidentia vel obscuritas : deinde certitudo vel incertitudo : atque hæc vel rebus , vel intellectui, vel vocibus attribuuntur. Perspicuitas in rebus esse dicitur, cum res facile cognoscuntur, idque vel sensu , vel mente. Quod fit cum res vel menti, vel sensui certa propositione respondent. Quomodo se res habere debeant ad sensus , ut sensibus sint perspicuæ , in Physicis explicari solet. Ut menti sint perspicuæ , debent mentis caput neque nimis excellentia, neque nimia exilitate Entitatis suæ excedere: atque insuper sensibiles habere notas , à quibus mens cognitionis originem habeat. Ex.

gr. res

gr. res divinæ nobis obscuræ sunt ob infinitam excellentiam; materia prima ob nimiam exilitatem; numerus stellarum etiam obscurus est nobis, quia nullæ sensibiles notæ sunt, è quibus rei istius cognitio deduci queat.

II. Conceptus dicuntur perspicui quando res objectas clare, distinctè, ac plene repræsentant. Perspicuitas primo inest conceptibus simplicibus, & eorum interventu, complexis. Obscuri ergo conceptus erunt, qui res objectas confuse & imperfectè repræsentant. Causa perspicuitatis in conceptibus vel est à sensibus, & imprimis à phantasia; vel à consuetudine: qui enim imaginandi virtute pollent, & qui contemplationibus assueverunt, evidentius res concipiunt quam alij.

III. Singulæ voces sunt perspicuæ quæ rem intellectui objiciunt sine mora. Ad quam rem requiritur ut distinctæ sint & usitatæ: ambiguæ enim & insolentes habent obscuritatem. Enunciatio perspicua est, quæ constat vocibus perspicuis, & structuram habet aptam, apertam & usitatam, nulloque modo perplexam & ambiguam. Sed hac de re plura Rhetores.

IV. Certitudo quæ rebus attribuitur, est quædam Veritatis aut existendi necessitas; Incertitudo, est veritatis aut existendi contingentia.

V. Res

V. Res vel præteritæ sunt, vel præsentæ, vel futuræ. Res omnes præteritæ & præsentæ certæ sunt, quia sicuti τὸ μὲν εἶναι τὸ ὄν, ὅταν ᾖ καὶ τὸ μὴ ὄν, μὴ εἶναι, ὅταν μὴ ᾖ ἀνάγκη, ut dicit Aristot. cap. 9. de Interp. ita quoque necesse est fuisse quicquid fuit. At res futuræ partim certæ sunt, partim incertæ: Certæ quæ necessario futuræ; incertæ quæ ita sunt futuræ, ut impediri possint.

VI. Certitudo & incertitudo intellectûs & orationis non est in simplicibus conceptibus aut vocibus singulis, sed tantum in iudicio sive assensione, & enunciatione. Intellectus certus dicitur, cum aliquid iudicat esse, aut non esse absque ullo periculo aut suspitione erroris; incertus contra, cum periculum est aut metus ne erret. Causa hujus incertitudinis vel in rebus est, vel in nobis: atque in præteritis & præsentibus in nobis est solummodò; in futuris partim in rebus, partim in nobis.

VII. Certitudo in Enunciatione est immutabilitas veritatis: incertitudo est veritatis inconstantia. Utraque oritur à certitudine & incertitudine, quæ est in rebus: non verò ab illa; quæ est in intellectu. Ideoque non dividitur certitudo & incertitudo Enunciationis in Logicam & Ethicam, quomodo veritatem antea dividi diximus.

De Bono & Malo.

THESIS I.

Bonum nihil est aliud quàm Ens, prout habet convenientiam cum alio. Ergo Bonitas in abstracto est Convenientia Entis cum alio: nihil enim per se ipsum & in seipso bonum est. Ideoque veteres dixerunt bonum quasi duonum, ad eam formam, quàm bellum dicitur quasi duellum. Cum Ens absolutè & in se consideratum Bonum dicitur, ea bonitas nihil aliud est, quam interna entis perfectio qua ens est; atque hoc bonum non est Entis affectio, sed vox synonyma, quemadmodum & res.

II. Bonitas ergo sive Bonum includit Ens atque insuper addit Enti non aliquam absolutam atque internam proprietatem, ex naturâ sua distinctam ab Entitate quæ bona dicitur (nam proprietas illa quoque suam bonitatem haberet, & illa rursus suam, & sic in infinitum) non denominationem externam oriundam ex connotatione naturæ, capacitatem naturalem aut inclinationem habentis cum eo quod bonum dicitur (quia bonitas dicit quomodo bonum se habet ad aliud, non quomodo illud aliud se habeat ad bonum) non est etiam Bonitas ipsa cujusque rei interna perfectio; quia una eademque res sua
interna

interna perfectione bona dicitur uni, & alteri mala. At res una eademque sua bonitate uni bona & alteri mala dici nequit: ut taceam, quod ante dixi, perfectionem illam non esse entis passionem, sed vocabulum Synonymum. Superest ergo, ut dicamus bonitatem addere Enti relationem, non rationis (nam absque mentis operatione bonum est, quicquid bonum dicitur) sed realem: Convenientia enim unius cum alio relatio realis est haud dubiè, hoc est talis, quæ non pendet à mente.

III. Multi hanc convenientiam referunt ad voluntatem sive appetitum, voluntque bonitatem Entis consistere in eo, ut appetibile sit. Sed illi non videntur satis rectè philosophari: nam esse appetibile posterius est bonitate: dicitur enim Ens alicui appetibile, quia bonum illi, id est, conveniens est. Ideoque cum Aristoteles Ethic. cap. I. bonum esse dicit, quod omnes appetunt, descriptio illa boni à posteriori est petita: veluti si quis hominem definiret animal *ζηλασικόν* aut *θauμασικόν*. Cum autem bonum dicitur esse appetibile, vel bonum animalis solummodò intelligitur; vel appetitus vox ita latè patet, ut etiam propensionibus naturalibus conveniat, quas appetitus innatos appellare solent.

IV. Cum ergo Ens Bonum dicatur,
quia

quia & quatenus habet convenientiam cum alio quopiam, videndum porrò in quo illa convenientia sita sit. Ego verò existimo, bonum omne vel finis rationem habere, vel medij : ac proinde quicquid bonum dicitur, convenientiam habere talem cum eo, cui bonum dicitur, qualem habet finis aut medium ad finem cum eo, qui finem intendit; nam licet cæteræ quoque causæ suâ propria causalitate alicui videantur esse bonæ ac convenientes, faciliè tamen omnis causa videtur ad finem vel media revocari posse, siquidem omnes aliæ causæ ad finis constitutionem conspirant.

V. Bonum multis modis dividitur : ac primo, in verum & apparens : hæc divisio non est sumpta ex natura boni, sed ex effectis; est enim effectum boni movere appetitum desiderio sui. Ad eam rem necessarium est, ut bonum applicetur & uniatur appetenti; quia omne movens dicitur esse conjunctum mobili. Non potest autem bonum aliter conjungi appetenti, quam per actionem sensus interni, aut intellectus judicantis rem objectam esse bonam. Non ergo movetur appetitus ab objecto ad illius amorem, quàm quatenus & quousque judicatur esse bonum : Nec refert sit ne revera bonum nec ne. Ex quo apparet, verum bonum solummodo bonum esse: bonum apparens non esse bonum, sed ita tamen

tamen dici, quia videtur tale appetenti, ideoque eo modo movet appetitum, atque id, quod revera bonum est. Ex quo apparet distinctionem hanc habere locum in animalibus solummodò; quatenus moventur appetitu elicitò: In ordine ad appetitum innatum, bonum apparens non habet vim movendi, ideoque bonum non dicitur: nam quia appetitus hic non pendet à prævia notitia aut iudicio, sed ab ipsa naturâ, nunquam fallitur.

VI. Secundo dividitur Bonum in bonum per se, & bonum per accidens. Bonum per se dicitur, quod sua natura bonum est: Bonum per accidens, quod non sua natura, sed eventu quodam fortuito bonum est. Multa enim per se ac suâ naturâ bona, fiunt mala per accidens: sicuti & contrâ multa fiunt bona per accidens, quæ suâ naturâ & per se mala sunt.

VII. Tertiò dividitur Bonum in naturale & morale. Bonum naturale dicitur, quod convenit rebus secundum naturam rationis expertem. Morale, quod convenit naturis rationalibus, quatenus secundum rationem operantur. Bonum morale vel est virtus, vel operatio secundum virtutem, vel voluptas aut dolor ex ejusmodi operatione proveniens. Objecta virtutum inter bona moralia referri nequeunt: nec dicuntur illa bona morali bonitate, nisi denominatione externa,

VIII. Quar-

VIII. Quarto dividitur bonum in honestum, jucundum, & utile. Quæ divisio hac ratione nititur: Ens duobus modis alteri convenire dicitur nempe vel per se, vel per aliud: Per se, cum ex seipso alteri consentaneum est; idque vel absque ratione delectationis, quæ rem consentaneam ejusve possessionem aut usum consequitur; vel in ordine ad delectationem, quæ per se in illo Ente consideratur. Prius illud vocatur bonum honestum, quod licet admodum affine sit bono morali, ab eo tamen aliquo modo differt: morale enim bonum aliquam includit delectationem; honestum, quâ jucundo opponitur, non item. Posterius vocatur bonum jucundum. Bonum utile dicitur, quod non sua, sed alterius, nempe finis alicujus bonitate bonum dicitur. Bonum honestum pertinet solummodo ad naturas rationales: bonum jucundum ad omnia animalia, tam rationis expertia, quam ratione prædita: bonum utile extenditur ad omnes res. Qui bonum honestum brutis quoque animalibus convenire volunt, vim inferunt veritati.

IX. Postremò etiam dividuntur bona, in bona animi & corporis, & in externa, quæ & fortunæ bona dicuntur. Bona animi dicuntur, quæ animæ per se conveniunt absque dependentiâ à corpore; ut virtutes intellectuales & morales, harumque operationes, quatenus à causis externis impe-

diri nequeunt. Bona corporis dicuntur, quæ corpori conveniunt, aut animo propter corpus, ut valetudo bona, robur, integritas sensuum, &c. Bona externa dicuntur, quæ neque animo, neque corpori, sed extra nos sita sunt; quæ ideo bona fortunæ dicuntur, quia proveniunt à causis externis, in quibus fortuna maximè dominatur, ut sunt divitiæ, gloria, amicitia &c. Hæc divisio non est accuratissima; quippe non satis apparet quomodo bona corporis distinguantur à bonis fortunæ; nam in illis etiam fortuna regnat, cum à causis externis pendeant. Rectius dividuntur bona in nostra & aliena. Nostra sunt, quæ ita sunt in potestate, ut nobis invitis eripi nequeant ab ulla causa finita: Aliena, quæ pendent ab ejusmodi causis, quæ non sunt in nostra potestate. Errant autem Stoici, qui priora illa solummodò bona esse dicunt: hæc verò bona esse negant.

X. Bono malum opponitur. Malum dicitur quod alicui inconueniens & adversum est. Itaque malitia in abstracto; est illa adversitas, qua Ens alicui est inconueniens & adversum. Malum ergo omne, simili modo quo bonum, includit Ens, & Enti addit relationem realem, quâ, quod malum dicitur, ita se habet ad aliud, ut illi inconueniens atque adversum sit. Hæc affectio satis intelligitur ex iis quæ Thesi secunda de Bono dicta sunt.

XI. Relationes istæ, quæ Ente additæ, bonum & malum constituunt, inter se contrariæ sunt; ideoque contrarias habent affectiones: nam sicuti bonum appetibile est ob id, quia alicui conveniens est: ita quoque malum est averfabile ob id, quod inconveniens & adversum est. Hinc sequitur, malum bono potius esse contrarium, saltē quoad proprias formas, quàm privativè opponi. Si enim convenientia & inconvenientia sive adversitas sint contraria, etiam bonum & malum debent esse contraria, quæ in convenientia & adversitate constituuntur; atqui convenientia & inconvenientia haud minus sunt contraria, quàm æqualitas & inæqualitas: Ens enim non dicitur malum alicui, quia non est conveniens, sed quia & quatenus est inconveniens affirmatè sive adversum. Si objicias, quicquid non est conveniens, est etiam inconveniens sive adversum; ac proinde malum in sola negatione aut privatione convenientiæ constituendum videtur. Si hoc, inquam, objicias, responderi poterit, hanc naturam esse contrarietatis immediatæ, ut ex unius contrarii negatione inferatur alterum; sic dicimus, qui liber non est, servus est: Simili modo, licet inconveniens & adversum sit positivè, quicquid non est conveniens, aliud tamen est nuda convenientiæ negatio, aliud affirmata, & positiva inconvenientiæ assertio; ac proinde li-

cet malū esset quicquid esset inconueniens, malitia tamen non esset nuda conuenientiæ negatio. His addo secundo, non confestim esse positivè inconueniens, & malum, quicquid non est conueniens, siue bonum. Quod patet ex rebus adiaphoris, quæ tales sunt; hæ enim neque bonæ sunt siue conuenientes, neque tamen malæ, siue conuenientes positivè: non ergo inconueniens est positivè; quicquid non est conueniens.

XII. Bonum igitur & malum consistunt in contrariis relationibus conuenientiæ & inconuenientiæ. Sed quia tamen relationes hæ ex ejusmodi fundamentis oriuntur, quorum alterum se habet ad alterum, ut privatio ad habitum; Hinc factum arbitror ut plerique omnes Metaphysici simul ac Theologi, præteritis propriis boni & mali formis, quas audivimus esse contrarias, malum dixerint bono opponi privativè; consideratis scil. utriusque fundamentis. Fundamentum enim illius relationis quæ conuenientia dicitur, in qua formam boni sitam esse diximus, est quædam *συμμετρία* ejus, quod bonum dicitur, cum fine illius, cui bonum esse dicitur: at fundamentum inconuenientiæ, quæ est mali forma, aut quasi forma, est *ἀσυμμετρία* siue recessus ab illa *συμμετρία*, ac illius quædam privatio. Hæc *ἀσυμμετρία* vel in excessu est, vel in defectu, vel in circumstantiis, vel in quocunque alio modo, quo quod malum esse dicitur, fini illius

illius obstat, cui dicitur esse malum.

XIII. Ex dictis porro consequitur, nihil obstare, quominus quod bonum est, malum quoque sit; & quod malum est, quoque bonum sit: tantum fieri non potest, ut bonum quia bonum, sit malum; aut malum quia malum, sit bonum: Omne enim Ens aliquo saltē modo bonum est: Ergo cum malum nunquam detur sine Ente, non datur summum malum, hoc est, tale malum, in quo nihil sit boni: alia est ratio boni, Bonum enim potest esse sine malo; itaque nihil vetat summum bonum dari, summum, inquam, absolutē. Summum bonum debet esse infinitum: Si enim finitum sit, aliquid boni in illo non erit, & sic non erit summum. Cum autem bonum omne movere queat appetitum, nullum bonum appetitum explere potest, præterquam absolutē bonum atque infinitum; quia appetitūs natura infinita est: hinc rectē conclusit Plato, non alibi summum hominis bonum, in quo possit animus conquirere, quam in solo Deo quærendum esse.

XIV. Malum eodem modo dividi potest atque Bonum, nec necesse est divisiones illas hic iterare: tantum notemus, præter divisiones illas, malum etiam dividi in malum culpæ, & malum pœnæ. Malum culpæ est *ἀνομία*, id est, discrepantia actionis aut habitus à lege: per legem intelligimus tum naturalem tum positivam, eam-

que rursus vel divinam vel humanam. Cæterum actiones sunt malæ per se; habitus, quatenus ex ejusmodi actionibus orti sunt, quæ rationem culpæ habent. Malum pœnæ est, quod ob præcedentis culpæ meritum delinquenti à judice infligitur. Malum pœnæ respectu infligentis, bonum est, respectu patientis, malum. Itaque malum culpæ sive peccatum, quæ tale est, non potest esse pœna; Sed id potest esse pœna, ex quo peccatum rursus proficiscitur, vel ipsa pœna potest ex peccato oriri. Itaque cum Deus dicitur peccata peccatis punire, non est hoc ita accipiendum, quasi Deus ob præcedentia peccata, author esset peccatorum sequentium in hominibus: sed quod homines improbi ob pœnam à Deo inflictam suo vitio peccent, vel quod Deus homines improbos puniri permittat peccatis aliorum hominum; sic peccatum Absolomi erat sanè pœna Davidis.

XV. Hæc de Malo: prius quam finiamus addamus aliquid de mali causis. Quod ad formam attinet, de eâ satis dictum est: Forma enim mali, aut quasi forma potius, est inconvenientia Entis cum alio: Materia sive subjectum (nam aliam materiam non habet) est omne Ens finitum. In Ente infinito sive Deo, nihil omnino mali est. Malum etiam quæ malum non habet finem; imò ideo malū dicitur, quia fini obstat: multò minus ipsum malum finis esse potest,

test, quā malum est. Quod ad causam Efficientem attinet, observandum est malum posse dici quinque potissimum modis effici. Primo modo, cum causa efficiens in subiectum introducit formam aliquam subiecto inconvenientem & adversam; veluti, cum ignis aquam calefacit: hoc modo dixeris malum quidem per se effici malitiam, tamen non nisi per accidens; accidit enim calorem igni bonum esse, aquæ malum: hoc sensu dici potest Deus causa mali, non culpæ, sed pœnæ. Secundo modo dicitur malum effici, cum efficiens laborat aliquā imperfectione, sive quando non habet sufficientem virtutem ad producendum effectum; veluti, cum equus claudicat, aut imperitus artifex in opere suo peccat. Tertio, cum causa efficiens aliunde impeditur; veluti, cum generantur monstra. Quarto cum causa superior causæ inferiori virtutem suam aut subtrahit, aut non confert: sic sol est causa tenebrarum; qui columnas subducit, causa ruentis ædificii; qui cibum non præbet, causa mortis. His tribus modis à primo proximis, causa mali non tam dici potest efficiens, quam deficiens. Quintus modus est, cum causa libera non agit, quod, quantum, & quando poterat, aut debebat; atque hoc solo modo videntur effici peccata: nam quod etiam peccata committi videantur, cum causa efficiens laborat imperfectione, aut aliunde impeditur, aut

cum ei aliquid à superiori causa substrahatur, aut non confertur; hoc ideo fit, quia aut imperfectio illa, aut impedimentum, aut subtractio virtutis à causa superiori, illi ipsi causæ imputandum sit, quæ peccare dicitur. Sic peccata omnia ex peccato originali prodeunt, nec tamen eo minus peccata sunt, quia peccatum originis nobis merito imputatur: sic cum improbi à Deo deferuntur, peccant sanè, quia suis peccatis deferri meruerunt.

C A P. XXI.

*De Localitate, Temporalitate
& Duratione.*

T H E S I S I.

ATque hæc sufficiant de affectionibus Entis, quæ ab essentia fluunt: sequitur locus, tempus, sive esse in loco, tempore, & duratione, quæ Enti conveniunt, ut ante dixi, propter existentiam: quicquid enim existit, eo ipso quod existat, in loco existit; nam quod non existit in loco, nusquam existit; at quod nusquam existit, ne existit quidem, quia $\pi\epsilon$ nusquam existentie repugnat. Inde factum est, ut veteres, quod adeò absurdum est ut existere non possit, $\alpha\tau\tau\omega\tau\omega$ dixerint, id est, quod locum non habet, sive quod nusquam est. Simili modo, quicquid dicitur existere, id dicitur
existere

existere in aliquo tempore: nam quod non existit in aliquo tempore, id nunquam existit; at quod nunquam existit, omnino non existit. Duratio non sequitur existentiam quocunque modo consideratam, sed existentiam solummodò inchoatam, idque in ordine ad Tempus: ideoque de ea postremo loco dicemus.

II. Ut intelligatur, quid sit esse in loco, statuendum est infinitum quoddam spatium, in cujus aliqua finita parte mundus est, & quicquid in mundo vel extra mundum est. Dari spatium istiusmodi in mundo satis manifestum est per se: quicquid enim quantum est, locum implet; locus autem iste vel spatium est, ut Platoni visum est; vel si Aristotelem sequi malis, est superficies corporis continentis locatum, & cum eo spatium æquale locato. Imaginare vas aquæ plenum sensum evacuari absque aëris successione in locum effluentis aquæ: hoc si fieri statuas (neque enim implicat contradictionem) erit vacuum spatium intra vasis latera: hoc spatium non fit aquæ recessu, sed fit vacuum solummodò: & si rursus aquam in vas illud infundas, non aboletur spatium, sed completur. Ut intelligas etiam extra mundum spatium esse ejusmodi, quæro an non fieri possit, ut aliud à Deo mundus creetur? si concedas, quæro, ubi erit alter iste mundus? an non in aliquo spatio? hoc spatium fiet ne à Deo novum una

cum mundo, nec ne? ut spatium istiusmodi dicatur à Deo fieri, non est rationi consentaneum: Ergo datur spatium aliquod, in quo alter mundus fieri possit, & tertius, & quartus; ac proinde infinitum est. Si hæc ratiocinatio non placet, finge corpus aliquod à Deo collocari & conservari extra mundi terminos: illud corpus haud dubie spatium occupabit: ergo extra mundum spatium est, & quidem infinitum.

III. Hoc spatium non est substantia aliqua, aut accidens, aut ullum aliud Ens reale, nec quicquam etiam ex illo genere, quod medium esse diximus inter Ens & nihil, sed merum nihil. Quod tamen, quia corpora in se continet vel potest corpus continere, à nobis concipitur, ac si esset aliquid trinâ dimensione præditum, aut verò quædam trina dimensio, corporum dimensionem penetrans vel permeans: neque verò mens in eo fallitur: si quidem non concipit affirmatè spatium esse aliquid, sed concipit infinitum nihil, seu vacuitatem quandam, cui tribuit adjuncta ac si non esset nihil, sed ens; quæ tamen omnia negativè sunt explicanda; ex. gr. cum spatium illud dicitur continuum ac divisibile, nihil aliud innuitur, quàm non esse indivisibile, ut punctum; cum dicitur unicuique corpori æquale, innuitur non esse majus aut minus: Simili locutione dicimus tenebras corpori esse æquales, aut inæquales, quamvis mera sint privatio,

IV. Hoc

IV. Hoc spatium est locus & receptaculum rerum omnium, nec quicquam concipi potest extra illius infinitum ambitum: Ex quò sequitur, in loco esse, seu non esse nusquam (hæc enim in hac disputatione æqui pollent) nihil esse aliud, quam esse in illo spatio ex quo resultat communis quædam Entis affectio, de qua agendum est hoc loco: Locus enim ipse non est affectio Entis, sed id quod omni Enti competit ob id, quod in loco sit, quod localitatem docendi causâ appellamus. Hæc affectio primo competit substantiis; accidentibus secundario, quatenus scilicet à substantiis dependent, & in iis existunt.

V. Localitas hæc in communi sua notione accepta, nihil aliud Enti superaddit, quàm respectum ad locum, sive spatium locale, in quo existit. Respectus hic non multum differt à respectu illo, quo contentum refertur ad illud quod continet: Spatium enim rem locatam continet: non quidem positivè, atque ita ut vas continet aquam, aut vinum; sed negativè, quomodo totum dicitur continere suas partes. Ut enim totum partes continere dicitur, quia nulla pars extra totum est; ita etiam spatium dicitur continere illud locatum, quia nec totum nec ulla illius pars extra spatium locale est. Quid autem localitas in specie Enti addat, ex sequentibus divisionibus patebit.

VI. Localitas non est unius modi, variat enim eo modo, quo Existentia, quam sequitur: Itaque dividi potest primo in Ubiquitatem & Ubietatem. Ubiquitas est localitas infinita, itaque competit soli Deo, quia nihil infinitum est præter Deum; nec magis potest communicari creaturæ, quam ipsa infinitudo. Ubietas est localitas finita: hæc competit rebus finitis; hæc enim alicubi esse dicuntur, non ubique; imo ne quidem in duobus locis simul esse queunt, si non sint etiam in locis intermediis: At quod infinitum est, ubique dicitur esse, id est, in omni loco, non alicubi, siue in aliquo loco; namquod in aliquo loco est, id etiam in aliquo loco non est, ideoque ubique non est.

VII. Potest etiam localitas dividi in absolutam & relatam localitatem. Absolutam tantisper voco, dum aptior vox occurrit, qua res alicubi existit sola, id est, absque respectu ad aliam rem; qualis erat localitas Dei ante mundum conditum, arque etiamnum est extra mundi ambitum, ubi nihil rerum est. Hæc localitas nihil addit Enti, quam quod localitas in genere addit, nempe respectum ad spatium. Localitatem relatam appello, qua res ibi esse dicitur, ubi aliæ sunt. Hæc respectiva Localitas uno verbo dici potest Præsentia. Eaue rursus subdividitur in corporalem & incorpoream, idque siue res locatas videas,

deas, five respicias eas res, quibus res locatæ dicuntur præsentēs. Hinc oriuntur quatuor quasi species localitatis relatæ five præsentia: vel enim spiritus spiritui præsens est; vel corpus corpori; vel spiritus corpori; vel corpus spiritui. Hæ species localitatis respectivæ, præter respectum ad spatium addunt etiam Enti respectum ad eas res, quibus dicuntur præsentēs esse, & modum illis coëxistendi: Hic modus non est idem in omnibus rebus; nam spiritus spiritibus & corporibus, & corpora spiritibus præsentia sunt penetrativè; corpora corporibus circumscriptivè tantum: nam spiritus corpus & spiritum penetrare potest, quemadmodum & corpus spiritum; at corpora seinvicem penetrare nequeunt.

VIII. Porro sola Ubiquitas est absoluta localitas; Ubietas omnis, relatæ est. Quicquid enim alicubi est, alicui præsens est, si non alii alicui rei, saltem Deo. Ideoque Ubietatem semper explicamus in ordine ad aliud, & imprimis in ordine ad corpus; hic enim Ubietatis modus nobis est notissimus, & ferè solus in usu: quia cæteri modi non habent vim declarandi nobis ignotam rei Ubietatem, quæ per vocem interrogativam *Vbi* quæritur. Hæc enim quæstio non satis appositè solvitur, nisi Ubietas illius rei, per quam quæstio solvitur, notior sit nobis quam Ubietas ejus rei, quæ quæritur per vocem *Vbi*; Atqui corporum Ubietas

tas nobis notior est, quam spirituum. Ergo rerum omnium Ubietatem explicamus per respectum ad corpora. Ex. gr. cum quærimus, *Vbi est Christus?* recte respondeas, *in Cælo*: At non tam appositè respondeas, *sedet ad dextram Dei*: hæc enim responsio nobis maiestatem potius *Christi* declarat, quam Ubietatem.

IX. Hisce ita explicatis, explicatu non erit difficile, quid sit esse in Tempore: ad quam rem intelligendam, simili modo concipiendum est infinitum quoddam Spatium Temporale; quod nec principium habet, nec finem habebit: quod item nec substantia est, nec accidens, nec quicquam aliud, sed merum nihil, quod tamen concipimus, ac si esset temporalis quædam quantitas, in qua, & cum quâ omnia existunt, quæcumque existunt. Differt tamen spatium temporale à spatio locali, quod temporale spatium concipiamus tanquam quid successivum cujus partes aliæ alias sequuntur: at spatium locale concipimus tanquam quid permanens, cujus partes omnes simul sunt. Itaque cum res finitæ mutant locum, moveri debent, idque non solum quia mutant modum præsentia, sed etiam quia ad alias & alias partes spatii localis progrediuntur: At cum res tempus mutant, id est, in aliis atque aliis partibus spatii temporalis existunt, neutiquam moventur, aut saltem non est necessitas moveri,

X. Ex

X. Ex dictis facile colligitur $\tau\delta$ esse in tempore nihil aliud esse, in communi sua notione, quam esse in illo spatio temporali. Hinc oritur affectio Entis, quam docendi causa, vocabimus Temporalitatem; eaque nihilo plus addit Enti, quam localitas sive $\tau\delta$ esse in loco, nempe respectum ad illud spatium temporale.

XI. Dividi potest Temporalitas in momentaneam & non momentaneam: Quarum illa competit rebus momentaneis, quæ ita sunt in tempore, ut non commensurentur tempori, quæque ita se habent ad tempus, ut punctum se habet ad lineam. Temporalitas non momentanea competit iis rebus quæ non solum punctum aliquod temporis indivisibile, sed & partem sibi vendicant. Temporalitas momentanea pertinet tantum ad quæstionem, qua quæritur quando res existit; altera illa & ad quæstionem hanc & ad eam, quâ quæritur quamdiu res existat.

XII. Temporalitas non momentanea, vel est æternitas, hoc est, temporalitas infinita vel temporalitas finita. Æternitas vel utrimque infinita est, id est, principio & fine carens; vel tantum fine carens, non etiam principio: nam æternitas tertii generis quæ principio caret & finem habet, nulla datur. Æternitas utrimque infinita, soli Deo competit, eaque definitur à Boëthio De cons. Philos. *Interminabilis vita tota simul*

mul & perfecta possessio. In qua definitione, nescio cur potius dixerit *vita*, quàm *existentia*: deinde cur addat *tota simul & perfecta* possessio; hæc enim omnia non pertinent ad notionem æternitatis, sed ad notionem rei æternæ sive Dei. Fateor equidem quicquid æternum est vivere, & vitam non per partes, sed totam simul ac perfectè possidere: sed non arbitror ideo ea omnia æternitatis notione comprehendere: satis erat dixisse, æternitas est interminabilis sive infinita existentiae possessio, sive infinita existentiae permanens. Temporalitas finita, vel *Ævum* est (hoc verbum placuit Scholasticis) vel *Tempus* strictè dictum. *Ævum* est temporalitas rerum permanentium; *Tempus*, rerum successivarum. Hæc temporalitas motu Cœli mensuratur: hinc definit Aristoteles *Tempus*, numerum motus, sive mensuram numero distinctam, secundum prius & posterius; sed malè: mensura enim temporis non est ipsum tempus.

III. Temporalitatem non momentaneam duratio sequitur. Duratio est continuïtas existentiae: ita enim se habet ad existentiam, ut continuïtas se habet ad lineam. Itaque sicuti continuïtas non convenit lineæ secundum singula puncta, sive in medio sive extremitate sita sint, sed secundum suas partes, aut secundum se totam: ita etiam duratio non convenit existentiae secundum momenta seorsim accepta, sed secundum

cundum se totam, aut secundum suas partes. Itaque non dicitur res durare eo momento quo incipit aut quo desinit, imò in nullo momento dicitur durare, nec tamen ob id duratio distinguitur à re durante ex natura rei, sed tantum ratione, ratiocinatâ. Fundamentum hujusce distinctionis est, quod conceptus Durationis addat Enti respectum ad esse præcedens sive inchoatum, atque insuper connexionem partium existentiae in ordine ad tempus. Nam ut Existencia in se partes habeat non est necesse.

XIV. Duratio eodem modo dividitur atque temporalitas. Alia enim æterna atque infinita est, alia finita: atque hæc iterum vel æviterna sive permanens, vel temporalis strictè dicta sive fluens aut successiva. Duratio omnis divisibilis est in partes, quia continua: sed duratio permanens (quod etiam de æternitate intelligendum est) uno modo tantum est divisibilis, nempe in ordine ad tempus, non in se: at duratio successiva & in se divisibilis est, & in ordine ad tempus: itaque alia pars existentiae, alii parti temporis responder: at in duratione permanente idem respondet omnibus temporis partibus.

XV. Existencia momentanea simul incipit, est & desinit: at Duratio sive Existencia non momentanea, non est, cum incipit, neque cum desinit, nedum ut incipiat, cum desinit, aut desinat, cum incipit. Igitur

eur duratio, atque omne adeò continuum, qua continuum, incipit in ultimo momento sui non esse, & desinit in primo sui non esse: nam continuum non habet primum & ultimum sui esse. Si existentia tamen spectetur, non ut continua, sed ut existentia, incipit in primo & desinit in ultimo sui esse, si sit permanens: At si sit successiva, incipit in ultimo sui non esse, & desinit in primo sui non esse, siue consideretur ut existentia, siue ut continua.

CAP. XXII.

De Toto & Parte.

T H E S I S I.

DICTUM est de affectionibus Simplicibus; sequuntur Conjunctæ, quæ non singulæ seorsim, sed ambæ simul acceptæ, de Ente prædicantur disjunctivè. Huc pertinent primo totum & pars, causa & causatum, subjectum & adjunctum, quæ Logica à Metaphysica mutuatur; deinde necessitas & contingentia, potentia & actus, perfectum & imperfectum: Non enim omne Ens totum quiddam est, nec etiam omne Ens pars est: sed Ens in totum & partem dividitur, ita ut quodlibet Ens dici possit aut totum aut pars, & sic de cæteris.

teris. Hæc distinctio in eo consistit, ut de omni Ente alterum membrum istarum affectionum possit affirmari, vel etiam utrumque simul, & non possit utrumque de quopiam negari. Ex.gr. quodlibet Ens, aut pars est, aut totum, aut utrumque simul: nullum autem reperitur, quod neque pars sit, neque totum, & sic de cæteris.

II. Totum, ut inde ordiamur, usurpatur vel positivè, pro eo quod habet partes: veluti cum dicitur, totus homo, totus dies, &c. Vel negative pro eo quod indivisibile est; veluti cum dicimus, Deus totus est ubique, anima est tota in toto corpore, id est, non per partes. Observandum hic, duobus modis dici quippiam indivisibile, nempe vel ut punctum, vel ut substantia incorporea; quorum hoc solummodò totum dici potest, illud minime. Sed puncta, dicat aliquis, & quæ sunt punctorum instar non possunt dici partes: quare, si non possint dici tota, totum & pars non recipiuntur cum ente. Hoc argumentum duobus modis solvi potest: primò enim dici potest, puncta non esse Entia, sed terminos solummodo, hoc est, modos quantitatis sive lineæ; sicuti *æ* & *ν* termini sunt temporis, & momenta motûs: Deinde, licet puncta non sint partes quantitatis, possunt tamen partes esse numeri alicujus, veluti si decem aut centum puncta dicantur.

III. Cum

III. Cum totum negativè sumitur , nihil addit Enti præter rationem simplicitatis , five carentiam diversitatis in partibus. At totum positivè sumptum , addit Enti multitudinem & diversitatem partium , simul & relationem ad illas partes; totum enim istud suis partibus totum dicitur. Pars autem addit Enti negationem cæterarum partium , quæ præter ipsam in toto continentur, & respectum insuper ad totum; pars enim omnis totius sui pars est.

IV. Totum oritur ex compositione atque unione plurium , nihilque aliud est, quam res ejusmodi , quæ constat plurium unione. Hæc unio interdum major est, interdum minor, ut diximus cap. 14. Illa plura, quæ unita constituunt totum , appellantur partes. Itaque partes priores sunt ordine naturæ suo toto : idque vel secundum existendi consecutionem , vel secundum causalitatem.

V. Totum dividitur in totum per se & per accidens. Totum per se dicitur , vel quod ipsum essentiale est suis partibus , vel ad cujus integritatem vel essentiam partes pertinent. Totum ergo per accidens erit, quod nec ipsum est essentiale partibus , neque partes pertinent ad essentiam aut integritatem ipsius. Ex. gr. animal collatum homini & bestię , est totum per se , quia utrique est essentiale; est etiam totum per se collatum corpori ac animæ, quia utrumque

que pertinet ad ejus essentiam : At si animal conferatur maribus & foeminis , dicendum erit totum per accidens : quia hæc accidentia animalis sunt.

VI. Totum per se vel est constituens, vel constitutum : constituens dicitur , quod partibus suis essentiale est, nihilque est aliud quam Universale respectu inferiorum ; vocatur hoc Totum potentiale , quia genus species subjectas, & species sua individua, non actu , sed potestate continent : posito enim genere , non est necesse poni speciem, & posita specie, non est necesse poni individuum : At totum constitutum est totum actuale, quia partes suas actu continet. Hoc totum Universale dicitur etiam totum Logicum , quia Logica consuevit de genere & specie disputare. Quod si objicias , totum omne suis partibus constitui , ut thesi 4. dictum est, ac proinde non dari totum constituens; Resp. Totum eatenus à partibus constitui qua totum est ; & certè totum universale constituitur à partibus subjectis, qua totum est : est autem totum, quatenus subjectas partes potentia continet : at quatenus subjectas partes constituit iisque essentiale est, eatenus non totius, sed partis ratione habet.

VII. Totum constitutum dicitur, quod actu à suis partibus constituitur : estque vel definitum, vel compositum, vel integratum. Totum definitum dicitur , quod constituitur genere & differentia : quia autem genus & diffe-

differentia non re ipsa, sed sola ratione differunt, compositio ex genere & differentia non vera, sed rationis compositio est, ut dictum est thesi 5. cap. 14. Totum hoc vocari solet totum Metaphysicum, quia Metaphysica versatur circa ea, quæ non tam re ipsa, quam ratione sunt diversa. Ejus partes etiam dicuntur partes formales, quia non re sed formali ratione diversæ sunt.

VIII. Totum compositum voco impræsentiarum, quod ex duabus partibus constat, quarum una est in potentia ad alteram, & altera vice versa actus est alterius. Componitur hoc totum vel per informationem, vel per inhærentiam: per informationem, cum actus & potentia sunt in eodem genere: veluti cum homo componitur ex animo & corpore; & omnis substantia corporea ex materia & forma. Per inhærentiam componitur, cum potentia est substantia & actus accidens aut saltem accidentalis. Huc pertinent omnia accidentia in concreto: in quibus subjectum est materiæ loco, & accidens pro forma. Vid. th. 4. c. 14. Totum hoc vocatur totum Physicum, quia Physicus agit de compositione ex materia & forma.

IX. Totum integratum est, quod habet partem extra partem: in quo distinguitur à duabus totius præcedentibus speciebus. Nam partes totius definiti, distinguuntur sola ratione. Partes totius compositi distinguuntur

stinguuntur quidem ex natura rei (realiter an modaliter non definitio) sed seinvicem penetrant: at partes integrantes sua singulari quantitate præditæ sunt. Indeque fit, ut quælibet ab alia non reipsa solum, sed & situ aut saltem ordine diversæ sint, ut nulla in alia contineri possit: hoc totum dicitur Mathematicum, quia quantitas Mathematicæ considerationis est.

X. Totum integratum, vel est continuum; ut magnitudo, tempus, motus, substantia corporea: vel discretum, ut numerus, exercitus, ætervus, &c. Dividitur etiam hoc totum in Homogeneum sive simile, & Heterogeneum sive dissimile. Totum homogeneum est, quod habet partes ejusdem nominis ac naturæ; ut magnitudo, tempus, motus: item lac, vinum, & similes species substantiæ corporeæ: quibus & numerus addi potest. Totum heterogeneum est, quod habet partes diversi nominis ac naturæ; ut substantiæ viventes, item exercitus, ecclesia, mundus & similia.

XI. Totum per accidens dicitur aut causa plurium effectuum, aut effectum plurium causarum, vel ejusdem, vel diversi generis, aut subjectum diversorum adjunctorum, aut adjunctum diversorum subjectorum: quibus quinta species non est addenda, nempe adjuncta plurium adjunctorum: adjunctum enim, cui adjuncta tribuuntur, non adjunctum amplius, sed subjectum earum

tenus est. Atque ista quidem omnia sunt tota per accidens, cum causæ, effecta, subiecta & adjuncta, non sunt essentialia differentia; at si essentialia differentia sint, totum universale constituitur: nam cum effectum formis dividitur, semper est totum per se; sæpè etiam, cum dividitur causâ efficienti, aut finali. Simili modo, cum accidens subiectis dividitur, aut objectis, totum per se est.

XII. Totum reipsâ differt à singulis partibus, etiam universale: Nam licet animal idem sit reipsâ homini, sit etiam idem reipsâ bestię, quatenus habet rationem partis definientis: attamen, quatenus habet rationem totius universalis, ab utroque reipsâ diversum est. Reipsâ etiam differt totum ab omnibus partibus simul sumptis, sed absque unione; aliud enim est be & ta, aliud beta: aliud anima & corpus, aliud homo. Ab hac regula excipe Totum universale, quod, quia non est reipsa, sed sola ratione compositum & unitum, ut dictum thesi 7. cap. 14. sola ratione distinguitur ab omnibus partibus simul sumptis absque unione: Si totum conferas cum omnibus partibus simul sumptis atque unitis, certum est, nullam aliam distinctionem inter totum & partes intercedere, quàm rationis rationata.

CAP. XXIII.

*De Causa & Causato in
genere.*

T H E S I S I.

CAusa est principium, cujus vi atque efficaciam res est. In qua definitione generis loco ponitur Principium: Omnis enim causa principium est sui causati, sed non omne principium est causa. Principium generali notione definitur, Primum unde aliquid est, fit, aut cognoscitur, lib. 4. Metaph. cap. 1. Quam definitione tria genera principiorum indicantur, nempe principia rerum quatenus sunt, quatenus fiunt, & quatenus cognoscuntur. Sed ea distinctione ommissa, statuemus principia esse alia cognitionis, alia ordinis, alia dependentiae. Principium cognitionis, est propositio immediata, atque indemonstrabilis. De ejusdem principii agit abunde Aristoteles lib. 1. prior. Analyt. Principium ordinis dicitur, quod primum est in unoquoque ordine. Sic aurora est principium diei; punctum lineae; exordium orationis: hoc sensu Privatio principium dicitur rerum naturalium lib. 1. Phys. Principium dependentiae, vel est causa sine qua non, vel est causa proprie dicta: Causa sine qua non dicitur, quae tol-

lit impedimenta, quibus sublatis, ab alijs causis producitur causatum. Sic qui manu lapidem tenet, subducta manu, est causa lapidis cadentis sine qua non, sed, non est causa propriè dicta. Ab omnibus illis principiorum speciebus distinguitur causa propriè dicta, cum dicitur, cujus vi atque efficacia res est.

II. Causæ respondet Causatum. Causatum dicitur significantius, quam latinus, quod à suis causis constituitur.

III. Causa causato prior est ordine naturæ (causatum enim ab illa pender) & notior, nempe simpliciter, & quoad cognitionem distinctam: nam quoad cognitionem confusam, quæ à sensibus venit, causatum notius est: quia sensibus vicinius est.

IV. Causæ sunt quatuor, Materia, Forma, Efficiens, & Finis. Quicquid enim fit, ab alio fit: datur ergò causa efficiens: jam nulla res finita potest aliquid ex nihilo producere: quare, cum constet aliquid produci à finitis causis, concedenda est materia, ex qua producitur quicquid producitur: & cum materia non producat, aliud quid in rebus concedendum est, ad quod ortus rerum revocari queunt. Hoc forma est haud dubiè. Tandem, cum constet nihil agere temerè, finis quoque concedendus est, cujus gratia causa efficiens operetur. Exemplar non est quintum genus causæ, ut Platoni visum est, sed ad causam instrumentalem

lem refertur aut ad causam Proëgumenam. Objectum pertinet ad causam procatarticam.

V. Quatuor illæ causæ concurrunt ad idem numero causatum; quod tamen pro vario respectu ad illas causas distinguitur in compositum, effectum, & medium sive destinatum. Compositum est causatum in quantum ex materia & formâ constituitur: effectum, prout pendet ab efficiente: destinatum, quatenus pendet à fine.

VI. Posita causa in actu implicat contradictionem non poni causatum. Causa enim in actu dicitur, quæ actu causat; atqui non potest fieri, ut causa actu causet, si non sit causatum quod causetur.

VII. Causa in actu constituitur per causalitatem. Causalitas interdum, coincidit cum ipsa existentia causæ, ut in causa emanativa: interdum est modus causati, quo à causa sua dependet. Cum causalitas non differt ab existentia causæ, positâ causâ, fieri nequit, ut effectum non sequatur: si causalitas ab existentia causæ sit diversa, non est absolutè necessarium, ut, positâ causâ, effectum consequatur.

VIII. Causæ formaliter consideratæ, ita sunt diversæ, ut una per suam causalitatem non possit exercere causalitatem alterius; neque enim efficiens sua efficientia potest exercere causalitatem materiæ, nec forma informando efficientis causalitatem,

atque ita de cæteris. Causalitates enim omnium causarum inter se sunt oppositæ, quælibetque alterius negationem includit. Itaque nugantur Pontificij cum dicunt, accidentia panis in Eucharistia consistere sine subiecto, Deo causalitatem subiecti concursu suo supplente: si enim velint Deum concurrere per modum subiecti siue materiæ ad accidentium conservationem, manifestè sunt impij: si per modum causæ efficientis, causalitates diversas confundunt.

IX. Hæc causalitatum diversitas & repugnantia non impedit, quominus una eademque res, si cum diversis effectis consideretur, posset exercere causalitates omnes; sic anima humana est forma hominis, finis generationis, efficiens & materia siue subiectum suarum proprietatum: At si una res referatur ad eundem effectum, fieri potest, ut plures quidem, sed non omnes causalitates exerceat; idem enim potest esse causa efficiens & finis *cuius* ejusdè rei, veluti cum medicus sibi ipsi medicinam facit; idem etiam potest esse causa materialis siue subiectum, & efficiens per emanationem; veluti cum Sol dicitur & efficiens & subiectum illius lucis quam habet in seipso. Cæteræ causalitates in eadem re, respectu ejusdem effecti non possunt combinari.

X. In unoquoque genere est quædam
causa-

causarum subordinatio ; in eaque subordinatione non datur progressus in infinitum : neque cum causæ per se , neque cum causæ per accidens subordinatæ sunt. Subordinatio enim ordinem habet : ordo habet primum , medium , & ultimum : at in infinito vel neque primum est , neque ultimum ; vel si primum sit , non erit ultimum ; aut si ultimum sit , non erit primum : deinde , infinita transiri nequeunt : quare tolleretur causarum officium , tolleretur scientia , quæ ex causis est , si causarum subordinatio esset infinita.

XI. In subordinatione datur una causa proxima ; cæteræ remotæ sunt. Causa proxima dicitur , quæ immediatè causatū constituit : Remota , quæ concurrit ad causatum constituendum media causa propinquiore. Causa proxima duobus modis dicitur , nempe vel absolutè , vel in suo genere. Causa absolutè proxima dicitur , quæ non solum immediatè , sed & existentia sua , causatum constituit , atque adeò qua posita , necesse est causatum poni : Causa in suo genere proxima dicitur , quæ concurrit ad causatum constituendum , non interveniente alia causa sui ordinis , licet interveniat alia diversi ordinis ; sic pater est proxima causa filij in suo genere , licet filium generet mediante semine : at avus est causa remota. Cæterum una res potest habere plures causas in suo genere proximas ; sed

150 INSTITVT. METAPH.
nam tantum, quæ sit absolute proxima;
quæ in substantiis est forma; sic, cum ho-
mini proxima materia sit corpus huma-
num: efficiens proxima pater; finis bene
esse; forma proxima anima rationalis: sola
tamen causa absolute proxima est anima.
In accidentibus causa absolute proxima est
causa efficiens; sic Eclipseos causa absolute
proxima est interpositio terræ: vel finalis;
sic sublatis vultus in homine, proximus finis
est contemplari cœlestia.

XII. In unoquoque genere sunt etiam
quædam causæ totales, quædam partiales.
Causa totalis dicitur, quæ sola in sua specie
totum causatum causat: Partialis, quæ alijs
causis suæ speciei juncta, causatum ex par-
te tantum causat. Quod ut intelligatur,
observandum est in unoquoque genere plu-
res esse causarum species, puta principales
& instrumentales, primam & secundas, pro-
ximam & remotas. Quæ, cum ad eundem
effectum concurrunt, non sunt in eo minus
causæ totales, quia unaquæque in sua spe-
cie est sola: sic scriptio licet sit à manu &
calamo, utraque tamen causa totalis est,
manus causa principalis, calamus causa in-
strumentalis. At cum causæ sunt ejusdem
speciei atque ordinis, veluti cum duo boves
plaustrum trahunt, dicuntur causæ partia-
les; Unius enim rei non possunt esse duæ
causæ totales ejusdem speciei: causa nam-
que totalis causat totam rem: quare si es-
sent

sent plures causæ ejusdem speciei, vel cæteræ omnino nihil causarent, & sic non essent causæ; vel causarent quod jam causatum est, quod omnino fieri non potest.

CAP. XXIV.

De Causa Materiali.

T H E S I S I.

EX quatuor causis duæ sunt internæ, materia scil. & forma; totidemque externæ, nempe, efficiens & finis. Causæ internæ dicuntur, quæ causatum intrinsecus componunt, eique suam essentiam largiuntur. Itaque non solum causæ sunt, sed & partes; imo ideo causæ sunt, quia partes. Causæ externæ dicuntur, quæ sunt extra causati essentiam.

I I. Causæ internæ involvunt aliquam imperfectionem in modo causandi: Causant enim componendo, hoc est, seipsas conferendo effectui; igitur necesse est utriusque Entitatem incompletam esse, atque imperfectam: Quæ cum ita sint, non potest Deus (à quo abest omnis imperfectio) exercere causalitatem materiæ aut formæ. Causæ externæ nullam sua causalitate imperfectionem involvunt: ideoque causalitates istæ Deo rectè tribuuntur; nam

si quæ imperfectio reperiatur in quibusdam causis efficientibus aut finalibus, ea non convenit ijs qua sunt causæ efficientes aut finales, sed quatenus causæ sunt finitæ. Causa quidem efficiens finita multiplici imperfectione laborat: Primo, enim imperfecta est, quia operatur propter aliquam sui perfectionem. Secundo, quia indiget materiâ. Tertio, quia indiget concursu superioris causæ. Similiter & causa finalis, si finita sit, imperfecta est, quia indiget concursu distincti ac limitati subjecti, ac proinde limitatam habet causalitatem, quod est imperfectio; at causalitates hæ, dum Describuntur, ab omnibus his imperfectiois modis sunt immunes.

III. Causæ internæ necessario nexu inter se & cum alijs causis cohærent: ita ut, quicquid materiam habet, id formam, efficientem & finem habere debeat: simili modo id quod formam habet, id cæteras omnes debeat habere causas; materia enim causat subjecta formæ, & forma materiam informando; atqui formæ non possunt in di materiæ absque efficiente; & efficiens non potest operari absque fine. At causæ externæ inter se quidem necessario sunt connexæ (efficientis enim semper propter finem operatur) at causis internis non junguntur necessario.

IV. Materia est causa interna ex qua res est. Quam definitionem ut intelligas, notandum

tandum est duo esse munera materiæ, non re, sed ratione distincta; nempe cum forma causatum componere, & inter componendum formæ tanquam subiectum substerni. Prius illud munus designamus, cum materiam dicimus esse causam *internam*; posterius, cum addimus, *ex qua res est*. Ex hac definitione potest explicari vulgaris illa materiæ distinctio potius quam divisio, in materiam in qua, ex qua, circa quam: Una enim eademque materia dicitur materia in qua, quatenus formam sustinet; ex qua, quatenus ex illa forma suscitatur, & cum forma causatum componit; circa quam, quatenus circa illam informandam efficiens occupatur: Vocatur etiam objectum omne, materia circa quam, sed admodum improprie.

V. Ex superiore definitione patet, materiam ex se & ratione suæ essentiae in potentia esse ad formam, hoc est, expertem simul & capacem esse formæ illius, cujus respectu materia dicitur. Et quanto magis formis destituta est, tantò magis in potentia est ad plures formas, & propterea si omnibus omnino destituta esset formis, pura foret potentia. Sed nunquam reperitur materia omnibus formis nudata: Itaque cum materiam primam puram dicimus esse potentiam, mens materiam absque formis concipit, quali modo nunquam existit, aut potest existere. Fundamentum hujus Theo-

rematis est, quod quamvis materia non possit simul omnibus formis destitui, possit tamen omnibus destitui successivè: nulla enim forma est, absque qua materia aliquando non existit, aut verè existere potest. Concipit ergo ens materiam nullis conceptis in ea formis, quia nullæ sunt quibus non possit carere; atque hæc est illa tam decantata materia prima.

V I. Hæc imperfectio materiæ, quâ in proprio suo conceptu atque absque formis considerata, dicitur pura puta potentia, non efficit, ut ex se, ac quatenus à forma distinguitur, non habeat existentiam actualem, sive actum (ut cum Scoto loquar) Entitativum, distinctum ab actuali Entitate formæ: nam ex quo forma educitur, quod formam sustinet, & quod cum forma compositum constituit, id haud dubiè actu est in rerum natura, ac proinde si sit Ens, actu erit Ens, imo actu erit substantia, habebitque actualem existentiam. Quid si materia magis ens sit quàm forma? quid si forma non sit substantia, sed modus substantialis tantum, qui additus materiæ certam Entis compositi speciem constituat. Sed hæc postea.

V II. Causatum materiæ proximum est forma; sed adæquatum, est compositum: materia formam causare dicitur, & cum fit, & cum facta est. Cum fit, quia ex illius potentia educitur, quod quid sit postea dicemus:

mus: Cum facta est, quia eam sustentat ne aboleatur; Forma enim ipsa per se subsistere non potest. A qua lege excipe animam intelligentem, si modò illa vera sit hominis forma informans. Compositum materia causat, quia unita formæ ex se productæ, compositum unà cum eâ constituit.

VIII. Causalitas materiæ, respectu formæ & compositi orientis, seu considerati in fieri, est ipsa formæeductio ex potentia materiæ, passivè, considerata; nam si consideretur activè, causalitas est agentis. Quod plerique omnes ex Suarezio dicant, causalitatem materiæ respectu compositi in fieri esse unionem sui cum forma, aut, quod eodem redit, formæ secum, falsum est; Forma enim informans non est à materia separata, imò ne separabilis quidem (nisi fortè anima intellectiva forma hominis informans sit) ac proinde non potest materiæ uniri.

IX. Causalitas materiæ respectu formæ & compositi facti, non differt ab illius existentia. Dicitur enim causare formam & compositum factum, quia utrumque sua Entitate sustentat, ne aboleatur. Quæ causalitas conservationi respondet & materialis conservatio dici potest. Itaque quod res materiata, cum semel facta est, non semper permaneat, non materia in causa est, sed efficiens agens in materiam, eamque refringens, atque aliam formam ex materia

reducens, quæ cum priori existere non potest. Si objecias quod thesi 7. cap. 22. dicitur, posita causa quæ sua existentia causat, necessario poni causatum; ac proinde, si materia causet formam & compositum ejusmodi causalitate factum, quæ non differt ab existentia materiæ, formam & compositum, nunquam interiturum, quia materia ipsa permanet. Respondetur materiam suam indifferentiam respicere formas omnes, ac proinde posita materiâ, non est necesse hanc vel illam formam poni, aut hoc vel illud compositum; sed aliquam saltem formam, aut aliquod compositum.

X. Materia vel substantiarum est vel accidentium. Materia substantiarum, est incompleta substantia, & nullius certæ speciei; quæ, addita forma, completur, & in certa specie constituitur. Materia accidentium est substantia completa eaque vel simplex est vel composita, quæ accidentibus tamen insuper informatur; nam ut substantialis forma se habet ad materiam, quæ est incompleta substantia: ita se habent accidentia ad subjectum suum, quod est substantia completa: Cum autem accidentia dicuntur inesse compositæ substantiæ, cave putes ea materiæ & formæ tanquam duobus subjectis partialibus inhærere, sed statue soli inhærere materiæ mediante forma. Sed hac de re plura cap. seq. de formis.

XI. Porro materia substantiarum vel remota

remota est, vel proxima. Materia remota, est materia imparata, ideoque indifferens ad plura causata. Materia proxima, est materia parata, ideoque disposita ac limitata ad certam aliquam causati speciem. Paratur autem materia ad certam aliquam formam, vel per accidentia solummodo, ut in Elementis; vel per formas substantiales, ut in corporibus mixtis & in primis in viventibus. Itaque materia remota & proxima non differunt in substantia materiæ, sed in ratione formarum, quibus materia disponitur ad formam ulteriorem.

CAP. XXV.

De Causa Formali.

T H E S I S I.

Forma definitur, τὸ ἢ ἢν εἶναι, id est, illud esse quo explicatur, quid sit res: vel λόγος ἢ ἢν εἶναι, id est, ratio illius quæ explicatur, quid res sit: vel denique λόγος ἢ εἰσίας, id est, ratio essentiae. Plenius sic: Forma est causa interna, per quam res est id, quod est. Quam definitionem ut intelligas, observandum est, ut materiæ, ita & formæ duo esse munera, non re, sed ratione distincta, nempe causatum, id est, compositum.

ficum cum materia constituere (quo nomine dicitur causa *Interna*) & simul materiam penetrando, indifferentem illius atque communem naturam determinare, restringere, atque in certa rerum specie constituere; atque hoc nomine dicitur causa *per quam res est id quod est*: quod enim res formata sit, quod substantia sit, aut corpus, aut ens alio modo compositum, non minus, si non magis, à materiâ est quam à forma: at quod res formata sit hoc quod est, puta cœlum, ignis, lapis, canis, aut homo, soli formæ imputandum est.

II. Ex hac definitione apparet, Formas malè dividi in informantes & assistentes. Formæ enim assistentes dicuntur, quæ rebus extrinsecus adjunctæ, motum illis solummodo impertiunt: at informantes formæ, materiæ non junguntur extrinsecus, sed in eâ sunt, eamque per omnia penetrant, ideoque non motum solum, sed esse specificum largiuntur, ut ante dictum est.

III. Præcedens formarum definitio satis apertè declarat, quid formæ sint, in quantum sint causæ; sed nondum satis constat, quid illarum absoluta sit natura, sive cujusmodi Entia sint & quomodo oriantur; hoc ergo restat explicandum. Ut igitur ab ortu ordiamur, primum statuimus, Formas non fieri ex nihilo; si enim ex nihilo fierent, crearentur. Si respondeas non ideo creari,

creari, quia ita ex nihilo fiunt, ut interim cum fiunt, à materia dependeant: Réponam hoc non sufficere, ut de verbis non litigem & dem, non fore creationem propriè dictam, ut pote, quæ rerum est per se substantium: hoc tamen certum est, ortum formæ talem fore actionem, quæ sit supra vires finitarum causarum, si ante generationem rei formatæ formæ fuerint nihil omnino, nunc autem vera sint Entia. Inter Ens enim & nihil infinita distantia intercedit, ideoque infinitæ virtutis est, Ens aliquid facere ex nihilo. Si hoc argumento non movearis, audi aliud: Si formæ, cum res compositæ generantur, ex nihilo fiunt, siue si ante rerum generationem sint omnino nihil, cum res compositæ intereunt in nihilum rediguntur: Atqui Ens in nihilum non abit naturaliter; non ergò formæ ex nihilo fiunt. Non potest etiam dici, Formas ante ortum & generationem rerum formatarum actu in materia fuisse: hoc enim qui statunt, omnem rerum ortum tollunt & interitum; si enim omnes formæ generationem antecedant, materia eodem modo se habebit ante & post generationem, & sic generatio tollitur.

IV. Ut hæc duo extrema vitemus, hoc est, ut neque creationem admittamus, neque generationem evertamus: media sententia eligenda est statuendumque, omnes formas educi ex potentia materiæ. Qua locutione

cutione significatur, formas non solum in fieri à materia dependere, sed etiam, formas ante generationem id ipsum fuisse potestate, quod post generationem sunt actu: Omnis enim forma propriè dicta ita se habet ad materiam, ut forma statuae se ad lignum; Atqui forma statuae non erat ullo modo in ligno ante statuae confectionem, siquidem nihil novi-Entis in ligno à statuario procreatur, quod antea in illo non erat, imo potius aliquid detrahitur: non erat etiam statuae forma actu in ligno, i. e. ita, ut est in statuâ confectâ; ergo erat in ligno aliquo modo, & aliquo modo nō erat in ligno: erat in illo potestate, & non actu. Simili modo de formis omnibus cogitandū est. Oriuntur ergo formæ, cum materia sic afficitur ab aliquo agente, ut fiat actu quod erat potestate; ac proinde actus formæ nihil aliud est, quàm progressio formæ à potestate ad actum, siue mutatio qua actu fit quod erat potestate. Intereunt autem formæ, cum materia ab actu relabatur ad potestatem, siue cum fit potestate, quod erat actu, atque in hac materiæ mutatione rerum ortus & interitus consistit.

V. Hinc sequitur, Formas non esse *χωριστάς*, i. e. non posse seorsim à materia existere: quod enim materiæ mutatione oritur & occidit, quod ex potestate materiæ educitur, id ita materiæ annexum atque implicitum est, ut seorsim existere non possit.

Itaque.

Itaque cum anima rationalis seorsim existat, non est putandum eam formam esse hominis informantem propriè dictam. Quid rerum formæ sint, explicari nequit nisi præmissa Formæ divisione.

VI. Dividuntur autem Formæ in substantiales & accidentales. Forma substantialis est, quæ materiam complet, eamque informat, atque ita constituit substantiam corpoream: Forma accidentalis est additamentum, completæ substantiæ inhærens, & cum illa constituens ens concretum, atque unum per accidens. In hisce definitionibus quatuor exprimuntur discrimina, quibus duo hæc formarum genera à se invicem dissident. Primum est, quod substantialis forma ad referatur materiam substantiæ; accidentalis, ad ipsam substantiam: & quia materia substantiarum ex se imperfecta est & incompleta in genere substantiarum, ideo forma substantialis dicitur materiam in genere substantiarum complere, & in certa specie constituere. Forma accidentalis non complementum est, sed additamentum substantiæ, atque hoc est alterum discrimen: ex quo nascitur tertium, quod forma substantialis materiam verè informat; at forma accidentalis non informat substantiam completam, nisi generali quodam & non ita propriè loquendi modo, sed ei inhæret potius, ut in subjecto. Hinc jam quartum oritur discrimen, quod forma sub-

stantialis

stantialis constituat substantiam per se unam; accidens verò constituat Ens quoddam concretum, atque per accidens duntaxat unum.

VII. Forma substantialis per se non est substantia; Substantia enim per se subsistit, quod certè formis substantialibus non potest attribui: què enim dicatur per se subsistere, quod non potest à materia separari? Atque hac in re nihil discriminis intercedit inter formas substantiales, & accidentia; ut enim accidens depèdet à substantia, sic pendet substantialis forma à materia: Non est tamè forma substantialis accidens: accidens enim substantiam non potest constituere; quid ergo aliud erit substantialis forma? Nihil aliud profectò, quam substantialis modus. Substantialis modus est, qui quamvis non sit substantia, in propria tamen ratione substantiæ includitur: si Forma substantialis per se substantia foret, aut verum Ens, quoties substantia corporea gignitur, duo Entia gignerentur, substantia videlicet & forma substantialis. Videri posset hoc non esse absurdum, siquidem ista duo unius rationem habent, quia sunt subordinata; Attamen revera absurdum est, si quidem explicari non potest, quomodo oriatur forma, si ipsa per se Entitatem habeat, distinctam ab Entitate materiæ. Quid ergò dices? an forma non habet propriam Existentiam, aut Entitatem? Imo sane: continet

nec enim ipsa & includit materiam, eo modo quo perfectio includit suum perfectibile, aut ut actus includit potentiam, ideoque reverà existit, per Existentiā materiæ: at si consideres eam in se seu in proprio conceptu, ac quatenus materiæ complementum est, non existit sâne, nec quicquam rerum est, sed modus tantum (ut dixi) substantialis.

VIII. Hæc si vera sint, dicat aliquis, esse atque existere quod rebus competit corporalibus, in solidum materiæ debetur: Formæ solummodò, quod tales res sint. Imò verò, inquam ego, si formis debetur, quod res corporales tales res sint, iis etiam ex parte debetur, quod sint; quia esse non potest concipi absque tali aut tali esse, & tale esse est ipsius esse complementum.

IX. Porro materiæ potentia suis quasi gradibus distinguitur; quorum singulis suæ Formæ respondent substantiales. Hæ formæ inter se subordinatæ sunt, non ut species generibus, aut formæ specificæ genericis (nullæ enim dantur formæ genericæ, si propriè loquamur; à mente enim pendet ea distinctio) sed ut remotæ causæ, proximis: Et enim cum Forma materiam complet, eam quidem in aliqua rerum specie constituit, sed ita tamen, ut adhuc in potentia sit ad speciem ulteriorem, ac proinde perfectibilis per formam nobilioris speciei: sic materia viventis admittit animam, quamvis ipsa
corpus

corpus sit, suâ propriâ formâ constitutum: sed cur hæc posterior forma non constituit unum per accidens, ut forma accidentalis, siquidem advenit substantiæ completæ? quia, quamvis hæc substantia in suo genere completa sit, incompleta tamen est in ordine ad speciem perfectiorem, ad quam ab ipsa natura ordinatur; at substantia est non incompleta in ordine ad accidentia, nec accessu accidentium completior fit, aut in perfectiorem transit speciem.

X. Hæc Subordinatarum formarum multitudo, Essentiam in corporibus non multiplicat, quia illud esse, quod à priori formâ tributum est, in eo continetur, quod à sequenti forma confertur. Ex. gr. materia viventium est corpus, anima est forma: Corpus illud suam habet formam, per quam corpus est; illa igitur forma dat esse corporeum, anima corpori largitur vitam seu esse vivens: Nec tamen propterea in vivente est duplex esse, corporeum & vivens; sed unum esse vivens, quod in se continet esse corporeum, ut numerus major minorem includit; species enim rerum sunt sicuti numeri, ut docet Aristot. lib. I. Metaph. cap. 6.

XI. Non hic prætereundum, quod quidam docent, Formas substantiales non distinguî à formis accidentalibus in se atque absolutè consideratas, sed in ordine ad compositum: volunt enim illi eandem formam, sub-

substantialem esse uni rei, alteri accidentalem: sic Græci interpretes penè omnes ajunt primas qualitates esse formas substantiales elementorum, & quidni etiam mistorum? alii addunt omnes formas esse accidentales respectu materiæ, quasdam tamè ex iis substantiales dici composito: quia compositum in certa specie constituunt. Hæc Philosophia quamvis rationibus suis non destituatur, non videtur rationi consentanea: quod enim speciem constituit, est incommunicabile, ergo nulli alii rei tribui potest, neque ut accidens, neq; ut adjunctum specificum. Præterea formæ substantiales non incurunt in sensus, non augentur gradibus in sua specie, non habent contrarium: at accidentia per se sentiuntur, gradibus variantur, & sibi invicem sunt contraria, saltem qualitates illæ primæ, de quibus præcipuus jam sermo; non possunt ergò accidentia unius rei, formæ substantiales esse rei alterius. Sed annon formæ substantiales compositi sunt accidentia materiæ primæ? Facile id concesserim, si per accidentis vocem intelligatur quicquid rei Essentiâ non continetur: Cum enim Essentia materiæ primæ consistat in potentia, quæ formarum negationem includit, Formam certè materiæ essentia non includit, ac proinde Formæ istæ, quas recipit, aliquo modo accidentia sunt materiæ primæ, siue adjuncta accidentalia.

CAP. XXVI.

De Causa Efficiente.

THESIS I.

CAusa efficiens definitur vulgò, à qua res est: sed non satis rectè; nam quid illud est, à qua res est? an à qua res efficitur, aut effecta est? Atqui sic definitio nihilo clarior est quàm id quod definitur; an à qua res causatur aut causata est? si hæc placeat definitio, omnes causæ eodem modo definiri poterunt; nec satis est dicere, causam esse externam à qua res est, nam & hoc fini competit: finis enim causa est externa, à qua res causatur. Alij causam efficientem dicunt esse causam externam, quæ vera causalitate causat; ut sic finem excludant qui non *vera*, sed *Metaphorica* causalitate causat: nec malè; sed tamen quia causam procatartica etiam videtur causare metaphoricè, malo causam efficientem hoc modo definire: Causa efficiens est, causa externa, quæ ipsa per se causat; in eo enim à fine distinguitur, qui non *per se*, sed *per efficientem* causat, quatenus scilicet desiderio sui efficientem movet ad agendum.

II. Causa efficiens latissimè patet, habetque plurimas sub se species; causandi modo differentes, quas omnes ad octo distin-

stinctiones referemus. Primum autem causa efficiens dividitur in procreantem & conservantem : Causa procreans dicitur, quæ rem efficit, quæ antea non erat ; conservans , quæ efficit rei existentis durationem ; itaque perperam causa conservans vocatur , quæ rem non destruit. Interdum eadem causa est procreans & conservans ejusdem rei ; interdum alia. Si sit eadem, conservatio nihil aliud est , quàm procreationis continuatio. Entia successiva non habent causam conservantem , sed tantum procreantem ; quia illorum esse , est continuum fieri.

III. Secundo dividitur causa efficiens in emanativam & activam. Causa emanativa dicitur , quæ sua existentia causat ; sive, à qua causatum fuit immediatè. Causa activa dicitur , quæ causatum causat mediante actione. Hæc actio est causæ activæ causalitas ; & in causa emanativa causalitas ab existentia non distinguitur ; existere enim & causare in illa unum sunt. Itaque fieri nequit, ut causa emanativa posita, non ponatur effectum : at causa activa posita , non est absolutè necesse causatum poni ; quia causæ existentia salva, potest impediri actio. Causa emanativa est causa conservans tantum ; causa activa & procreans potest esse & conservans : Itaque nulla causa emanativa potest esse prima : ac proinde, qui statuunt Deum causam esse
ema-

emanativam mundi, concedere debent aliā causam Deo priorem, à qua mundus sit procreatus. Etsi autem omnis causa emanativa sit causa conservans, non tamen omnis causa conservans est emanativa.

IV. Causa activa subdividitur in immanentem & transeuntem. Causa immanens dicitur, quæ producit effectum in seipsa; sic anima cum intelligit, aut appetit est causa immanens suorum conceptuum & effectuum. Causa transiens dicitur, quæ producit effectum extra se. Estque vel creans, vel transmutans. Creans, quæ producit effectum ex nihilo. Transmutans, quæ producit effectum ex præcedente & substrata materia; sic faber est causa transiens ædificatæ domus: & qui lapidem projicit, causa projecti lapidis. Cæterum observandum est, Deum non ita propriè dici causam transeuntem creaturæ, quam causam eam, quæ rem quampiam procreat ex nulla substrata materia; transitus enim duos requirit terminos. Itaq; ea causa magis propriè dicitur transiens, ubi agens & patiens rationem habent duorum terminorum; quàm ubi agenti patiens aut materia non respondet: atque hanc solum causam efficientis nomine dignatus est Aristoteles: ubique enim causam efficientem definit in ordine ad motum; Causam creantem non agnovit: causam emanativam & immanentem ad materiam, credo, retulit.

V. Causa transiens propriè dicta tres conditiones requirit ad causandum. Primo debet esse reipsa distincta à patiente seu materia ; agit enim cum motu : atqui movens debet à mobili reipsa distingui ; quod enim movet actu est , quod movetur , potestate : ideoque cum non possit idem respectu ejusdem simul esse actu & potestate , non potest idem à seipso moveri ; ac proinde debet causa transiens reverà distingui à patiente : velut totum à toto , velut pars à parte. Secundo debet causa transiens patienti esse conjuncta , idque vel existentia vel, ut vulgo loquuntur , supposito , vel virtute ; itaque non datur actio indistans , ut loquuntur. Tertio , causa transiens debet patienti esse dissimilis, vel quoad speciem, (quomodo calidum dissimile est frigido) vel quoad gradum , quomodo calidius dissimile est minus calido : quæ neutro modo dissimilia sunt , eorum alterum non potest agere in alterum , quia finis agentis est pateriens sibi assimilare : ubi igitur nulla dissimilitudo est , nullus est assimilationi aut fictioni locus.

VI. Tertio dividitur causa efficiens in contingentem & necessariam. Contingens dicitur, quæ indeterminata est ; necessaria, quæ determinata est ad causandum. Quod indeterminatum est, indifferens est ad plura quæ inter se sunt opposita , idque vel contradictoriè vel contrariè. Itaque causa duobus

bus modis vel determinata vel indeterminata dicitur: nempe vel quoad contrarietatem, vel quoad contradictionem; seu, ut alii, vel quoad specificationem, vel quoad exercitium actus. Causa quoad contradictionem seu exercitium actus determinata dicitur, quæ quod agit, non potest non agere; indeterminata, quæ quod agit, potest non agere. Quoad contrarietatem seu specificationem causa dicitur determinata, quæ non potest aliud agere, quàm quod agit; indeterminata, quæ aliud etiam agere potest. Cæterum causæ quædam utroque modo determinatæ sunt; quædam utroque modo indeterminatæ: quædam determinatæ quoad contradictionem, & indeterminatæ quoad contrarietatem: quædam contrà determinatæ quoad contrarietatem, & indeterminatæ quoad contradictionem. Sed hæ differentiæ ex sequentibus intelligentur.

VII. Causa contingens vel est libera vel fortuita. Libera dicitur hoc loco, quæ consultò causat; nam alias omnis causa ratione prædita imò interdum omnis spontanea, libera dicitur. Causa fortuita est causa contingens, quæ vel absque consilio agit; ut, cum natura gignit monstra: vel præter consilium; ut, cum aleator vincit, aut cum qui terram fodiens fertilitatis causa, thesaurum inuenit. Porro deliberatio versatur circa media, quæ non habent manifestam veritatem

tem & connexionem cum fine: de ipso fine, aut de mediis quæ certam habent connexionem cum fine, etiam de ijs quæ necessario finis adeptionem impediunt, non deliberamus, sed ea adhibemus ἀπεργελατός. In mediis quærimus, vel an hoc aut illud fieri debeat; vel cum plures sese offerunt, quodnam debeat præ cæteris fieri: Itaque cum causa libera deliberationem sequatur, eatenus libera censenda erit, quatenus deliberat, & in ijs de quibus deliberat. Itaque si deliberet an debeat agere nec ne, erit libera ac indeterminata quoad exercitium actus: si deliberet an hoc potius agendum vel illud, erit libera quoad specificationem: si deliberet utrumque, erit etiam utroque modo libera atque indeterminata: si neutrum deliberet, erit prorsus necessaria & determinata. Nec obstat libertati, quod voluntas determinetur à iudicio intellectus: Causa enim libera non ideò agit liberè, quia non agit sua voluntate, sed quia agit consultò, hoc est, ut ex pluribus objectis inter se collatis unum pro arbitrio suo eligere possit. Cæterum causa libera magis est contingens quàm fortuita: hæc enim habet aliquid necessitatis à fortuito causarum concursu; at causa libera non item. Ex. gr. etsi contingens sit monstrum à natura produci; non est tamen contingens produci monstrum, positis ejusmodi naturæ impedimentis, qualia poni solent

cum monstra gignuntur.

VIII. Causa necessaria vel naturalis est, vel spontanea, vel coacta. Causa naturalis dicitur, quæ causat necessitate naturali; siue quæ sua natura determinata est ad causandum: veluti, cum ignis urit, gravia descendunt, &c. Hæc causa determinata est quoad utramque speciem oppositionis, itaque agit ubi, quando, quamdiu, & quantum potest. Causa spontanea tunc dicitur necessaria (nam interdum libera est) quando determinatur ab objecto, id est, quando ab objecto movetur ad causandum sine deliberatione, estq; vel ratione prædita, vel ἀλογος: causæ ratione præditæ, ut homines, angeli, non determinantur à quolibet objecto, sed à fine solùm, aut ab ejusmodi rebus, quæ necessariam habent cum fine connexionem, aut quæ finis connexionem necessario impediunt; causæ ἀλογæ, ut bestię, à quolibet objecto promiscuè determinantur; itaque in bestiis nulla est libertas, bestię enim omnia appetunt aut refugiunt necessario: at homo necessario quidem fertur in finem ultimum, & in illa quæ cum illo necessario conjuncta sunt; aversatur autem necessario, quæcunque ultimi finis impediunt adeptionem. Sed in cæteris rebus liber est, quæ neque necessario cum fine sunt connexæ, neque adeptionem necessario impediunt. Causa coacta dicitur, quæ vi ad causandum adigitur, ita, ut ipsa

ut ipsa nihil ad illud conferat καὶ οὐκ ἔστιν ὁρμην, id est, proprio impetu, atque adeò ut ne quidem consentiat in illud factum; veluti si quis de sublimi loco vi dejectus, casu hominem opprimat: sic Philosophi causam coactam definiunt; Jurisperiti non excludant omnem consensum; sed eum solum, qui non producit effectum juris.

IX. Quartò dividitur causa Efficiens, in causam per se, & causam per accidens. Quæ divisio duobus modis explicari potest: primo enim dicitur causa per se, quæ effectum producit quæ talis est, hoc est, ea ipsa virtute à qua denominatur; veluti cum architectus dicitur causa domus, aut statuarius statuæ: igitur causa per accidens erit hoc sensu, quæ effectum non producit quæ talis est, id est, non ea virtute aut qualitate unde nomen habet, sed alia; veluti cum architectus dicitur causa statuæ, aut statuarius domus; accidit enim statuario esse architectum, & architecto statuarium.

X. Alio modo dicitur causa per se, quæ fine suo potitur; sive, quæ producit effectum consilio suo, si liberè operetur; aut alioqui naturæ suæ propensione consentaneum, si operetur necessariò: causa ergo per accidens erit, quæ suo fine frustratur, estque vel fortuita, vel coacta. Causa fortuita idèò dicitur causa per accidens, quia producit effectum præter consilium, si ope-

retur liberè; vel contra naturæ propensionem, si necessariò. Ex. gr. cum natura producit sibi simile, dicitur causa per se; cum generat monstrum, causa per accidens: illud enim naturæ propensioni consentaneum, hoc illi contrarium est. Similiter cum piscator pisces caput est, causa per se, quia illud intendebat; at si extrahit aureum tripodem, est causa per accidens, quia hoc præter illius intentionem ac consilium fit. Causa coacta dicitur causa per accidens, quia quicquid à coacto fit, id illius scopo consilioque contrarium est.

XI. Quinto dividitur hæc causa, in principalem, & minus principalem sive secundariam. Causa principalis dicitur quæ sua virtute effectum producit; itaq; non potest esse deterior effecto suo, sed dicitur quidquid est in effecto suo, idque vel formaliter, id est, eo modo quò continetur in effecto suo; vel eminenter, id est, modo eminentiori & perfectiori. Cum causa principalis effectum in se formaliter continet, causa dicitur univoca, veluti cum ignis ignem gignit; at cum effectum continet eminenter, dicitur causa æquivoca, veluti cum lux calorem gignit, aut architectus domum efficit: Itaque causa univoca dignitate æqualis est effecto suo, & ejusdem speciei; at causa æquivoca præstantior est suo effecto & diversæ speciei. Cum effectum in causa quapiam neque formaliter
neque

neque eminenter continetur, ea causa dicitur secundaria, eaque non tam efficit, quàm movet causam principalem, eique subservit, ad effectum producendum; itaq; semper effecto suo deterior est, non quidem essentia, sed virtute illâ quâ causat.

XII. Causa secundaria vel est procatarctica, vel proëgumena, vel instrumentalis. Causa procatarctica est, quæ causam principalem extrinsecus incitat ad agendum: estque vel objectum, vel occasio, vel auctor, vel merita, seu causa meritoria: objectum dicitur causa procatarctica, quatenus movet principalis causæ potentias, tum cognoscentes tum appetentes, atque ita eam ad agendum impellit; Sic fructus vetiti pulchritudo; causa peccandi fuit primis parentibus. Occasio est loci temporisque commoditas ad agendum quod velis; quæ & ipsa vim quandam movendi habet, atque eatenus causa est; sic noctis tenebræ, & res negligenter custoditæ, furem incitant ad furtum faciendum; occasio enim facit fures. Auctor dicitur, qui aliquem ad agendum hortatur, aut ab agendo dehortatur, ab aliis causa dicitur moralis; sic Diabolus autor erat & causa primis parentibus violatæ legis à Deo latæ. Meritum sive causa meritoria dicitur, quæ aliquem movet ad reddendam talionem, idque tam in bonis quàm in malis, tam in privatis quàm publicis rebus; sic beneficia accepta sunt cau-

ſæ meritoriaæ cordatis hominibus de benefactoribus ſuis benè merendi; & injuria eſt cauſa meritoria pugnae aut belli; ſimili modo res benè geſtae ſunt cauſa meritoria præmiorum, & delicta pœnarum: Cauſa meritoria interdum vocatur occaſio, eaque ſiſt ſicta, dicitur *æſφαις* ſive prætextus.

XIII. Cauſa proëgumena eſt, quæ cauſam principalem intus diſponit, vel etiam proritat ad agendum; ſic temperamentum eſt cauſa morum proëgumena, ſed diſponens ſolummodò atque inclinans; at cum ira dicitur cauſa proëgumena vindictæ, aut avaritia injuſtitiaæ, non diſponens, ſed incitans eſt & proritans.

XIV. Inſtrumentum eſt, quod cauſæ principali in ipſa effectiōe ſubſervit; eſtque vel conjunctum vel ſeparatum. Conjunctum dicitur, quo cauſa principalis in ipſa effectiōe utitur; atque hæc vel activa ſunt, ut calor in igne, vel paſſiva, ut culter, gladius: Inſtrumenta ſeparata ſunt, quæ agunt loco ac vice cauſæ principalis; ſic legatus eſt inſtrumentum Principis à quo mittitur: hujusmodi inſtrumenta non habent locum in naturalibus, ſed tantum moralibus.

XV. Sexto dividitur cauſa Efficiens in primam & ſecundam. Prima eſt, quæ non pender ab alia cauſa. Secunda, quæ pender à prima. Cauſa efficiens vel abſolutè prima eſt, vel in ſuo genere. Cauſa abſolutè
prima

prima est, à qua omnia pendent in fieri, in esse, & operari: Ejusmodi causa tantum una est, nempe Deus; omnia enim dicuntur pendere à Deo *in fieri*, ratione creationis, idque vel proximè vel remotè; *in esse*, ratione conservationis; *in operari*, ratione providentiæ, tum ordinariæ tum extraordinariæ: Itaque respectu Dei omnes aliæ causæ sunt causæ secundæ. Causa prima in suo genere dicitur, à qua pendent reliquæ causæ ejusdem generis & ordinis: ejusmodi causa prima non solum datur in unoquoque genere causarum, sed etiam in unaquaque causarum subordinatione; sic Adam prima causa dici potest hominum inter homines, cœlum prima causa motus inter causas naturales, anima prima causa operationum vitalium, & quælibet causa principalis, dici potest prima causa respectu instrumentorum.

XVI. Septimò causa efficiens dividitur in universalem & particularem: Causa universalis est, quæ concurrit eadem virtute ad plura effecta cum aliis causis; Causa particularis quæ sua virtute unicum tantum effectum producit. Universales causæ sunt Deus & cœlum; ac Deus quidem, quatenus cum causis particularibus ad omnes effectus concurrit secundum legem ordinariæ providentiæ suæ; cœlum autem, quatenus concurrit ad omnes effectus naturales & morales: At cum canis ca-

nem generat, aut pirus pirus, dicuntur causæ particulares. Cæterum ex Universalis causæ definitione duo sequuntur: primo causam universalem nunquam quicquam producere absque causis particularibus: secundo qualitatem effecti, non universali, sed particulari causæ esse adscribendam. Ex gr. cum Equiso, agitante se armentum equorum, causa universalis dicitur, quia integros pellit & claudos eodem modo, eadem virtute, ideoque equisoni non imputandum, quod quidam claudicent, alii non item, sed hoc solum quod omnes moveantur: Sic Deus non potest dici causa peccatorum, etsi causa sit omnium actionum, quia est causa universalis, & eadem actione concurrat ad bonas & malas.

XVII. Octavo & ultimo solet dividi causa Efficiens in proximam & remotam; nam licet hæc divisio ad omnes causas pertineat, hic tamen est rursus explicanda, quia particulari modo Efficienti competit. Hæc autem divisio duobus modis explicatur: nam causa proxima interdum dicitur, quæ virtute sua effecto est conjuncta; sic ignis est causa proxima ustionis, parentes suorum liberorum; nam quamvis ignis agat mediante calore, & parentes mediante semine, quia tamen calor ignis, & semen parentum sunt instrumenta, non efficiunt interventu suo, ut causa principalis.

palis non possit dici effecto suo proxima, præsertim cum instrumenta censentur una eademque causa cum causa principali : causa ergo remota hoc sensu dicitur, quæ neque existentia, neque virtute, cum effecto est conjuncta; veluti cum avus causa nepotis dicitur.

XVIII. Alio modo dicitur causa efficiens proxima, nempe ea, quæ sua existentia seu supposito, effecto est conjuncta, nulla media virtute intercedente, vocaturque causa absolute proxima : hujusmodi causa proxima non datur in substantia, sed tantum in accidentibus, præsertim proprijs; substantia enim non efficit substantiam nisi medijs accidentibus. Hæc causa dividitur in internam & externam : interna dicitur, quæ est in ipso subjecto in quo est effectum; huc pertinet causa emanativa, & synectica sive continens Medicorum : externa dicitur, quæ non est in eodem subjecto; Sic interpositio terræ est causa eclipsos. Hujus causæ respectu omnis causa dicitur remota, quæ per virtutem aliquam mediā, causatum producit; veluti cum ignis suo calore urit. Itaque quæ priori modo dicebatur causa proxima, hic dicitur remota.

CAP. XXVII.

De Fine.

T H E S I S I.

Finis est causa externa, cuius gratia res est, id est, quæ sui desiderio ac amore incitat causam efficientem ad agendum; & ad consecutionem sui. Quæ definitio ut melius intelligatur, hæc quatuor ordine sunt explicanda: Primo quæ res finis sit, & quæ sit ratio formalis, quâ causat. Secundo, quæ sit conditio in fine ad causandum requisita. Tertio, quæ causalitas. Quarto, quodnam proprium illius sit causatum.

II. Atque ut à primo exordiamur, ante omnia constituendum est, finem esse bonum; nam quemadmodum omne bonum idèd, quia bonum est, appetibile est: ita quoque nihil appeti potest, nisi quod boni habet rationem. Itaque finis non alia ratione causat, nisi quia & quatenus bonus est; nec quicquam refert, sitne reverà bonus, an bonus esse videatur. A bonitate finis, media quoque suam bonitatem accipiunt; ea enim eatenus bona sunt, quatenus fini acquirendo conducunt: Malum ergo cum amari aut appeti non possit, quia malum est, non potest etiam quia malum est, causare finaliter. At appetitus averfatur
malum

malum, dicat aliquis, ergò malū etiam, quā malum, exercet causalitatem finalē. Sed ista consequentia nimis est infirma; nam voluntas cum malum adversatur, non pelli-
tur à malo, sed à contrario bono trahitur. Si urgeas, etiam privationes appeti, ut *ἀλυσίαν*, mortem, &c. Non una Responsione dilui poterit ista instantia; nam primò licet privationes bonæ non sint, appetuntur tamen sub ratione boni, arque ita ac si essent bonæ, & sic mors appetitur; nam si minus malum habet rationem boni collatum majori, multò magis negatio mali habebit rationem boni. Deinde privationes ferè movent appetitum sociatæ bono cuiuspiam, sic *ἀλυσίαν* expetimus, quia conjuncta est ejusmodi statui, qui naturæ nostræ est convenientissimus.

III. Porro bonum, vel ut intentum, vel ut obtentum potest considerari; similiter & finis, cum inter causas numeratur, ut intentus sive in intentione spectatur, hæc-
nus enim movet efficientem ad agendum, & ad sui consecutionem: Finis obtentus & effectus, sive ut vulgò loquuntur in executione, non causæ, sed effecti rationem habet. Itaque efficiens & finis sibi mutuò causæ sunt; nam finis movet efficientem ad agendum, & ipse vicissim hac efficientis actione producit. Cum autem finis in intentione quasi duplex habeat esse, nempe esse reale possibile, & esse intelligibile (nam

(nam cum habet esse reale actuale, in executione est, & effecti rationem habet) non causat secundum esse intelligibile, sed secundum esse reale possibile; finis enim jam obtentus, non amittit esse intelligibile, quod habebat in intentione, sed tamen rùm desit causare: Deinde appetitus non fertur in finem secundum esse intelligibile, sed secundum esse reale. Quod si aliquando objecti alicujus cognitionem expetimus aut finem, (ut fit in Philosophia speculativa) cognitio rùm spectatur secundum esse reale, quatenus nempe est actus mentis, aut habitus.

IV. Interim esse intelligibile siue cognitio finis, necessaria conditio est ad exercendam causalitatem finalem, sicuti propinquitas necessaria est ad causalitatem efficientis; quia enim ignoti nulla cupido est, non potest finis absque prævia sui cognitione movere appetitum: non sufficit autem apprehendi finem, sed debet apprehendi sub ratione boni, ideoque cognitio ista non theoretica est, sed practica, imo ipsum dictamen intellectus practicum. Quid ergo, dicet aliquis, an ea solum propter finem agunt, quæ agunt *en-telektionis*? nam res inanimæ non videntur agere propter finem, quia finem non cognoscunt, ideoque non expetunt: & bruta animantia, licet agnoscant finem, non tamen cognoscunt finem esse finem, ac proinde non possunt à
fins

fine moveri, ad media adhibenda, quibus finis debet comparari: Imo verò, inquam ego, omnia nihilominus agunt propter finem, sed non omnia eodem modo; quædam enim ipsa per se ac immediatè moventur à fine; quædam mediatè, & interveniente alio. Ex iis quæ immediatè feruntur in finem, quædam feruntur in finem formaliter, id est, in quantum finis est, ut homo, & quicquid agit *cum ætate*: alia tendunt in finem materialiter, id est, in quantum habet rationem boni, non quatenus est finis; ut bestię. Res inanimæ diriguntur in fines suos à generante, aut à primo motore, ideoque moventur à fine ad media, quibus ad finem eundum est, non suâ, sed primi motoris cognitione atque appetitione interveniente. Deus etiam agit propter finem, sed finis Dei non est bonum quod consequitur, sed quod vult communicare.

V. Causalitas finis, est amor desideriumve, quo efficientis appetitus movetur à fine ad media, quibus ad finem pervenitur. Hæc motio, ut ab efficientia distinguatur, vocatur motio metaphorica, non, quia non est vera motio, sed quia non est talis motio, qualis est motio efficientis: Efficiens enim sua motione, causat effectum immediatè, finis non immediatè, sed interveniente causæ efficientis causalitate. Porro cum ista motio metaphorica appetitus,

appetitus, sit actio immanens, ideoque vel ut passio appetitus considerari possit, à fine concitati, vel ut actio appetitus effectum amoris in se producentis; observandum est, eam priori consideratione esse causalitatem finis, consideratione posteriori esse effectum aut actionem appetitus.

VI. Ut causatum Finis intelligatur, de quo quarto & ultimo loco erat dicendum, observandum est, duo esse genera actionum in efficiente causa, quæ à fine causantur. Quædam enim à fine causantur ab objecto, quæ causalitas pertinet ad causam procatacticam, ut ante dictum; aliæ causantur à fine, ut à causa finali. Ex. gr. cum finis agenti oblatu apprehenditur, probatur, amatur, atq; intenditur: earum actionum respectu non causa finalis, sed objectum sive causa objectiva dici debet; at cum movet efficientem ad deliberandum de mediis, ad eligenda media ex multis optima, ad media electa comparanda, & ad Finem horum mediorum adminiculo consequendum, hæ actiones, atque ipsa media pendent à fine, non ut objecto, sed ut à causa finali. Ratio discriminis hæc est, quod priores actiones illæ immediatè causantur à fine; posteriores priorum interventu: Itaque causatum Finis, ut est causa finalis, erunt media ad finem destinata, & omnes actiones efficientis causæ circa media.

VII. Finis (inquit Aristot. lib. 1. Polit. cap. 9.) in infinitum expetitur, media non in infinitum, sed quantum satis est ad finem acquirendum; itaque Finis est mensura mediorum, idque non solum in ratione quantitatis, sed etiam in ratione qualitatis sive bonitatis; ut enim finis per se bonus est, ita media ætenuus bona sunt, quatenus conducunt ad finem consequendum, & quæ ad finem consequendum plus conferunt, meliora sunt aliis: quod aded verum est, ut etiam media quædam sua natura mala, amentur tamen & expetantur ut bona, & sint etiam revera bona, quatenus conducunt ad obtinendum finem: si tamen media inhonesta sint, nullius finis gratia expetenda sunt, quia quod inhonestum est sua natura, nullius respectu bonum esse potest.

VIII. Finis solet dividi in finem cuius & finem cui. Finis cuius dicitur, quem efficiens expetit: Finis cui, in cuius gratiam sive commodum finis cuius expetitur. Ex. gr. Medicinæ finis cuius, est sanitas; Cui, æger: Finis cuius, movet efficientem amore concupiscentiæ; Finis cui, amore benevolentæ: Finis cuius vel est operatio, vel opus aliquod præter operationem, aut usus operis; sic finis Musicæ est, peritè canere, finis virtutis, *εὐμεγεία*; at artium mechanicarum finis, non tam est operari, quàm opus aliquod, puta domum.

num, calceum, aut aliquid tale producere, eoque uti; Finis cui, ferè est personæ, aut aliquid quod amamus instar personæ.

IX. Finis Cujus vel principalis est, vel secundarius. Principalis finis dicitur duobus modis: Primo quem agens primario intendit; itaque finis secundarius dicitur, quem agens intendit tanquam adjunctum seu auctuarium primarii finis; Sic finis principalis vestium est, corpus tegere ac tueri & decus conciliare. Secundo dicitur finis principalis, quem efficiens intendit primo; secundarius, quem intendit *κατὰ δευτερον πλεον*, sive intentione secundâ, ac tanquam vicarium primi finis, quem scilicet consequatur, si priori fine excidat: sic finis principalis, propter quem Deus se in creaturis manifestavit, est, ut homines Dei cognitione & pietate imbuantur; secundarius, ut reddantur *ἀναπολόγητοι*, i. inexcusabiles, ut patet ex cap. 1. Rom.

X. Dividitur etiam Finis, in subordinatum & ultimum. Finis subordinatus est, qui refertur ad finem ulteriorem, itaque tunc induit rationem medij: finis ultimus est, ad quem reliqui fines referuntur, & ipse ad ulteriorem finem non refertur; estque vel in suo genere ultimus vel absolutè. Finis in suo genere ultimus est, qui est ultimus inter eos fines qui intenduntur ab eodem agente, qui tamen ab alio agente destinantur ad finem ulteriorem: Finis abso-

absolutè ultimus est ad quem omnia referuntur, ipse ad nullum finem ulteriorem refertur. Non iri in finium subordinatione in infinitum, sed dari finem absolutè ultimum, colligit Aristoteles libr. 1. *Ethic.* cap. 1. ex eo, quod frustra foret & inanis appetitio, quam natura omnibus rebus indidit, si non esset ultimus finis.

XI. Neque verò cuique agenti suus finis ultimus propositus est; sed omnes causæ secundæ feruntur in eundem finem. Nam sicut ab una eademque causâ prima omnes dependent: ita quoque omnes tendunt ad eum finem. Prima illa omnium rerum universalis causa est ipse Deus, ac proinde Deus erit quoque communis & ultimus omnium rerum finis: Itaque sicut ab eo dependent omnes causæ quoad efficientiam; ita quoque omnes creati ac subordinati fines, à Deo dependebunt quoad causalitatem finalem: Quæ tamen dependentia in quibusdā rebus admodum est obscura; non enim videntur omnes causæ in omnibus suis actionibus, ultimum finem intendere, ac proinde subordinati illi fines finaliter ab ultimo fine causari non videntur. Notandum ergò, actiones secundarum causarum, etiam esse actiones causæ primæ, ac proinde duobus modis spectari posse, nempe vel quatenus exercentur à causis secundis, vel quatenus à prima causa sunt. Quatenus à prima causa sunt, causantur ab ultimo fine
haud

haud dubiè; Deus enim, quem ultimum finem esse diximus, agit omnia propter seipsum; at quatenus à secundis causis exercentur, non semper causantur formaliter & explicitè ab ultimo fine, sed tantùm materialiter, aut virtualiter atq; implicitè; nā res inanimes non agunt propter finem, nisi quia & quatenus dependent à causa prima, quæ agit propter finem; ideoque non moventur ab ultimo fine, nisi quia & quatenus causa prima ultimum finem intendit: Bestiæ quidem agunt propter finem proximum qui sensus ferit, sed materialiter tantùm: finem ultimum non respiciunt aut affectant ullo modo: Homo quidem semper intendit finem proximum formaliter, atque expetit sub ratione finis, non tamen semper ultimum finem intendit, sed tantùm aliquando; sæpè enim fit, etiam cum agit propter finem aliquem proximum, ut de fine ultimo non cogitet; idem de Angelis statuendum videtur. Interim quia boni subordinati fines secundarum causarum, quædam participationes sunt summi boni atque ultimi finis; cùm secunda causa à subordinatis finibus movetur, etiam debet ab ultimo fine moveri; & cum tendit in finem proximū, censeri etiam debet in ultimum tendere, & proinde proximi, cæterique subordinati fines dici poterunt ab ultimo fine causari virtualiter & implicitè.

XII. Fines sæpè subordinati sunt serie longa,

longa, alii aliis, in eaque quidam per se subordinati sunt, quidam per accidens. Per se subordinati sunt aliis, qui in eodem genere subordinati sunt, id est, qui intenduntur ab eo ipso agente, à quo intenditur finis ulterior: per accidens dicuntur aliis subordinati qui in suo genere sunt ultimi, hoc est, qui non intenduntur ab eo agente à quo finis ulterior intenditur. Ex. gr. metallarii terram fodiunt, ferrum eruendi gratia, ferrum eruitur, ut ex eo instrumentum fiat nostris usibus inserviens, puta scalpellum, scalpellum inservit ad venæ sectionem, & sic porro; hi fines per accidens subordinati sunt, quia singuli intenduntur ab alio agente: à metallariis primus; secundus à fabro; tertius à medico &c. at si fines sic concinnes, Medicus eruit scalpellum ad venæ sectionem, venæ sectionem instituit ad detrahendum sanguinem superfluum aut vitiosum, detrahit sanguinem sanitatis ægro restituendæ causa; Fines isti per se subordinati sunt, quia omnes à Medico intenduntur: si pergas, & sanitatem ægro redditam referas ad ulteriorem finem, puta ad ægri felicitatem, jam transibis ad ejusmodi finem, cui priores illi fines per accidens subordinati sunt; nam Medicus, ut medicus est, nihil ulterius sanitate intendit in ægro. Interim observandum, eosdem Fines & per se subordinatos posse esse & per accidens, respectu diverſi agentis;

agentis; nam, ut in eodem exemplo pergam, si sanitas ægro restituta, referatur ad expetitum muneris exercitium, & ad ægri felicitatem, erunt isti fines per se subordinati respectu ægri, peraccidens verò respectu Medici, cui ægri sanitas in isthoc genere, hoc est in ægro ultimus est.

XIII. Quo finis ulterior, eo melior est: Finis ergò ultimus est optimus omnium, adeoque summum bonum. Finis enim, ut ante diximus, bonus est & quidem per se; Media autem bona non sunt, nisi quatenus fini obtinendo inserviunt: Finis ergò semper melior est mediis, quia propter quod unumquodque tale est, illud est magis tale; quare cum subordinatus finis sit medium respectu ulterioris, & proinde minus bonus, sequitur finem ultimum esse omnium optimum (siquidem ad meliorem finem non refertur) aut saltem videri talem: nihil enim refert, ut ante diximus; sitne finis reverà bonus, an tantum apparenter.

XIV. Addendum est & hoc, quod Aristoteles docet lib. 3. Eth. cap. 3. τὸ ἔχον ἐν τῇ ἀναλύσει, πρῶτόν ἐστι ἐν τῇ γένεσει. i. quod ultimum est in resolutione sive in intentione, id primum est in generatione sive executione: Hinc concludas, quoniam fides prius confertur electis quàm vita æterna, vitam æternam prius destinari homini à Deo conferendam, quàm fidem.

XV. Di-

XV. Dividitur & Finis, in finem per se, & per accidens; verum hæc divisio non caret vitio: Finis per accidens appellatur vulgò, qui non intenditur, sed quem agens assequitur præter intentionem & propensionem naturæ: atqui quod præter intentionem agenti accidit, Finis aut causa finalis dici nequit; quia finis ideò & eatenus causa est, quia & quatenus movet efficientem, id est, quatenus ab efficiente intenditur: itaque cum hoc sensu finis per accidens dicitur, Finis appellatione, non causa, sed effectum per accidens sive eventus intelligitur. Potest tamen divisio illa excusari, si per finem per se, intelligas finem, quem efficiens primò intendit, & per finem per accidens eum, quem intendit *ἡγετὸς τοῦ τεργὸς πλεον*, id est, ut eo potiatur, si primo fine excidat.

CAP. XXVIII.

De Subjecto & Adjuncto.

T H E S I S I.

Subjectum est *ἐκ τῶν ὡς π*, denotatque respectum vel ad prædicatum, vel ad adjunctum: cum respectu ad prædicatum sumitur in doctrina de Enunciatione; hic

hic cum respectu ad adjunctum. Subiectum in Enunciatione dicitur, de quo aliquid verè aut falsò affirmari aut negari potest: Hoc loco Subiectum est, cui aliquid est additum, quod ad illius essentiam non pertinet; & id quod illi præter essentiam additur, dicitur adjunctum. Porro subiectum prædicati latius patet quam subiectum adjuncti, ut istas voces discriminis causâ usurpem: nam quicquid adjuncto subijci potest, id etiam prædicato subijcitur in enunciatione, quia omne adjunctum potest affirmari de subiecto suo, non quidem in rectâ, sed obliquâ oratione, si voces non desint: sed non quicquid in Enunciatione subijcitur, id omne adjuncto dici potest subijci: nec omne prædicatum Enunciationis, dici potest adjunctum; nam quod negatur de subiecto, non potest adjunctum dici; non etiam quod falsò affirmatur: nec quicquid pertinet ad subiecti essentiam; veluti, cum prædicantur genus, differentia, aut definitio, sed id solum quod extra subiecti essentiam est.

II. Adjunctum multifariam dividi potest, eademque differentiarum poterunt etiam subiecto accommodari; Adjunctum vulgò dividitur in proprium & commune, malim, in necessarium & contingens. Adjunctum necessarium sive proprium est, quod omni, soli, & semper alicui subiecto convenit, atque ideo cum eo recipitur:

non

non addo, quod *non declarat quid res sit*, quoniam id ad generalem adjuncti definitionem spectat, ideoque non erat in definitione speciei repetendum. Tres conditiones priorum adjunctorum expressi, scil. ut *omni subiecto*, id est, omnibus quæ subiecto continentur, vel ut species, vel ut individua conveniat: ut conveniat *soli subiecto*, & *semper*; itaque accidens commune seu contingens fuerit, in quo una istarum conditionum desideratur, aut plures, id est, quod aut non convenit *omni*, aut *soli* alicui subiecto, aut non *semper*, ac proinde quod cum nulla re recipiatur. Quærat aliquis, cum propria adjuncta vel generum sint vel specierum; an quæ generibus propria sint cum subiectis speciebus tribuuntur, fiant communia adjuncta? nullo modo: licet enim proprietates generum non recipiuntur cum singulis speciebus, recipiuntur tamen cum genere; at adjuncta communia dicuntur, quæ cum nullo subiecto recipiuntur. An ergo proprietates generum sunt etiam proprietates subiectarum specierum? ita certè: nam quia genus in specie continetur, quicquid generi est proprium, id etiam proprium est speciei secundum naturam genericam consideratæ; ex. gr. sentire proprium est animali, ideoque & homini, non quatenus homo est, sed quatenus animal est; at commune adjunctum nulli rei adjunctum proprium

est, quomodocunque considerata; sic nigror est commune adjunctum corvi, siquidem neque cum corvo reciprocatur quatenus est corvus, neque quatenus est avis, nec ulla alia consideratione.

III. Propria adjuncta quædam emanant ab essentia subjecti, idque vel immediatè; sic ridendi admirandiq; facultas manat immediatè ab humana essentia: vel mediante alia proprietate; sic locum occupare manat ab essentia corporis mediante quantitate. Alia subjecto conveniunt propter causam aliquam externam; sic Eclipsis quæ est proprietas Lunæ, non manat ab essentia Lunæ, sed à causa externa, nempe à terrâ inter Solem & Lunam interpositâ: Itaque priora illa licebit appellare absolute propria, cætera propria ex hypothesi causæ externæ, qua tamen positâ, haud minus necessariò subjecto conveniunt, quàm propria absoluta.

IV. Proprium absolutum ita necessariò convenit subjecto suo, ut subjectum absque eo nequeat existere, imò ut citra contradictionem de subjecto suo, vel verbo vel cogitatione negari nequeat; si quis enim dicat aut cogitet, corpus non esse quantum, aut ignem non esse calidum, ille dicit aut cogitat ignem non esse ignem, aut corpus non esse corpus: vel saltem ex quo sequitur corpus non esse corpus, vel ignem non esse ignem: Ubi tamen cavendum est, ne proprietatum

prietatum actiones cum ipsis proprietatibus confundantur; actiones enim priorum, non sunt adjuncta propria, quia non semper subjectum operatur; sed adjuncta communia & contingentia, ideoque impediri possunt salva subjecti essentia: sic legimus in Babylonica fornace ignem non uulsiisse injectos juvenes, quia Deus scilicet aut cum ignis actione desit concurrere, aut impedimentum posuit in juvenum corporibus, quo vis ignis arceretur; & sic etiã legimus ferrum aquis non fuisse immersum, Christum ambulasse super aquas, & Petrum etiam usquequò fides in eo vigeret; at verò ut ignis non sit calidus, aut ferrum exuat gravitatem suam, aut ut ullum subjectum amittat proprietatem suam salvã tamen essentiã, nulla vi fieri potest; quia enim proprietates emanant ab essentia subjecti, ab eaque immediatè causantur, si Deus essentiam subjecti conserveat, necesse est, etiã proprietatem conservari, quam Essentia subjecti ipsa per se sine ulla causalitate causat.

V. Proprietates non possunt communicari subjectis specie diversis; nam quia immediatè manant ab essentia subjecti, etiam communicaretur subjecti essentia, si communicarentur proprietates: itaque si ubiquitas, quæ est proprietas divinæ naturæ, sit communicata humanæ naturæ Christi, etiam humana debuit fuisse Deificata. Ne

in hac quæstione hallucineris, distingue inter *συνδύασις*, *μέτεξις*, & inter *κoinωνία*: Est autem *συνδύασις*, cum duo corpora ita sunt permista & unita, ut sensus ea distinguere nequeat, ob eamque causam unius proprietates alteri tribuitur, veluti cum ferrum ignitum dicitur urere; aut cum manus quæ pomum tractavit, dicitur pomum redolere: *μέτεξις* est, communio plurium in eodem genere, & in iis omnibus, quæ generi per se conveniunt; hoc sensu dici potest, sensus, qui est proprietas animalis, communicari homini & bestię: *κoinωνία* est, cū proprietas quæ uni speciei convenit, alteri communicatur absque *συνδύασει*, veluti si risibilitas, quæ primò convenit homini, communicaretur bestię. *συνδύασις* & *μέτεξις* concedimus, *κoinωνία* posse dari negamus.

V I. Adjuncta communia sive contingentia dicuntur, quæ subjecto abesse aut adesse possunt absque illius corruptione, id est, quæ de subjecto affirmari aut negari possunt sine contradictione; suntque vel separabilia vel inseparabilia. Separabilia, dicuntur, quæ reipsa possunt à subjecto suo separari, ut stare, sedere, vestitum esse in homine: inseparabilia sunt, quæ quamvis à subjecto reipsa separari nequeant, subjectum tamen absque ijs concipi potest, absque contradictione, ut albor in cygno, &c.

V I I. Secundo dividitur adjunctum in absolutum

solutum & limitatum: Adjunctum absolutum est, quod subiecto simpliciter & absolute; limitatum quod convenit ei secundum quid. *Secundum quid* subiecto convenire dicitur, quod ei convenit secundum certam aliquam partem aut naturam, aut certo aliquo loco, tempore, aut respectu; sic homo dicitur mortalis absolute, immortalis secundum quid, scilicet quoad animam; æthiops dicitur niger absolute, albus quoad dentes; simili modo depositum absolute reddendum est reposcenti, non reddendum tamen cum furit; sic legere Virgilium absolute licitum est; non est licitum cum sacra peraguntur. Cum adjunctum limitatum subiecto absolute tribuitur, propositio ea aut falsa est, aut synecdochica: synecdochicam illam in doctrina de persona Christi, Theologi vocant *ἰδιωματικήν*, quando scilicet attributa unius nature propria tribuuntur toti personæ Christi *πανθρώπου*; idque vel absolute, vel ab altera natura determinata; absolute, veluti si dicas Christum natum ex Maria virgine, crucifixum, mortuum, aut cum esse ubique, æternum, omniscium, omnipotentem, &c. priora enim illa conveniunt Christo secundum naturam humanam, posteriora secundum divinam: At cum Deus dicitur acquisivisse Ecclesiam suam proprio suo sanguine, Dominus gloriæ crucifixus, attributa ista humanæ naturæ, tribuuntur

Christi personæ, à natura divina denominata; nam Christus quidem, qui Deus est, acquisivit Ecclesiam suo sanguine, sed non ipsa divina natura: ex quo sequitur, *ἡ ἑκκλησία ἰδιωμὸς τῆς θεότητος* non esse veram communicationem proprietatum, sed figuratum loquendi modum.

VIII. Tertio dividitur adjunctum in internum & externum. Internum dicitur, quod subjecto inhæret: externum, quod ad subjectum extrinsecus ordinatur. Itaque adjunctum internum tribuit subjecto denominationem internam, externum externam. Adjuncti interni subjectum dicitur subjectum inhæſionis; externi subjectum denominationis: ne tamen erres, subjectum denominationis latius patet, quam subjectum externi adjuncti; nam interdum omne subjectum vocatur subjectum denominationis, etiam subjectum inhæſionis, quia, quod subjecto inhæret etiam subjectum denominare potest si non desint voces: interdum subjecto inhæſionis opponitur: ac tum primo subjectum denominationis dicitur, de quo dicitur attributum essentialiale, puta genus, aut differentia; *veluti cum dicit Aristoteles, quedam dicuntur de subjecto, ut substantia secunda, quæ non sunt in subjecto*; Secundo cui aliquid extrinsecus adjungitur, ut hoc loco.

IX. Adjunctum externum vel objectum est, vel signum, vel circumstantia. Objectum

ctum est, circa quod res operando versatur: itaq; cum objectū vel tribuatur substantiis, vel facultatibus, vel habitibus, vel operationibus, veluti cum Ens omne dicitur objectum animæ intelligentis, intellectus scientiæ & contemplationis; sola tamen operatio objectum per se requirit, cætera objecta requirunt operandi causa: ex quo apparet, quam perperam objectum & subiectum confundantur; subiectum enim tribuitur rebus ad existendum, objectum ad operandum. In Theoreticis tamen scientiis una eademque res subiectum dici potest & objectum, sed diverso respectu; sic corpus naturale dicitur subiectum Physices, si referas ad affectiones; objectum, si ad mentem aut scientiam Physicam quæ in mente est.

X. Objectum aliud est per se, aliud per accidens: hæc divisio objecto tribuitur vel ratione sui, vel ratione subiecti. Objectum ipsum ac ratione sui per se dicitur, quod rei, qua tale est, objicitur: objectum per accidens quod non objicitur rei quâ tale est, sed quâ aliud est. Hoc sensu bonum est objectum voluntatis per se, malum per accidens; voluntas enim appetit bonum, quâ bonum est; malum non appetit quâ malum, sed quâ bonum est: sic objectum visus per se est color, per accidens Diaris filius; Diaris enim filius non videtur quâ Diaris filius est, sed quâ coloratus; at color vi-

detur, quâ color est. Ratione subjecti dicitur obiectum per se, circa quod subjectum versatur quâ tale est. Obiectum per accidens circa quod subjectum non versatur quâ tale est, sed quatenus aliud est; sic materia domus est obiectum Architecti per se, Musici per accidens est, si contingat Musicum ædificare. Obiectum per se vel proprium est, vel commune: Proprium quod unius; commune, quod plurium rerum obiectum est; sic color est obiectum proprium visus, magnitudo commune. Eadem res potest esse obiectum commune plurium materialiter, sed non formaliter; itaque obiectum formaliter consideratum, semper est obiectum proprium.

XI. Signum est, quod seipsum sensibus, & id cuius signum est, intellectui offert: signum enim est *εἰς τὸ αἰσθῆναι*, ideoque ad aliud refertur cuius signum dicitur. Debet autem signum ipsum per se incurtere in sensus (nec refert quem sensum afficiat) atque insuper rem vel sua natura insensibilem, vel absentem, vel absconditam, intellectui representare: sic hedera suspensa demonstrat animo vinum venale, quod sensibus non poterat apprehendi. Cum res signata & signum sunt diversæ disparatæque res, si res signata de signo dicitur, veluti cum Genes. cap. 40, tres propagines dicuntur tres dies: & cap. 41. septem boves & septem spicæ sunt anni, locutio aut falsa est, aut tropica;

pica; tropus hic adeò usitatus est, ut Syri aut Hebræi nunquam aliter loquantur, nec possint aliter loqui; siquidem verbum non habent, quod respondet verbo *משגיח* aut significare.

XII. Signum variè dividitur, ac primò in naturale & institutum. Signum naturale dicitur, quod sua natura significat, estque vel formale vel materiale. Formale dicitur quod rem repræsentat; sic imago est formale signum rei repræsentatæ, vestigium pedis, pictura rei depictæ: Materiale dicitur quod rem significatam indicat quidem, sed non repræsentat: estque vel causa rei signatæ, veluti cum fulmen tonitru; vel effectum, veluti cum pulsus concitatus febris est signum, vel unum effectum est signum alterius effecti ab eadem causa pendentis; sic eclipsis est signum plenilunii. Signum institutum seu arbitrium est, quod non sua natura, sed *καὶ συνήθεια*, id est ex institutione significat: eaque vel humana, veluti campanæ pulsus signum est horam effluxisse; vel divina, ut cum iris est signum fœderis, Genes. 9. cum Sacramenta ab Augustino dicuntur visibilia signa invisibilis gratiæ. Signa divina non solum significant, sed etiam obsignant, ob eamque causam etiam appellantur *σημαδεῖς* ad Rom. 4.

XIII. Præterea quædam signa rem antecedunt; ut aurora Solis ortum, coactæ

nubes pluviam : quædam consequuntur ; ut pallor morbum , vastatio regionis bellum : quædam conjuncta sunt cum re ; ut inæqualis pulsatio arteriæ cum febris , tranquillitas conscientiæ cum justificatione . Atque ex his quædam dicuntur τεκμήρια , quædam εἰσότης . Τεκμήρια dicuntur , quæ omni & soli rei signatæ conveniunt , atque aded cum illa recipiuntur ; ut aurora cum Solis ortu , fulmen cum tonitru : εἰσότης dicuntur , quæ cum re signata non recipiuntur , eaque vel omni conveniunt , non soli ; sic pallor est signum morbi ; hæc vocantur signa æquivoca : quædam conveniunt soli , non omni ; sic eclipsis est signum plenilunii : quædam nec omni , nec soli ; veluti cum cutis hispida , dicitur signum salacitatis .

XIV. Circumstantia est id quod circa rem est , eive adiacet aut appositum est ; huc pertinet locus , tempus , vestitus , armatura , & id genus alia .

C A P. XXIX.

De eo quod est Necessarium, Impossibile, Contingens & Possibile.

T H E S I S I.

Necessarium generatim dicitur , quod non potest non esse : Necessario contrarium

trarium est impossibile, hoc est, quod non potest esse; quæ tamen duo æquipol-
lent, si alterum affirmetur, alterum negetur;
quod enim necesse est esse, impossibile est
nō esse, & quod necesse est non esse, impossi-
bile est esse; & contra quod impossibile est
esse, necesse est non esse, & quod impossi-
bile est non esse, necesse est esse. Contingens
dicitur quod est, & potest non esse; Possi-
bile, quod non est, & potest esse: itaque
contingens dicitur de re præsentī, possibile
de futura; sæpe tamen ista duo confundun-
tur. Hæc differentia magni est momenti,
& in Theologia usum habet maximum:
ideoque omnes necessitatis & contingen-
tiæ modi accuratè sunt explicandi: & quan-
tum per institutæ brevitatis leges licebit,
inter sese conferendi, ut appareat quomo-
do contingentia consistere possit cum ne-
cessitate.

II. Observandum primò, duplicem in
rebus esse necessitatem; internam scil: &
externam. Internam voco, qua res sua na-
tura est necessaria: Necessitas interna
duplex etiam est, absolutè sc. & secundum
quid: Absolutè necessarium dicitur, cujus
negatio (qua vel non esse dicitur, vel po-
test non esse) implicat contradictionem; sic
necesse est Deum esse; hominem esse ani-
mal: quia, qui dicit Deus non est, aut po-
test non esse, dicit Deum non esse Deum:
& qui dicit hominem non esse animal, aut

Dicitur vulgò, quæ necessaria sunt ex hypothesi, esse necessaria in sensu composito, sed non in sensu diviso.

V. Hypothesis quæ rei, alioquin contingenti, adfert necessitatem, vel antecedit rem, vel sequitur, vel cum re est conjuncta. Conditio antecedens necessitatem adfert vel causalitate aliquâ, vel absque causalitate; causalitas illa vel coactio est, vel determinatio. Coactio necessitatem adfert, quia quicquid per vim fit, non potest non fieri respectu ejus qui cogitur, unde etiam vis necessitas appellari solet: Determinatio necessitatem quoque gignit, quia quod determinatum est ad agendum, non potest non agere: & quod determinatum est ad hoc, aut illud, non potest aliud agere: sic voluntas dicitur finem & omnia quæ cum fine necessario cohererent, necessario appetere: imo etiam ea quæ non necessario cum fine cohererent, cum ab ultimo intellectu practici judicio determinata est. Conditio quæ adfert necessitatem absque causalitate, est decretum, præscientia, & prædicti Dei: sic necesse erat ossa Christi in crucem non frangi, quia hoc à solo Deo præscitum, & per Prophetas prædictum erat. Hypothesis consequens vel est rei finis; sic necessarium fuit Christum in mundum venire, scilicet genus humanum redimeret: vel ventus; sic necesse est ut inter nos sint haereses, ut qui diximus sint, fiant manifesti.

Quo

Quod necessarium est ex hypothese finis, distinguitur in necessarium ad esse, & in necessarium ad benè esse, quæ distinctio satis est nota. Conditio conjuncta dicitur, quæ cum ipsa re cohæret: sic dixit Aristoteles c. 9. de Interpr. Quicquid est, quando est, necesse est esse; & quicquid non est, quando non est, necesse est non esse: sic etiam omnia possunt dici necessaria ex hypothese cōcursus divini.

VI. Ex hisce necessitatis modis, facile etiam erit colligere modos Impossibilitatis: nam quot modis dicitur unum oppositorum, tot etiam dicitur alterum. Itaque aliud est absolutè impossibile, aliud secundum quid, aliud ex hypothese. Absolutè impossibile est, quod involvit contradictionem, ut hominem esse lapidem. Impossibile secundum quid est, quod quidem non implicat contradictionem, non potest tamen fieri à causis secundis & finitis; sic impossibile est duos esse mundos, gravia ascendere, aliquid fieri ex nihilo, virginem parere, & id genus alia. Impossibile ex hypothese est, quod suâ naturâ possibile est, dicitur fieri non posse positâ hac aut illa conditione; sic impossibile est coactum omittere id ad quod cogitur, voluntatem averfari finem, Christum nasci Nazarethi, quia prædictum erat eum nasciturum Betlehe-mi, animalia diu carere cibo, rem esse quando non est, non operari causam secundam, si cum illa concurrat prima, &c.

VII. Con-

VII. Contingentia, vel consulta est, vel fortuita. Contingentia consulta oritur ex indifferenti natura causæ voluntariæ liberè operantis; sic omnes actiones intellectus practici & voluntatis, siue elicite siue imperate, contingentes dici possunt: Contingentia fortuita est in effectis per accidens, quæ fiunt aut præter consilium voluntarii agentis; ut si quis ambulans sanitatis causa, pedem offendat, inveniatur thesaurum, vel aliquid tale: aut contra propensionem agentis naturalis, veluti cum natura generat monstra.

VIII. Hisce ita explicatis, considerandum porrò; quomodo necessitas & contingentia, & in quibus rebus possint sociari. Primum autem certum est, necessitatem absolutam expertem esse omnis contingentiae: quod autem non est absolutè necessarium, aliquo modo contingens est, & tantò minus necessarium, quantò plus habet admixtum contingentiae: nam quod secundum quid necessarium appellavimus, quia non implicat contradictionem, impediri potest à Deo, quædam etiam à causis secundis, atque hætenus sunt contingentia. In iis, quæ ex hypothese necessaria dicuntur, non est contingentia sollicitè querenda, siquidem natura sua sunt contingentia, sublataque hypothese desinunt esse necessaria; sic quia à Deo prædictum erat, sortem jactam iri super Christi vestimentis,

mentis, erat id ex hypothefi prædictionis neceffarium, at in fe erat contingens tamen, & fi neque prædictum, neque præfcitum, neque præfinitum fuiffet à Deo, non fuiffet neceffarium.

IX. Simili modo, nulla eft Contingentia, quæ non aliquid faltem habeat neceffitatis, & unumquodque tanto minus eft contingens, quanto plus habet neceffitatis. Ac primum omnia funt neceffaria refpectu divinæ providentiæ, (qua voce & decretum Dei de rebus omnibus, & præfcientiam, & concursum intelligi volumus) & refpectu propriæ existentia; nam quicquid eft, quando eft, neceffariò eft, ut ante dictum eft. Præter hos generales neceffitatis modos, res contingentes admittunt adhuc alios etiam modos neceffitatis in specie: fic quæ liberè funt, tribus modis neceffaria dici poffunt: ac primò, quia voluntas in omnibus determinatur ab ultimo iudicio practico, & ipfe etiam intellectus practicus determinatur ab ultimo fine, & ab omnibus iis, quæ neceffariò cum fine funt connexa. Secundo, quia multa media, natura fua contingentia, neceffaria funt ad obtinendum finem, vel faltem ad aliquem eventum. Tertio, qui caufa libera cogi poteft, non quidem ad volendum, fed tamen ad faciendum. Contingentia fortuita, ac primum ea quæ funt à naturâ fortuitò impedita, neceffaria funt refpectu caufarum iftarum,

rum, quæ naturam impediunt, eamque fine suo, saltem primario, frustrant. Quæ accidunt præter consilium voluntarii agentis, necessaria sunt, quia necessariò sequuntur concursum fortuitum plurium causarum; sic necesse est, quando aliquis loculos perdidit in via qua tibi transeundum est, ut eos invenias; sic alexæ eventus habet aliquid necessitatis, sed nobis incompetæ.

X. Observandum præterea, necessitatem & contingentiam, vel in Existentia consistere, vel in Prædicatione, vel in Causalitate. Necessitas & contingentia in existendo opponuntur immediatè, totumque Entis ambitum exhaustiunt, ita ut, quod necessarium est in existendo, non possit dici in existendo contingens; & quod est contingens, non possit dici necessarium, nimirum quia necessitas in existendo, absoluta est necessitas, quæ neque contingentiam includit, neque in re contingenti includi potest: solus autem Deus in existendo necessarius est, quia solus independens est, ideoque existentia est de illius Essentia, reliqua omnia contingentia sunt, quia sic à Deo pendent, ut potuerint à Deo non fuisse effecta, atque etiamnum in nihilum possint redigi. Quid ergò? an res creatæ non sunt necessariae? imò verò, sed necessitas non competit iis secundum existentiam, sed secundum causalitatem, qua pender à suis causis.

XI. Ne-

XI. Necessitas in prædicando dicitur, cum propositionis prædicatum est de essentia subjecti, vel subjectum de essentia prædicati, eaque vocatur propositio κατ' αὐτὸ, & si constet terminis reciprocis, κατ' ὅλας πρῶτον, hæc necessitas absoluta est, & ideò sine contradictione non potest negari: addit Aristoteles etiam propositiones κατὰ παντός, sed præstat eas vocare contingentes, & certè Aristoteles, ipse eas vocat necessarias κατὰ συμβεβηκός. Propositio contingens dicitur, in quâ neque prædicatum est de essentia subjecti, neque subjectum de essentia prædicati, ac proinde quæ negari potest absque contradictione de his plura in log.

XII. Necessitas & contingentia in causando sunt modi actionum & effectorum, quibus à suis causis dependent. In qua æstimanda, non est consideranda tota series causarum simul sumpta, sed unaquæque causa singulatim & seorsim: nam si effecta considerentur, cum omnibus suis causis simul sumptis, nihil erit in rerum natura contingens; causa enim secunda, eadem qua eadem, semper & necessariò agit idem: quare cum idem effectum dependet à pluribus causis idque diversimodè, nihil vetat idem simul esse necessarium & contingens, prout cum diversis causis comparatur. Omnis necessitas consistit cum contingentia fortuita, præter absolutam: Contingen-
tiam

tiam consultam sive libertatem, non solum absoluta necessitas evertit, sed & necessitas coactionis, & necessitas naturalis, non etiam necessitas determinans, aut ulla alia necessitatis hypotheticæ species.

CAP. XXX.

De Potentia & Actu.

THESIS I.

Potentia & Actus mutua habitudine se invicem respiciunt, ita ut omni potentia actus aliquis respondeat, & omni ferè actui respondeat aliqua potentia. dico *ferè*, quia puro actui nulla potentia responderet, ut postea dicitur; purus tamen actus dici potest potentiam respicere, quia potentia negationem includit. Ex quo manifestum est, aliter actum ad potentiam, aliter potentiam ad actum referri; nulla enim reperitur potentia, cui non respondeat actus.

II. Potentia & Actus sibi invicem opponuntur, alterque alterius includit negationem; non tamen quælibet potentia cuilibet opponitur actui, nec quilibet actus cuilibet potentia; sed certa potentia certo actui, & certus actus certæ potentia: eaque oppositio relativa est, atque insuper
vel

vel privativa vel contradictoria; nam interdū potentia actus sui privatio est, interdum pura negatio, ut ex sequentibus patebit.

III. Potentia alia est Objectiva, alia Existens, sive, ut ita dicam, Entitativa. Potentia objectiva est potentia ad existendum, ea consistit in negatione duplici, nempe in negatione existentiae, & in non repugnantia ad existendum, convenitque iis omnibus, quæ non implicant contradictionem, sed tunc solum, cum nondum existunt ullo modo, sive cum adhuc nihil sunt; sic mundus ante creationem dici potuit in potentia objectiva ad esse, & nunc quoque mundus alter, & tertius, &c. Potentiae objectivæ non solum opponitur impotentia quædam sive repugnantia ad existendum, quæ iis competit, quæ contradictionem implicant; sed & existentia, quæ res actu existunt vel perfectè vel imperfectè, ac solum ratione materiæ, quorum enim materia existit, ea sunt in potentia passiva sive subjectiva, vel saltem in potentia obedientiali.

IV. Potentiam existentem sive Entitativam voco, quæ reperitur in Ente aliquo actuali, ac reverà existente, in eoque distinguitur à potentia objectiva, quæ tribuitur iis, quæ actualem existentiam non habent ullo modo. Potentia existens sive Entitativa admodum est varia, ita ut difficile sit justè eam dividere: ut tamen aliquid conemur,

conemur, primo eam dividimus in naturalem & obedientialem (sic enim vulgò vocatur.) Potentiam naturalem voco quæ actum respicit naturæ suæ convenientem: estque vel activa, vel passiva, vel mixta. Activa potentia definitur, principium mutationis in alio, quatenus aliud est; sed nimis angustè, nam potentia creandi non convenit, quæ tamen activa potentia est inaud dubiè, sed Aristoteli incognita: melius ergo definitur, quâ res aliquid agit extra se.

V. Potentia activa multas habet differentias; quædam enim infinita est; quædam finita; quædam creativa; quædam transmutativa; quædam rationalis; quædam irrationalis: quæ differentia paucis explicandæ sunt. Potentia infinita dicitur, quæ extendit ad omnia quæ non involvunt contradictionem, eaque seipsam ad agendum applicat, ideòque caret omni potentia passivâ, nec reperitur in alio quam in solo Deo, solus enim Deus est infinitus: Finita potentia, licet alia major sit, alia minor, nulla tamen tanta est, quæ se extendat ad omnia possibilia, sive ad omnia quæ non implicant contradictionem: hæc semper ad agendum ab alio applicatur, ideòque cum passivâ potentia est conjuncta.

VI. Potentia creandi, est potentia aliquid ex nihilo producendi, & aliquid in nihilum reducendi: utrumque infinitæ virtutis

tutis est, ac proinde hæc infinita potentia est, quia infinita distantia est inter Ens & nihilum; ideoque veteres qui infinitam potentiam, ignorabant, generatim pronunciarunt, *Ex nihilo nihil, in nihilum nil posse reverti*: Potentia transmutativa est potentia, quæ versatur circa materiam aut subiectum existens, estque vel ordinaria vel miraculosa: Potentia ordinaria dicitur, quæ versatur circa materiam aptam & dispositam, estque vel naturalis vel artificialis. Potentia naturalis sive Physica est nuda potentia, eaque est vel generatrix, ac corruptrix, vel auctrix, ac diminutrix, vel alteratrix vel motrix; de quibus in Physicis. Potentia artificialis est, potentia habitu prædita; ars enim naturam præsupponit, ideoque non tam principium est operationum, quam talium operationum, id est, non est causa quod res operentur (hoc enim à natura est) sed quod operentur tali modo. Potentia miraculosa, est potentia quæ versatur circa materiam & subiectum planè indispositum & ineptum, eaque infinita est, æquè ac potentia creandi, siquidem non minoris est virtutis aliquid ex inepta quàm ex nulla materia producere: itaque competit soli Deo eique naturalis. Nam creaturæ miracula faciunt virtute Dei, eaque potentia in creaturis non est naturalis, sed obediencialis, ut mox dicetur.

VII. Potentia rationalis dicitur, quæ ad utrumque oppositorum indeterminata est, siue quæ potest operari & non operari; hoc vel illud operari pro arbitrio suo & consilio. Potentia irrationalis dicitur, quæ determinata est ad unum oppositorum, siue quæ potest agere, & non potest non agere; hoc agere & non aliud. Estque vel animalis vel purè naturalis: Potentia animalis est, quæ sensum sequitur solummodo, qua potentia bruta animantia & pueri ante rationis usum, & homines adulti cum agunt *ἀνευ λόγου*, operantur: potentia purè naturalis est, quæ agit absque cognitione; talis est potentia in rebus inanimis, in plantis, in animalibus, quatenus secundum animam vegetativam agunt.

VIII. Potentiam activam vidimus. Passiva potentia est principium mutationis ab alio, quatenus aliud est, ut inquit Aristoteles, siue, quod eodem redit, potentia qua res aliquid ab alio patitur. dixi *ab alio*, ut distinguatur à potentia mista, de qua statim: vocatur etiam potentia subiectiva, quia subijcitur mutationibus & formis, quæ ab agente per potentiam activam in illa cientur. Potentia passiva vel est simplex ac pura, vel composita. Pura potentia est, quæ caret omni forma, hæc tribuitur materiæ primæ: potentia composita vocatur, quæ formata quidem est, sed apta tamen, quæ formetur ulterius.

IX. Po-

IX. Potentia mixta est principium mutationis in seipso: ab hac potentia fluunt actiones immanentes; quæ quia & actiones dicuntur, quatenus ab agente causantur effectivè, & passionés, quatenus in illo recipiuntur, factum est, ut hujusmodi potentia mixta dicatur: non quia est ex duabus potentiis conflata, sed quia talium mutationum principium est, quæ respectu ejusdem subjecti & actiones & passionés dicuntur. Potentia activa & passiva principium etiam ejusmodi mutationis sunt, quæ & actio & passio est, sed non respectu ejusdem rei. hæc de potentia naturali.

X. Potentia obedientialis est, quâ res aliqua ad agendum vel patiendum aut recipiendum a prima causa movetur, quod agere vel recipere sua natura non potest. Estque etiam vel activa, vel passiva, vel mixta. Ad potentiam activam revoca potentiam faciendi miracula, à Deo vel hominibus concessam, vel etiam brutis, veluti cum Balaami asina loquebatur: ad passivam potentiam in hoc genere, reducenda est potentia, quâ res omnis à prima causa miraculosè potest transmutari; talis potentia est in mortuis ad resurrectionem; in ægrotis ad miraculosam sanationem; in ferro ad natandum in aqua; in juvenibus in ardente fornace versantibus ad resistendû igni: huc revoca potentiam illam, qua res omnis redigi potest à Deo in nihilum. Mixta po-

ta potentia dicitur, verbi gratia, qua homo convertitur ad Deum, sive, qua justificatur & sanctificatur: hæc enim non naturalis, sed obediencialis est haud dubiè, & non in sola passione, sed etiam in actione consistit; siquidem homo ex nolente red-
ditur valens.

XI. Potentiam examinavimus, ad actum accedamus. Actus est perfectio quædam quæ potentia caret, estque vel Entitativus vel informans. Actus Entitativus est, cujusque rei existentia, quatenus opponitur potentiaæ objectivæ: estque vel purus vel mixtus. Actus purus dicitur, qui nihil habet admixtum potentiaæ passivæ, ut Deus: actus mixtus ergò fuerit, cui aliquid passivæ potentiaæ conjunctum est: estque vel incompletus vel completus. Actus incompletus dicitur, quæ per formam in suo genere completur, ut materia: actus completus dicitur, cui nihil in suo genere deest, ut substantia finita, quatenus accidentibus subjicitur: actus completus vel est absolutus, vel assistens: quæ distinctio satis nota est. Quærat aliquis, cur formas tum substantiales tum accidentales non recenseam inter actus Entitativos; æquè ac materiam? Resp. Quia formæ non existunt, sed insunt materiae aut subjecto suo; ac proinde non ut actus Entitativi, sed ut informantes considerari debent.

XII. Actus informans est perfectio po-

K

tentia

tentiæ passivæ sive subjectivæ; estque vel naturalis vel supernaturalis. Naturalis est, qui à naturali ac finita causa conciliatur subjecto, estque vel primus vel secundus; Actus primus est, principium operationis: secundus ipsa operatio. Actus primus vel est substantialis vel accidentalis, ut dictum est in doctrina de formis. Actio sive operatio vel ut actio vel ut passio considerari potest: si consideretur ut actio, sive ut pendet ab agente, est actus agentis: si spectetur ut passio, est actus patientis. Ideoque actiones transeuntes non possunt dici actus informantes in quantum sunt actiones, sed in quantum sunt passionēs, idque non ratione sui, sed ratione termini sui. Actus supernaturalis dicitur, qua causa prima subjecto præter naturam conciliatur; recipitque easdem differentias, quas naturali actui tribuimus; est enim vel primus vel secundus, &c.

XIII. Hæc de actu & potentia dicta sufficient, si Coronidis loco adjecero, potentiam activam esse potentiam traducendi aliquid ex potentia in actum. Itaque potentiam aliquam recipit ut terminum à quo, & actum ei potentiæ respondentem, ut terminum ad quem: Et potentia quidem creativa versatur inter potentiam objectivam, & actum Entitativum: potentia transmutandi, inter potentiam passivam sive subjectivam & actum informantem: & ordinaria,

dinaria, inter potentiam naturalem & actum naturalem: extraordinaria sive miraculosa inter potentiam obedientialem & actum supernaturalem.

CAP. XXXI.

De Perfecto & Imperfecto,

Sive,

De Perfectibili & Perfectione.

T H E S I S I.

Perfectum multi bono conjungunt, & perfectionem bonitati, quasi idem sint; sed non satis rectè. Nam licet omne perfectum bonum etiam sit, non est tamen omne bonum perfectum; nam omne Ens est bonum, sed non omne Ens perfectum est: Sunt enim quædam, quæ hoc quod sunt, imperfecta sunt, sive quorum essentia in imperfectione posita est, ut materia prima, puncta & id genus alia: quæ tamen bona sunt, qua Entia. Deinde etsi perfectum cum bono, & imperfectum cum malo reciprocaretur, ratio tamen formalis multum discrepat; quod ex definitione manifestum erit.

II. Perfectum est, cui nihil deest: imperfectum, in quo aliquid deest. Perfectio

est id quo perfectum ab imperfecto: imperfectio, quo imperfectum differt à perfecto. Itaque imperfectio consistit in defectu quodam aut in negatione: perfectio, in negatione defectus aut negationis: ac proinde imperfectum addit Enti defectum aut negationem; perfectum, negationem defectus aut negationis. At bonum & malum addunt Enti convenientiam & inconvenientiam, quæ non negationes, sed relationes sunt, ut suo loco diximus. Hinc sequitur perfectum & imperfectum non esse sibi invicem contraria ut bonum & malum, sed opponi privativè aut quasi privativè: nam imperfectio est quædam privatio, aut quasi privatio perfectionis; at bonum & malum diximus esse contraria.

III. Perfectum multis modis dividi, aut si mavis, distingui potest. Ac primò perfectū vel ut Participium, vel ut Nomen accipitur. Perfectum, si ut Participium sumatur, nihil aliud est, quàm quod ab agente quopiam vel ex potentia in actum educatum est simpliciter, si actus sit individuus, vel ad ultimum actus sui terminum perductum est, si actus sit dividiuus. Imperfectum quod illi opponitur, appellatur, quod adhuc in potentia est, aut, si ad actum transit, nondum pervenit ad extremum actus sui limitem: veluti quod adhuc in motu est vel in fieri, ut loquuntur. Perfectio quæ huic perfecti & imperfecti significationi quadrat,

quadrat, græcè vel τελείωσις, vel τελειότης dicitur: τελείωσις est motus, quo imperfectum mutatur in perfectum: τελειότης est terminus illius motus, & status in quo res perfecta ac consummata dicitur.

IV. Perfectum significatione Nominis dicitur, cui nihil deest, idque absque ullo respectu ad perficiens aut ad imperfectionem tanquam ad terminum à quo. Hæc significatio strictior est superiore; nam quicquid perfectum est notione participii, est & perfectum notione nominis, sed non vice versa: nam Deus perfectus est, sed nunquam imperfectus fuit, nec cuiquam debet perfectionem suam, ac proinde vox *perfectus* non habet notionem participii cum Deo tribuitur. Imperfectum tamen, quod huic perfecto opponitur, à priori non differt nisi sola ratione mentis. Perfectio, à quâ aliquid nominis significatione perfectum dicitur, τελειότης est. Τελείωσιν non admittit, ut paret exemplo Dei, aut saltem non, quatenus usurpatur ut nomen.

V. Secundò perfectum aliud est absolute tale, aliud secundum quid. Perfectum absolute dicitur, cui perfectio convenit sine ulla imperfectione cujuscunque generis. Itaque oportet infinitum esse quod absolute perfectum est: ac proinde nihil absolute perfectum dici potest præter Deum: Dei respectu omnia alia imperfecta sunt, non quidem privativè, quasi quædam iis de-

sint quæ adesse debebant, sed negativè; quod non habent perfectiones quasdam quæ sunt in Deo vel etiam in aliis creaturis. Perfectum in suo genere vocatur, cui nihil deest ex iis, quæ isti generi adesse debent aut possunt. Imperfectio quæ huic perfectioni opponitur, non negativa; sed privativa, atque adedò defectus quidam est; eaque duum generum est. Nam interdum res in suo genere dicuntur imperfectæ, quia carent aliqua perfectione quæ adesse debebat naturâ postulante; sic cæcitas, surditas &c. imperfectiones dicuntur: interdum carent perfectione, quæ non debebat, sed poterat adesse; sic ignorantia, vitium &c. imperfectiones sunt.

VI. Tertiò perfectum aliud est quoad speciem, aliud quoad partes sive integritatem, aliud quoad gradus. Perfectum quoad speciem dicitur, quod reverà est id, quod esse dicitur: huic perfectioni nulla imperfectio opponitur; nam quia res individuæ sunt quoad speciem, non potest quippiam in sua specie imperfectum esse. Perfectum quoad integritatem voco, quod habet omnes partes sibi debitas; hæc perfectio in homogeneis non differt à perfectione quoad speciem, sed in heterogeneis plurimum ab eo discrepat: ei opponitur aliqua species imperfectionis, quæ mutilatio dicitur. Perfectio quoad gradum dicitur, quæ summam habet in suo genere intentionem:

tentionem: hæc perfectio non convenit aliis rebus quam accidentibus, & quidem solis qualitatibus; nam cum substantiis aut actionibus tribuitur, id ob qualitates fit, quæ solæ gradibus suis variantur. Habet hæc distinctio præclarum usum in doctrina de legis observatione, operumque nostrorum perfectione. Ex. gr. cum 1. Joh. c. 2. v. 5. *Charitas Dei*, quâ scilicet Deus diligitur, ἀληθῶς πεπλήρωται, id est, *verè perfecta est, in eo*, qui observat τὸν λόγον αὐτοῦ, id est, *Christi*; id non de perfectione quoad gradum, sed quoad speciem accipiendum est: similiter cum subinde pii in hac vita dicuntur legem Dei *perfectè* servare, de perfectione quoad partes, non quoad gradus illud accipiendum est.

VII. Præterea perfectio alia essentialis est, alia accidentalis. Perfectio essentialis est, cum omnia adsunt qua necessaria sunt ad essentiam: hæc potest etiam transcendentalis perfectio appellari, competit enim omni Enti eo ipso quod Ens est: Ens enim omne essentiam habet, ac proinde omne quod ad essentiam constituendam est necessarium: hæc perfectio non differt ab ea, qua res dicitur perfecta secundum speciem. Perfectio accidentalis est additamentum essentiæ pertinens vel ad operandum, vel ad patiendum quod sibi consentandum est, vel ad ornamentum. Huic opponitur imperfectio, quâ voce vel præcedentis perfectionis

ctionis privatio intelligi potest, ut cæcitas, surditas &c. vel positivum quid quo res propensa est ad agendum, aut obnoxia ad patiendum, quod sibi adversum est, ut morbus, vitium, & quæ sunt alia.

VIII. Perfectio accidentalis vel naturalis est, vel supernaturalis. Naturalem voco, quæ naturam comitatur, aut ex causis naturalibus provenit: estque vel Physica vel moralis. Physica perfectio est, qua res sibi sufficit ad operandum; sic dicitur anima perfectum cum potest generare; sic valetudo quoque perfectio animalis dici potest, morbus imperfectio, siquidem æger est, qui naturales functiones exercere non potest: Perfectio moralis est virtus aut habitus quicumque qui nostra industria gignitur; imperfectio moralis est virtutis aliorumque habituum defectus aut vitium, aliique habitus perversi. Perfectio supernaturalis est, quæ non à natura aut à causis naturalibus, sed à Deo provenit; talis erat imago Dei in primo homine; in nobis fides, spes, charitas; in Prophetis & Apostolis virtutes miraculosæ. Imperfectio supernaturalis nulla datur; nam peccatum originis non Deo, sed nobis imputandum est, ob id quod in Adamo peccavimus; Rom. 5.

Libri primi Finis.

INSTITUTIONUM METAPHYSICARUM

LIB. II. CAP. I.

*De divisione Entis in Substantiam
& Accidens, & de Substan-
tia in genere.*

THESIS I.

Absoluta est generalis illa Meta-
physicæ pars, quæ agit de Ente,
ejusque principiis & affectioni-
bus in genere : Sequitur Meta-
physica specialis, quæ descendit ad species
Entis quæ sine materiâ concipiuntur, &
reverà quoque consistunt, in iisque spectat
affectiones & affectionum principia, quate-
nus illud in rebus incorporeis & immate-
rialibus fieri potest. Atque ut appareat, quæ
species Entis huc referendæ sint, quæ non,
instituenda est Entis in suas species aut
quasi species distributio.

II. Duæ sunt communissimæ divisio-
nes Entis, ut thesi 8. c. 2. libri superioris
præsupposuimus: Nam vel in Substantiam
& Accidens, vel in Deum & Creaturam di-
vidi potest. utraque ex æquo totam entis
latitudinem exhaurit. Nec faciliè dixeris

¶

utram

utram præcedere debeat, aut sequi: si Ens dividas in substantiam & accidens, & substantiã deinde subdividas in Deum & creaturam, accidentia videris creaturæ nomine non comprehendere: si contrà Ens dividas in Deum & creaturam, & creaturam deinde subdividas in substantiam & accidens, omit-tenda erunt omnia in hac divisione, quæ generatim omnibus substantiis conveniunt, & Deo reliquisque substantiis communia sunt, & non etiam accidentibus. Neque evitaveris hæc incommoda, si utramq; divisionem seorsim tractes, sine ulla subdivisione; hoc enim si moliaris, non satis commodè descendere poteris ad finitam substantiam in genere & ad illius species: de quibus tamen haud dubiè multa dicenda sunt Metaphysico.

III. Cum ergò undecunque quædam incommoda sese offerant, istac eundum est, qua occurrunt leviora. atqui leviora sunt ea, quæ ad primam dividendi rationem videbantur pertinere, quam quæ pertinent ad alias. Itaque partiemur Ens primò in substantiam & accidens, deinde substantiam subdividemus in suas species. quod autem videamur isthoc modo accidentia creaturarum appellatione non comprehendere, nihil est: accidentia enim eo modo sunt creaturæ, quo sunt Entia; atqui sunt Entia quatenus insunt substantiis; ergo isthoc quoque modo creaturæ sunt, & non
per

per se, ut substantiæ. Divisionem Entis in substantiam & accidens idèd præmitto, quia notior est, quam divisio Entis in Deum & Creaturam; nam dari substantias ex sola vocabuli significatione notum est: dari accidentia, quæ Entia sint à subjectis reipsa distincta, tametsi non ita notum est quàm substantias dari, tamen satis evidenti ratione id ostendi potest ex actionibus & transformationibus rerum, ut suo loco patebit: at divisio in Deum & Creaturam non est ita nota.

IV. Substantia est Ens per se subsistens. *Per se subsistere* non excludit in hac definitione dependentiam ab omnibus causis (nam hoc sensu nullum Ens dici potest *per se subsistere* quàm solus Deus) sed solummodò dependentiam à subjecto; quæ dependentia revocatur ad causalitatem materiale. Itaque per se subsistere nihil est aliud quàm non esse in subjecto: in subjecto esse dicitur hoc loco, quod ita est in aliquo, ut neque pars sit neque seorsim possit existere: esse in subjecto convenit accidentibus, eaque propria eorum natura est atque essentia. Ex quo concludi potest hanc divisionem esse æqualem toti Entis amplitudini: quicquid enim verè Ens est, id aut per se subsistit, aut in subjecto est; quod enim per se subsistit, id non est in subjecto, & quod non subsistit per se, id in subjecto est: & vice versa, quod est in sub-

K 6

jecto

jecto, non subsistit per se, & quod non est in subjecto, id subsistit per se. Atque hæc omnia ita vera sunt, ut contrarium implicet contradictionem: itaque si quis statuatur substantiam esse in subjecto, is statuit substantiam esse accidens, ac proinde non esse substantiam; & si quis statuatur accidens per se subsistere, is statuit accidens esse substantiam. Ac proinde non esse accidens: quæ aperta est contradictio, sed de accidente suo loco dicemus.

V. Sed quid de Christi natura humana statuendum est? Ea enim substantia est haud dubiè, & tamen non subsistit per se: non habet enim propriam ὑπόστασιν; sed subsistit ὑποστάσει divinx naturæ, ideòque duæ illæ naturæ non sunt nisi unum ὑποστάσιον sive suppositum aut persona. Resp. τὸ *per se subsistere* vel ad existentiam spectat, vel ad subsistentiam: est autem subsistentia modus quidam substantiam singularem ejusque existentiam determinans, eamque reddens incommunicabilem pluribus suppositis, ut seq. capite docebo. Si *per se subsistere* existentiam spectat, Christi humana natura in abstracto considerata, haud dubiè potest dici per se subsistere, ideòque verè proprieque dicta substantia est: si verò referatur ad subsistentiam, non potest dici natura Christi humana per se subsistere; sed non ideò non est substantia, sed ideò non est suppositum.

VI. Ex dictis sequitur, substantiam esse priorem accidente, naturâ, dignitate, definitione, & cognitione: natura, quia accidentis esse est inesse substantiæ: dignitate, quia substantia magis habet rationem Entis quàm accidens; accidens enim est quoddam finitæ substantiæ additamentum, ideoque Ens non dicitur *συνανύμους* de substantia & accidente, nec prorsus *ὁμωνύμους*, sed medio quodam modo, ut suo loco ostendimus: substantia prior est accidente τῷ λόγῳ sive definitione, quia accidens debet per substantiam definiri, saltem in genere. & quamvis in definiendis accidentium speciebus sæpè nulla nominetur substantia, dicitur tamen censerì nominata, quia in genere vel proximo, vel remoto, vel saltem remotissimo includitur: etiam cognitione prior est; non illâ, quam sensus suppeditant, quæ confusa cognitio est (nam substantiæ non sentiuntur nisi per accidentia) sed cognitione distinctâ ac perfecta, quam veræ ac perfectæ definitiones menti conciliant: addit Aristoteles, substantias etiam tempore priores esse, sed non video qui id defendi queat ab eo, qui mundum voluit æternum esse.

VII. Substantia omnis indivisibilis est quoad speciem: in quo habet conditionem & naturam numerorum. Numerum, si addita unitate augeas, aut dempta minuas, confessim cum in alia specie constituis: ad
istum

istum modum, si substantia ratione substantiæ vel minimum mutetur, ita ut perfectior vel imperfectior evadat, confestim in aliam speciem transit, desinitque esse quod erat, & fit quod non erat. Ista transmutatio necessariò debet momento fieri; nam si in tempore fieret, quoniam omne tempus divisibile est, ipsa quoque transmutatio ac proinde & res quæ transmutantur, deberent esse divisibiles in sua specie, quod jam diximus esse absurdum.

CAP. II.

De Primis & Secundis substantiis, deque Subsistentia.

THESIS I.

Substantia dividitur in Primam & Secundam. Prima substantia est substantia singularis: secunda substantia est substantia universalis. Substantia in hac divisione non spectatur ut genus (nam substantia quæ genus est, secunda substantia est) sed ut subjectum, quod dividitur per accidentia sive adjuncta sua; eaque vel rationis vel realia: duobus enim potest exponi modis hæc divisio: vel enim dici potest divisam esse substantiam conceptam sub essentiali

tiali ratione substantiæ; eamque quatenus concipi potest ut prædicabilis de multis, dici substantiam secundam; quatenus verò concipitur ut tantum subijcibilis, vocari substantiam primam: (atque hoc modo divisio petita est ab accidentibus sive adjunctis rationis) vel potest dici substantiam hic dividi in sua definitione consideratam, & divisionem esse factam per reales modos participandi proprietatem substantiæ, quæ est, *per se subsistere*. Nam sicuti secundæ substantiæ in primis sunt, ita quoque in primis *per se subsistunt*: & hoc sensu petita est divisio ab adjunctis realibus.

II. Porro quia subijci tantum, quod est primarum substantiarum, & non tantum subijci sed etiam prædicari, quod est substantiarum secundarum, immediatè sunt opposita sibi que contradicunt; quemadmodum per se subsistere in seipso, & non in seipso per se subsistere sed in alio: ob eam causam omnis substantia quæ prima non est, necessariò secunda est, nec dantur substantiæ tertiæ aut quartæ. Est tamen ordo aliquis inter substantias secundas; aliæque propriiores sunt primis, ut species, aliæ remotiores ab iis, ut genera.

III. Substantiæ primæ sunt maximè substantiæ, & inter substantias secundas unaquæque tantò magis substantia est, quanto propius accedit ad substantias primas: idque non *est*, hoc est, secundum

dum essentialem rationem substantiæ, sed *κατ' ὑπόστασιν*, hoc est, secundum actualem modum subsistendi, qui primis substantiis per se convenit, secundis substantiis non convenit, nisi quia & quatenus sunt in substantiis primis. de quâ restatim plura.

I V. Substantia prima vocatur à Scholasticis suppositum: &, si sit ratione prædita, persona. Itaque Persona definiri solet, rationalis natura, singularis atque individua substantia. Sed hæc definitio non est satis accurata: nam anima humana à corpore separata, & humana Christi natura, per se persona fuerit, si ista definitio obtineat. ideoque solet addi, quæ *pars alterius non est*, (ad excludendam animam rationalem) nec *ab alio sustentatur*, qua voce cavetur, ne humana Christi natura persona sit.

V. Suppositum componitur ex naturâ substantiali habente essentiam & existentiam actualem, & ex subsistentia (græci Ecclesiæ procures *ὑπόστασις* dicunt) in abstracto consideratâ, quæ naturæ substantiali additur. nam subsistentia sive hypostasis in concreto notat ipsum suppositum sive personam.

VI. Subsistentia sive *ὑπόστασις* in abstracto est modus substantialis, quo substantialis naturæ Existencia ita determinatur, ut & per se subsistat, & incommunicabilis sit.

In qua definitione & natura subsistentiæ
expri-

exprimitur, cum dicitur *modus substantialis*, & genuinum munus, nempe, substantialis naturæ existentiam ita determinare, actuare, complere, ut sit *ἰφιστάμενον ἑ*, seu substantia per se subsistens, & etiam reddere incommunicabilem. de singulis aliquid dicendum, ac primùm de subsistentiæ numeribus.

VII. Ut primum subsistentiæ munus intelligatur, observandum est, substantiam duobus modis existere, nempe vel independenter, hoc est, propria, vel dependenter ab alio (non ut à subjecto, sed ut à sustentante, atque, ut cum Scholasticis loquar, à suppositante) id est, aliena subsistentia. Subsistere enim est quasi genus, cujus duæ sunt species: subsistere per se, hoc est, propria subsistentia, & subsistere per aliud sive subsistentia alterius.

VIII. Ex quo sequitur, substantialis naturæ existentiam ex se incompletam esse: complerique atque actuari cum afficitur propria subsistentia; aut potius, completam esse ac perfectam, quia & quatenus subsistentiam suam habet. Si quæ natura propriam subsistentiam non habeat, ea subsistere dicitur subsistentia aliena. quod cum fit, coalescunt duæ naturæ in unum suppositum sive personam: quia una est utriusque subsistentia, etsi sua sit cuique existentia: hoc modo subsistit humana natura Christi *ἡμεῖς*; nam cum ipsa suam non habeat sub-

subsistentiam, & existat tamen, subsistere debet subsistentia divinæ naturæ sibi communicata. Atque ideo Christus una tantum persona est, licet duabus constet naturis, quarum unaquæque ab alterâ sua essentia atque existentia reverà diversa est: quoniam illæ duæ naturæ *ὑποστατικοῦς*, hoc est, communi subsistentia seu *ὑποστάσει* uniuntur.

IX. Ut duæ naturæ uniri possunt in una eademque subsistentia: ita potest una natura habere plures subsistentias; & tùm una eademque numero natura sive essentia cōstituit plura supposita aut personas, *τῶν ὑποστάσεων*, hoc est, subsistendi modo sive subsistentia diversas. Sic una eademque essentia divina subsistit in tribus distinctis personis, quia tribus prædita est subsistentiis.

X. Porro natura, quæ plures subsistentias admittit, debet esse infinita: ut & illa, quæ naturæ cuiuspiam à se diversæ suam subsistentiam communicat, eamque assumit in unitatem personæ sive suppositi. Finita natura sua quælibet hypostasi ita definita est, ut tota subsistat in uno supposito, atque ita ut extra eam subsistere non possit, idque non aliam ob causam, quàm quia finita est.

XI. Cavendum est hoc loco, ne credas proprietates naturæ communicari, quando communicatur hypostasis. Nam sicut ipsæ naturæ

naturæ distinctæ manent etiamsi coaluerint in unam personam; ita quoque manent distinctæ proprietates; communisque hypostasis non magis facere potest ut proprietates communes fiant, quàm ut ipsæ naturæ confundantur: hypostasis enim est modus additus naturæ, at proprietates emanant à natura. Ex quo sequitur, non posse communes esse proprietates, quæ emanant à distinctis naturis: at nihil vetat hypostasim communem esse, quoniam ea tolli potest, naturâ tamen salva. His addo, hypostasim non communicari formaliter (nam natura non potest formaliter per se subsistere) sed tantum effectivè.

1. Obj. hypostasis est ubique: ea autem est communicata humanæ naturæ: Ergo natura humana est ubique. Resp. Id non sequi, quia hypostasis non communicatur naturæ humanæ formaliter; sed tantum effectivè.

2. Obj. Si humanitas nõ sit ubique, λέγει alicubi non erit homo. Resp. hac distinctione Christus ubique est persona humanam naturam habens sibi adjunctam; sed Christus non est persona humanam naturam habens sibi ubique adjunctam.

XII. Atque hæc de primo munere subsistentiæ; alterum est, naturam substantialem *reddere incommunicabilem*. Quod ut intelligas, observandum est, naturam duobus modis communem dici, nempe vel plu-

pluribus individuis (sic omnis natura universalis communis dici potest) vel pluribus suppositis: sic una eademque natura divina, eaque singularis, communis est tribus personis Patri, Filio, & Spiritui Sancto. Hinc sequitur, duobus quoque modis eam dici posse incommunicabilem: primò cum non potest abstrahi à differentia individuante, & concipi sub ratione generis aut speciei; secundò cum non potest communicari pluribus suppositis, sive substantiis primis, in suo genere completis & perfectè actuatis. Prior illa incommunicabilitas est à cujusque rei singularitate, sive differentia individuante; posterior provenit à subsistentia. Quare quemadmodum quod singulare est, non potest communicari pluribus inferioribus; ita quoque quod determinatum est subsistentia, non potest communicari pluribus suppositis. Sic Dei natura considerata *ἡσώδης*, communis est tribus personis, quoniam in essentia sua communi non includit subsistentiam: at eadem considerata *ὑποστατικής*, id est, affecta subsistentia, communicari amplius non potest; nam Essentia Dei subsistens in persona Patris, nequit Filio communicari.

XIII. Quid autem subsistentia sit, obscurum est, & multiplici sententiarum varietate disputatum. Quas ne operosè repetam, primò statuo, subsistentiam non esse substantiam; nam si substantia foret, prima fo-

ma foret haud dubiè substantia (nam secunda mentis operatione tantum à prima abstrahitur) atqui omnis substantia prima constat natura & subsistentia: subsistentia natura & subsistentia non constat (daretur enim progressus in infinitum) sed naturæ additamentum est. Secundo, non esse accidens, quia accidens non potest complere substantiam, aut eam reddere incommunicabilem. Præterea, si esset accidens, aut esset accidens proprium & inseparabile, aut commune ac separabile: non est accidens proprium, si quidem accidentia propria naturam sequuntur: nec commune, quia id abesse potest salvo supposito; at subsistentia non sequitur naturam, quia una eademque natura potest habere tres hypostasies, & una subsistentia convenire potest duabus naturis: non potest etiam abesse à supposito, quia suppositum per hypostasim est suppositum. Tertiò, non esse relationem aut respectum ad aliud; quod in creatis rebus manifestum est; & cur aliter in divinis statuamus? Sunt quidem in Deo relationes personales; sed illæ non sunt personarum subsistentiæ, siquidem personis tribuuntur, quæ subsistentiis affectæ sunt, non ipsi naturæ divinæ, quod valdè considerandum est.

XIV. Superest ergo, ut, quemadmodum antea in definitione diximus, sit modus substantialis. Modum substantialem

voco, qui substantiam actuat ac determinat in ratione suæ substantiæ: in eoque differt à modis accidentalibus, qui aut accidunt modificant, aut si modificent substantiam, in ratione tamen ac conceptu substantiæ non includuntur: non est autem modus mutabilis ac separabilis, sed immutabilis prorsus ac inseparabilis; Non potest etiam prima substantia sua privari subsistentia, nisi ipsa quoque pereat. At humana Christi natura non habuit *ὑπόστασιν* sive subsistentiam dicat aliquis; ergo non est inseparabilis? fateor, inquam, ego, non habuisse propriam, sed semper habuit, & æternum habebit communem cum natura divina: natura enim humana nunquam fuit in rerum natura non unita naturæ divinæ. Quod adeò verum est, ut ne quidem in triduo mortis soluta fuerit hæc unio: nam licet anima à corpore fuerit separata, neutrum tamen, neque anima neque corpus, sejunctum fuit à natura divina, sed utrumque ei mansit *ὑποστατικῶς* unitum: nec tamen ideò divisa fuit aut geminata persona.

XV. Ex dictis patet, in omni prima substantia seu supposito compositionem aliquam reperiri, sed quæ tamen ex se nullam imperfectionem inferat; ideoque etiam in Deo locum habere potest. Nam quod substantiæ creatæ ac finitæ, in quibus ista est compositio, imperfectionem includant, id non

id non ex compositione proficiscitur, sed ex similitudine, ut diximus thes. ult. cap. 9. libri superioris.

XVI. Ex his etiam colligi potest, quomodo loquendum sit, cum agitur de distinctione quæ est in personis S. S. Trinitatis. Nam cum persona quælibet essentiam includat & subsistentiam, & subsistentia sit modus; sequitur personam quamlibet ab essentiâ modaliter differre. Sed quomodo distinguuntur personæ inter se? Quidam ajunt realiter discrepare, alii modaliter: utriusque rectè. Nam qui dicunt discrepare realiter, considerant unamquamque personam veram esse rem, atque interim ita distingui, ut ista distinctio non pendeat ab operatione nostræ mentis. Qui distinctionem illam modalem vocant, considerant personam quidem unamquamque esse rem, attamen tres personas non esse tres res (nam si tres res essent, tres quoque essentias haberent) sed unam eandemque substantiam aut rem, modo tamen subsistendi à seipsa differentem.

XVII. Hæc de substantia prima: substantia secunda sive universalis, à prima abstrahitur. neque verò abstrahitur à sola natura, ut voluit Fonseca, sed à toto supposito, ita ut & ipsa componatur ex naturâ & subsistentia communiter sumptis, sicut prima substantia sive suppositum componitur ex naturâ & subsistentia singulari. Præsupponamus

ponamus enim impræsentiarum, universalia sola ratione distingui ab unoquoque individuo: quo constituto corrumpitur sententia Foscæ. nam cum subsistentia Petri, verbi gr. sit modus additus naturæ Petri, & ab illâ ex natura rei & non sola ratione distinctus; etiam hominis subsistentia in communi sumpta, natura sua distingui debebit à natura humana in communi sumpta. nam homo & Petrus reipsa idem sunt, solaque ratione distinguuntur, ut ante dictum est, ac proinde & humana natura reipsa eadem est humanæ naturæ Petri, ab eaque sola quoque ratione differt: Ergo sicuti Petrus præter individuum naturam humanam sibi propriam, includit subsistentiam; ita quoque includit homo, præter communem naturam, subsistentiam quoque communiter sumptam: & sicuti subsistentia Petri non sola ratione, sed modaliter differt à natura Petri individua, ita quoque non sola ratione, sed modaliter differt communis hominis natura à communi subsistentia.

XVIII. Hæc tamen abstractio non habet locum in Deo. Deus enim essentia sua ac naturæ necessitate singularis est: nec ab illa abstrahi potest communis quædam natura aut conceptus Deitatis. nam non tantum non sunt plures Dii, sed plures esse implicat contradictionem; ut alias diximus, & suo loco dicemus ex professo.

XIX. Hæc

XIX. Hæc doctrina de distinctione naturæ ac subsistentiæ, ex Theologia descendit, non ex Philosophia. Philosophus enim sine ope Theologiæ vix ac ne vix quidem agnosceret hanc, quam tradimus, differentiam. Attamen in Theologia habet præclarum usum, cum agitur de persona Christi *Θεωδωρῆς*, deque mysterio adorandæ Trinitatis. Cur ergo ea de re agitur in Metaphysicis, & non potius in Theologia? Ut intelligamus, illa Theologiæ dogmata, tametsi supra Philosophiam sint, non tamen cum Philosophia pugnare. In eum finem ita explicandæ sunt istæ Theologorum voces, ut nulla in iis videatur esse contradictio. Quod hæretici Trinitarii perperam conantur ostendere.

CAP. III.

De distributione Entis in Deum & Creaturam, & aliis æquivalentibus.

THESIS I.

SOlet Ens in genere sumptum dividi in Deum & Creaturam, sive in Ens à Deo factum ac dependens: & quia hi termini non satis noti sunt, vique suæ significationis non ostendunt veritatem di-

visionis, propterea ea tradi solet terminis notioribus, sic tamen, ut res eodem redeat. Ac primò, Ens aliud a se est, aliud ab alio: ubi primum nota, Ens à se duobus modis dici posse, nempe vel affirmatè, quasi diceret, Ens, quòd à se producitur, aut productum est; atque hoc modo nullum omnino Ens à se esse potest, ut suo loco ostendimus: vel negativè, ita ut esse à se nihil aliud sit, quam non esse ab alio: atque hoc modo intelligenda est proposita divisio.

II. Secundò Ens aliud est independens, aliud dependens ab alio. Ens ab alio dependere dicitur, quod ab alio causatur quoquo modo: ergo independens est, quod ab alio nullo modo causatur.

III. Tertiò, Ens aliud est per essentiam, aliud per participationem. Ens per essentiam dicitur, ad cuius essentiam spectat esse sive existere: Ens per participationem, quod existit ope & causalitate alterius.

IV. Quartò, aliud est actus purus, aliud est actus potentialis. in hac divisione observa, actum intelligi Entitativum. Cæterum actus Entitativus purus dicitur, in quo nihil est objectivæ vel subjectivæ potentia: ergo actus non purus dicetur, sive potentialis, in quo aliquid subjectivæ vel objectivæ, vel utriusque potentia reperitur. Hæc divisio licet non satis videatur esse nota ex terminis, attamen ex præcedentibus satis apertè sequitur. Si enim datur
Ens

Ens à se, ac prorsus independens, datur etiam purus actus. nam quod à se est, illud prorsus est immune à potentia objectiva, quia nunquam non fuit, nec potest non esse: est etiam immune à subjectiva potentia, quia quod subjectivam potentiam habet, indiget causalitate materiali, ac proinde & efficiente, à quo potentia subjectiva promoveatur ad actum: at quod à se est, non habet causam efficientem: ergo quod à se est, non habet potentiam subjectivam. Contrà omne Ens ab alio dependens, aliquo modo potentiale est: nam primò, habet potentiam objectivam; quia quod ab alio suum esse habet, id, si in se consideretur, intelligitur in potentia objectiva, è qua ad actum deductum est ab eo, à quo suum esse habet: deinde habet etiam potentiam subjectivam; quod quidem per se non est ita notum, suo tamen loco probabitur.

V. Ens aliud est necessarium, aliud contingens. Ens necessarium dicitur hoc loco, quod sine contradictione non potest dici non esse: contingens, quod potuit, atque etiamnum potest non esse. Hæc divisio nota est, si præsupponamus creationem dari, & creationem esse actionem liberam. Si statueremus primam causam agere ex necessitate naturæ, non esset quidem tam manifesta, esset tamen vera, & posset naturaliter innotescere; quia non omnia En-

ria fierent à causa prima immediatè; & si quæ fierent aliarum causarum interventu, illa contingenter fierent, siquidem possent impediri.

VI. Sextò, Ens aliud est infinitum, aliud finitum. Finitudo & infinitudo non spectant hoc loco quantitatem, sed essentiae perfectionem, in qua necesse est latitudinem quandam concipiamus, per modum quantitatis. Quod autem Entia sint finita perfectionis, per se clarum est: cumque ea perfectionem istam ab alio accipiant, necesse est dari Ens aliquod, in quo omnis ista perfectio vel formaliter vel eminenter contineatur, ideóque debet esse infinitum.

VII. Hæ divisiones omnes inter se & cum illa coincidunt, qua Ens dividitur in Deum & creaturam, quam initio proposuimus, licet aliquanto videantur manifestiores. Nam etiamsi constet esse Ens quodpiam à se, independens, per essentiam &c. non tamen confestim manifestum est, illud esse Deum: & licet constet, dari Entia quædam ab alio facta, dependentia, contingentia, per participationem &c. non tamen statim constat ea esse creaturas. Cur ergò obscurissimam omnium divisionum sumis, dicat aliquis, cæteris omissis, quæ veritatem habent illustriorem? Quia, hac divisione explicata & probata, cæteræ etiam omnes erunt explicatæ ac probatæ; at probatis & intellectis cæteris, hæc adhuc

huc poterit ignorari; ubi enim demonstratum erit esse Deum, utique quoque demonstratum erit, dari Ens aliquod à se independens, per essentiam, actum purum, necessarium, atque infinitum; hæc enim omnia Deo conveniunt. Et si demonstratum fuerit dari Entia creata, erit etiam demonstratum, dari entia ab alio facta, dependentia, per participationem, potentialia, contingentia & finita, quia ista omnia rebus creatis conveniunt.

VIII. Cæterum, tametsi Ens in genere sumptum, istis omnibus modis dividi so-
leat, nos tamen divisiones istas, atque imprimis eam, quæ initio proposita fuit, qua Ens dividitur in Deum & creaturam, accommodabimus solis substantiis; accidentibus, quæ neque Deus sunt, neque per se primò creantur, in ultimum locum re-
jectis.

CAP. IV.

Deum esse.

THESIS I.

OMnis divisio aut per se ita debet esse manifesta, ut ex terminis innotescat, aut si non sit ita nota, oportet eam demonstrari. Videndum igitur an istæ

propositiones, *Deus est, & quicquid prater Deum est, à Deo factum creatumque est*, sint ita notæ, ut intellecta significatione vocum quibus efferuntur, sine ulla ratiocinatione assensum impetrent, sicuti hæc propositio, Totum est majus sua parte. Ego verò non existimo, quenpiam repertum iri, qui id ausit asserere. Nam quam multi fuerunt olim (ut de prima propositione nunc disputem, nam de altera dicetur suo loco) atque utinam hodieque non reperi-
rentur, qui palam profiteantur se credere, non esse Deum. Verbo, inquires, hoc profitentur; at fieri non potest ut mens non afficiatur aliquo sensu ac metu Deitatis: esto sanè; at tamen hinc sequitur, non ita notam esse propositionem hanc, *Deus est*, quàm, Totum est majus sua parte: nam posterius hoc nemo seriò negare potest. Deinde, quàm multæ gentes sunt, apud quas nullum extat vestigium Religionis? ex quo colligas, nullum quoque sensum numinis in iis vigere. Si reponas, istos quidem homines non credere Deum esse, sed etiam non credere contrarium; nec mirum, si quidem nihil fortè unquam de Deo fando audiverint. Si, inquam, hoc reponas, ego quoque vicissim quæram, an existimes, si quis illis hominibus explicaret, quid nomine Dei significetur, confestim illos credituros esse absque ulla ratiocinatione, esse Deum? Imò tantùm abesse puto, ut ex
solâ

solâ nominis definitione sint agniture esse Deum, ut contrâ argumentis opus esse existimem admodum obviis, ad illorum animos convincendos: in causa quidem illorum stupor est, aut pertinacia, aut præjudicium, aut affectus, fateor; sed si ex terminis esset manifestum, esse Deum; intellecta terminorum significatione, nullus stupor, nulla pertinacia, præjudicium aut affectus impedire possit hominis mentem, quo minus crederet, Deum esse.

II. Itaque cum dicitur, Deum esse, naturaliter esse notum, non dicitur, hujus propositionis notitiam atque assensum animis nascentium inscriptum atque insculptum esse (nam hoc falsum est: anima enim nascentium est tabula rasa, in qua omnium rerum notiones inscribi possunt, sed reverà nulla est inscripta; ne quidem illarum propositionum, quarum notiones *ἡγινὰς ἐννοίας* Stoici vocant) sed hoc dicitur, primam illam Deitatis notionem, quâ statuimus Deum esse, non ex revelatione proficisci, sed ex ratiocinatione & discursu. Quod aded verum est, ut Theologia, quæ omnia sua dogmata ex revelatione habet (nam quatenus aliquid naturali ratione probat, hætenus Philosophum agit) non probet, sed præsupponat, Deum esse. Primum enim Theologiæ principium est, S. Scripturam esse *θεόπνευστον*. nam si hoc principium probandum sit, non autoritate Scri-

pturæ probari potest (esset enim petitio principii) sed ex S. Scripturæ adjunctis atque effectis: atqui hoc principium, S. Scripturam esse *θεόπνευστον*, præsupponit esse Deum; ergo & Theologia id præsupponit, non probat. Quare si id probatione indigeat, utique Philosophiæ proprium erit illam demonstrationem instituere.

III. Nec tamen magna subtilitate opus est ad eam rem, in sobriis & moderatis ingeniis. Nam tam manifesta Deitatis indicia omnibus penè creaturis, ac imprimis toti mundo insculpta sunt, ut, qui ex iis non colligant & esse Deum, & Deum religiosè colendum esse, dicantur veritatem in injustitia detinere, eoque nomine *ἀναπαισθητοί* sint, id est, omnis excusationis prætextu destituti, ut philosophatur Paulus Rom. i. Imo verò Act. 17. docet Deum *ψηλαίφητον*, id est, palpabilem esse, non in se quidem, sed in creaturis suis. Verùm enim verò, quia is est humanæ vitæ stupor & protervia, ut præjudiciis & affectibus obtenebrata, cæcutiat in tam clarâ luce, & evanescat in suis ratiocinationibus, ut non solum Deum, non ita ut oportet, colat, sed etiam sæpè eum ne agnoscat quidem: ob eam rem necesse est ostendere & explicare, quomodo τὸ γνωστὸν ὁ Θεὸς in creaturis manifestum sit, & demonstrationem ita instituere, ut etiam protervos & pertinaces expugnare possit.

IV. Ad eam rem necessarium est ante omnia, ut constet quid Dei nomine intelligatur. nam frustra quæritur an res sit, si τὸ λεγόμενον antea non sit perspectum. Duo autem in eo vitanda sunt extrema, primo ne nomen Dei ad quodlibet attributum Dei accommodemus, eoque demonstrato, putemus demonstratum esse, Deum esse: nam proprium Dei, est nobilissimum omnium entium esse, esse independens, primum motorem, &c. attamen si quis crederet, dari Ens nobilissimum, aut independens aut primum motorem esse, non crederet propterea Deum esse: si quis enim crederet nihil rerum esse præter corporeum hunc mundum, is credere deberet, hominem esse Deum, si Ens nobilissimum esset Deus; item si quis fateatur cum Aristotele, primi mobilis motorem esse primum motorem absolutè, nec tamen quicquam aliud ei tribuat, quàm hoc, quod sit primus motor, non poterit profecto iste dici novisse, Deum esse. Alterum extremum est, ne nomine Dei intelligamus omnes illius proprietates & attributa: hoc enim si fieret nunquam posset esse demonstratum, Deum esse, nisi prius demonstrata essent omnia Dei attributa.

V. Ut ergò modum inter duo illa extrema teneamus, ordiamur ab eo, quod omnium hominum consensione firmatum est, Deum religiosè venerandum esse. Ubi

enim sensus est Deitatis, ibi & religio aliqua viget; & vicissim, ubi religio viget, ibi aliquis sensus Deitatis sive numinis. Itaque cum demum Deum demonstratum erit esse Deum, quando erit demonstratum esse Ens ejusmodi, quod religiosè colendum sit.

VI. Quòd religiosè colendum est, id omnes arbitrantur esse Ens, quod ab alio factum non est, quod causa sit cæterorum Entium, eoque non solum perfectissimum ac nobilissimum omnium Entium, quæ facta sunt: sed & eorum, quæ fieri possunt, atque adedò infinita quadam perfectione præditum. Hæc igitur sigillatim demonstranda sunt.

VII. Atque ut à primo ordiâr, quod cæterorum fundamentum est. Quicquid factum est, ab alio factum est; nihil enim à seipso fieri potest: quare cum videamus multa Entia facta esse, vel veniendum est ad Ens aliquod, quod à nullo factum est, vel datur circularis dependentia in causis efficientibus, vel progressus in infinitum. Sed non datur dependentia circularis, quia sequeretur idem fore causam & effectum sui ipsius: nam cum causa causæ etiam sit causa causati, si circularis dependentia daretur, & A ex. gr. foret causa $\tau\tilde{x}$ B, & B $\tau\tilde{x}$ C, & C vicissim $\tau\tilde{x}$ A, sequeretur A esse causam sui ipsius. Non datur etiam progressus in infinitum; nam si unaquæque res facta

facta sit ab alio, nulla excepta, etiam tota rerum collectio facta erit ab alio: atqui præter res omnes simul sumtas & collectas, nihil est, à quo tota rerum collectio possit dici facta: ergo non omne Ens ab alio factum est; ac proinde datur Ens quoddam, quod factum non est. Quod primo loco erat demonstrandum.

VIII. Hinc sequitur quidem, omnia quæ facta sunt, ab hoc ente facta esse, vel immediatè vel mediatè; sed hoc non est satis, nisi eadem operâ constet, in illis quoque, quæ aliarum causarum interventu ab ente non facto proveniunt, illius quoque vim elucere. Atque hoc ex motu patet: nam quicquid à re facta sit, per motum aut mutationem fit; nihil autem movetur à seipso: ergo sicut antea ad primum effectorem adscendebamus, ita hic quoque adscendendum erit ad primum motorem in unaquaque re. Hæc collectio multò manifestior est priori, ita ut etiam ab iis agnita sit, qui tamen primum effectorem negaverunt. Hisce si adjicias, non posse fieri ut alius sit primus motor, alius effector, res confecta erit, probatumque omnia quæ fiunt, ab eo fieri tanquam à primo motore, qui primus est rerum omnium effector: atque hoc admodum manifestum est. Nam qui potest res efficere & reverà efficit quæ non erant, cur non posset movere, imò cur non moveat eas quæ jam factæ sunt? Concludimus igitur,

tur, omnia quæ facta sunt ab illo Ente quod à nullo factum est, vel tanquam à primo effectore, vel tanquam à primo motore facta esse. quod erat secundo loco demonstrandum.

IV. Hinc porro sequitur, illud Ens esse perfectissimum: quod enim causa est omnium eorum quæ facta sunt, id debet omnem perfectionem possibilem in se continere: omnis enim perfectio talis est, ut fieri possit, aut ut fieri nequeat. Perfectio quæ fieri potest debet in eo Ente contineri quod factum non est: nam perfectio affecti debet contineri in causa vel formaliter vel eminenter: atqui quod factum non est, causa est omnis perfectionis quæ fieri potest. Perfectio quæ fieri non potest, in quo sit, si non sit in eo Ente quod non est factum? ergo Ens non factum omnium entium perfectissimum ac nobilissimum est.

X. Neque autem solum perfectissimum, sed & absolutè, id est, infinitè perfectum est. Quicquid enim finitum est, in eo non est omnis perfectio possibilis: nihil enim repugnat, ente quolibet finito dari Ens finitum perfectius. Ergò cum omne quod fieri potest, fieri possit ab illo Ente quod factum non est, sequitur profectò, Ens illud, quod factum non est, infinitè perfectum esse. nam si esset finitum, nihil ab illo fieri posset nisi finitum, idque æqualis aut certè non majoris perfectionis. Quare
cum

cum quolibet finito Ente, possit dari aliquod Ens finitum perfectius, & perfectius non possit fieri ab imperfectiori, sequitur Ens aliquod fieri posse suâ naturâ, quod non posset fieri ab illo Ente non factô, si non foret infinitum: sequitur ergo dari Ens infinitum. quod erat ultimo loco probandum.

XI. Hæc demonstratio tam est evidens & potens, ut omnes homines sanæ mentis eam capere æque atq; ea capi possint. Nam in omnium penè hominum animis ita se exerit, ut quamvis fallaciis convellatur, affectibusque obscuretur, efficiat tamen, ut recurrat hæc existimatio, Deum esse, religioseque colendum esse, eumque peccata etiam occultissima punire, præmiisque benefacta compensare; non quidem ut ista existimatio sufficiat ad pietatem, sed tamen ut satis sit ad ἀναπολογησίαν: atque id etiam in ejusmodi hominibus, qui credere volunt, & sese credere profitentur, non esse Deum. Hoc est opus illud legis, quod omnium hominum animis inscriptum esse testatur Paulus Rom. c. 2. vers. 15.

CAP. V.

*De Essentia Divina, & illius
Attributis in genere.*

THESIS I.

IN Deo spectanda est Essentia & Attributa. Essentia Dei invisibilis est & incomprehensibilis: quia enim immaterialis est, externis sensibus non obijcitur, ideoque nec ad intellectum deferri potest modo naturali; quia nihil in intellectu est, quod non prius fuerit in sensibus, oportetque intelligentem speculari phantasmata. atqui rerum immaterialium nulla sunt phantasmata. Quod adeò verum est, ut ne separatus quidem intellectus divinam essentiam queat intueri naturali modo; quod enim finitum est, infinitam rem non potest comprehendere atque in eo quidem plerique omnes consentiunt.

II. Utrum verò intellectus separatus essentiam divinam queat intueri modo supernaturali, Theologi certant, & adhuc sub iudice lis est: ego negantibus accedo. nam ratio ab intellectus nostri finitate ducta, haud minus probat Dei essentiam non posse comprehendì modo supernaturali, quam non posse comprehendì modo naturali.

turali: nam si infinitum non potest comprehendi à finita re, oportet aut Deum illo modo supernaturali finitum fieri, aut intellectum infinitum. Quod Scholastici dicunt Dei essentiam non posse comprehendi, sed apprehendi, nihil causam istam juvat; est quidem discrimen aliquod inter cognitionem comprehensivam, & apprehensivam, ubi res objecta divisibilis est, potestque per partes intelligi: at in re simplicissima comprehendere & apprehendere non differunt; qui enim eam apprehendit, eam quoque comprehendit.

III. Nec contra nos facit, quod Paulus dicit, in futura vita nos visuros Deum *θεωσωμεν θεους θεωσωμεν* 1. Cor. 13. vers. 12. nec quod Johannes dicit 1. Epist. cap. 3. v. 3. nos visuros eum sicuti est. Nam Paulus non loquitur de visione essentiae divinae, sed de notitia Dei, qua illius attributa percepturi sumus in futura vita, longè perfectiori modo, quam fit in hac vita: nam in hac vita, etiam cum longiusculè progressi nobis videmur in cognitione rerum divinarum, Deum tamen, id est, attributa Dei haud aliter cognoscimus quàm *ὁ ἐν ὁρατοῖς, ἐν ἀνιγμῶσι*: at in futura vita Deum cognoscemus, id est, attributa Dei, de facie ad faciem, id est, coram modo, qua fieri potest, perfectissimo: Iohannes per pronomē *αὐτόν* non Deum intelligit *ὁ ἀπόθεος*, sed Christum, ut ex præcedentibus verbis apparet.

IV. At-

IV. *Attributa Dei vel sunt penitus incommunicabilia, vel rebus aliis communicari possunt, saltem κατ' ἀναλογίαν. Attributa incommunicabilia sequuntur Dei essentiam immediatè atque absolutè: ut sunt necessitas, unitas, æternitas, immensitas, simplicitas, atque immutabilitas. Attributa communicabilia conveniunt Deo in ordine ad creaturas, sive res à se factas, suntque vel δυνάμεις ἐνεργητικοί; ut vita, intellectus, voluntas, potentia: vel operationes, æque vel immanentes; ut intelligere, velle: vel transeuntes, ut creare, conservare, & gubernare sive providere. Quæ omnia duobus generibus possunt contineri: nam vel actiones sunt, vel proprietates.*

V. *Proprietates inter se & ab essentia divina, non reipsa, neque modaliter, sed sola ratione distinguuntur: non reipsa; quia Deus omnem perfectionem possibilem in essentia sua continet: non potest ergo proprietas ulla Deo convenire, quæ ab essentia reipsa discrepet. Deinde, si proprietates discreparent reipsa ab essentia, vel essent substantiæ vel accidentia: non possunt esse substantiæ; quia substantia substantiæ proprietas esse nequit: non etiam accidentia, quia infinitæ substantiæ nihil accidit: accidens enim est additamentum substantiæ & quasi complementum quoddam; at infinitæ rei nihil addi potest. Hinc sequitur proprie-*

prietates inter se non distinguuntur reipsa : nam quæ reipsa eadem sunt uni & eidem singulari tertio, ea quoque inter se eadem sunt. Non distinguuntur etiam proprietates ab essentia, aut inter se, modaliter, quod satis manifestum est in proprietatibus incommunicabilibus : nam æternitas species durationis est, immensitas ad localitatem pertinet: atqui antea docuimus durationem & localitatem sola ratione discrepare ab Ente. Si ita se res habeat in proprietatibus incommunicabilibus, nulla causa est cur aliter statuamus in proprietatibus communicabilibus. Actiones transeuntes haud dubiè reipsa distinguuntur ab essentia Dei: de immanentibus suo loco videbimus.

VI. Illa Attributorum divinorum distinctio non est rationis ratiocinantis, sed rationis ratiocinatæ; si enim esset distinctio rationis ratiocinantis, hæc propositio, Deus est ubique, omniscius & id genus aliæ omnes essent identicæ: quod est falsum. Sunt igitur in ipso Deo diversi λόγοι atque habitudines ad Creaturas, quibus fit, ut una simplicissimaque essentia, diversis ac dissimilibus conceptibus apprehendatur. Ex. gr. si concipias essentiam divinam cum respectu ad tempus, dicetur æternitas; si cum respectu ad locum, immensitas, hoc est, ipsa essentia æterna atque immensa.

VII. In cognitionem divinorum attributorum nos deducunt Dei opera. nam
cura

cum Deus causa sit rerum omnium, quicquid uspiam perfectionis est, id Deo attribuius modo quodam eminentissimo: & quicquid in rebus defectum notat, aut qualemunque imperfectionem, id omne à Deo removemus.

VIII. Sed si attributa non distinguantur ab essentia divina, haud magis attributa Dei assequi poterimus quam essentiam divinam. quare si essentia divina sit *ἀκατέληκτος*, erunt & attributa *ἀκατέληκτα*. Verum id non sequitur: nam essentia Dei est absolutum quippiam: at attributa respectus includunt, quorum beneficio intelligi à nobis possunt, revera que nobis innotescunt. Interim fatendum est, ipsa quoque attributa admodum imperfectè cognosci, & conceptibus aut negativis, aut confusis & inadæquatis: quod Apostolus vocat *κα μέρους*, ex parte, cognoscere, quod in futura vita abolebitur.

C A P. VI.

*De Dei Necessitate, Vnitate,
& Æternitate.*

T H E S I S I.

H Is præmissis singula Dei attributa consideremus, exorsi à Necessitate. Ens Necessarium ut c. 29. diximus, appel-

appellatur, quod non potest, neque unquam potuit, aut poterit, non esse: in eoque distinguitur ab Ente contingente, quod & potuit non fuisse, & potest non esse. Atqui Deus non potuit non fuisse, & non potest non esse: est ergo Ens omnino necessarium. Si enim Deus potuisset non fuisse, vel etiam non esse; aut ipse haberet essendi & non essendi arbitrium, aut id esset in alterius potestate; atqui non est in potestate alterius; siquidem ab alio non est: non habet etiam ipse & essendi & non essendi arbitrium, quia liberum arbitrium non pertinet ad esse & non esse, sed ad operari & non operari: esse enim præsupponit. At homo potest arbitrato suo esse suum finire, cur non etiam Deus? Quia homo esse suum finit per operationes: at Dei esse nulla operatione finiri potest, quia infinitus est & independens. Deinde, non finit totum esse quod habet, sed esse hominis solummodò: atqui si Dei esse finiretur, totum finiretur, quod contra infiniti naturam est. Nec sequitur, si finitum à seipso finito potest destrui, & infinitum à seipso infinito potest destrui: quia esse finitum à levi causa dependet, qua sublata, tollitur: at esse infinitum per se consistit sua infinita essentia.

II. Hinc sequitur, Deum esse Ens per essentiam, ita ut esse sive existere sit de Dei essentia & quidditate, adeò ut essentia Dei aut Deus concipi non possit, non dico negatâ,

gatâ , sed non concepta existentia. Itaque quæstio quid sit, cum de Deo agitur, includit quæstionem an sit : at cum agitur de rebus aliis, non includit, sed præsupponit.

III. Alterum Dei attributum est Deum esse Unum, aut potius Unicum. Atque hoc primum colligi potest ex Universi ordine pulcherrimo, omniumque rerum quæ in illo sunt, mirabili connexionem, & constantissimam conspirationem ad eundem finem. Si dicas, hinc sequi quidem unicum esse mundi conservatorem aut gubernatorem, at non esse unicum conditorem: reponam, gubernari mundum non posse nisi ab eo, cujus sapientiâ & potentiâ conditus est. Quibus adde, mirabilem illum rerum ordinem & harmoniam non posse esse à gubernatore, sed necessariò esse à conditore: ac proinde sequitur ex eo, non solum gubernatorem, sed & conditorem esse unicum. Dici potest, mundi conditorem non esse unum naturâ & substantia, sed voluntate & consensione; nec plus colligi ex harmonia mundi & conspirationem ad eundem finem. Sed contra dici potest, si essent plures mundi conditores, vel essent subordinati uni alicui supremæ ac primæ causæ, vel omnes ex æquo essent independentes. Si essent subordinati uni primæ causæ, res confecta est. Illa enim sola Deus erit: nam quod ab alio pendet vel quoad esse vel quoad operationem suam, Deus esse non po-

potest. Si plures isti conditores non sunt eidem primæ causæ subordinati, vel quilibet sufficientem habebit potestatem ad producendum universum, vel nullus seorsim sufficientes habebit vires; si singuli sufficientiant, omnes alii frustra sunt: si non sufficientiant singuli, nec omnes simul sufficientiant, quia ad condendum mundum virtute infinita opus est, at plures causæ, quæ singulæ seorsim impares sunt condendo mundo ob finitudinem virtutis, non possunt simul junctæ virtutem infinitam conficere: ex finitis enim rebus non potest infinitum fieri.

IV. Idem etiam sequitur ex infinita Dei perfectione. nam quod infinitum est, id in eo genere, in quo infinitum est, unicum est haud dubiè. Sic si tempus infinitum esset, unicum esset, nullumque tempus esset præter illud infinitum tempus: simili modo si esset quædam infinita magnitudo, nulla dari posset alia magnitudo extra magnitudinem infinitam. Quare cum Deus essentiali perfectione infinitus sit, non potest non esse unicus. Videri hoc argumentum posset non admodum firmum, nec satis apposita exempla: siquidem extra infinitam magnitudinem nulla omnino magnitudo, ne finita quidem, esse posset; at præter Deum alia multa dantur entia: quare sequitur aut Deum non esse infinitum, aut ex infinitate non rectè conclusam

ſam eſſe unitatem. Sed ſi accuratè argumentum illud conſideres, ſanè firmum eſt. nam illa alia Entia, quæ præter & extra Deum ſunt, Deus non ſunt, neque ejuſdem naturæ cum Deo: ut magnitudo finita, magnitudo eſt. Eapropter etſi nulla magnitudo poſſet eſſe extra magnitudinem infinitam, poteſt tamen extra infinitam Dei eſſentiam dari aliqua eſſentia, ſed nulla dari poteſt quæ Deus ſit.

V. Hinc ſequitur, quemadmodum ad eſſentiam Dei pertinet exiſtere, ita quoque ad eam pertinet ſingularem atque indiuiduam eſſe. In rebus finitis eſſentia concipi poteſt ut communis, aut ſaltem ut communicabilis, quia dari plura ejuſdem naturæ eſſentiæque indiuidua nullam involvit repugnantiam. At eſſentia Dei non poteſt concipi ut communicabilis, quia repugnat illius eſſentiæ infinitæ in indiuiduis multiplicari.

VI. Tertium attributum Dei eſt æternitas. quid æternitas ſit, ſuo loco diximus. Nihil ergò ſuper eſt hoc loco, quam ut demonſtremus hoc loco ea Deo convenire, quæ æternitatis definitione ſuo loco comprehendere diximus. Sunt autem iſta duo ſolummodò, carere ſcilicet principio & fine durationis. nam quod quidam dicunt, rem æternam ſucceſſione quoque carere, id ſanè verum eſt: ſed quod ſucceſſione carere ideò ad definitionem æternitatis pertinere

tinere concludant, quia res æterna successione caret, nullam habet consequentiæ necessitatem. Quid enim? an quia quod æternum est, iustum est, ideo quoque iustitia pertinebit ad definitionem æternitatis? Deinde fingamus (quæ Aristotelis sententia fuit) mundum ne quidem cœpisse, motus profectò cœlorum æternus erit ex illa sententia; & tamen successio pertinet ad essentiam motus. Quare ut demonstratum sit, æternum esse Deum, nihil aliud demonstrandum est, quam Deum non habuisse initium suæ existentiae, nec habiturum esse finem. Successione carere, ad immutabilitatem pertinet. de quo postea.

VII. Quæ cum ita fiat, satis apparet, non magno molimine opus esse ad colligendam æternitatem ex iis quæ jam demonstrata sunt: nam quis non videt huiusce propositionis consequentiam: Quod non est ab alio factum, id non habet initium suæ durationis? Dubitant quidem multi, an, quod ab alio factum est, initium habuerit durationis; sed quod ab alio factum non est, id nemo inventus est, qui suspicaretur initium habuisse. itaque cum Deus non fuerit ab alio factus, initium non habuit: & cum sit Ens. per essentiam, hoc est, necessarium non potest habere finem. Sequitur ergò eum esse æternum.

VIII. Æternitas Deo ita propria est, ut nulli

nulli creaturæ communicari possit. Sunt enim *αὐτότερον* quicquid alii dicant, factum esse, & æternum esse. Nam quod factum est, fieri desit; quod fieri desit, aliquando fuit in fieri; quod in fieri est, nondum est; ergò quod factum est, aliquando non fuit, ac proinde esse incœpit; ideoque non potest æternum esse quod factum est. Hæc disputatio, dicat aliquis, procedit tantummodò de rebus permanentibus, in quibus fieri & factum esse distinguuntur: sed non probat rem successivam non posse ab æterno fuisse: imò, inquam ego, si res permanens; quæ facta est, non potuit ab æterno fecisse, multò minus successiva. nam res successiva propriè non est una res, sed catena quædam rerum: quarum aliæ post alias oriuntur, &, simul atque oriuntur, intereunt: ita ut non solū æternitas, sed & esse, rebus ejusmodi non convenire videatur. an autem in illa catena ad primum aliquod Ens perveniri debeat, suo loco quæremus.

CAP. VII.

*De Immensitate, Simplicitate,
& Immutabilitate Dei.*

THESIS. I.

Atributum Dei quarto loco à nobis propositum, est Immensitas sive ubiqui-

ubiquitas: quæ tantò diligentius demonstranda est, quod reperti sint homines non ita pridè, qui non satis piè de hoc Dei attributo senserunt. Primū ergò immensitas Dei ex illius perfectione colligitur; quod enim infinita perfectione præditum est, ubique est: nam quo bonum majus est, eo melius est atque perfectius, si sermo sit de eo, quod in se & naturâ suâ bonum est: at omni bono finito majus dari potest saltem cognitione mentis: bono verò perfectissimo, non potest dari bonum perfectius. ergo bonum perfectissimum debet esse infinitum; ac proinde debet esse ubique: quare si Deus Ens sit infinitæ perfectionis, erit etiam immensus.

II. Secundò, Deus à nulla pendet tanquam à priori ac superiori causa; ergo est immensus. nam si rectè colligitur, mundum idèò pendere ab aliqua causa, quia finitus est; etiam rectè colligitur Deum esse infinitum, quia à nulla causa pendet. nam si Deus finitus sit, & non ubique, nulla erit consequentia in hac illatione, Mundus est finitus, ergo ab alio; dari non potest instantia rei finitæ, quæ tamen à nulla causa pendet. Deinde, quod finitum est, ab aliquo definitum est, ac proinde ab aliquo dependet.

III. Tertio, Deus est actus purus, ergò infinitus est & ubique; nam si non sit ubique, aut non poterit esse ubicunque vult

esse, aut necessariò moveri debet. Atque absurdum est, Ens absolute perfectum non posse esse ubi vult esse: ergo moveri debet si ubique non sit: ac proinde erit in potentia & ad motum & ad ubi. Sed Deus non vult alibi esse quam ubi est: Esto, saltem potest velle. Atqui hoc quoque absurdum est, Deum aliquid velle posse, quod sine motu non potest consequi.

IV. Quartò, Deus ubique operatur, ergo ubique est: operari enim præsupponit esse: ac proinde alicubi agere, præsupponit ibi esse. Multa possunt objici adversus hanc rationem: ac primò, propinquitatē & conjunctionem agentis cum patiente, necessariam esse in causis finitæ virtutis, non in Deo qui infinitæ virtutis est, ac proinde non agit per contactum, sed per voluntatem. Sed contra dici potest: cum omnia agentia finita inæqualis admodum sint virtutis, ex æquo tamen omnes requirunt conjunctionem agentis & patientis: necessitatem conjunctionis sive præsentia non provenire ex imperfectione causæ finitæ, sed ex ratione causandi in genere. Deinde si causa infinitæ virtutis in definito loco existens, posset agere in spatio quantumcunque remoto in infinitum: etiam causa finitæ virtutis posset agere intra sphæram activitatis suæ, in spatio remoto, ita ut non ageret in spatio interjecto, quod tamen falsum est. Tandem, fateor verum esse, Deum agere
per

per voluntatem suam, sed inde infero, non posse Deum loco claudi: nam qui tantus est, ut omnia agat nutu suo, is tantus esse debet, ut nullo contineatur loco; nam quæcunque loco clauduntur, non nutu aut voluntate sua quippiam, sed omnia per contractum agunt, ut vel idè angelos moveri sit necesse. Secundo objici potest, non requiri in omni actione suppositi propinquitatem, sed sufficere propinquitatem virtutis; at ex propinquitate virtutis non posse demonstrari immensitatem Dei. Resp. in creatione & conservatione non posse intelligi aliam propinquitatem Dei, quàm propinquitatem suppositi, quia in illis actionibus non potuit uti virtute mediâ. Sed Deus non omnia creat. Esto, creavit saltem omnium rerum materiam, eamque conservat immediatè. Unde necesse est, Deum omnibus rebus intime præsentem esse, ac proinde ubique esse. Tandem objici potest, ex operatione non sequi Deum ubique esse, sed tantum in toto mundo, & non etiam extra mundum in spatio imaginario. Imò contrà, si Deus sit in toto mundo, quia in toto mundo operatur, etiam extra mundum est, quia extra mundum operari potest, alterumque mundum condere sine ulla sui mutatione, ut postea probabitur: hæ rationes admodum firmæ sunt, nec quicquam momenti habet, quod Sophista quidam contrà, ex Socini fundamentis, disputavit.

V. Sequitur Simplicitas, quæ quinta Dei proprietas est, quæ admodum late patet: nam cum simplicitas sit opposita compositioni, quot sunt species compositionis, tot erunt modi simplicitatis. Est autem compositio quædam ex partibus integrantibus, altera ex materiâ & forma, tertia ex subiecto & accidente, quarta ex essentia & existentia, quinta ex genere & differentia, sexta ex natura & hypostasi sive substantia. Itaque simplicitas vel in genere de Deo potest demonstrari, vel per species: Demonstratio generalis hæc esto: Deus est Ens perfectissimum; ergo & simplicissimum: major enim perfectio est simplicitas, quam compositio: imo impossibile est, absolutè perfectum Ens dari, quod ex plurium unione coalescit; nam quæ rem componunt, imperfectiora sunt singula composito ipso: atqui ex imperfectis nihil fieri componique potest, quod infinita perfectione sit præditum.

VI. Jam ad species accedamus & ad singulos simplicitatis modos. Ac primò Deum non esse compositum ex partibus integrantibus, neque ex materia & forma substantiali, colligitur ex illius incorporea natura; istæ enim compositiones non alibi reperiuntur, quam in corpore: at Deus corpus non est; nullum enim corpus immensum esse potest: alias enim corpora se mutuo penetrarent.

VII. Non

VII. Non esse in Deo compositionem ex subjecto & accidente, sive Deum non esse præditum accidentibus, ex eo colligi potest, quod Deus sit Ens per essentiam, infiniteque perfectum. Accidentia enim idè finitis essentiis addita sunt, ut suppleant, quod illis ob finitatem deest. Cui igitur nihil deest, & à quo nulla perfectio abest, id accidentia non requirit, neque adèd habere potest. Deinde, si essent in Deo accidentia, vel essent illi ab externa causa conciliata, vel à Dei essentia emanarent; prius dici non potest, quia Deus est prima causa & prorsus independens: non etiam posterius, quia causa emanativa non potest esse causa prima, ut alias diximus. Cæterum cum accidentia à Deo removemus, ejusmodi accidentia intelligimus, quæ vera Entia sunt, non etiam denominationes, aut respectus accidentales; hæc enim compositionem non faciunt.

VIII. Compositionem creaturæ ex Essentia & Existentia diximus quidem esse compositionem rationis: attamen in Deo non habet locum. Nam illa distinctio quæ creaturis tribuitur, inde provenit, quod Essentia creaturarum ex se sit indifferens ad esse & non esse, determineturque ad esse quasi ab existentia: at in Dei essentia hæc indifferentia considerari nequit, quia est Ens necessarium, & esse est de illius essentia; ergo Deo distinctio ista tribui non potest.

IX. Non datur & in Deo compositio ex genere & differentia; nam tamen si hæc quoque compositio rationis compositio sit, à Deo tamen aliena est. nullus enim conceptus, nulla ratio dari potest, quæ Deo & creaturis ex æquo sive univocè communis sit: concipitur quidem in Deo ratio quædam Entis aut substantiæ, quæ creaturis quoque convenit, sed ratio ista admodum est dissimilis, & tamen non omnino æquivoca. quid de Compositione ex natura & hypostasi statuendum sit, cap. 2. hujus libri abunde ostendimus.

X. Superest sextum & ultimum attributum incommunicabile, nempe immutabilitas. Immutabile dicitur, quod mutari non potest. mutatio vel ad substantiam pertinet vel ad accidentia. Mutatio substantialis est generatio, corruptio, nutritio: accidentalis, accretio, diminutio, alteratio & motus localis. Creatio & annihilatio etiam si mutationes non sint, attamen ad substantiales mutationes similitudine quadam referendæ sunt. His positis, quemadmodum Simplicitas, ita & Immutabilitas vel in genere vel per species demonstrari potest. atque in genere quidem hoc modo: Deus est simplex; ergo & Immutabilis: omnis enim mutatio requirit subjectum, quod manet sub utroque termino mutationis, sub termino à quo & sub termino ad quem: nihil ergo mutari potest quod omnino simplex

plex est. Creatio quidem & annihilatio non requirunt subjectum; requiritur tamen compositio ex actu & potentia objectiva, in eo quod creatum est, & annihilari potest. Ut hæc distinctius intelligamus, percurramus species mutationum; ac primo, mutatio quoad substantiam non habet locum in Deo, quia secundum se totum est æternus: non potest Deus augeri, quia est Immensus: non diminui, quia non habet partes: non moveri loco, qui ubique præsens est: non alterari, quia nulla qualitate, atque adeò nullo accidente præditus est.

XI. Adversus ea quæ de simplicitate & immutabilitate Dei diximus, difficile argumentum opponi potest, petitum ab actionibus Dei immanentibus, atque imprimis à decretis Dei de condendo mundo & aliis rebus agendis. Nam decreta Dei libera sunt, ac proinde possunt esse & non esse; ac proinde Deus non videtur omnino immutabilis esse.

XII. Responderi potest, Deum quidem omnia quæ in tempore facit, liberè facere; ab æterno quoque liberè decrevisse facere; & potuisse non decernere: attamen non esse mutabilem propterea, quia decreta illius non mutantur. Nam qui consilium mutat, aut non potest ille exequi quod decrevit, aut mutat in melius; at Deus consilia sua non potest mutare in meliora, quia cum sit Sapientissimus decernit optima: &

cum sit Potentissimus, non potest illius consilium impediri. Hæc, inquam, responderi possunt, verum non tollunt difficultatem; nam licet decreta Dei non possint fieri irrita, attamen si potuit Deus decreta non fecisse quæ fecit, potest Deus considerari sine ulla volitione aut decreto: atqui hoc sufficere videtur ad mutabilitatem. Et licet ad mutabilitatem id non videretur satis, attamen sufficeret ad compositionem. Nam Decreta sunt in Deo, & non sunt essentia Dei (nam essentia Dei non potest non fuisse ab æterno: at decreta Dei potuerunt ab æterno non fuisse) ergo aliquid est in Deo, quod non est Essentia Dei, ac proinde est compositio.

XIII. Quidam viri docti & pii victi illius argumenti pondere, concesserunt in Deo compositionem esse ex essentia divina, & actibus internis: sed compositionem istam non esse imperfectionis argumentum, quia decreta aliique actus interni non sunt in Deo, ut perfectior sit, sed quia est perfectissimus. Verum enimverò vereor, ut illud satis sit. nam cum simplicitas sit perfectio, cur Deus absque ejusmodi compositione non decernit, si sit absolutè perfectissimus. Alii volunt, decreta Dei esse Dei essentiam, & nihil præterea, quod etiam crudum est, nisi dextrè explicetur.

XIV. Ut hanc difficultatem tollamus, existimo longè aliter in Deo concipiendam esse

esse libertatem, quàm in homine; nam libertas hominis, quæ quidem propriè sic dicitur, nihil aliud videtur esse, quàm indifferentia quædam potentiæ ad diversos actus; at in Deo est indifferentia actus ad diversa objecta. Est enim in Deo concipiendus unus actus, qui nihil aliud est quàm essentia divina. Hic actus respicere potest diversa objecta creata, seu, quod eodem reddit, Deus per istum actum tendere potest in diversa objecta, vel etiam non tendere: & cum in illa tendit, reverà ea vult. Dixi in objecta creata; nam semetipsum Deus non potest non amare. Decreta ergò Dei duo involvunt, actum scilicet, & illius actus tendentiam sive applicationem ad diversa objecta creata. Actus ipse liber non est, non magis quàm Dei vel immensitas vel æternitas: sed libera est illius actus applicatio ad objecta; quæ tamen, quia nihil Deo addit Entis, sed solum denominationem quandam externam, sumptam à connotatione objecti creati, tanquam termini sui, neque compositionem efficere potest neque mutationem. Quod adedò verum est, ut existimem, si Deus decreta rescindere posset, illud imperfectionem allaturum Deo, non propter mutationem decretorum, sed propter causam mutationis, quæ aut imprudentia semper est aut impotentia.

CAP. VIII.

De Vita & Intellectu Dei.

T H E S I S I.

EXplicatis & demonstratis attributis incommunicabilibus, sequuntur ea, quæ Creaturis communicari posse diximus, saltem κατ' ἀναλογίαν: quæ tamen analogia non in ipsis Dei attributis, sed in ipsorum effectis sive operationibus quaerenda est. Nam cum attributa infinita sint, æquè atque ipsa Dei essentia, & attributa incommunicabilia: nullam habent cum creaturis ἀναλογίαν; nisi in suis operationibus circa objecta creata & finita.

II. In hoc genere primum locum vitæ dedimus, quam Deo tribuendam esse constat ex vita creaturarum; nam cum creaturæ vivant, necesse est & creatorem vivere, quia causa conferre nequit effecto, quod ipsa non habet. Nec dici potest, in Deo quidem vitam non esse formaliter, sed aliquid eminentius vitâ: nam cum vivere sit perfectius simpliciter quàm non vivere, oportet sane vivere formaliter, quod aliis vitam largiatur. Solem quidem ajunt non esse formaliter calidum, & tamen calefacere: sed non est simpliciter perfectius calidum esse, quàm non esse calidum: quod si
id sim.

id simpliciter perfectius esset, non posset Sol calefacere, si non esset calidus formaliter.

III. Sed dicet quis, vivens quidem simpliciter esse perfectius non vivente, sed tamen vitam non esse perfectionē simpliciter simplicem, i. e. expertem omnis imperfectio-
nis. Vita enim aut motus est, aut essentia seu principium vitalis motionis, qua vivens à seipso movetur: ac proinde necesse est ex potentia activa & passiva constatum esse quod vivit, quia necesse est, ut moveatur simul & moveatur, quod à divina perfectione alienum est haud dubiè. Sed observandum est, vitam Dei à vita creaturarum multum discrepare. In creaturarum enim vita duo sunt; primò, quod vivens sese actuet: secundò, quod sese actuet per veram causalitatem & motum, aut physicum, ut fit in vita vegetativa & sensitiva, aut spirituales, ut fit in vita intellectuali. Prius id perfectionis est, nullamque imperfectio-
nem includit, nisi quatenus posterius quoque cum illo conjunctum est. Deus igitur vivit, sed sine causalitate aut motu, ita tamen ut perfectissimo modo habeat omnē perfectionem, quam habent creature, cum se actuant per veram causalitatem & motum.

IV. Hinc sequitur, vitam Dei non esse concipiendam, neque per modum actus primi, neque per modum actus secundi,

neque per modum rei ex actu primo & secundo compositæ: sed per modum actus simplicissimi; in quo tamen sit omnis illa perfectio, quæ in actu primo & secundo creaturarum continetur. Itaque dici potest, Deum non solum esse substantiam viventem, sed & vitam substantialem; vitamque Dei nihil esse aliud, quàm illius simplicem & actuosam essentiam.

V. Vita Dei non est vita vegetativa, neque sensitiva (nam istæ vitæ imperfectiores sunt, quam ut illæ Deo tribui queant) sed intellectualis. Atque hoc primum patet ex eo, quod Deus sit causa vitæ intellectualis; quæ Angelis & animabus, humanis convenit. Deinde omnis immaterialis substantia est intellectualis: atqui Deus cum sit substantia perfectissima, necessario debet esse intellectualis. Quod omnis substantia immaterialis sit intellectu prædita, suo loco demonstrabitur. Et licet concederetur immaterialem substantiam posse esse intellectu destitutam, cum tamen perfectior sit substantia intellectualis, quàm ea quæ intellectu destituitur, rectè colligitur Deum intellectu esse præditum, si sumas non solum Deum esse immaterialem, sed & absolutè perfectum, seu præditum absoluta perfectione atque infinita.

VI. Vita intellectualis consistit in intellectu ipso & voluntate. Intellectus enim sine voluntate esse nequit, quemadmodum

ACC

nec voluntas sine intellectu: intellectus & voluntas ex operationibus suis innotescunt, & operationes ex effectis: quemadmodum & potentia quæ intellectus & voluntatis executrix est. Ut intellectus divini natura nobis aliquanto distinctius innotescat, Primò agendum erit de intellectu sive scientiæ divinæ objecto; Secundò de sciendi modo; Tertiò de speciebus aut quasi speciebus.

VII. Objectum scientiæ divinæ sunt omnia quæcunque aliquam quamcunque Entitatem habent aut quomodocunque veris Entibus conveniunt; sive universalia sint, sive singularia; sive substantiæ, sive accidentia; sive præterita, sive præsentia, sive futura; sive necessaria, sive contingentia; sive bona, sive mala; sive vera Entia, sive modi Entium, Entia rationis, aliæve Entium affectiones sint: nihil enim horum Deum latet, ejusque notitiam effugere potest. Atque ut hoc melius appareat, distinguemus ista in tres classes; ut in prima classe ponatur Deus; in secunda classe, quæ actu existunt, vel iis actu conveniunt quæ actu existunt; in tertia, quæ sunt in potentia objectiva.

VIII. Quod semetipsum Deus cognoscat, per se satis notum est. Nam sicut Deus maximè Ens est, & quidem immaterialissimum: ita quoque maximè intelligibilis est. Sed à quo intelligetur, si non cognoscatur

scatur & intelligatur à seipso? sibi enim ipsi maximè est proportionatus. Quod etiam Deus cognoscat omnia quæ actu sunt, inde manifestum est, quod à Deo sint; non enim fieri potest, ut Deus ignoret quippiam eorum, quorum ipse author est & causa, quomodocunque modo. Quomodo Deus causa sit malarum rerum, suo loco dicemus; hoc solum observandum est impræsentiarum, non esse imperfectionis, mala cognoscere. Tandem quod Deus etiam cognoscat omnia possibilis, sic ostendi potest. Deus cognoscit essentiam suam, ergo & cognoscit quicquid in ea continetur, vel formaliter, vel eminenter, & quicquid ab ea proficisci potest: atqui à Deo fieri potest, quicquid est possibile, siue, quod suâ natura, non repugnat fieri, ut contradictoria: ergo cognoscit etiam omnia possibilis. Etenim cum Deus sit principium siue causa intellectualis, absurdum est, aliquid existimare posse fieri à Deo, quod ipse ignoret.

IX. Ut de modo scientiæ divinæ constet, primò statuendum est, cognitionem Dei esse cognitionem *rationis*, non *diarationis*. omnis enim *diaratio* cum ignorantia conjuncta est, quoniam est progressio à noto ad ignotum: atqui nulla ignorantia Deo tribuenda est. Illa cognitio *rationis* non est sita in compositione & divisione, sed in simplici intuitu, quo Deus omnia uno intuitu, quasi coràm intuetur: nam in

compo,

compositione apprehenditur primo subiectum, deinde prædicatum, tertio loco nexus utriusque: at in Deo nihil prius, nihil posterius apprehenditur, sed omnia simul. Præterea statuendum est, Deum nihil intelligere per facultates aut habitus, essentiæ suæ superadditos; non etiam per imagines aut species intelligibiles; sed omnia per essentiam suam: adeò ut intelligere Dei nihil sit aliud quam ipsius esse, illiusque scientia, illius ipsissima essentia, cum objecti cogniti connotatione. Species enim & habitus, & potentia in humana intellectiōe necessaria sunt propter imperfectionem: nam per species objecta cum intellectu conjunguntur; habitus potentiam intelligendi faciunt; potentia ipsa (si modò ab animæ substantia reuera sunt diversæ) sunt principium quo anima agit & patitur cum intelligit. Atqui objecta omnia Deo sunt præsentia, ejus intellectus nulla eget facilitate, nec quicquam ab objectis patitur: Ergò Deus omnia intelligit per simplicem essentiam. Novit ergò Deus semetipsum in semetipso per semetipsum; reliqua omnia & in seipso novit, & in propria ipsorum entitate: in seipso eminentèr, sicut effecta cognoscuntur in suis causis; in propria ipsorum entitate formalitèr. Excipiuntur tamen mala & privativa, quæ non cognoscuntur in propria entitate (nam nullam habent) sed in entitate subiecti & habituum oppositorum.

X. Ex iis quæ dicta sunt, sequitur, scientiam rerum omnium Deo esse necessariam: quod tamen non absolutè intelligendum est, sed præsupposita in rebus veritate atque existentia. Seipsum quidem tam necessario cognoscit Deus, quam necessario est, & quam necessario cognoscit seipsum ac potentiam suam, tam necessario cognoscit res possibiles. Creaturas autem factas aut faciendas quatenus factæ aut faciendæ sive futuræ sunt, Deus potuit non novisse, quia potuerunt non esse factæ, & non esse futuræ. Postquam autem Deus eas effecit, aut certò voluit ut aliquando fierent, omnino pertinet ad perfectionem Dei, eas actu cognoscere. non indiget Deus ista cognitione ad felicitatem ac perfectionem suam, sed quia illius perfectionem naturali necessitate sequitur. Ex quo porro sequitur, scientiam Dei semper esse in actu secundo: nam quod necessarium est, semper actus est.

XI. Ex præcedenti porro doctrina sequitur scientiam Dei immutabilem, atque æternam; ideoque omnibus numeris perfectam esse, ut nec extensivè nec intensivè augeri possit, multò minus ut varietur, quotiescunque objecta variantur. Scientia dicitur extensivè variari, cum ad plura objecta extenditur; intensivè, cum in eodem objecto plura apprehendit attributa essentialia, magisque distinctè. Atqui scientia
Dei

Dei ad plura objecta extendi nequit, quoniam uno actu omnia complectitur; & plura in eodem objecto non potest apprehendere attributa, quia unamquamque rem cognoscit, ita ut in se est: ergo scientia Dei non potest intensivè aut extensivè variari. Sed nec variatur cum res objectæ variantur, quia prævidit fore, quicquid unquam fit.

XII. Atque hæc quidem omnia satis certa videntur, si sermo sit de rebus præteritis, præsentibus, ac futuris. Res enim ita se habent ad cognitionem Dei, ut se habent quo ad esse; ac proinde, cum, quæ fuerunt, sunt, aut futura sunt, non possint non fuisse, non esse, aut non esse futura, non possunt etiam non cognosci à Deo, quatenus fuerunt, sunt, aut futura sunt. Sed quid de iis dicendum, quæ esse quidem possunt, neque tamen futura sunt? si enim futura non sunt, utique Deus ea non novit esse futura: at potuerunt esse futura; & si futura fuissent, Deus cognovisset ea futura: ergo potest augeri scientia Dei, aut saltem potuisset esse major. Resp. Scientiam Dei, qua res possibles cognoscit, quæ tamen futuræ non sunt, ex se sufficientem esse ad eas ipsas cognoscendas, si fortè futuræ forent, absque tamen aliquo perfectionis suæ incremento. Nam quod eas non novit futuras esse, non accidit quia aliquid in scientia Dei desideratur,

rum, sed quia res ipsæ non sunt cognoscibiles isthac modo, quandoquidem futuræ non sunt. Quemadmodum enim, quod præsens non est, non potest cognosci præsens esse (esset enim illa cognitio non cognitio sed error) ita profectò quod futurum non est, non potest cognosci futurum esse.

XIII. Porro quanquam Deus omnia intelligat actu simplicissimo, ejus tamen scientia distingui solet (ut ad id me conferam, quod tertio loco proposueram) in indefinitam & definitam. Scientia indefinita dicitur, quam & scientiam simplicis intelligentiæ vocant; qua Deus res cognoscit absolute, absque ulla definita temporis differentia. Scientia definita (alii scientiam visionis appellant) dicitur, quæ versatur circa rem in aliqua definita temporis differentia, siue qua Deus res cognoscit, aut præsentem esse, aut præteritam, aut futuram. Scientia indefinita prior est decreto Dei de rebus faciendis, ideoque Deo naturalis est; definita, decretum sequitur, cum versetur circa res creatas. Nam scientia Dei, qua seipsum cognoscit, ipsi quoque naturalis est, omnemque actum voluntatis antecedit. Hinc sequitur, scientiam indefinitam versari non solum circa ea, quæ sunt, fuerunt, aut futura sunt, sed etiam circa res possibles quæ nunquam futuræ sunt. inde patet, cur dicatur, *scientia indefinita*, nempe quia indefinitè versatur circa omnia, ea-
que

que etiam considerat nulla temporis differentia definita. At scientia definita, versatur circa ea, quæ certâ temporis differentia definita sunt.

XIV. Scientia definita, cum versatur circa futura, vocatur præscientia; eaque vel absoluta est vel conditionata. Præscientia absoluta dicitur, qua Deus res absolute & sine conditione futuras esse novit; eaque certa atque infallibilis est. Quod in rebus necessariis non est difficile creditur; at quomodo futura contingentia, præsertim illa, quæ consulta vocavimus, sive quæ pendent à causis liberè operantibus, possint infallibiliter præsciri, explicatu est admodum difficile. Nam quod potest non fieri, non potest certò atque infallibiliter præsciri: scientia enim præsupponit objectum suum; ac proinde præscientia, sive scientia futuræ rei, præsupponit objectum futurum esse; & præscientia infallibilis præsupponit rem præscitam infallibiliter futuram esse. Quod autem potest non fieri, non est infallibiliter futurum. Atqui futura contingentia possunt non fieri: ergo non videntur infallibiliter præsciri posse.

XV. Ista objectio Socino & ejus alicui fuit visa tam urgens, ut ausi fuerint, infallibilem Dei præscientiam in dubium vocare, vel etiam negare. Quod facinus alii imprudentiam, ego furorem appello. Quid enim? an prophetiæ & prædictiones divi-
næ,

næ, quæ post tot secula impletæ sunt, etiam in minutissimis circumstantiis suis, non probant evidenter infallibilem Dei præscientiam? an non demonstrant? at ex connexione rerum collegit Deus futurum esse quod prædixit. Quid, malum collegit? illa rerum connexio, an non contingens fuit? quæ ergo illam potuit certius præscire quàm ipsa contingentia? aut si etiam non præscivit certò, quæ potuit contingentia ex illâ tam certò prædicere? Deinde Deus nihil colligit, sed quicquid cognoscit, uno mentis intuitu cognoscit, ut ante diximus.

XVI. Cum igitur certum sit, Deum liberos suæ voluntatis actus præscire infallibiliter, videndum, quo fundamento infallibilitas divinæ scientiæ subnixa sit, & quomodo cum contingentia possit conciliari. Ad quam rem non sufficit, si dicas, scientiam Dei indefinitam esse, ac proinde se quoque ad futura contingentia extendere. Nam sicut potentia Dei, tametsi infinita sit, se non extendit ad contradictoria, quoniam ea fieri nequeunt: sic quoque fieri possit, ut scientia Dei se non extenderet ad futura contingentia, quoniam infallibiliter præsciri non possunt, quatenus sunt contingentia; nisi explicetur quo fundamento nitatur infallibilitas, & quomodo cum contingentia ac libertate possit consistere. Non etiam se expediunt, qui statuunt, futura contingentia, sive liberos voluntatis,

luntatis actus à Deo præcognosci in ipsa æternitate, quod in illa omnia sint quasi præsentia. nam primo non videtur vero consentaneum, quod dicunt, æternitatem esse perpetuum momentum semper consistens, semper præsens: nam etsi non habeat partium diversitatem in re quæ æterna dicitur; est tamen divisibilis, si conferatur cū tempore imaginario, & cum duratione rerum successivarum. Deinde, sit æternitas unum quoddam momentum, semper consistens, semper præsens, si illi omnia præsentia forent, sequeretur quoque omnia sibi invicem præsentia fore, ac proinde præterita & futura simul cum præsentibus fore. Denique, si demus omnia Deo præsentia esse in indivisibili momento æternitatis, in eâque infallibiliter à Deo cognosci, explicandum restat, quomodo hoc non tollat contingentiam. Nam sicuti unumquodque necessariò est, quando est, ita quoque necessariò futurum est, quando ita futurum est, ut jam præsens sit Deo in puncto æternitatis. Porro neque illi nodum solvunt, qui fingunt scientiam quandam conditionatam, quâ Deum ajunt naturaliter, & ante omne decretum cognoscere, quid, quâlibet re posita, sit secuturum: nam paulò post ostendimus, scientiam conditionatam non pertinere ad ea quæ contingenter connexa sunt.

XVII. Alii volunt, Deum præscire libera
volun-

voluntatis effecta, omnesque voluntatis actus, quia scit, qua ratione movebitur intellectus ab objectis propositis; nam quia voluntas determinatur à iudicio intellectus practici, eadem ratione prævidet, quo voluntas sit se inclinatura. Hoc modo & voluntati siue homini sua libertas integra est, & causa inventa videtur, qua scientiæ divinæ infallibilitas subnixa est. Alii tamen malunt, eam niti voluntate seu decreto Dei, ajuntque omnia, quæ in tempore fiunt, ab æterno decreta esse, & quæ decreta sunt ab æterno, certò futura: ac proinde Deum infallibiliter præcognoscere, quicquid futurum est, quia non potest ignorare, quod ipse decreverit. Si jam quæras, quomodo certò futurum sit quippiam ob id quod à Deo decretum sit, cum decretum sit actio immanens & æterna; responderi potest, quia in tempore exequitur, quicquid ab æterno decrevit: quomodo interim Deus non sit causa mali, cum tam mala quàm bona prævideat, & quomodo non tollat voluntatis libertatem ista executio, dicam in doctrina de concursu Dei cum causis secundis.

XVIII. Superest Dei Scientiâ conditionata, quam & Scientiam mediam vocant quidam, quod inter scientiam simplicis intelligentiæ & visionis media videatur intercedere. Est autem media siue conditionata Scientiâ, qua Deus novit, quid, qua-

libet

libet reposita, sit secuturum. Hæc scientia se solum extendit ad ea, quorum connexio & sequela est necessaria, non etiam ad ea quæ contingenter sunt connexa: Nam si, quod liberè futurum est, Deus non præscit, nisi in decreto suo aut alia causa necessaria; certè contingentes rerum nexus prævidere non potest, nisi in decreto aut alia causa necessaria. Atqui decreta Dei conditionata non sunt, & si maximè conditionata forent, authores hujus scientiæ faciunt eam priorem omni decreto; nec causam habent necessariam, siquidem contingenter sociata sunt cum antecedente. Deinde, si Scientia media omni decreto Dei sit prior, seseque ad nexus rerum non necessarios extendat, imprudentes videntur fatum & necessitatem stoicam introducere; qui illius authores sunt. Quid ergo, an Deus non cognoscit illa, quæ ex conditione præcedenti contingenter sequuntur? ita sanè, sed ea in se & decreto cognoscit, idque absolute, non in conditione præmissa.

CAP. IX.

De Voluntate & Potentia Dei.

THESIS I.

In intellectum sequitur Voluntas: cum enim in nobis voluntas reperiatur, ea-
que nullam imperfectionem formaliter inclu-

includat, sequitur ut ea Deo tribuenda sit. Imò scientia Dei maxima sui parte esset inutilis, si non haberet voluntatem sibi sociatam.

II. Objecta divinæ voluntatis sunt Deus & Creatura: Circa hæc objecta versatur Deus, in quantum sunt cognita. nam quod dicitur ignoti nulla cupido, id etiam in Deo locum habet; quanquam Deus nihil ignorare potest. Neque verò solum præcedit scientia voluntatem, sed eam quoque regit ac determinat, non effectivè, sed obiectivè; id est, scientia Dei non est causa volitionis, sed est ratio in objecto, ob quam Deus hoc potius velit, quàm aliud, aut velit potius quàm nolit.

III. Porro Scientia illa, quæ voluntatem præcedit, non est scientia visionis (hæc enim haud dubiè voluntatem sequitur: versatur enim circa res in aliquâ temporis differentiâ constitutas: atqui res ad nullam temporis differentiam determinari possunt sine voluntate Dei) sed scientia simplicis intelligentiæ. hæc enim scientia comprehendit omnia possibile, & ex iis ea voluntati proponit decernenda, quæ judicat ipsi Deo maximè esse consentanea.

IV. Ex quibus apparet, quæ scientia & quomodo dici queat causa rerum. Ac scientia quidem visionis nullo modo potest dici causa rerum: est enim rebus posterior vel factis, vel futuris; quia præsupponit vel res esse

esse factas, vel saltem futuras, tanquam objectum. Scientia simplicis intelligentiæ dici quidem potest causa rerum, sed mediante voluntate: nam quia voluntas Dei causa rerum est, etiam scientia Dei causa rerum dici potest, quia voluntatem determinat atque applicat ad ea objecta, quæ fieri Deo consentaneum est. Ac voluntas quidem sola causa non est ut res sint, sed tantummodò ut futuræ sint; posita enim causa poni debet effectum: At voluntas Dei æterna est: res autem à Deo factæ non sunt æternæ: ergò sola voluntas non est causa rerum factarum. Quomodo igitur Deus est causa rerum jam factarum? per voluntatem ut potentiam, sive per actiones potentiae, ut statim dicam.

V. Actiones voluntatis sunt velle & nolle, quarum negationes sunt non velle & non nolle. Itaque differunt etiam in Deo non velle & nolle; item velle & non nolle. velle circa bonum est, nolle circa malum. Cum velle & nolle Dei versantur circa res existentes, velle Dei est amare; & nolle, odisse: at cum versatur circa res faciendas, velle est decernere ut quid fiat, nolle, ut non fiat.

VI. Deus amat seipsum propter seipsum, quia scilicet se amat tanquam finem suum, non quidem tanquam finem intentionis, sed tanquam finem fruitionis; Deus enim gaudet & fruitur seipso sive perfectio-

ne sua: at creaturas amat Deus, quia, & quatenus gerunt imaginem suam. Itaque seipsum amat maximè, & creaturas tantò magis aut minùs, quantò propius aut minus propè accedunt ad illius similitudinē.

VII. Deus amat seipsum & creaturas suas quamdiu servant ipsius imaginem, necessario; idque non solum necessitate decreti, sed & necessitate quadam naturali. At cum creaturæ rationales (nam cæteræ non possunt) imaginem Dei peccando fœdant, justum Dei odium incurrunt. Quia autem imago Dei non potest penitus in creaturis aboleri, nunquam ita odit creaturas suas, ut eas non aliquo modo amet. Testatur enim salutem velle se, & vicem miserari, etiam earum, quas iusto suo iudicio atque odio damnare decrevit.

VIII. Atque ut istud melius intelligas, considera in creaturis rationalibus, & quod creaturæ Dei sint, in quibus aliquid adhuc imaginis divinæ relucet, & quod peccatrices sint. Creaturas ergo peccatrices odit, quatenus peccatrices sunt, easdemque amat quatenus creaturæ sunt. Odium illud se habet in Deo, ut in nobis se habet volitio, amor ut velleitas; nihilque aliud est, quàm naturalis affectus Dei, ergo creaturas rationales etiam damnandas, quo vellet illis non esse malè si per iustitiam fieri posset. De hoc affectu naturali loquitur scriptura haud dubiè, cum ait, Deum
velle

velle omnes homines salvos fieri, etiam illos qui perituri sunt; eodemque modo intelligenda sunt loca similia. Nam non possunt illa intelligi de volitione efficaci, siquidem illa semper effectum sortitur, omnesque salvi fiunt, quos Deus hac voluntate salvos esse vult. At affectus ille naturalis, si cum efficaci volitione conjunctus non est, effectum non sortitur.

IX. Theologi voluntatem efficacem & peremptoriam, vocant voluntatem decreti, aut beneplaciti: Velleitatem sive naturalem affectum appellant voluntatem signi. Quæ duo inter se consentiunt in iis, qui servantur: nam horum salutem Deus non solum naturali affectu veluti exoptat, sed & conferre decrevit. At in iis qui pereunt, diversa sunt: nam horum salutem naturali affectu Deus quidem expetit, sed non decrevit conferre, atque adeò eos punire, ut justitiæ suæ satisfiat. Nec tamen repugnant istæ voluntates inter se, siquidem aliud est objectum volitionis efficaciæ, sive decernentis, aliud affectus naturalis: nam volitio, sive voluntas decernens, spectat creaturam peccatricem, quatenus peccatrix est, idque habita ratione suæ justitiæ: at velleitas fertur in creaturam peccatricem quidem, sed non qua peccatricem, sed quatenus est creatura retinens aliquas divinæ imaginis reliquias.

X. Atque ita se habet Dei voluntas erga
N 2 se &

se & creaturas jam factas; at erga creaturas nondum factas, longè aliter se habet: has enim non vult necessariò, sed liberè & contingenter. Hæc voluntas nihil est aliud quàm decretum de rebus condendis & efficiendis. Quicquid autem Deus decrevit, ut aliquando fieret, potuit etiam non decrevisse. Atqui creaturæ media sunt quibus Deus finem suum assequitur; ergò sicut finem suum, id est, seipsum aut potius fruitionem sui ipsius necessariò vult, ita quoque necessariò debet velle media ad istum finem destinata. Resp. Creaturas quidem esse media, sed sine quibus finem suum potest assequi. Itaque creaturas tanquam media Deus adhibet, non ut per ea seipso fruatur perfectius, sed ut se ipsis communicet. Deinde quamvis necessarium sit ut Deus bonitatem suam communique, ideoque & creaturas condere decernat, non est tamen necessarium ut has aut illas decernat. Sed an hoc non exigit sapientia Dei? minimè, nam sapientia sua eligit ea, quæ meliora sunt, & ea quæ facit sunt meliora, quia ea elegit.

XI. Porro, in Deo nulla est voluntas conditionata. Ac proinde malè distinguitur voluntas in antecedentem & consequentem; si per voluntatem antecedentem intelligatur voluntas conditionata; per consequentem, voluntas absoluta. Ex. gr. Deus, ajunt, vult servare Petrum, si credat

credat filio suo: damnare, si non credat nulla habita ratione eventus: hæc est voluntas antecedens. Deinde ubi vidit Petrum crediturum, vult eum servare absolute, aut si videt non crediturum, damnare: hæc est voluntas consequens. Hæc Philosophia est indigna Dei sapientia. Quid enim indignius quam Deo tribuere, quod in nobis non habet locum nisi ob defectum prudentiæ? Quis enim nostrum aliquid velit sub conditione, si sit tam perspicax, ut prævidere possit, an conditio illa implebitur, an non? cur ergo hoc Deo adscribemus, quem scimus nihil ignorare.

XII. Deus voluntatem suam exerit per potentiam: volitio enim est actus immanens, quæ quidem sola causa esse queat, quod res futuræ sint, ut ante diximus, non quod actu existant, nisi accedat potentia, quâ operatur extra se. Potentia Dei infinita est, & reverà omnipotentia. nam cum Deus essentia & perfectione infinitus sit, oportet eum quoque omnipotentia præditum esse. Omnipotentia se ad omnia extendit, quæ non implicant contradictionem: nam quæ contradictionem implicant, entia non sunt. Non ergo dici possunt omnipotentiam negare, qui negant contradictoria à Deo fieri posse. Potentiam Deus exerit per actiones externas, quæ versantur circa res à se factas aut potius

C A P. X.

De Creatione & Conservatione.

T H E S I S I.

Actiones Dei externæ tres sunt, crea-
tio; conservatio, cooperatio seu
concurfus. Per creationem res à
Deo dependent quoad fieri, saltem si ma-
teriam respicias; per conservationem quo-
ad esse; & per concursum quoad opera-
tiones.

I I. Creatio est productio rei ex nihilo:
in qua definitione particula *ex nihilo*, duo
denotare potest. Primò creationem nullam
materiam præsupponere, ac proinde quod
creatur, aut immateriale esse & simplex,
aut materiam quoque vi creationis exor-
tam esse. Secundo rem creatam ante
creationem fuisse nihil: omnes qui admit-
tunt creationem, fatentur prius illud ad
creationem pertinere, in eoque distingui à
generatione, quæ materiam præsupponit.
An etiam requiratur alterum illud, ut res
creata fuerit aliquando nihil, quod vulgò
sic efferunt, an ad creationem requiratur
novitas essendi, postea quæremus: impræ-
sentiarum

sentiarum satis est, si intelligamus creationem esse actionem ejusmodi, qua res quidem aliqua fit, sed ex nulla prævia materia.

III. Hinc sequitur, si quid creatur, illud debere per se subsistere. Quicquid enim non subsistit per se, vel in materia subsistit, ut formæ; vel in subjecto, ut accidentia. Atqui formæ materiales & accidentia educuntur ex potentia materiæ, ac proinde materiam præsupponunt, non possunt ergo creari: si quid ergò creatur, debet per se subsistere: quicquid per se subsistit, est substantia vel corporea vel incorporea; nihil ergò creatur, si quid creatur, quàm substantia; formæ substantiales & accidentia non creantur, sed concreantur; fieri enim non potest, ut materia absque forma sit, aut finita substantia sine accidentibus.

IV. Atque hætenus nihil aliud ostendimus, quàm, si quid creatur, substantiam esse debere; restat ut ostendamus mundum hunc & quicquid in eo substantiarum est, à Deo reverà creatum esse, aut saltem ab illis provenisse, quæ creata sunt. Supra quidem ostendimus, Deum esse Ens, independens, & unicam rerum omnium causam efficientem: ex quibus sequitur, Deum esse Creatorem: quibus addamus has collectiones; totum universum finitum esse, ut Aristoteles ipse agnoscit l. 1. de Cælo c. 7. Ergo ab alio factum est: quod enim

finitum est, etiam certa ratione definitum est, secundum Quantitatem & qualitatem; solius infiniti nulla ratio est; quod autem certa ratione definitum est, ab aliquo definitum est, qui ratione est præditus: At à quo universum certâ ratione ita definitum fuerit, ut tale ac tantum sit, si non à Deo? Deinde, universum non est propter se, sed propter aliud; nam cum ratione careat, non potest frui propria felicitate: quod propter se non est sed propter aliud, id etiam est ab alio; mundus ergo est ab alio, ac proinde à Deo. Jam si mundus & universum sit à Deo, haud dubiè creatum est: quia non potest esse factum ex materia. Nam universum materiam omnem includit, nihilque præter universum est, ex quo potest esse factum.

V. Porrò in mundo tria sunt substantiarum genera, substantiæ elementarès, cœlum, & substantiæ immateriales. Substantiæ Elementares quotidie generantur alia ab aliis, nec potest perveniri ad aliquod individuum in eadem specie, quod non sit ab alio factum. Si quod daretur individuum non factum, non esset id ejusdem speciei cum reliquis; quia sicut corruptibile & incorruptibile, ita quoque generatum & ingeneratum toto genere differunt. Quare cum non detur progressus in infinitum in causarum efficientium subordinatione, veniendum est ad Ens aliquod, à quo omnes

nes substantiarum generabilium species factæ sunt, in alioquo primo individuo. Jam, prima illa singularum specierum individua, aut facta sunt ex nihilo, aut ex materia: si ex nihilo, creata sunt: si ex materia, aut illa quoque materia facta fuit, aut non fuit facta: si facta fuit, creata fuit, quia materia non potest ex materia fieri; si non fuit facta, fuit æterna; atqui pugnat cum materiæ indefinita ac imperfecta natura, ut sine formis sit nedum ut æterna esse possit. Cum constet Elementares substantias creatas esse, cur cælum non sit creatum? præsertim cum constet, non sui causa factum esse, sed propter bonum universi totius. Utrum dentur substantiæ immateriales, hoc loco non disquirimus: hoc tamen dicimus, si quæ sunt, eas creaturas esse: nam cum sint immateriales & simplices, non possunt aliter fieri, quam per creationem.

VI. Deus mundum condidit non ex necessitate naturæ, aut naturali emanatione, sed consultò & liberè. Etenim omnis causa necessaria agit quantum potest. Deus extra se agit, non quantum potest, sed quantum vult: nam cum illius virtus infinita sit, non minus quàm intelligentia, voluntas virtutem sive potentiam non potest exhaustire. Nam quantumcunque velit, plus tamen potest semper facere; deinde Deus creaturis non indiget; potest enim sine iis esse; imò & beatissimus esse. ergo

non fuit necessarium ut creaturas produceret. Quod non emanarit mundus à Deo, ostendi potest ex eo, primo quod non sit infinitus; secundo quia substantia Dei producto mundo non est diminuta; tertio quia causa emanativa non est causa productrix sed conservatrix.

VII. Mundum in tempore fuisse conditum à Deo, non solum ex sacris litteris manifestum est, sed etiam ex principiis philosophiæ multis argumentis ostendi potest. Ac primo colligi potest, mundum non esse ab æterno, ex eo quod potuit non fuisse conditus à Deo: non enim videtur quicquam æternum esse posse, quod potuit non esse. Si objicias, decreta Dei æterna esse, & tamen potuisse non esse; facilis est solutio. Decreta enim Dei, quatenus potuerunt non esse, non sunt res ab essentia diversæ, sed denominationes externæ, aut respectus essentiæ divinæ ad creaturas, sive res decretas. Sed non est necesse, dices, ut causa prior tempore sit effecto; in necessariis, fateor, id non est necesse, at in causis liberis omnino necessarium videtur. Secundo creatio est productio rei ex nihilo, ergo quod creatur non potest esse æternum: oportet enim nihil fuisse, antequam crearetur. Si respondeas, ex nihilo, nihil aliud denotare, quàm negationem subjecti sive materiæ, instabo, denotari etiam terminum à quo; ac proinde sicuti privatio, quæ est terminus à quo

à quo in generatione, tempore præcedit rem genitam: ita quoque oportet ut π nihil, siue nihil esse, præcedat rem creatam.

VIII. Præterea, si mundus ab æterno fuisset, & homines ab æterno fuissent, & bestię, & plantę, alioquin mundus infinito tempore fuisset inutilis; si homines, ut cætera omittam, fuissent ab æterno, vel fuissent facti alii ab aliis in infinitum, vel ab æterno, quidam homines fuissent non facti, à quibus in tempore reliqui homines sint procreati. At non datur progressus in infinitum, ut ante ostendimus. non fuerunt etiam homines ab æterno non facti, à quibus reliqui in tempore facti sint; tum, quia æternum & temporarium non est ejusdem speciei; tum, quia, quod ab æterno fuit, in æternum permanet. Ergo mundus aliquando cœpit.

IX. Pergamus ulterius, & ostendamus insuper, nec mundum nec quicquam potuisse creati ab æterno, adeoque novitatem essendi esse de essentia creationis, ut loquuntur: idque hoc modo: Omnis creatura potest destitui à Deo, imò nunquam non potest destitui: quare si creatura fuisset ab æterno, potuisset etiam ab æterno destitui: atqui hoc fieri non potest, quia sequeretur idem ab æterno fieri posse, & simul ab æterno corrumpi. Deinde si quid ab æterno crearetur, non distingueretur creatio à conservatione, possetque idem dici

simul creari & conservati. Hoc autem absurdum est, & contradictionem implicat: nam quod conservatur, est; quod creatur, non est, sed fit; imò quod jam est, creari aut omnino fieri nequit.

X. Ad Creationem requiritur infinita virtus: omni enim potentia passiva responderet aliqua potentia activa, quæ debet tanto esse major, quanto passiva potentia remotior est ab actu: ergo virtus illa debet esse infinita, quæ aliquid efficiat ex nulla prorsus potentia passiva. Quæ illatio subnixa est hoc fundamento, quod inter Ens & nihil sit infinita distantia: quæcunque enim habent finitam distantiam, ea habent aliquam rationem inter se: at Ens & nihil non habent aliquam rationem inter se: ergo distant infinitè. Objicit quidem Scotus, Ens infinitum longius distare à nihilo quàm Ens finitum: ac proinde creaturam, quæ finita est, non distare à nihilo infinitè. Verum ista objectio non est magni momenti: nam distantia inter Ens finitum & nihil non est infinita ex parte Entis, sed ex parte & nihil; at, quæ est inter Ens infinitum & nihil, utrimque infinita est. Si quem tamen objectio Scoti moveat, is rationem præcedentem sic instruere potest, ut vis consequentiæ non subnitatur infinità distantia inter Ens & nihil, sed hoc potius fundamento, nullam esse proportionem inter virtutem finitam & nihil: nam si tan-

to ma-

to major debet esse virtus agentis, quanto remotior est potentia passiva ab actu, ergo ubi potentia passiva sine ulla ratione recedit ab actu, ut fit in eo quod nihil est, ibi etiam virtus debet augeri sine ratione, ac proinde debet esse infinita. nam omnis virtus finita ad quamlibet virtutem finitam aliquam habet rationem.

XI. Creatio non est in Deo, sed in creaturis. Si enim in Deo foret, cum Deus in tempore creat, mutationem subiret haud dubie. Quare cum Deus creare aut creator dicitur, denominatio externa est. Non est autem in creatura ut accidens in subiecto, sed ut actio in termino ad quem. Sed cum omnis actio sit accidens, & creatio, quæ est actio Dei, non sit in creatura ut in subiecto, utique erit in Deo ut in subiecto? Resp. Non omnem actionem esse accidens aut subiectum postulare, sed eam solummodo quæ tendit ad terminum, qui per se subsistere non potest. Quare cum creationis terminus, sit res per se subsistens, subiectum non requirit, neque reverà accidens est, sed tantum nomine tenus. Sed actio est prior suo termino: Ergo creatio non est in creatura ut in termino. Resp. actionem esse priorem termino facto: termino in fieri non esse priorem, sed simul cum illo.

XII. Creatio non est res, aut modus ab essentia creaturæ distinctus, non relatio, sed

sed ipsa essentia creaturæ, prout est in fieri, sive ipsum creaturæ fieri. Interim vera quidem actio est, sed quæ absque mutatione aut passione consistit: mutatio enim omnis & passio præsupponunt subjectum, quod mutari aut pati dicitur; in creatione nullum subjectum est, sed nudum creaturæ fieri. Itaque cum vulgò creationem distinguunt in activam, quam Deo, & passivam, quam creaturæ tribuunt, abusiva aut saltem impropria locutio est. Nam τὸ fieri creaturæ, quatenus habitudinem notat ad potentiam Dei, à qua fit, vera quidem actio est, attamen quatenus spectatur in re, quæ fit, passio non est, sed tamen *κρησις* sic dicitur; quia ut τὸ fieri in subjecto mutato passio est; ita quoque τὸ fieri creaturæ quasi passio dicitur, quia ferè ita se habet ad creaturam, ut mutatio se habet ad terminum suum.

XIII. Atque hæc quidem de creatione: sequitur conservatio, quæ nihil est aliud quam rei productæ in existentia sua continuatio. Potest autem ista continuatio duobus modis explicari, nempe vel negativè, vel positivè: continuare rei existentiam negativè dicitur, qui eam non abolet, cum potest; positivè qui existentiam rei positiva quadam vi atque influxu, ut loquuntur, sustinet, atque impedit, ne abeat in nihilum. Non potest dubitari, quin primo saltem modo creaturæ conserventur à Deo:
nam

nam creaturæ possunt à Deo destrui, & tamen non destruuntur. Sed hæc admodum improprie, conservatio dicitur. nam istoc modo quilibet conservare diceretur omnes, quos potest occidere, & non occidit tamen. Ergo ostendendum est, mundum & omnia quæ ab eo facta sunt, etiam positivè ab ipso conservari, quod tamen non videtur ita facile factu: nam cum res esse suam semel ab alio accepit; illud usque retinebit, donec per contrariam actionem aboleatur: nihil enim seipsum destruere, aut se sua essentia aut existentia privare potest. Quare ut rei existentia continetur, non videtur necessarium, ut ab actuali alterius influxu pendeat, sed tantum ut à nulla causa destruat.

XIV. Ut tamen intelligatur, cur necesse sit creaturas omnes positiva quadam virtute à Deo conservari, statuendum est omnes creaturas essentialiter atque ex interna finitæ suæ naturæ necessitate à Deo dependere: atque dependentiam istam ita includi in earum essentia, ut sine ea concipi non possint: sunt enim Entia per participationem, ut postea dicitur. Hinc sequitur, ut quemadmodum nihil fieri aut esse possit sine essentia; ita etiam nihil subsistere possit sine actuali Dei influxu; ac positiva sui ab illo dependentia; si Deus influxum illum ac vim conservandi subtraheret, mundus confestim annihilaretur; non à seipso
(nam

(nam hoc fieri non potest) sed à Deo ipso : idque non alia actione, quam sola suæ virtutis subtractione, quæ in omni finita essentia includitur.

XV. Conservatio ista non est actio à creatione distincta, sed creatio quasi continuata: si enim essent distinctæ actiones, creatio primum cessaret, & conservatio deinde inciperet, vel, eodem illo momento quo creatio cessat, vel alio sequenti: non potest incipere eodem momento, quia cum creatio sit actio momentanea, res primo sui momento quo creatur, diceretur conservari, quo nihil potest dici absurdius: non potest etiam conservatio incipere sequenti momento, quia cum inter quælibet momenta duo, tempus intercedit, illo medio tempore res nec crearetur nec conservaretur. ergo creatio & conservatio non sunt actiones distinctæ: si neges creationem esse actionem momentaneam, quæram, cur, si creatio tempore aliquo durare possit, non possit tamen tamdiu durare, donec res interit. Differt tamen conservatio à creatione, quia creatio denotat novitatem sive initium essentiæ; Conservatio, essentiæ possessionem sive essentiam jam procreatam atque inchoatam. non potest ergo dici res in primo momento conservari, neque post primum momentum creari, sed tantum conservari.

CAP. XI.

*De Concurſu ſeu Cooperatione
DEI cum Creaturis.*

T H E S I S I.

PER concurſum Dei intelligitur actio, qua Deus immediatè influit in omnes actiones creaturarum: ita ut actiones iſtę dici poſſint non à creaturis ſolùm, ſed etiã à Deo immediate dependere; nam qui non aliter volunt Deum cum creaturis ad earum actiones concurrere, quàm quatenus eſſentiam earum & agendi poteſtatem conſervat, planè concurſum tollunt, aut eum cum conſervatione confundunt. Nos ergo, ne cum illis erremus, ſtatuímus, ſic concurrere cum creaturis, ut etiam proximum principium ſit operationum, quæ à creaturis eduntur, ut operationes creaturarum etiam cum ſiunt, à Deo actualiter dependeant.

II. Atque hoc ſic oſtendi poteſt. Res quælibet ita ſe habet in fieri, ut ſe habet in eſſe; quare ſi neceſſe ſit creaturas omnes à Deo dependere quoad eſſe, adedò ut iſta etiam dependentia in earum eſſentia includatur, neceſſe eſt etiam ut à Deo dependeant in fieri: atqui omnis res quæ fit, aliqua actione fit; imò actio nihil aliud eſt quàm

quàm fieri illius rei , quæ actione ista fit : Omnis ergò actio à Deo dependere debet; ac proinde creatura nihil agere poterit sine proximo & immediato concursu Dei; quare sicut Deus potest rem privare suo esse, sive destruere per solam negationem sive subtractionem virtutis conservatricis; ita potest rem privare sua operatione, sola negatione aut subtractione sui concursus sive virtutis cooperatricis.

III. Interim observandum est, causas secundas virtutem habere , non quidem quæ sufficiat per se sola ad producendum effectum, sed tantam tamen, ut majore in suo genere & causalitate non indigeat. Hinc sequitur, causas secundas rectè dici causas principales suorum effectorum, etiamsi in agendo à Deo cooperante immediate ac proximè dependeant. Dicuntur enim non absolutè principales, sed principales inter causas secundas : ad quam rem nihil aliud requiritur, quam ut habeant sufficientem virtutem ad producendum effectum sibi æquali propositione respondens. Quod si objicias, effectum illud in fieri dependere à Deo, respondeo, & virtutem illam causæ à Deo conservari; ac proinde pariter esse rationem utrobique, & in causa & in effecto, si rectè instituaturs comparatio. Nam effectum in se spectatum non excedit virtutem causæ suæ in se spectatæ; & spectatum, ut à Deo dependens
non

non excedit virtutem causæ suæ , si & illa spectetur , ut à Deo dependet. Etenim , duæ causæ principales non possunt simul immediate concurrere ad eundem effectum : si particulares ambæ sint , & non subordinatæ , fateor : at si altera sit universalis , altera particularis , aut una alteri quovis modo subordinata , ajo consistere posse.

IV. Concurfus Dei non recipitur in causis secundis per modum principii aut conditionis actionem earum præcedentis , sed per modum actionis. Qui enim concursum putant tribui per modum principii , non minus errant , quàm qui immediatum Dei concursum tollunt. quid enim interest , si ve dicas Deum non concurrere immediate cum creaturis ad earum actiones atque effecta , si ve statuas , virtutem aliquam in creaturis , quæ in ipsis sit principium actionum atque effectuum. Nam causa , quæ alteri dat virtutem ad agendum , si aliter non concurrat ad actionem ejus , reverà concurrit remotè & per accidens tantum ; denique creatura ideo non potest esse Principium suarum actionum , quia finita est ; atqui vis Dei causis secundis ad operandum communicata per modum principii , qualis aut quantacunque fingatur esse , finita est haud dubiè : non magis ergò poterit esse principium operationum , quàm ipsa finita essentia & virtus naturalis causarum secundarum : Præterea , posito concursu Dei , involvit

volvit contradictionem, si quis asserat, actionem aut effectum creaturæ non poni; at, posita quacunque re in causis secundis per modum principii, & non per modum actionis, non involvit contradictionem, si statuatur, actionem creaturæ non sequi. ergo necesse est Dei concursus esse actionem.

V. Sed an non potest concursus tribui per modum principii & per modum actionis simul? nullo modo: quorsum enim pertinebit virtus illa quæ datur creaturis per modum principii, an ut per illam virtutem operentur? atqui creaturæ, saltem eæ, quæ causæ principales sunt, habent virtutem in suo ordine atque causalitate sufficientem ad operandum & effectum producendum. Ergo virtus illa actionem principii more præcedens, supervacua est. Atque hæc quidem omnia intelligenda sunt de actionibus naturalibus: nam ad actiones supernaturales causæ secundæ non habent sufficientem virtutem; ideoque non solum necessarium est, ut Deus cum iis concurrat ad actiones istas per modum actionis, sed etiam per modum principii: verum. ista Theologis relinquimus.

VI. Concursus Dei & actio causæ secundæ est una tantum actio; quæ tamen tota pendet à Deo, & tota à causa secunda, non partim à Deo & partim à causa secunda: Si enim actio Dei concurrentis & actio crea-

creaturæ essent duæ diversæ actiones, actio creaturæ esset à solâ creaturâ immediatè, & non esset à Deo.

VII. Deus concurrit ad actiones creaturarum, sive causarum secundarum, ut causa prima & universalis, eique causæ secundæ subordinatæ sunt. Atque ob eam causam etsi Dei partes potiores, aut saltem non inferiores in actionibus creaturarum sint, quàm ipsarum Creaturarum: attamen istæ actiones earumque effecta non Deo, sed Creaturis imputanda sunt: non enim dici potest Deus ambulare cum homo ambulat, aut Deus urere, cum ignis urit; quamvis ad ambulandum aut urendum non minus conferat Deus quàm homo aut ignis: causa enim universalis indifferenter se habet eademque virtute concurrit ad omnes creaturarum actiones; ideoque specificatio actionum, non Deo, qui est causa universalis actionum naturalium (nam in supernaturalibus alia ratio est) sed ipsis creaturis adscribenda est. Itaque quod homo se moveat, certè Deo debetur (in illo enim movemur) sed quod motus iste sit ambulatio, homini tribuendum; ideoque non Deus, sed homo dicitur ambulare.

VIII. Hinc ratio quoque peti debet, cur Deus author peccatorum non sit, etiamsi ad eas actiones concurrat, quæ peccata sunt: nam cum sit causa universalis solummodò concurrit ad actionum substantiam,

tiam, quæ mala non est: Formalis enim ratio mali, quæ actioni accidit ob circumstantias, causis secundis imputanda est. Nec verum est, quod novatores quidam dicunt, actiones quasdam sua substantiâ malas & lege prohibitas esse, ut furari, adulterari, &c. nam ista vocabula non nudas actiones significant, sed actiones circumstantiis vestitas: nam furari verbi gr. motus quidam est, atque hætenus peccatum non est. Sed ad rem alienam & animo fraudandi, atque hinc malitia provenit. Sed an formalis ratio peccati non subest providentiæ divinæ? ita sane: licet enim illa creaturis imputanda sit, sit tamen illa Deo non auctore quidem aut effectore, sed permittente. Permittere dicitur Deus, non quod non vult impedire, sed quia vult non impedire.

IX. Concursus Dei accommodatus est ad naturam & agendi modum, quæ ratione naturæ creaturis sive causis secundis competit. Nam cum causis naturalibus sive necessariis ita concurrir, ut agant necessariò; cum voluntariis, ut agant liberè. quod quomodo fit in causis naturalibus ac necessariis, non est intellectu difficile; at quomodo voluntariæ causæ libertatem Dei concursus non tollat, id non ita facile explicatu est: nam si posito concursu voluntati non sit integrum non operari, aut aliud operari, certè voluntatis libertas periisse videtur & quoad exercitium actus,
& quoad

& quoad specificationem.

X. Nec audiendus est Suarez, qui ut tueatur libertatem voluntatis quoad exercitium actus, ait Deum sic concurrere, ut simpliciter & absolutè non velit voluntatem nostram operari, ex vi sui concursus, sed solum ex hypothesi, *si voluntas ipsa se ad agendum determinet*. Et ut tueatur libertatem quo ad specificationem, ait Deum causis liberis offerre concursum, qui sufficit ad omnes actiones, quæ isto tempore à voluntate possunt exerceri. Nam primum ista pugnant cum Dei sapientia, quæ à mutabili conditione non suspenditur. Deinde nequit intelligi, quæ sit ista sufficiens concursus oblatio, cum Dei concursus non differat ab actione creaturæ. Denique non potuit Deus effectus liberæ volûntatis ab æterno infallibiliter præscire, si Deus non voluit ab æterno, ut ex vi concursus sui creatura simpliciter & absolutè operetur. Nam quod dicit, Deum liberos voluntatis actus infallibiliter præscire, non per voluntatem concurrendi, sed per aliam voluntatis actionem, quam dicit in bonis præfinitionem, in malis permissionem appellari, non tollit difficultatem. Explicandum enim restat, quomodo ista præfinitio aut permissio consistere possit cum contingentia seu libertate voluntatis, si præscientiæ divinæ infallibilitas illis est subnixa. Videtur enim æquè contingentiam rerum futurarum tollere, atque

atque illa præcisa & absoluta voluntas ita concurrendi cum humana voluntate, ut ex illo concursu non possit non sequi actio. Ut omittam, explicari non posse, quid aliud ista præfinitio sit, quam decretum de omnibus rebus efficiendis. Quod cum Deus per creationem & concursum exequatur, nihil aliud esse potest, quam ipsa creandi, & cum creaturis concurrendi voluntas. Quæ quomodo cum libertate voluntatis consistere possit, & tamen causa esse queat, quod res infallibiliter futuræ sint, impræsentiarum quærimus.

XI. Nos nodum istum sic solvimus: Concursus Dei non tollit voluntariâ actionum contingentiam, quia non antecedit actionem causæ secundæ, imo nihil est aliud quam actio causæ secundæ, prout illa à Deo quoque est. Est quidem necessarium, ut posito concursu Dei, secunda causa operetur, verum ista necessitas est necessitas hypothetica, cum quâ contingentia consistit. nam prorsus sicut necessarium est, ut res quælibet sit quando est, quamvis sit contingens, ita quoque necessarium est, ut humana voluntas operetur, cum Deus cum illa concurrat, licet operetur contingenter.

XII. Ut ista plenius intelligas, observa, voluntatem nostram à Deo non determinari ad operandum, si propriè loqui velis; actio enim determinantis, & actio illius quod determinatur, duæ diversæ actiones

nes sunt, quarum una alteram antecedit, & antecedens causa est alterius, ut patet exemplo voluntatis determinatæ ab intellectu: At concursus Dei & actio creaturæ non sunt diversæ actiones, nedum ut altera sit causa alterius; si tamen concursus Dei dicatur esse prior actione causæ secundæ, id non ad causalitatem, sed ad nobilitatem, universalitatem, & independentiam referendum est. Atque hæc ita se habent in actionibus naturalibus: nam ad actiones supernaturales voluntas nostra verè determinatur à Deo, quia ad eas Deus concurrit non solum per modum actionis, sed etiam per modum principii: itaque cum voluntas nostra aut quælibet alia causa secunda dicitur à Deo excitari, applicari, atque adeò etiam determinari ad agendum, id non de ipso concursu intelligendum est, quæ est actio transiens, sed de voluntate concurrendi.

XIII. Si causa secunda non determinetur à concursu causæ primæ, multò minus putandum est, concursum Dei determinari à causis secundis. Nam actio causæ secundæ non solum non est prior actione causæ primæ, (quod tamen erat necessarium ad determinandum illius concursum) sed virtus illius imbecillior est, & à primæ causæ virtute dependet. Ex quo certè patet, non determinari concursum causæ primæ à causis secundis ad operandum. Quod etiam

non determinetur à causis secundis, quoad specificationem actionis, siquidem determinandi vox sumatur propriè, iisdem rationibus colligi potest. Nam quod obijcias, in conferendo concursu Deum sequi naturam & conditionem causarum secundarum, talemque semper concursum præbere, qualem illæ exigunt, nihil est. Hinc enim non sequitur, concursum Dei à causis secundis determinari, sed hoc tantum sequitur, naturam & modum operandi in causis secundis esse rationem objectivam, quæ talem concursum requirat, qualem Deus tribuit, sed pro arbitrato suo, siue quia ita decrevit. Nam quemadmodum Deus ab æterno certas res decrevit, certo tempore producere certa naturæ conditione & agendi potestate præditas; ita quoque decrevit ab æterno cum iisdem rebus ad operandum sic concurrere, ut natura singularum postulat.

CAP. XII.

De Substantia Creatâ.

THESIS I.

Actum est de Deo, sequitur Creatura; qua voce intelligimus substantiam a Deo factam ex nihilo. Nam
accidentia

accidentia non creantur per se propriè, sed sequuntur substantias creatas tanquam additamenta & complementa quædam. Res enim ita se habent in fieri, ut se habent cum jam factæ sunt. Arqui accidentia facta, sunt in substantia, ab eaque tota sua entitate dependent: Ergo etiam cum fiunt, ac proinde non creantur; ac ne generantur quidem propriè; sed solummodò concreantur, ut ita dicam, aut congenerantur.

II. Antequam creatura esset facta, erat in se revera nihil: erat enim in potentia objectiva: sed Ens in potentia objectivâ, quatenus est in potentia objectiva, ita distinguitur ab eo quod actu est, ut Nihil ab Ente distinguitur. Quando ergò creatura à Deo fit, existentia non additur essentiæ, sed utraque simul producitur: sola enim ratione differunt. Si objicias, essentiâ iis rebus tribui, quæ adhuc sunt in potentia objectiva, atque adeo Entia ea dici, saltem quatenus vox illa sumitur ut nomen, imo eodem modo & significatu Entia dici, quo ea quæ jam existunt, ac proinde non esse nihil: si hoc, inquam, objicias, negabo consequentiam; nam cum ens dicitur de iis, quæ non existunt actu, propositio ista sententiam habet hypotheticam, nihilque aliud significat, quam ista Entia fore, si existerent, aut cum existent: similique modo Essentia illis ex hypothesi tribuitur.

III. Et si autem Existentia creaturæ ab

Essentia non differat realiter, non includitur tamen in ratione aut definitione Essentia. Hæc ergò propositio, *creatura est*, non est Essentialis aut vera per se, sed accidentalis. at Existencia est de essentia Dei: ideoque cum dicitur, *Deus est*, propositio ista est in primo modo ἡ κατ' αὐτὸν.

IV. Creatura includit essentialiter dependentiam à Deo, sive, quod eodem redit, dependentia à Deo est de essentia creaturæ. Idque non solum quando & quamdiu est in fieri, sed etiam quando facta est.

V. Hinc sequitur, creaturam esse Ens contingens, & primi Entis sive Dei imperio atque arbitrio subiectum: itaque sicut à Deo ex nihilo producitur, & non esset, si ab illo non produceretur; ita sublata virtute Dei conservatrice, continuò in nihilum relaberetur. Cum enim hæc dependentia sit de essentia creaturæ, & in tota essentia intimè includatur, subtrahi non potest à creatura, nisi tota illius essentia sublata.

VI. Hinc porro sequitur, creaturam essentia, virtute, & perfectione finitam esse: ac proinde cum perfecta dicitur, non absolute perfectam intelligi, sed in suo tantum genere; nam quod absolute atque infinite perfectum est, non tantum alterius auxilium non requirit, sed nec admittit; pugnant enim ista vel maxime, in finitum esse, & alterius virtute atque auxilio subsistere.

VII. Fini-

VII. Finitam Essentiam creaturæ sequitur modus finitæ præsentiaæ seu Ubietatis. Omnis ergo creatura requirit finitum ac definitum locum. neque magis fieri potest, ut creatura sit ubique, quam ut sit infinita essentia ac perfectione; ita ut qui creaturam ajunt esse ubique, cogantur confiteri, etiam eam essentiâ esse infinitam. Præsentia enim seu ubietas non differt ab essentia reipsa, sed ratione solummodò: nihil enim aliud addit essentiaæ rei locatæ, quam respectum ad locum in quo est. ergò res dicitur esse infinita, quæ ubique est, seu quæ est in loco infinito.

VIII. Creatura non solum non potest esse ubique, sed etiam non potest esse in pluribus locis simul: nam ut se habet infinita localitas ad rem finitam; ita se habent localitates diversæ & à se invicem divisæ, ad rem unam atque eandem. Ut ergo finita res nequit esse ubique, & si statuatur esse ubique, statuitur id, ex quo sequitur, eam esse infinitam; ita res una nequit esse in diversis locis, aut si statuatur esse in diversis locis, id statuitur, ex quo sequitur rem unam diversas esse res.

IX. Finitam essentiam creaturæ, sequitur etiam finita duratio: omnis enim creatura facta est aliquando, nullaque facta est vel fieri potuit ab æterno: quod enim ab æterno est, Ens necessarium est, & quod necessarium est, infinitum est. omne enim

finitum ab infinito aboleri potest: at quod necessarium est, nequit aboleri; ergò, quod necessarium est, non finitum, sed infinitum est. Non tamen hinc sequitur, omnem creaturam abolitum iri aliquando, aut desituram; non enim necesse est, ut quod finitum est essentia, aliquando esse desinat; nam licet necesse sit, ut quod ab æterno fuit, in æternum durare debeat; non est tamen necesse, ut quod aliquando cœpit, aliquando esse desinat: Æternitas enim à priori parte actu infinita est, ideoque finitæ essentiæ repugnat: at à parte posteriore infinita est potestate solummodò, quod non pugnat cum finita essentia creaturæ.

X. Ut Creatura se habet in esse, ita se habet in operari: quare ut in esse suo dependet à Deo, ita etiam ab eo pendet in operari: ac proinde sicut Creaturæ in nihilum abirent repentè, cessante virtute Dei conservatrice, ita cessarent ab omni operatione, si cessaret virtus Dei cooperatrix, seu, si Deus cum Creaturis ad agendum non concurreret, positis aliquin omnibus ad agendum prærequisitis.

XI. Creatura appetit suum esse, & esse sui perpetuitatem. Appetitus is innatus, non elicitus est. Perpetuitas alia speciei, alia individui est; atque utrique quidem natura studet: sed quia species perfectior est uno aliquo individuo sub se contento, prius videtur natura ferri ad speciei quàm ad

ad individui perpetuitatem, eoque sensu dixit Aristoteles, Generationem, quâ species conservatur, esse naturalissimum opus viventis: Certè multò naturalius est quam nutritio, quâ conservatur individuum. atque hæc quidem ita se habent, si spectetur appetitus innatus: at si appetitum elicitum spectes, videtur is prius ferri in conservationem individui quam speciei.

XII. Naturalis iste creaturarum appetitus subinde impeditur quoad actum secundum ab appetitu elicitō, ut patet in iis, qui sibi aut liberis suis mortem consciscunt, nunquam tamen tollitur quoad actum primum.

XIII. Nulla creatura appetit suum aut suæ speciei esse propter se, sed propter aliquem finem, extra se: nam ut creatura non potest esse primum vel suiipsius vel alterius rei principium, quia ab Ente primo sive Deo essentialiter dependet; ita nequit esse ultimus, vel sui ipsius vel alterius rei finis, quia non est infinitæ perfectionis. Ultimus enim finis debet appetitum terminare & explere, ac proinde debet esse infinitus. nam cum natura cupiditatis infinita sit, à nulla re finita expleri potest.

XIV. Omnis creatura habet aliquam cum Deo similitudinem: aliæ tamen propius ad Deum accedunt, aliæ longius ab eo absunt, prout aliæ aliis perfectiores aut imperfectiores sunt. In hac diversitate sunt

quinque creaturarum gradus, esse, subsistere per se, vivere, sentire, intelligere; quorum posterior priorem includit, aut aliquid analogum, sed non vice versa: esse convenit accidentibus, & nil præterea; esse & per se subsistere, substantiis; esse, subsistere per se, & vivere, plantis; hæc omnia atque insuper sentire, bestiis; homini & angelis seu substantiis incorporeis omnes gradus conveniunt, esse, per se subsistere, vivere, sentire, intelligere; sed tamen aliter homini, aliter substantiis incorporeis: Itaque creatura intelligens, homo & angelus, similior est Deo, ideoque nobilior & perfectior bestiis, bestiæ plantis, plantæ substantiis inanimatis, substantiæ accidentibus.

XV. In hac rerum serie perfectiora sunt finis imperfectiorum, aut saltem imperfectiora ad perfectiora referuntur. Itaque accidentia sunt propter substantias; substantiæ inanimæ propter animatas; plantæ propter animalia; bestiæ propter homines; homines & angeli propter Deum, à quo sunt omnia & in quem omnia redeunt.

CAP. XIII.

De Angelorum existentia & naturâ.

T H E S I S I.

Substantia creata dividitur in corpus & Spiritum. Corpora sensibilibus indiciis satis seprodunt, ut laborandum non sit de probanda eorum existentia: quid autem corpora sint & quæ iis accidant, Physicis expendendum relinquimus. Spiritus appellatione intelligimus substantiam incorpoream atque immaterialem; eaque locutio impropria est. Nam spiritus propriè corpus est adeò subtile, ut quia omnes sensus fallit, corpus esse non videatur: ob eamque causam immateriales substantiæ spiritus dicuntur per metaphoram. Philosophi tamen veteres intelligentias seu mentes abstractas vocant.

II. Spiritus, vel est Angelus vel anima. Angelus est spiritus in se & in suo genere perfectus: ideoque ineptus qui corpori sic societur, ut cum illo unum per se constituere possit. Ejusmodi substantias Angelorum voce explicat scriptura, quia sunt nuntii & ministri, seu λειτουργοὶ πνεύματος & Θεῶν. Anima est spiritus, qui tamen per se possit subsistere, imperfectus & incommu-

tus tamen est in suo genere, ideoque aptus & ordinatus ut corpori adjungatur, & cum eo constituat unum per se nempe hominem.

III. Tria sunt quæ de Angelis quæri possunt. primò an sint; secundò quæ sit eorum natura; tertio quæ proprietates & actiones. Esse Angelos nequit demonstrari ex motu cœlesti, ut factum est ab Aristotele, quia non constat an cœlum moveatur ab Angelis, imò multò probabilius est, cœlum ab Angelis non moveri, sed vel à se ipso moveri ut animalia, vel à Deo, vel quod penè certum esse dūco, à sua forma atque insita virtute, ut gravia & levia moventur motu recto. Ergo esse Angelos colligendum est potius ex eo, quod in natura sint effecta quædam, quæ nullis possint causis physicis adscribi, quorum ingens etiam multitudo in historiis prophanis commemoratur. Quare spiritus seu Angeli concedendi sunt, qui authores sint istorum effectorum, ni velimus quotidie ad miraculum confugere: quanquam quædam talia sunt, ut miraculo non possit esse locus; nempe quæ rationem habent peccati, ut præstigia, maleficia, tentationes, & id genus alia. idem etiam colligitur ex ordine & perfectione universi, quod spiritus requirere videtur: nam certum est naturam esse corpoream; certum est etiam naturam esse mediam, quæ partim est corporea, partim incorporea; atque

que ita necesse esse videtur, ut etiam natura quædam sit prorsus incorporea.

IV. Natura Angelorum, quod erat secundum caput, est incorporea & immaterialis, ut diximus ante. Atque hoc patet ex operationibus, quæ tales sunt ut à corporea natura proficisci nequeant. Deinde; corpus nequit à corpore penetrari, nec corpus aliud penetrare, ideoque corpus corpori obstat, ejusque motum impedit, aut retardat; at Angelis non obstant corpora, neque motum eorum retardant. nam æquè facile atque citò transeunt per corpus densissimum, quam per tenue ac fluidum. Præterea, cum corpus transit per aliud, necesse est ut alterutrum vel utrumque dividatur; at Angeli transeunt per corpora, nec tamen ea dividunt; ergo vel corporei non sunt, vel dividi debent. Quod si dividantur, corruptibiles sunt, quod nemo, puto, concessurus est. Denique si Angeli sint corporei, vel ita sunt corporei ut Elementa aliæque res inanimæ, quæ sunt corpora, vel ita ut anima humana, quæ quidem non est corpus, sed requirit corpus. Si prius statuas, quæram qualia sint corpora, & à quo moveantur; nam corpus nequit à se moveri quaquaversum, nisi constet multiplici partium organicarum diversitate, ut non dicam, quod tamen urgentissimum est, nullum corpus merum posse esse præditum intelligentia: si alterum eligas, eadem diffi-

cultate te premam, & itorum cogeris fate-
ri, angelos esse res imperfectas.

V. Neque verò pugnat cum angelorum
natura, materia carere, atque esse incorpo-
reum; neque quia substantia est, neque
quia finita est, aut creata. Non quia sub-
stantia, quia etiam Deus substantia est &
immaterialis: neque quia creata, quia ani-
ma humana est immaterialis, ut suo loco
dicemus, & per se à corpore separata subsi-
stere potest: non ergo per se subsistere re-
pugnat in corporeæ & immateriali naturæ.
Quidam, ut vim horum argumentorum
eluderent, commenti sunt nescio quas sub-
stantias materiales quidē & corporeas, sed
tamen indivisibiles, quas ajunt à physicis
corporibus non dividi aut impediri, sed in-
offensas per ea & sine difficultate transire;
quo nihil dici potest futilius: nam quanti-
tas materiam necessariò sequitur, ergo
quicquid materiam habet, divisibile est. De-
inde, materia illa aut continua est & solida,
hoc est, plena sui; aut discreta vel divisa, seu
rara. Si prius concedas, sequetur si ea mo-
veatur per corpora, aut eam divisum iri à
corporibus, aut divisuram corpora, aut da-
tum iri penetrationem dimensionum. Si
ipsa dividatur, corruptibilis est; si dividat
corpora, jam ab iis resistantiam patitur; ut
omittam experiētiā constare, corpora non
dividi cum per ea transeunt spiritus. Pene-
tratio substantiarum non ideo impossibilis
est,

est, quia substantiæ illæ corpora sunt, sed quia quanta sunt, & quantitate sua locum replent & occupant. Si dicas, materiam angelorum esse divisam ac raram, ut sponsia aut vapor, singulæ partes constare debent figura, atque insuper sequetur eam corruptibilem esse.

VI. Cum angelos incorporeos dicimus, cavendum, ne illud intelligamus *ἄκωσ* seu positivè, quasi affirmatè diceremus, eos esse puncta aut instar punctorum. Nam puncta sunt extrema linearum, lineæ superficierum, & superficies corporum, ideoque in ea incommoda incideremus, si angelos ut puncta consideremus, quæ iis ante opposuimus, qui angelos corpora esse ajunt. Ea ergo vox *incorporea* negative debet concipi, non ut simpliciter aliquid de angelis negetur, sed ut hac negationis formula aliquid exprimatúr, indirectè ac confusè, quod aliter à nobis exprimi ac concipi nequit.

CAP. XIV.

De Angelorum attributis.

T H E S I S I.

Tertius locus de Angelis continebat attributa, qua voce proprietates intelliguntur

guntur ac operationes. Prima proprietas est *esse in loco*, aut potius modus quo sunt in loco. nam esse in loco omni Enti competit aut per se; aut per aliud. nam quod in loco non est, nusquam est; & quod nusquam est, omnino non est. Porro modus localitatis sequitur. essentiam rerum: itaque sicuti corpora tota essentia differunt à rebus incorporeis; ita quoque res incorporeæ longè aliter in loco sunt, quam corporeæ; nam corpora sua quantitate locum tenent & implent, suisque terminis & extremis loco possunt adæquari; at Angeli nec quantitatem nec extrema habent; ideoque non sunt in loco ut corpora.

II. Non sunt etiam Angeli in loco ut puncta; nam puncta non sunt in loco per se, nec lineæ, nec superficies, sed in loco esse dicuntur, quia sunt corporum extremitates, quæ per se in loco sunt: at Angeli per se in loco sunt, quia per se subsistunt: non sunt etiam in loco per solas operationes, quia operatio præsupponit existentiam, ac proinde necesse est, ut, quod alicubi operatur, alicubi existat: non igitur sunt in loco per applicationem virtutis seu per operationem in certo loco. Quid? quod angelus non semper operetur, itaque si sit in loco per operationem, non erit in loco cum non operatur. quid ergò? estne Angelus ubique? nam nihil aliud videtur superesse: nullo modo; quod enim est ubique, essentia & per se.

perfectiōne est infinitum, ut ante diximus. nihil ergo videtur superesse, quā ut dicamus, Angelos quidem esse in loco divisibili, sed modo tamen indivisibili: modus ille in eo consistit, quod essentia Angeli non commensuretur divisibili loco, nec partes Angeli respondeant partibus loci, sed totus toti loco, & totus singulis partibus.

III. Plures Angeli possunt esse in eodem loco: nam quod plura corpora nequeant esse in eodem loco, in causa est quantitas, qua corpora suo loco ita commensurantur, ut singula locum sibi æqualem impleant, & alia quælibet corpora ex eo loco excludant; quare, cum Angeli quantitate destituantur, ideoque locum non impleant aut occupent, nil vetat aut corpus & Angelum, aut plures Angelos simul in eodem loco morari. Cave tamen hinc concludas, unum Angelum esse posse in pluribus locis simul, iisque à se invicem distitis: si enim unus & idem Angelus esset in diversis locis simul, non esset unus & idem; & si posset esse in pluribus locis simul, posset esse in omnibus simul, & per consequens infinitus esset.

IV. Angelorum duratio, ut omnium aliarum creaturarum, à priori parte finita est, quia finita est essentia: at à posteriori infinita est; si enim finiretur, aut id corruptione fieret, aut annihilatione; corruptio non cadit in Angelos, ut mox dicam, & quamvis à Deo annihilari possint, non ta-

men

men est credibile eos annihilatum iri : pugnare enim cum Dei sapientia videtur aliquid creare, quod postea destructurus est.

V. Angeli non sunt omnino simplices: licet enim non constent materia & forma, non etiam partibus integrantibus, ut *corpora*, ex subiecto & accidentibus; est tamen in Angelis compositio ex genere & differentia, ex essentia & existentia. Compositio ex essentia & existentia omnibus creaturis convenit, ut ante diximus, ergo & Angelis. Compositio ex genere & differentia ex eo colligitur, quod substantia dicatur *συσσύνθετος*, de corpore & spiritu: si enim non diceretur, *synonymus*, vel corpus esset causa spiritus, vel spiritus corporis. Compositio ex subiecto & accidente non videtur colligi posse ex intellectu, voluntate, aut potentia Angelorum, (hæc enim non videntur reipsa discrepare ab eorum substantia) sed ex actionibus immanentibus, ut sunt intelligere, velle & ex habitibus qui ex iis actionibus proveniunt, ut postea dicetur.

VI. Angeli partim immutabiles sunt, partim mutabiles: mutatio enim vel spectat substantiam, vel quantitatem, vel qualitatem, vel Ubi: mutatio quæ spectat substantiam, est vel generatio vel corruptio; quæ quantitatem, est vel accretio vel diminutio; quæ qualitatem, vocatur alteratio, eaque versatur vel inter qualitates contrarias, vel inter eas quæ contrarium non habent;

habent; mutatio ad Ubi, latio dicitur, seu motus localis: quod ad generationem & corruptionem attinet, ea nequit in Angelis habere locum, quia sunt simplices substantiæ; non accretio aut diminutio, quia sunt expertes quantitatis; non etiam illa alteratio quæ versatur inter qualitates contrarias, quia ea via est ad interitum; quod attinet ad eam quæ versatur inter qualitates non contrarias, illa in Angelis locum habet haud dubie; nam etiam mutantur quoad internos actus & habitus inde provenientes, ut cap. sequenti ostendemus.

VII. Angelos localiter moveri, ex operationibus apparte; modò enim hic operantur, modò illic, idque in locis admodum diffitis: itaque cum operatio rei operantis requirat præsentiam, necesse est angelos nunc hic esse, nunc alibi, quod sine motu locali fieri nequit; atque hæc quidem ita manifesta sunt, ut in S. litteris præsupponi videantur.

VIII. Et si autem Angeli cum moventur, desinunt esse alicubi, & esse alicubi incipiant; non tamen medio corporeo commensurantur, per quod moventur; non enim per medium moventur, ut corpus, sed ut spatium est; neque enim aliter se habent ad corpora, per quæ transeunt cum moventur, quàm si moverentur per vacuum; atqui in vacuo nulla potest cogitari commensuratio, nequidem si corpus moveretur in

tur in vacuo, ergo multò minus angeli cum per ea transeunt, possunt corporibus commensurari.

IX. Hinc sequitur, Angelos moveri celerimè; nam quod corpora æquè gravia, æqualia, & eadem figura prædita, moveantur, alia celerius, alia tardius, inde est, quod medium interdum magis, interdum minus resistit, & quo minus resistit medium, eo quoque celerius moveri corpora necesse est. ergò Angelos, quibus medium nullo modo resistit, celerimè moveri oportet. Nec tamen hinc concludas, angelos motum iri in momento, quia cum motus sit divisibilis, in momento fieri nequit. Aristoteles tamen, dicat aliquis, collegit l. 4. Phys. si quid in vacuo movetur, id motum iri in momento, ac proinde, quia nihil potest moveri in momento, nihil posse etiam moveri in vacuo: fateor quidem, Aristotelem sic collegisse, sed quæritur quam rectè: Reperti enim sunt, quibus ea collectio displiceret, & rectè: non enim videtur esse verum quod Aristoteles præsupponit, omnem moram corporalis motus esse à resistance medi; est enim aliqua moræ portio, exigua quidem ea, sed aliqua tamen à terminorum distantia: ac proinde opus est aliqua mora, etiam ubi medium mobili non resistit. Hinc sequitur, non omnino eandem esse rationem motus ad motum quoad tarditatem, quæ est medi ad medium quoad
resisten-

resistentiam, qua tamen proportionē Aristotelis collectio subnixa est. atque hæc de Angelorum proprietatibus.

CAP. XV.

De Angelorum actionibus.

THESIS I.

Actiones Angelorum vel sunt immanentes vel transeuntes. Actiones immanentes vel sunt intellectus vel appetitus; non enim dubium est, quin angeli intelligant: nam cum intelligere sit summus & perfectissimus vitæ gradus, oportet angelos, qui perfectissimi sunt inter creaturas, intelligendi potestate esse præditos, præsertim cum videas homines ea præditos, qui tamen angelis longè sunt inferiores, si spectes conditionem & præstantiam utriusque: jam si Angeli intelligunt, appetunt quoque, siquidem intellectus & cognitio non sine appetitu est.

II. Duo autem potissimum explicanda sunt, quæ Angelorum intellectum & cognitionem spectant: quomodo Angelus intelligat, & quid intelligat: ac primò observandum est, quædam Angelos naturaliter cognoscere, quædam per revelationem: quod ad naturalem cognitionem attinet, ante

ante omnia statuendum est, Angelos nihil intelligere per essentiam. Phrasis enim illa, *per essentiam intelligere*, vel significat, essentiam suam intuendo intelligere, vel intellectionem esse essentiam: at Angelus neutro modo potest dici per essentiam intelligere; utrumque enim Deo proprium est, & ut in se omnia videat, & ut ea cognitio nihil aliud sit quàm ejus essentia. Non autem intelligunt omnia angeli in essentia sua, quia omnium rerum perfectiones non continent eo modo in essentia sua, quo effecta continentur in causis suis non est etiam intellectio ipsa angelorum essentia, quia multa intelligunt quæ antea ignorabant, absque essentiæ suæ mutatione.

III. Intelligunt ergo Angeli per species, quicquid intelligunt. Cum enim intellectus quippiam intelligit, de potentia mutatur in actum: quare cum res ipsæ non sunt in Angelorum mente quas intelligunt, nec possit mens mutari à re extra se positâ, aliud quid intercedere oportet, quo mediante intellectus ab objecto immutetur, quid aliud intercedere poterit quam species? istæ species non sunt Angelis à Deo in creatione inditæ (sequeretur enim, Angelum iam nihil intelligere, quod non intellexit antea ab initio; imo sequeretur Angelum semper intelligere) sed ab ipsis objectis angelorum intellectui imprimuntur, non

non quidem immediatè, sed mediante aliqua facultate, quæ habet rationem eam ad intellectum angelorum, quam habet Phantasia aut sensus internus ad intellectum nostrum; atque hoc modo cognoscunt ea quæ naturæ ordinem non excedunt; cum quid intelligunt eorum, quæ naturæ limites excedunt, id habent ex immediata Dei revelatione.

IV. Porro Angeli non solum apprehendunt res objectas, easque simplici notione intuentur & intelligunt, sed etiam componunt & dividunt, colligunt & ratiocinantur: nam & unum ex multis eligunt, & ex creaturarum notitia progrediuntur ad cognitionem Dei, quod sine ratiocinatione fieri nequit.

V. Angeli cognoscunt naturaliter, ut iam de objecto dicam, omnia quæ naturaliter ab homine possunt cognosci: nequit enim fieri, ut anima humana plura percipiat, quam illæ ab omni materia separatæ mentes: homo autem intelligit & quæcunque incurrunt in sensus, & quæcunque ex sensibilibus argumentis colliguntur; eadem ergo & angeli cognoscunt, sed ratione & modo longè perfectiori: in naturâ enim sciunt, quid agere possit unumquodque, & quid pati possit, quod etiam sagacissimos mortales fugit: in hoc genere Boni Angeli non utuntur conjecturis, ideoque neque errant; at mali angeli & utuntur

conjecturis, & errant ipsi sæpè, & illuduntur, & miseris mortalibus sæpè illudunt. Non solum autem videntur angeli perfectiori modo, sed & plura cognoscere quàm homo: nam etiam omnium rerum essentias cognoscunt, quas intellectus humanus non assequitur: etsi enim essentiæ sensibilibus notis se prodant, homo tamen ex iis colligere nequit, quæ sit essentiæ ratio in rebus singulis.

VI. Quæ nullis sensibilibus argumentis se produnt; ea nequeunt ab angelis cognosci naturali modo: hinc sequitur, Angelos non esse *αγγέλοις* id est, non cognoscere cogitationes & decreta aut hominum, aut aliorum angelorum, multo minus ipsius Dei. Dæmones seu mali angeli, admodum sagaciter quidem conjectant hominum cogitationes & consilia, idque ex signis antecedentibus & consequentibus, ex animi corporisque qualitate, ex phantasmatibus objectis, nihil tamen certi de cogitationibus possunt statuere, ni eæ se prodant actionibus aliisque sensibilibus indiciis: iudicia enim mentis non necessariò sequuntur phantasmata objecta; sæpè enim fit, ut quibus eadem phantasmata objecta sunt, non iudicent tamen eodem modo de iisdem rebus. Angelos Bonos conjectura uti non est probabile, sed suspendere iudicium in iis rebus, in quibus argumentum non est necessariò cum rebus
cogno-

cognoscendis conjunctum.

VII. Hinc porro sequitur, Angelos etiam non cognoscere futura, quæ pendent à liberæ voluntatis vel divinæ vel humanæ determinatione; nam quia voluntas sequatur intellectus judicium, qui poterunt certò & infallibiliter prævidere, quo se voluntas sit inclinatura, si prævidere non possint, imo nequidem videre intellectus humani cogitationes? & si nequeant humanæ voluntatis actus præscire, multò minus certè ea, quæ à liberæ voluntatis determinatione dependent.

VIII. Quod ad cognitionem Dei attinet, quam angeli naturaliter assequuntur, eam scholastici distinguunt in matutinam & vespertinam: Matutinam vocant, qua Deum ejusque essentiam cognoscunt, & omnia in Deo, ut in speculo, intuentur; Vespertinam, qua res creatas omnes & se ipsos intuentur, indeque cognitionem Dei colligunt. Hæc distinctio inter alias absurditates, hoc habet incommodi, quod statuat ipsam Dei essentiam ab angelis cognosci. atqui antea ostendimus, Essentiam Dei à nullo finito intellectu posse comprehendì, imò ne apprehendi quidem. Deinde, qui ea distinctione utuntur, ajunt angelos semper occupatos esse in cognitione matutina, nulla ergò est cognitio vespertina; fieri enim nequit ut Deum cernant in seipso & simul in creaturis: alterum enim fit directè,

rectè, alterum indirectè & reflexo intuitu: matutina ergo ea in Angelis cognitio, merum est figmentum, multo magis in animabus beatorum, qui vita sunt defuncti.

IX. Atque hæc de naturali Angelorum cognitione. addamus aliquid de cognitione Revelata; ea duo capita complectitur: Deus enim angelis vel consilia sua & decreta revelat, vel cogitationes hominum, & quæ ex iis secutura sunt. Consilia sua Angelis revelare Deum, patet ex eo, quod eos mittat & mandet: frustra sanè, si Dei consilia naturaliter cognoscerent. Cogitationes revelare, colligitur ex eo, quod intelligant, an homines Deum simulatè, an ex animo precentur, ut liquet ex c. 10. Dan. quo loco dicitur missus ad Danielem Angelus, qui noverat eum ex animo precatum esse Deum: atqui ante ostensum est, angelis hominum cogitationes non esse perspektas naturaliter, ergò ex revelatione.

X. Atque hæc de cognitione Angelorum: sequitur voluntas seu appetitus, qui intellectum, ut ante diximus, sequitur, atque eum quidem, qui Practicus appellatur; nam quia distinctio inter Theoreticum & Practicum intellectum non in ipso intellectu, sed in objectis constituta est, aut potius in ipsa intellectione; nulla causa est, cur Angelis non possit tribui. Voluntas angelorum ab intellectu Practico determinatur, & ut velit potius quàm non velit, aut quàm

quam nolit, & ut hoc potius velit, quam aliud: hinc sequitur, non aliam esse rationem angelicæ voluntatis ad suum objectum, quam humanæ ad suum. Errant ergò Scholastici; cum ajunt, voluntatem Angelorum adhærere suo objecto immobiliter, atque hinc petunt causam, cur Angelus semel lapsus non potuerit redimi. Etenim si intellectus Angelicus non adhæret objecto immutabiliter, ergo nec voluntas qui intellectum necessariò sequitur; atqui intellectus angelicus non adhæret objecto suo immobiliter; quomodo enim labi potuit angelus, si intellectus immobiliter objecto adhæreret? an diceretur angelus esse lapsus, quia in prima electione erravit? at sic non est lapsus; labitur enim qui stat, non qui nunquam stetit. ergò Angelus objecto suo adhæsit, antequam peccaret, estque lapsus, quia ab objecto recessit: in epistola Judæ expressè dicitur, angelos originem suam non servasse, suumque domicilium reliquisse, quod sine voluntatis mutatione fieri nequit.

XI. Cum Angelis tribuuntur affectus, ira, odium, gaudium, lætitia; &c. non significant idem univocè, quod significant cum tribuuntur homini, sed tantum analogicè: nam in hominibus, animi motus sunt affectus, quatenus habent communionem cum corpore: ira enim non nuda quædam vindictæ cupiditas est, sed etiam

fervor sanguinis circa cor: atque ita de cæteris affectibus judicandum est. At in angelis affectus sunt nudi motus voluntatis, sed vehementiores; sic odisse dicuntur, quando cum vehementia averfantur quod judicant esse malum.

XII. Atque hæc de immanentibus seu elicitis actionibus angelorum: sequuntur imperatæ & externæ, quibus actiones intellectus & voluntatis internæ sese produnt; quo in genere primo se offert communicatio, quæ est actio, quâ conceptus mentis & voluntatis decreta sibi invicem aperiunt. Bestiæ quidem affectus suos inarticulata & incognita voce produnt, sed ea tamen actio communicatio dici nequit: homines autem conceptus beneficio sermonis invicem interpretantur, & animi decreta communicant, quod iis aded est naturale, ut etiam muti signis quibusdam conceptus suos aperiant, & signorum vim intelligant: homo enim natura sua est animal sociale, at hac communicatione sublata, societas humana everteretur, non potuit ergo homo hac communicatione privari; ex quo colligitur, cum inter angelos quoque societas quædam sit, non quidem sermonem, sed aliquid sermoni analogum iistribuendum esse, quo cogitationes suas seu animi motus aliis exponant: nam quod Scholastici dicunt, sola eos voluntate cogitationes suas aliis patefacere, falsum est: si enim

enim nequeunt cogitationes aut decreta voluntatis humanæ, nisi ex effectis & signis colligere, non poterunt etiam cognoscere voluntatem aliorum angelorum, si nullo se effectu aut signo manifestent: ex quo sequitur Angelos non posse sola voluntate conceptus suos & voluntatis decreta patefacere, sed oportere ut aliquid intercedat, quod ita se habeat ad intellectum eorum, ut se habet sermo ad intellectum nostrum, quod quale sit, percipere non possumus, quia Angeli non sumus.

XIII. In operationibus Angelorum spectanda est potentia & executio; nam quia non agunt ex necessitate naturæ, sed libero voluntatis suæ arbitrato, plura possunt facere, quam reverà faciunt: potentia eorum est sanè in maxima, non tamen infinita: finitæ enim essentiae vis infinita tribui nequit. Non igitur omnia possunt facere Angeli quæ non implicant contradictionem: hoc enim soli Deo proprium est: quæ ut melius intelligantur observa, omni potentiae activæ respondere aliquam potentiam vel objectivam, vel obedientialem, vel passivam. Potentia ea cui responder potentia objectiva, veluti qua aliquid fit ex nihilo, vel cui responder potentia obedientialis, veluti qua excitantur mortui, est infinita, solique Deo propria; at cui responder potentia passiva seu naturalis, quæ potest in actum deduci, Angelis competit;

hæc enim finita est, naturæque limites non excedit.

XIV. Habent ergò Angeli omnes causas Physicas, atque adeò totam naturam, Deo permittente, in sua potestate, ita ut possint naturæ impetum retardare, retundere, impedire, promovere, impellere: sic credibile est Deum Angelorum opera usum fuisse, cum ignis vim retinuit, ne socii Danielis urerentur: cum leonum ora obturaret, ne Daniele devorarent: cum solem sisteret, vel etiam retraheret: cum terræ motus, fulmina, tonitru, procellas concitaret in monte Sinai ad conciliandam latæ legi authoritatem: ordo enim naturæ videtur postulare, ut quæ à causis secundis fieri possunt, ea Deus per eas exequatur; id autem immediatè tantum faciat, quod non est in ulla potestate Physica, sed tantum in potentia objectiva aut obedientiali, ad ea enim requiritur vis infinita. Cæterum bonorum Angelorum opera utitur cum illustranda est ejus gloria, cum puniendi hostes Ecclesiæ, cum vindicanda est authoritas à contemptu: at in piis castigandis & exercendis utitur operâ cacodæmonum, ut patet ex historia Jobi.

XV. Potentia Angelorum etsi magna est, non tamen se extendit ad judicium intellectus humani, aut ad voluntatis actiones: possunt quidem oculis objicere σκοτί-
μῶν queis prohibent videre quòd tamen
ante

ante oculos est: possunt etiam oculis obijcere larvas, vel menti phantasmata, ut existimet se videre, quod non videt: tandem possunt humores commovere, & objectis phantasmatibus provocare cogitationes; ipsas cogitationes formare nequeunt; hoc enim solius Dei est; is enim solus ita potest agere in animam nostram, ut necessariò assentiamur sine renisu, atque adeò ut ne quidem reniti possimus.

XVI. Atque hæc quidem omnia exequuntur Angeli per motum localem, applicantes activa admodum scitè suis passivis: nihil enim ipsi per se generare immediate possunt, aut corrumpere, nihil augere aut diminuire, nihil quoque alterare Physicè, sed tantum movere corpora localiter, eaque sic sociare, ut ex convenienti conjunctione corporum activorum & passivorum, oriuntur actiones eæ, quas ab iis proficisci diximus.

XVII. In Angelis haud dubiè est aliqua diversitas aut inæqualitas (in sacris literis enim Angeli & Archangeli nominantur, item Seraphin, Cherubin, *θέρων, χερουβιμ, δερζαί, ἰερασία, δυνάμεις*) qualis tamen ea sit aut quanta, puto temerè admodum à Judæis definitum esse, & à Dionysio Pseudo-Areopagita & ab ejus interprete: tanta tamen esse non videtur, ut Angeli inter se specie discrepant: singulos à singulis differre specie apertè falsum est: nam

qui volunt ea omnia quæ extra materiam sunt, si specie convenient, etiam numero unum esse, errorem errant sanè periculosum; sequeretur enim ex eo animas quoque omnium hominum, unam esse numero animam; neque est quod dicas, ideo esse multas animas, quia respiciunt diversa corpora; nam respectus diversitas nequit efficere, ut quod unum est substantia sua absoluta, non sit unum numero, cum ad res diversas refertur.

CAP. XVI.

De Anima humana separata.

THESIS I.

DE anima separata, quatenus id à Metaphysico fieri debet, disputaturi, ante omnia præsupponimus, eam esse substantiam separabilem, id est, talem, quæ per se ac sine corpore subsistere potest; in quo distinguitur ab animabus brutorum & plantarum, quæ, quia è potestate materiæ educuntur, haud magis queunt sine corpore subsistere, quam simitas sine naso. Hanc animæ humanæ prærogativam Aristoteles aliquo saltem modo videtur agnovisse, cum l. 2. de gen. anim. cap. 3. dicit, τὸν ἄνθρωπον θύραθεν ἐπιστέναι: cum l. 3. de anima § 19.

.19. sic dicit, καὶ ἔτι, ὁ νῦν scilicet ἐνεργη-
 τὴς, χωρὶς τοῦ σώματος, καὶ ἀμικτῶς, καὶ ἀπυθνῶς, & pau-
 ὀ post addit, καὶ τὸ μόνον ἀθάνατον καὶ
 εἶδον: quanquam quid Aristoteli sit νῦν
 ἐνεργητὴς, non ita perspicuum est; sed quic-
 quid sit de ejus sententia, quod anima ra-
 tionalis à corpore separata & scorsim exi-
 stere possit probari solet à Physicis ex ejus
 actionibus; cujus enim rei actiones non
 pendent à corpore, id ipsum non pendet à
 corpore; ut enim se habent operationes rei
 ad materiam, ita se etiam habet existentia:
 at animæ operationes, puta intelligere &
 velle, non pendent à corpore, seu non exer-
 centur per corpus, ut visus, auditus &c.
 ergo animæ substantia est immaterialis, ac
 proinde extra corpus potest existere.

II. Hoc constituto, declarandum por-
 rò, quæ sit natura animæ separatae, quæ
 proprietates, quæ actiones, & quæ diver-
 sitas, quæ tamen obscura sunt ob id, quod
 animarum separatarum nulla sentiamus ef-
 fecta: interim ex iis quæ de Angelis dixi,
 quæque in Physicis docentur de actionibus
 animæ in corpore, quodammodo colligo
 conditionem & statum animarum separa-
 tarum. Primò ergo statuimus, animam
 rationalem esse partem humanæ essentiae,
 non totum hominem, ut Plato voluit; cor-
 pus enim ad essentiam hominis pertinet
 haud dubiè; alias enim cum anima separa-
 tur à corpore, non potest dici homo mori

aut interire: homo igitur non est anima in corpore habitans, aut corpore utens, sed substantia ex animâ & corpore conflata.

III. Habet autem se anima ad corpus, ut forma ad materiam: sed cum duo celebrentur genera formarum in Philosophia Peripatetica, Assistentes & informantes, utri eam generi adscribemus, an assistentibus? at eæ nihil aliud conferunt rebus quibus assistunt, quàm motum, nec alio modo se ad eas habent, quàm quo se habet nauta ad navem, aut dæmon se habet ad hominem insecsum: at anima non solum motus, sed etiam essentiæ humanæ principium est, nec ita est in corpore, ut nauta in navi, aut dæmon in homine, sed modo longè alio: nam nauta non est in tota navi; at anima humana est in toto corpore; nam si non sit in toto corpore, erit aut in parte ejus, aut erit in corpore more puncti: non est in corpore more puncti; quia quod ita in corpore aliquo est, non per se est, sed per aliud; imò per corpus in corpore est, siquidem punctum lineæ, linea superficiiei, superficies corporis alicujus extremitas est: si autem in aliqua parte est, cur nequit esse in toto corpore? an, quia substantia immaterialis & quantitatis expers nequit esse in corpore quantitate prædito? at si hæc ratio obtinet, anima ne quidem erit in parte, siquidem etiam pars unaquæque quanta est; ergò anima est in toto corpore; ac proinde non

de non ita est in corpore, ut nauta in navi, sed nec ut dæmon in homine infesso, quia, plures dæmones eundem hominem insidere possunt vel successivè vel etiam simul: at plures animæ rationales nequeunt esse in eodem corpore neque simul neque successivè; anima ergo non est in corpore ut dæmon in homine, ac proinde non est forma assistens.

I V. An ergò erit forma informans? sed nec hoc videtur concedendum; siquidem formæ informantes totæ consistunt in informando, seu earum esse nihil est aliud quam informare materiam, ob eamque causam inseparabilis est à materiâ. Nil ergò superesse videtur, quàm ut dicamus animas esse mediæ conditionis inter informantes & assistentes formas, & utrarumque naturam participare: nam quatenus per se subsistit in corpore, sanè assistens est; nam formæ quæ solummodo sunt informantes formæ solum per se non subsistunt; quatenus autem sic corpori unitur, ut non solum motum corpori impertiatur, sed etiam essentiam humanam largiatur homini forma certè informans est, præsertim cum eo modo non nisi una anima possit esse in uno corpore.

V. Hinc sequitur, animam humanam cum est à corpore separata, substantiam imperfectam esse: omnis enim pars est imperfecta quædam res, non in ratione

partis, sed essentia: destinata enim est perficiendo toti; hinc porro sequitur, animam separatam *ἄσιν* tamen suam & inclinationem ad corpus retinere, ac proinde perfecta beatitudine frui non posse ante diem resurrectionis, quo die dimidio suo reddenda est. Hinc concludere possis, non quidem mathematica necessitate, sed aliquā tamen Philosophicā probabilitate, animam aliquando suo corpori redditum iri; quo autem modo id fiet, ne divinari quidem posset ex Philosophiæ fundamentis.

VI. His ita expositis, facile colligere est, quæ sit essentia animæ separatæ, quæ proprietates, si ea memoria repetas, quæ dicta sunt à nobis de Angelis. primò enim patet Animam separatam substantiam esse incorpoream, omnis materiæ & quantitatis expertem, æquè atque angelos: nam quod in corpore & per corpus diffusum est, id haud dubiè est immateriale, & expertis quantitatis; daretur enim dimensionum penetratio: nec quicquam refert, qualia corpora animas humanas esseingas, aut quā prædita materia; omnis enim materia atque adeo omne corpus molem habet & quantitatem, eoque nomine spatium implet, nec patitur aliud corpus in eodem spatio consistere: nequit ergò anima in corpore esse, si prædita sit quantitate.

VII. Cum ergò in hoc animæ sint similes Angelis, sequitur, omnia etiam attributa,

buta, quæ Angelis tribuimus, eis quoque esse tribuenda: non sunt ergò neque ubique, neque adèd ubique esse possunt, quia finitæ sunt; neque in pluribus simul locis, quia sunt unæ; neque in loco sunt ut puncta, neque circumscriptivè ut corpora, neque per operationem, sed modo quodam naturæ suæ conveniente; non fuerunt etiam ab æterno, quia hoc nulli rei convenit quàm infinitæ: quia tamen non sunt absolutæ & perfectæ substantiæ ut Angeli, non ab initio simul omnes creatæ sunt, sed quotidie creantur, cum corpora parata id postulant, ut verum sit tritum id, Deum animas creando corporibus indere, & indendo creare: non enim satis est consentaneum, ut quicquam creetur à Deo eo tempore, quo perfectionem suam non adipiscitur. Non repugnat animæ humanæ conditioni, dices, post mortem existere sine corpore, ergo nec ante formatum corpus: verum nulla in eâ illatione necessitas sequelæ: nam quod anima à corpore separetur & sine corpore existat, idque ad diem iudicii extremi, non est ex necessitate naturæ, sed ex culpâ humani generis: mors enim peccati stipendium est.

VIII. Præterea, anima quoad substantiam simplex est, nec ex partibus composita, interim compositio ex subiecto & occidente non repugnat ejus naturæ; nec ex genere & differentia; nec ex essentia & exi-

stentia : hinc sequitur, quod etiam quoad substantiam sit immutabilis , ita ut nec generetur, nec corrumpatur, nec incrementum capiat aut decrementum; alteratur quidem quoad internos actus & habitus, non quoad qualitates physicas, in quibus est contrarietas; motus localis tribuitur iis haud dubiè, & quando moventur, reuera mutant locum, attamen sine resistentia aut commensuratione , quod enim quantum non est, nequit rei quantæ commensurari, nec corpori resistit, nec ab eo resistentiam patitur, quia resistentia est à quantitate, cum enim quantum movetur per medium quod quantum est, necesse est medium dividi, & quanquam aliud alio dividatur facilius, nullum tamen dividi potest sine renisu: est quidem animæ motus pernix admodum, sed tamen quia motus est, momentaneus esse non potest.

IX. Atque hæc de proprietatibus animæ separatæ à corpore: de operationibus dici possunt pauca ex Philosophia, siquidem nullis se sensibilibus indiciis produnt; quare nihil hic restat, quàm ut ostendamus, non esse ea absurda, nec animæ naturæ repugnantia, quæ S. Scriptura tradit de animarum intellectu & volitione. Primum dum ex sacris litteris manifestum est, animas separatas intelligere; & quid ni? cum enim intelligant in corpore, idque sine ope corporis, nec pugnet intelligere cum natura

tura incorporea, cur non intelligent cum sunt à corpore separatæ? an quia oportet intelligentem speculari phantasmata? at hoc necessarium est, quamdiu intellectus est in corpore; at cum est extra corpus, id necessarium non est, quia tùm omnia ea objecta, & plura fortè, animæ patent per se, quæ ei in corpore versanti objiciuntur per phantasmata.

X. Sed cum intellectus nihil intelligat per essentiam suam, sed omnia per species ut angeli, quomodo imprimuntur ex species separato intellectui? an immediatè? at Angelis facultatem tribuimus sensui analogam, cur eam quoque non tribuimus animæ separatæ? & quæ erit ea facultas in anima separatâ, quæ ante non fuit in corpore? Equidem fateor, difficile esse hunc nodum explicare, conemur tamen: facultas ea Angelorum, quam diximus esse sensui analogam, non re sed ratione distincta est ab intellectu; simile quoque in animâ concipiendum est, scilicet, intellectum duplicis facultatis munere fungi, apprehendere sensibilia objecta, & ex iis notiones formare rerum non sensibilibus, idque & in corpore & extra corpus, sed hoc discrimine, quod in corpore objectorum sensibilibus species accipit à phantasmatibus, extra corpus immediatè ab ipsis objectis sensibilibus.

XI. Ut autem animæ humanæ conditio
longè

longè inferior est Angelis, ita quoque facultas intelligendi in ea minor; ut & ad pauciora se extendat, quæque intelligit, imperfectiori modo intelligat quàm angeli: intelligit tamen omnia quæ potuit intelligere in hac vitâ, ut Deum, creaturas, & perfectiori, credo, modo, quàm intellexit in hac vita: Dei tamen essentiam non intuetur, quia ne ea quidem Angelis patet; ac proinde non intuetur omnia, quæ fuerunt, fiunt, aut unquam futura sunt, in essentia Dei ut in speculò: itaque speculum id Trinitatis, de quo Scholastici, merum commentum est ac somnium: ignorat præterea humanas cogitationes, & voluntatis propositum, & quæ inde dependent, ac proinde & preces, siquidem preces non sunt preces, quæ ore, sed quæ animo concipiuntur.

XII. Credile est etiam, aliquam memoriam superesse in anima separata rerum ante cognitarum, eaque memoria consistit in speciebus animæ impressis: non enim puto omnes species aboleri in morte hominis, non certè illas, quæ non pendent ab actuali influxu phantasmatum, ut sunt species rerum immaterialium & similia: harum enim specierum ope recordatur etiam rerum sensibilibum: at nulla nobis recordatio superest in animi deliquio, & memoriam violentior morbus perdit, quâ ergò anima separata meminit? quia in hoc corporis

poris statu oportet animam speciebus insignitam moveri à phantasmatibus ad intelligendum; at cum à corpore separata est, movetur ab ipsis objectis.

XIII. Porro non est dubium quin longè imperfectior sit animæ separatae cognitio, cum primum ex corpore migrat, quam erit post ultimum iudicium reddita jam corpori suo: tùm enim erit aut beatissima aut miserrima: at beatitudo & miseria hominis in cognitione consistit, aut certè sine cognitione non est; qui enim bonum aliquod possidet, tanto suavius perfectiusque eò fruitur, quanto illud cognoscit distinctius; quique malo quopiam affligitur & bono caret, eò miserior est, quo perfectius intelligit quanto malo affligatur, aut bono careat suâ culpâ; cum ergò summa sit futura beatitudo proborum, & extrema miseria improborum, eaque in anima potissimum, oportet sanè distinctam esse cognitionem earum rerum in utrisque, in quarum frui-tione felicitas, & carentiâ miseria consistit.

XIV. Intellectum voluntas sequitur, etiam in anima separata: nam nequit intellectus practicus sine voluntate concipi, atque insuper beatitudo & miseria haud dubiè ad voluntatem quoque pertinent: nam quomodo quis felix dici possit aut miser sine voluntate aut appetitu, ergo & affectus animæ conveniunt, sed quales Angelis; amant enim piæ animæ Deum, &
odere

odere quicquid Dei gloriæ obstat, amant etiam se invicem haud dubiè, & oderunt dæmones & animas impias; nec dubium etiam est, quin latentur piæ animæ, & contristantur impiæ.

XV. Ad felicitatem animarum videtur pertinere communicatio, saltem post resurrectionem & judicium universale peractum: an etiam ea locum habeat ante resurrectionem, non est ita manifestum. Puta tamen id probabilius esse: quid enim? an nulla animarum inter se societas? nulla consensio in celebrando Deo ante resurrectionem? & si consensio intercedit societatis, etiam communicatione opus est. Quæ & quanta sit animarum potentia, & quid agant, prorsus obscurum est.

XVI. Unum ergò hoc superest, animas omnes inter se convenire specie: si enim una sit species humani generis, eaque infima, etiam animæ debent esse unius speciei: interim inter se numero distinguuntur, haud minus quam Petrus, Paulus. nam quæ queat esse forma omnium hominum quod ipsum est unum numero: distinctio enim numerica corporum à formâ est, siquidem una eademque materia potest esse in pluribus individuis, non quidem simul, sed successivè: non ergo una forma esse potest rerum numero discrepantium: nec satis est si dicas, unam animam diversâ relatione spectare diversa corpora,

pora, ab eâque relationum diversitate, pendere diversitatem hominum in eadem specie: nam respectus iste forma non est, sed accidens aliquod, aut minus adhuc quam accidens; Deinde, nequit anima diversa corpora respicere, ita ut forma respicit materiam, si ipsa una sit, eademque numero; tandem intelligi nequit, qui una anima sit in tam multis simul corporibus, si infinita non sit: & si in corporibus diversis animæ non differrent, etiam non differrent separatæ.

CAP. XVII.

De Accidente.

THESIS I.

HActenus de substantiis: sequuntur accidentia, qua voce generatim intelliguntur omnia, quæcumque substantiis attribuuntur, nec tamen in earum essentia aut definitione continentur; hoc enim notat vocabulum *accidere*, in Philosophia: hoc sensu multa sanè accidentia sunt, quæ in numero Entium non sunt, ut privationes, relationes, denominationes externæ, & id genus alia, de quibus actum est lib. I. hoc sensu etiam substantiales formæ accidentia dici possunt, non formatæ rei,

rei, sed materiæ; non enim de materiæ primæ essentia est, sed de essentia corporis; imo substantia integra accidens substantiæ integræ dici potest hoc sensu: ut si dicas scamnum esse ligneum, circulum æneum, aut simile; non enim de essentia scamni est esse ligneum, aut de essentia circuli, esse æneum.

II. Hoc loco accidens notat certum genus Entis, quod substantiæ inhæret, ut in subjecto: in subjecto esse dico, ait Aristoteles lib. de Categor. c. 2. *ὅ ἐν τίνι, μὴ ὡς μέρος ὑπαίχον, ἀδύνατον χωρὶς εἶναι τῷ ἐν ᾧ ἐστὶ*, id est, *quod cum in aliquo sit, non ut pars, nequit tamen seorsim ab eo existere in quo est.* In hac definitione tria recensentur: primò ut insit in aliquo: nam quod nulli inest, nequit esse in subjecto: secundo ut non insit ut pars, id est, ut non pertineat ad essentiam aut integritatem ejus cui inest: tertio ut separatim ab eo, cui inest, nequeat existere, id est, ut ejus esse sit inesse.

III. An dentur Entia, quæ à substantia differunt reipsa, iisque ita, ut dictum est, insint, inter veteres controversum fuit, atque hodiè iterum in controversiam adducitur. Democritus certè & qui secundum ejus sectæ principia philosophantur, accidentia omnia videntur tollere, omniaque figuris, situi, ac motui Atomorum, aut alioquin corpusculorum immutabilium adscribunt. Ego quidem certum habeo,
 plurima

plurima eorum quæ pro accidentibus habentur, à subjecti sui essentia non discrepare, aut, si discrepent non esse reverà Entia, ac proinde non esse accidentia eo sensu, quo nunc de accidentibus loquimur: at verò, ut omnia prorsus tollenda accidentia putem, nondum adduci possum ut credam: itaque primò ostendam dari quædam Entia accidentalia; deinde explicabo quæ sint Entia accidentalia & quæ non sint; actandem docebo, in quo sita sit accidentium eorum natura & essentia.

IV. Dari Accidentia verè proprièque dicta, ostenditur ex alteratione; alteratio enim motus est ad qualitatem, quare si datur alteratio, oportet & qualitates dari. Responderi potest, alterationem non esse ortum qualitatis, sed appulsam & rejectionem corporum qualitate præditorum; cum enim manus calefit ab igne, haud dubiè calidus spiritus ab igne manum subit; sic aqua calefacta non alium ob causam bullit, quàm quod fervidus spiritus per eam transiens, partes obstantes sursum propellat, quæ rursus exeunte spiritu, sua gravitate subsidunt: simili modo omnem alterationem interpretantur, sed perperam: nam quis motus localis fingi potest, cum anima humana habitibus imbuitur? spirituum forsàn. At habitus ii in anima sunt, ibique permanent, spiritus verò corpora sunt animæ expertia, eaque valdè evanida. Quod
ad

ad calefactionem attinet, non dubito quin corpora calefacientia calidam substantiam emittant; sed nec perpetuum id est, nec si esset perpetuum, vim nostræ demonstrationis eluderet: non est perpetuum, quia sol omnia hæc inferiora calefacit, nullum tamen emittit corpus; nam si corpus emitteret indefinenter tot seculorum periodis, solem consumptum esse oportuisset. fingamus tamen semper emitti corpus, quæro porro, quæ corpora non calida possint dici calefieri, cum ad ea appellunt ea calida corpora, si in iis non oriatur nova qualitas?

V. Secundò, si non dentur qualitates, sequitur Entia non posse in se invicem mutari: nam cum omnia inter se contraria sint, oportet, qualitates contrarias aboleri prius, & similes induci, quam possit fieri transmutatio. Quid enim? cum aqua est frigida, quæ poterit in aërem mutari, si non fiat calida? quomodo in ignem, si non siccescat? si concedas calefieri & siccescere, jam concedis qualitates: si dicas calefieri quidem, sed admissio calido corpore, reponam, eo modo non transmutari aquam, imò ne disponi quidem ad transmutationem, quod tamen experientia compertum est. Ex. gr. sponsia admissa aquâ, manet tamen sua substantia sicca; atqui simili modo aquam non calefieri dicunt, qui calorem & omnes qualitates corpora esse volunt.

Iunt. Tertio qualitates non poterunt intendi & remitti.

VI. Sed an omnia quæ qualitatuum appellatione vulgò veniunt, vera accidentia sive Entia accidentalia sint, & an non alia dentur accidentia quàm qualitates, porrò inquirendum est. Atque ut à posteriori quæstione ordiar, cum vulgò novem recensentur accidentium genera, nulla tamen ex iis vera accidentia sunt, aut Entia accidentalia, quàm qualitates; percurramus singula, & res erit manifesta. Quantitas, ut inde ordiar, dividitur in continuam & discretam: continua sunt, magnitudo & tempus: discreta nihil aliud est quam numerus: magnitudo non nisi ratione distinguitur à substantia corporea, ad eamque ita se habet ut veritas ad Ens; ut ergò veritas non est accidens Entis, ita quoque magnitudo non est accidens corporis; si enim quantitas esset accidens corporis, corpus extensum foret non vi suæ substantiæ, sed vi & causalitate quantitatis; at hoc falsum est; nam si extenderetur corpus vi quantitatis, sublata quantitatis causalitate, corpus ne foret quidem; sicut corpus non est calidum sublata causalitate caloris; at sublata causalitate quantitatis, corpus nihilominus foret quantum, quia si corporis quantitas esset accidens corporis, corpus quantitatem præsupponeret; quantitas enim non recipitur in eo quod quantum non

non est.

VII. Simili modo contra numerum argumentabor: nam cum numerus nihil aliud sit quàm unitatū collectio, nil erit accidentalis Entitatis in toto numero, si nil sit in singulis unitatibus; at nil est in singulis unitatibus; nam unitas Enti tribuitur quā Ens est, at Enti quā Ens est, non potest tribui accidens. Præterea, si Unitas sit accidens, erit in subiecto, eoque vel uno vel non uno; nequit dici unitas esse in subiecto non uno, quod est manifestum; nec in uno, quia cum subiectum natura prius sit accidente, erit subiectum unitatis unum, antequam sit unum.

VIII. Quod Tempus non sit accidens, satis liquet ex iis quæ de Tempore diximus lib. I. nam si Tempus intelligatur metaphysicè, omni Enti competit, ideoque accidens esse nequit; si vulgari modo sumas tempus, pro mensura motus, non differt à motu, nec magis potest esse accidens quàm motus, de quo statim.

IX. Relationes etiam inter non Entia retulimus lib. I. Nequeunt ergo Entia esse accidentalia. Actiones reipsa non differunt à suo termino, nihilque sunt quàm modi, quibus res in fieri differunt à rebus perfectis, ideoque de actionibus non aliter philosophandum hoc loco, quàm quomodo de terminis eorum philosophandum est: nam quales sunt termini actionum, tales quoque

quoque actiones esse necesse est; ideoque si actiones terminentur substantia, sunt substantiæ; si quantitate, quantitates: si qualitate, qualitates; si Ubi, ubieterates seu localitates; sed substantiæ, quantitates, qualitates & localitates in fieri. Passio non nisi ratione distinguitur ab actione, ideoque non aliter de Passione, quam de actione statuendum est. Idem dicendum de motu, qui & ipse reipsa idem est actioni & passioni.

X. De cæteris Categoriis, res clara est: nam quod in categoria Ubi & Quando ponitur, nihil est aliud quam denominatio extrinseca, aut respectus ad locum & tempus, aut si quid amplius vis esse, nihilo plus esse potest quam modus; sed ea de re satis est dictum in lib. 1. Situs est modus quidam corporis, qui oritur ex dispositione partium atque ordinatione ad se invicem. Habitus haud dubiè est externa denominatio.

XI. Sed si decem istæ Classes Entia non continent, dicat aliquis, cur ergò dicuntur summa genera? Resp. dicuntur summa genera τῶν κατηγορηµένων, non τῶν ὄντων: & ob eam causam etiam istæ classes Categoriæ vocantur, quia continent ea, non quæ Entitate, sed quæ γένεσι & κατηγορίας differunt: si enim Entitate differrent quæ sunt in diversis Categoriis, oporteret, actionem & passionem esse diversa Entia, quod falsum est vel Aristotelis iudicio, qui id falsum

sum esse pluribus probat l. 3. Phys. c. 3. totam autem disputationem sic claudit, ἔδ' ἡ διδασκίς τῇ μαθήσει, ἔδ' ἡ ποίησις τῇ παθήσει τὸ αὐτὸ κυρίως, id est, *neque docendi & discendi actus, neque effectio & passio propriè idem sunt; quomodo ergò differunt? τὸ γὰρ τῷδε ἐν ταῦδε, καὶ τὸ τῷδε ὑπὸ τῷδε ἐν ἐνεργίᾳ εἶναι, ἕτερον τὰ λόγῳ*, id est, quia esse actum hujus in hoc, & hujus ab hoc ratione differunt: atq̃ui per *actum hujus in hoc* intelligitur passio, & per *actum hujus ab hoc* actio. Ergo actio & passio ratione differunt.

XII. Non sunt ergò alia accidentia propriè dicta quàm qualitates: sed an omnes qualitates pro accidentibus habendæ, id est, pro Entibus reipsa distinctis à substantia cui insunt? nullo modo: quod ad habitus attinet, non dubito quin veræ qualitates sint, siquidem substantiis conciliantur sine ullo motu locali aut accessione substantiæ. Qualitates etiam patibiles maxima ex parte pro qualitatibus habeo; nam de primis qualitatibus non dubito; alias enim nulla daretur in physicis alteratio, & Elementa res essent prorsus immutabiles: quod ad secundas attinet, quædam oriuntur ex primarum temperatione, ut odores, sapores, colores &c. aliæ ex situ aut figura partium, ut asperum, læve, rarum, densum, grave, leve, &c. aliæ ab utrisque ut sonus. Qualitates primi & tertii generis vera esse accidentia existimo: at quæ secundum

cundi generis sunt modi sunt solum immediate efficientes ipsam rerum *etiam* seu substantiam.

XIII. Similiter statuendum est de potentiis naturalibus: harum enim etiam quædam oriuntur ex primis qualitatibus, ut sunt vires corporum, vitæ carentium: alie non habent commercium cum primis qualitatibus, ut potentie animæ, præsertim sensitivæ & rationalis, ejusque vel in corpore degentis vel à corpore separatæ; item potentie Angelorum. Potentias primi generis qualitates puro esse & vera accidentia, nam & vera sunt Entia & quia sine substantiæ diminutione possunt aboleri, reipsa quoque distinguuntur à subjecti sui substantia: quas secundi generis dixi, eas non puto à substantia ejus rei, cujus dicuntur potentie, distingui: in potentiis Angelorum & animæ humanæ res caret difficultate, sed in potentiis cæterarum animarum non item: potest enim objici, animas vegetativas & sensitivas esse formas corporeas, hoc est, corpori immerfas, corpus autem constare ex elementis, ac proinde etiam potentias earum ex primarum qualitatibus oriri temperie, ideoque esse veras qualitates, æquæ atque potentie rerum vitæ carentium? Respondeo animas vegetativas & sensitivas unitas quidem esse corpori ex Elementis confecto, sed mediante spiritui vitali & animali, ideoque

Q

facul-

facultates earum animarum non esse temperationes primarum qualitatū, sed ipsam substantiam animarum, quatenus spirituum ope Elementari corpori alligantur. Quod attinet ad temperiem & conditionem organorum, quæ ad animæ functiones necessariae sunt, eæ haud dubiè ex primis qualitatibus oriuntur, ideoque veræ qualitates sunt.

XIV. Formam & figuram nemo inter Accidentia realia ponet, qui attente eas considerat; quid enim figura est quàm modus ortus ex terminatione quantitatis, imò quàm ipsa quantitatis determinatio? Forma quidem figuram includit, atque insuper moderationem coloris; sed ideo non reale accidens est: nam si quid in formâ est, quod in figurâ non est, aut color est, aut modus coloris; si color consideretur in forma, hætenus ea qualitas est, sed non alia quàm color, quanquam color non est forma, ut color est, sed ut tali modo se habet; ideoque nil aliud videtur esse forma, quàm modus compositus ex terminatione quantitatis & determinatione aut mistura coloris.

XV. Superest ut investigemus Essentiam Accidentium, quod tertium erit membrum hujus capituli. Omnes quidem concedunt accidens esse Ens substantiæ inhaerens; sed Pontificii putant, accidens ideo accidens esse, non quod reverà inhaereat substantiæ.

substantiæ, sed quod possit inhærere; hinc concludunt, fieri posse, si non naturaliter, saltem à Deo per potentiam absolutam, ut accidens existat sine substantia: Nos contra contendimus, Essentiam accidentis esse, non solum posse inhærere, sed actu inhærere substantiæ, ideoque absolutè simpliciterque impossibile esse, ut accidens aliquod per se sine substantia existat.

XVI. Hæc sententia sic probatur. Ens est genus æquivocum, vel, ut vulgò loquuntur, analogum ad substantiam & accidens, quod multi quoque ex Pontificiis agnoscunt; quare necesse est accidens à substantia dependere, non tantum in ratione eâ quâ accidens est, sed etiam in ea, qua Ens est, ac proinde sublata substantia, definit accidens esse Ens. deinde, accidens definitur per substantiam, ergò nequit existere sine substantia.

XVII. Concedunt Pontificii, his & similibus rationibus probari, non posse accidens naturaliter existere sine subjecto; contendunt tamen existere posse separatim, & reverà existere in Eucharistia, virtute Dei omnipotentis, ab eoque vicem sublata substantiæ, & causalitatem ad conservandum accidens extraordinario concursu suppleri: sed id effugium nimis angustum est: nam quæ contradictionem implicant non possunt fieri à Deo: atqui accidens existere separatim implicat contradictionem.

Nam cum accidentis esse sit inesse, non erit accidens, quod non inerit substantiæ: accidens ergò separatum existens, erit accidens non accidens; inò non solum erit non accidens, sed substantia: nam quod non est in subiecto, per se subsistit, & quod per se subsistit, est substantia. Si dicant, accidentia idèò substantias non esse, quia, tamen in subiecto non sunt, possunt esse in subiecto, non solvunt argumentum: nam omnes substantiam definiunt Ens per se subsistens, nec quærunt, an, quod per se subsistit, possit esse in subiecto, nec ne, sed præsupponunt, non posse esse in subiecto quod per se subsistit, & rectè id: nam per se subsistere, & esse in subiecto, immediate opponuntur, alterumque alterius negationem includit; nam per se subsistere, significat non esse in subiecto, & esse in subiecto, non subsistere per se: præterea, si accidens non idèò est accidens, quia est in subiecto, sed quia potest esse in subiecto substantia quoque non erit substantia quia per se subsistit, sed quia potest per se subsistere; atqui secundum eos omne accidens potest per se subsistere, saltem divina virtute, & tamen ita ut maneat accidens; ergò omne accidens potest esse substantia divina virtute, & tamen esse accidens, quo nihil absurdus.

XVIII. Quod dicunt de extraordinario consursu Dei suppletis causalitatem deficientis

ficientis substantiæ, ad conservandum accidens separatum, absurdum est: nam quæro, an Deus ad conservandum accidens separatum, adhibeat causalitatem materiæ, quam causalitatem exercet omnis substantia creata ad conservanda accidentia quæ sibi insunt naturaliter, an causalitatem efficientis. Primum dici nequit, quia causalitas materiæ aut subiecti involvit imperfectionem indignam Deo, sequeretur enim Deum subiectum esse accidentium, si ipse accidentia separata conservet causalitate materiali: nequit etiam dici alterum, quia cum causalitates sint inter se oppositæ, una alterius loco esse nequit.

XIX. Ex dictis sequitur, idem numero accidens non posse migrare de subiecto in subiectum: quod enim ita pendet à subiecto, ut ejus esse sit subiecto inesse, id moveri non potest nisi in & cum subiecto, atque adeò movetur subiecti; nequit ergò accidens subiectum suum deserere, & in aliud subiectum migrare; videntur subinde migrare, ut odores, &c. sed revera subiectum non deserunt, sed cum eo moventur, & alio deferuntur; sed quia subiectum adeò tenue est, ut tactum visumque fallat, solum accidens videtur transferri in alium locum, aut in aliud subiectum.

XX. Accidens nequit esse subiectum accidentis: cum enim omne accidens in

Q 3 subiecto

subjecto sit, si accidens foret subjectum accidentis, subjectum esset in subjecto, quod absurdum est: additur sæpè accidens accidenti, sic calor humiditati cum aqua incælescit, prius tamen accidens non est subjectum alterius, sed substantia est subjectum utriusque. Sic cum aqua calefit calor non est in humiditate ut in subjecto, sed in aqua humida: quod ita verum est, ut putem accidentia ne in formis quidem substantialibus esse posse ut in subjectis, sed omnia esse in materia formata.

XXI. Ut accidentia se habent quoad rationem existendi, ita se habent quoque ad rationem operandi: Nihil ergò agunt per se, sed omnia ut instrumenta, ac in virtute substantiarum in quibus sunt; imò verò, si propriè loquar, accidentia non agunt, sed substantiæ accidentibus vestitæ; accidentia enim substantias modificant & determinant ad operandum, iisque inserviunt inter operandum; idque non solum verum est cum substantiæ, sed etiam cum accidentia producuntur: Nam sicut accidens quod fit, dependet ab aliqua substantia quoad ipsum fieri, ita necesse est, Accidens quod agit, ab aliqua substantia dependere quoad ipsam actionem: par enim ratio est, & in eo quod fit, & in eo quod facit: inde colligo, nullum acci-
dens

dens agere quicquam in virtute substantiæ cui non inest, multo minus, quæ non est in rerum natura.

Libri Secundi

Et

Institutionum Metaphysicarum.

F I N I S.

INDEX

INDEX CAPITVM

Libri Primi.

CAP. I.	D e naturâ Metaphysicâ. p. 1.	
II.	De communi Entis ratione.	10.
III.	De eo quod est medium inter Ens & Nihil in genere.	19.
IV.	De Privatione & Denominatione externâ,	25.
V.	De Ente Rationis.	30.
VI.	De Relatione.	34.
VII.	De modis Entium.	44.
VIII.	De principiis incomplexis sive de Essentia & Existentia.	49.
IX.	De principiis Metaphysicâ complexis.	56.
X.	De Entis Affectionibus in genere.	58.
XI.	De Unitate & Multitudine in genere.	61.
XII.	De Unitate Numerica & Formali deque principio individuationis.	65.
XIII.	De Unitate Universali.	75.
XIV.	De speciebus & gradibus Unitatis.	81.
XV.	De Diversitate sive Distinctione & Convenientia.	87.
XVI.	De Oppositione.	95.
	XVII. De	

I N D E X.

XVII.	De Ordine.	100.
XVIII.	De Veritate & Falsitate.	104.
XIX.	De Adjunctis Veritatis.	114.
XX.	De Bono & Malo.	117.
XXI.	De Localitate, Temporalitate & Duratione.	128.
XXII.	De Toto & Parte.	138.
XXIII.	De Causa & Causato in genere.	145.
XXIV.	De Causa Materiali.	151.
XXV.	De Causa Formali.	157.
XXVI.	De Causa Efficiente.	166.
XXVII.	De Fine.	180.
XXVIII.	De Subjecto & Adjuncto.	191.
XXIX.	De eo quod est Necessarium, Impossibile, Contingens & Possibile.	202.
XXX.	De Potentia & Actu.	211.
XXXI.	De Perfecto & Imperfecto sive Perfectibili & Perfectione.	219.

LIBRI SECVNDI.

CAP. I.	D E divisione Entis; in Substantiam & Accidens, & de Substantia in genere.	225.
II.	De primis & secundis Substantiis deque Subsistentiâ.	230.
III.	De distributione Entis in Deum & Creaturam & aliis æquivalentibus.	241.
IV.	Deum esse.	245.
	De	

I N D E X.

V.	De Essentia divina & illius Attributis in genere.	254.
VI.	De Dei Necessitate, Vnitate & Æternitate.	258.
VII.	De Immensitate, Simplicitate & Immutabilitate Dei.	264.
VIII.	De vita & Intellectu Dei.	274.
IX.	De Voluntate & Potentia Dei.	287.
X.	De Creatione & Conservatione.	294.
XI.	De concursu seu cooperatione Dei cum creaturis.	305.
XII.	De Substantia creata.	314.
XIII.	De Existentia & natura Angelorum.	321.
XIV.	De attributis Angelorum.	325.
XV.	De Angelorum actionibus.	331.
XVI.	De Anima humana separata.	342.
XVII.	De Accidente.	353.



F I N I S.





